



BIBLIOTHECA  
P. M. M. M. M.  
FRANCOFONIA

586939-  
- 586940

kat.komp.

Mag. St. Dr.

1



3711

Biblioteka Jagiellońska




stdr0001543




586939 - 586940

Mag. St. Dr.











OLYMPUS

SANCTITATIS

STADIUM RELIGIOSÆ

imò & Christianæ virtutis decurrentibus

PROPOSITUS.

S E U

MANUDUCTIO HOMINIS,

POTISSIMUM RELIGIOSI,

per allocutiones asceticas,

ad

Sublimiorem & excellentiorem,

nec vulgarem Sanctimoniam.

*Authore P. Stephano Poninski Soc: Jesu.*

*Anno Domini 1719.*

*Typis Clari Coll: Poln: Soc: Jesu.*





Ex  
Mundo  
Symbol:  
Picinelli.

**O**lympus inter Græciæ montes facile prin-  
ceps, sese supra mediam aeris regionem ita  
attollit, ut nubibus superior terrenos ho-  
minum oculos penitus effugiat à compluribus a-  
liis minoribus montibus veluti quadam coronâ  
cinctus. Hinc de illo apud Pœtam: *Nubes exce-*  
*dit Olympus*

In speculo  
Imagin:  
Verit.

Jam à Jacobo Massenio illi sublimitatem & ex-  
cellentiam Beatissimæ Virginis Matris in se expri-  
menti adscriptum: *Nubibus altior extat.*

Altus Olympi  
Vertex qui spatio ventos hyemesq; relinquit  
Perpetuo, nullum temeratus nube serenum,  
Celsior exurgit pluviis, auditq; ruentes  
Sub pedibus nimbos, & rauca tonitrua calcat.

Claudianus.

586939 - 586940

I

I

Bibl J.

1973.K.94 Jt Dr.

Bibl J.



Validissimo Coeli & Ecclesiæ Atlanti,

**OLYMPUM,**

Et quid quid in terra Summum est

Excedenti,

Humanam magnitudinem

Famâ & immortalis Nomine

Superanti

Coelum virtutibus & meritis exæquanti

Præmio & gloriâ ipsum implenti Empyreum

**MAGNO DEI SERVO**

Et maximis DEI Servis Pari

**SANCTO IGNATIO**

de **LOJOLA,**

Fundatori **SOCIETATIS JESU.**

*Simulq;*

Excellentissimæ Sanctitatis,

Christianæ perfectionis,

Solidarumq; Virtutum

Tum majoris semper Divinæ gloriæ

**ASSERTORI GLORIOSISSIMO**

Aliis plurimis titulis toto orbe cœloq;

**SPECTATISSIMO**

Patri



PATRI demum & PATRONO ÆSTIMATISSIMO

Minus tanto nomine opusculum

Et minus filiali debito,

*Hoc est*

Ex magnitudine & dignitate materiæ

**OLYMPUM SANCTITATIS**

Ex tenuitate auctoris & ipsius laboris.

Atomum

Pro obligato in æternum affectu

Dedicat pedibusq; unà secum adsternit ;

Ut vel sic saltem in parem Olympo molem

Grandescat :

Sat eo ipso Lucis habiturum ,

Si sub umbra IGNATIANI Nominis & protectionis

Latebit.

Satis Fortunæ :

Si vel retrudente pede tangi dignabitur

Merebiturq; aspici ipso in despectu

In ipsa sui improbatione ac rejectione agnosci

Non modico per id ipsum sibi imprimendo honore &  
pretio.

Dum etiam calcabitur..

Indignissimus Filius

æternumq; Obligarissimus

*Client*

Stephanus Poninski, Soc. JESU.




IMPRIMATUR.

FRANCISCUS  
KAZNOWSKI,

Archi-Diaconus Pſeevenſis  
Judex Surrogatus Poſna-  
nienſis.

*m. p.*



FACULTAS  
R. P. VISITATORIS  
Per Poloniam.

Cum Opus quod inſcribitur: OLYM-  
PUS SANCTITATIS, à Patre Ste-  
phano Poninski, Societatis Noſtræ Sacer-  
dote Conſcriptum aliquot ejusdem Socie-  
tatis Theologi recognoverint & in lucem  
edi



edi posse probaverint ; potestate mihi  
facta ab A. R. P. Nostro Michæle Angelo  
Tamburino Societatis Nostræ Præposito  
Generali , facultatem concedo ut typis  
mandetur, si iis ad quos pertinet ita vide-  
bitur. In cujus fidem has literas manu  
mea firmatas & Sigillo munitas dedi. Po-  
sania, 8va. Martii, 1719.

REINHOLDUS GERT,

Visitator & Vice-Præpositus  
Provincialis Soc: JESU, per  
Poloniam.



# ALLOCUTIO PRÆLIMINARIS UNICA,

Ad non vulgarem Sanctimoniam nulla re magis, quàm magnò & non abjectò animò opus esse.

## PARS PRIMA.

*Motiva & invitamenta ad sublimiorem & excellentiorem Sanctimoniam proponens.*

### MOTIVUM I.

Vocationem Religiosam, non vulgarem Sanctimoniam à nobis exigere.

### MOTIVUM II.

Vocatio ad Societatem JESU, quidquid in Sanctitatis Studio vulgare est, à nobis proscribit.

### MOTIVUM III.

Obsequium & cura salutis animarum, Societati ex fine vocationis ac Instituti præfixo, aliis quibuscunq; ex quocunq; titulo, motivo, præscripto, incumbens, nihil vulgare in ratione Sanctimoniæ requirit.

### MOTIVUM IV.

Spectator mundus censorq; cujuscunq; ac religiosi potissimū nominis acerrimus, non vulgaris à



nobis Sanctimonix exactor est.

#### MOTIVUM V.

Ratio vitæ activæ in Religionibus plerisq; ac etiam in Societate, non vulgariter sanctos nos esse exigit.

#### MOTIVUM VI.

Exempla Patrum unius cujusq; Religionis Domestica, ad non vulgarem nos provocant Sanctimoniam.

#### MOTIVUM VII.

Exemplis externis sæcularium DEO & virtuti solidè famulantium, non vulgaris suadetur sanctimonia.

#### MOTIVUM VIII.

Exemplis sæcularium mundo & vanitati militantium, non vulgaris sanctimonix cura suadetur.

#### MOTIVUM IX.

Non vulgarem in nobis sanctimoniam singulariter à DEO probari atq; exigi.

#### MOTIVUM X.

Non parum DEO displicere in Religioso sublimioris sanctimonix neglectum.

#### MOTIVUM XI.

Cælestis gloria ac beatitudo non leve ad sublimem sanctimoniam invitamentum.

PARS



## PARS SECUNDA.

*Essentialia & peculiaria sanctimoniae non vul-  
garis proponens.*

I.

Sublimitas sanctimoniae in præcellis cogitationibus Filiorum DEI.

II.

Vana sanctitatis sublimitas in solis præcellis cogitationibus ac desideriis.

III.

Sublimitas Sanctimoniae ab eximiis operibus.

IV.

Excellentia sanctimoniae in ordinariis & communibus, non ordinariè nec communiter obeûdis.

V.

Excellentia & sublimitas sanctimoniae ab exacta observatione & cura minimorum.

VI.

Rarioris sanctimoniae est, eniti ut viuat sine defectu ac nævo, & quidem cum quadam impotentia peccandi.

VII.

Excellentia sanctimoniae in heroicis actionibus & victoriis sui ipsius.

VIII.

Sublimitas sanctimoniae à sublimitate Intentionis

Az



onis in quibusvis actionibus.

IX.

Non vulgarem sanctimoniam in perfecto passionum Dominio consistere.

X.

Excellentia Sanctimoniae ab omnigeno virtutum ornatu.

XI.

Sublimitas Sanctimoniae à possessione gradus supremi in quacunq; virtute.

XII.

Non vulgaris, id est, docta non rudis Sanctimonia: seu, Excellentia Sanctimoniae à conjunctione cum doctrina.

XIII.

Excellentia Sanctimoniae ab umbra seu occulto operandi modo.

XIV.

Sublimis & excellens Sanctimonia quae multum laboriosa.

XV.

Sublimitas Sanctimoniae, totius mundi omniumq; terrenorum: atq; linguarum etiam ac respectuum quorumvis contemptrix,

PARS



## PARS TERTIA.

*Peculiares virtutes Religiosas ad altiore nec vulgarem gradum provec̃tas exhibens.*

I.

Non vulgaris animarum Zelus, virtutum sublimiori Sanctimonix militantium prodromus & antesignanus.

II.

Paupertas, Castitas, Obedientia, non vulgaris, sublimioris Sanctimonix non impares Triarii.

III.

Patientia Religiosa non vulgaris, Sublimioris Sanctimonix individuus comes & assecla.

IV.

Humilitatis Religiosa, profundissimi utique, non vulgaris Sanctimonix fundamenti sublimitas,

V.

Resignatio sui ac indifferentia, sublimioris sanctimonix manuductrix abiq; errore, dexterima ac felicissima, eaq; non vulgaris.

VI.

Mortificatio interna & externa sublimioris sanctimonix vigilantissimi custodes ac propugnatores, iiq; non vulgares nec ignobiles.

VII.

Oratio Sublimioris Sanctimonix nutrix ac

A4

conser-



conservatrix, non vulgari cultu & pretio exhibita.

VIII.

Amor DEI omnium virtutum ac sublimioris Sanctimonie Rex & Corona,






# PROFASIS

Ad homines potissimum religiosos,  
tum quoscunq; virtutis non vul-  
garis studiosos.

*Obsecro vos ut dignè ambuletis vocatione  
qua vocati estis.*

*ad Ephes. 4.*

Uâ olim adhortatione Divus gen-  
tium Apostolus, ad suos Ephesios  
affatus est, eâdem ego quoque Vos  
in primis Religiosæ quæcunq; ani-  
mæ, ac memetipsum in præsens alloquor ac de-  
inceps allocuturus sum: Ut inquam dignè am-  
bulemus vocatione, qua vocati sumus. Non  
hic quidem Divinissimus Paulus vocationis Re-  
ligiosæ homines, non votis specialibus, ad DEI  
obsequium initiatos, non strictioris observan-  
tiæ religiosos affatus est: Sed primævos non  
nisi Christianos, eosquè nullo voto Religioso  
ad speciale Numinis servitium obstrictos, secu-  
lares. En, videte tamen, cuiusnam illos vir-  
tutis ac Sanctimonix commonuerit? Obsecro

B

vos,



vos, inquit, ut dignè ambuletis vocatione quā  
vocati estis. Ac si dixisset: minimè vos, o  
mei Ephesii, minimè o novellæ plantæ Christi,  
cuperem esse cujuscunque probitatis & sancti-  
monia commendatione conspicuos. Illud sata-  
gite, eò erigite animos, curas ac vires intendi-  
te, ut eximia non vulgaria, digna vocatione ve-  
strâ, vitâ & moribus exhibeatis exempla. Ni-  
hili hîc æstimate illa Ethnicorum vestrorum  
Philosophorum tota antiquitate celebratissima  
virtutum vel quasi virtutum specimina in qui-  
bus plus fuerat de fumo quàm de luce, plus  
de vanitate ac inani larva, quàm de genuina  
substantia virtutis. Altiùs vobis omnino, quos  
divinius vocationis ad veram fidem lumen cir-  
cumfulsit, enitendum est, altiùs collimandum.  
Quod si verò idem DEI Apostolus, non suos  
Ephesios, eosque recens à gentilium ritu ad  
Christum conversos, sed adultos iam Christia-  
nos nosq; Religiosos alloqueretur: quàm, o-  
ro, à nobis vitæ ac morum sanctitatem exige-  
ret? certè non qualemcunq; illam, non popu-  
larem aliquam, sed longè eximiam, longè subli-  
mem, caloque ipsi conterminam ac planè di-  
gnam vocatione etiam nostrâ religiosa. Et sa-  
nè si tanti vocationem ad fidem æstimavit ille,

ut




ut non dubitaverit, vulgari aliqua probitate & legis divinæ observantiâ minimè fore contentam; quanti vocatio ad religionem, statum utiq; ad perfectionem tendentem æstimanda esset? quantum in studio excellentissimæ virtutis longè præferenda? Illud igitur ab hinc mihi agendum erit: ut Vobis ac mihi met ipsi, non vulgarem, non plebeiam, (ut aiunt) sed per omnia excellentem ac sublimem sanctimoniam persvadeam, ac velut in Olympum quendam sanctitatis vos deducam. Agite sic & pergite unà mecum, idq; è voto cujuscunq; Religionis, è voto ipsius, ex cujus mente Divinissimus peroravit Apostolus, Christi, Ecclesiæ, è voto totius Curix Cælestis, è voto tandem Sanctissimæ Triadis, cujus Supremo honori & gloriæ hic noster, quem ordimur conatus sacer esto.



# ADHORTATIO PRÆLIMINARIS UNICA.

Ad non vulgarem sanctitatem,  
nulla re magis, quàm magnô & non  
abjectô animô opus esse.

*Rerum ma-  
gnarum ini-  
tia terrent.*



Agregdimur non exigui momen-  
ti negotiū, quia circa non vulga-  
rem, non plebeiam, sed subli-  
mem cæloque conterminam, di-  
gnam vocatione nostrâ sanctita-  
tem. Verùm quibûs id fastigii capessendum  
impendiis? præsertim cùm ipsa inexpertos non  
rarò terreat rei magnitudo ac sublimitas: ita  
ut etiam pæne in desperationem pusillanimes  
adigat: innata rerum magnarum ac sublimium  
vicissitudine: quæ dum nos in admirationem  
rapiunt, simul spem sui comprehendendi eripi-  
unt. Et id quidem ipsum nobis etiam in subli-  
mioris sanctimonix apicem eluctantibus for-  
sitan contingeret, nisi trepidæ pusillanimitati  
occurreretur in limine. Illud ego ad hanc re-  
tundendam nosq; in proposito egregio firman-  
dos



dos in præsens affero ac liberrimè enuntio.  
Non multis videlicet circa sublimem Sanctimo-  
niam nobis laborandum: Uno hîc præcipuè  
eoq; magnò & non abjectò animò opus esse.

Et certè nihil egregium, nihil sublime un-  
quam gessit, quisquis sua mediocritate con-  
tentus, humili & abjecto genio semper fuit.  
Ad magna & sublimia agenda, non tam magnis  
impensis, non tam robustis viribus, quàm ani-  
mo opus est: qui si defuerit nulla amplius me-  
dia supersunt. Animus est qui magna efficit,  
aggreditur sublimia, exequitur admiranda, diffi-  
cillima & maximè ardua superat ac triumphat,  
ita ut si omnia deficiant animus tamen omnia  
vincat. Quotquot heroas antiquitas recen-  
suir, magis animo quàm viribus triumpharunt.  
Impar erat Hercules robore, singulis etiam  
monstris cum quibus pugnaverit edomandis,  
sed quia major animos, ideò triumphalis eorum  
domitor evasit. Impar cum suo exercitu Ale-  
xander Dario: sed quia sub signis non tam  
committentes, quàm grandes spiritus & animos  
computabat, ideò illum aggredi ausus est, &  
fundere, orbem in illo vincens, cum majorem  
orbe animum circumferret. Non numero il-  
los Leonidas, Coclites, Scævolas, & innumeros

*Animus re-  
rum omnium  
victor.*

Bj

alios

alios, contra densa hostium agmina solo animo decertantes. Non memoro heroem Polonum Wisnioyseium, cujus olim magnanimum cor ex dissecto martiali pectore extractum, inter se barbari Turcæ partiti, inter sua absumpserunt obsonia, rati, ex absumpto eodem corde heroicos se hausturos spiritus, & ausus, qui sibi ad omnem satis victoriam essent.

Missis profanis, sacram evolvo historiam, unde facile constabit, quantos ibi in Abraham quinque Regum Chananæorum victores; quantos in Josue, in Gedeone, Jonata, quantos in Machabæis, & pluribus aliis, triumphos egit animus. Ut non omittam Davidem qui adhuc puer corpore, quia tamen Gygas animo, turrim illam carneam ita aggressus est, ut unico ictu & eam ipsam & hostilem simul prostraverit superbiam, iacentem Israelitici nominis gloriam triumphaliter erexerit, & capite Goliæ, simul & probrò exercitus sublatò. Ideoque non frustra illi de quibus 1 Machab: 10. *Non alium belli ducem quam animum habere voluerunt.*

*Animum re-  
rum magna-  
rum & su-  
blimum a-  
for:*

Hinc etiam advertite, quibusnam Salomonem auxiliis, ad tot & tanta pro sua gloria, Regniq; prosperitate patranda Deus instruxit.



struxerit? *Dedit* (inquit Scriptura) *Deus Sa-*  
*lomoni latitudinem cordis quasi arenam quæ est* 3<sup>a</sup> Reg: 4<sup>a</sup>  
*in littore maris.* Sed cur potius non ad instar  
 magnanimi vg: leonis aut Aquilæ, cor illi con-  
 rulerit? Regum utiq; hæc sunt Symbola. Ni-  
 si fortè quod leoni, etsi cor utcunq; magna-  
 nimum, ita ut iuxta Salomonem ad nullius pa-  
 veat occursum ut pote fortissimus bestiarum,  
 plerisq; tamen nimis pusillanime & pavidum,  
 ita ut etiam igne & fumo terreatur. *Timet*  
 (inquit Leo Papa) *circumactos rotarum orbes,*  
*plaustri vacui strepitum, gallorum cantum, i-*  
*gnem.* Aquila pariter, licet, aliis volucribus  
 animosior pueruli tamen unius aspectu fugatur.  
 Corigitur magna aggressurum patraturumq; sit  
 velut arena, quæ est in littore maris, cuius ea  
 scilicet vis est, ut non tantum decumanis flucti-  
 bus ac procellis resistat, non tantum amplissi-  
 mis onerariis par sit sustinendis sistendisq; an-  
 chorarum perferendis moribus, sed ipsum et-  
 tiam indomitum maris furorem coërceat ac si-  
 stat, acclamante Scriptura: *Vsq; huc venies &*  
*non procedes amplius, & hic confringes timent-*  
*es fluctus tuos.* Nec verò potentia, robur, vi-  
 res Gyganteæ, aut Achillea arma, Salomoni co-  
 feruntur. Nempe cor unum illudq; sua latitu-  
 dine

dine magnanimum ad omnia, satis esse.

Ezech: 1.

Quanquam quisnam ab imbelli & humilibus nonnisi mancipato obsequiis bove sive vitulo quidquam speraret egregiū? ac etiam evolare ausurum in sublimia simul cum Aquilis, cogitaret? Et defacto tamen vitulus Propheticus, unus ille ex quatuor animalibus, eo se sua virtute extulit, ut sese leoni & homini æquans nihil minus iisdem pro gloria DEI gesserit: imò etiam cum ipsa Aquila vulgarem super terram tramitem exosus, sub cælum usq; ut eò secum gloriam DEI efferret, conspicuus evolarit. Nempe Cherubicus illi inerat animus, qui illum ad nihil humile, sed imò ad pares quoq; leonibus ausus stimulet: Siquidem & bovi nihil amplius inaccessum est; si illi subime cor non desit, ita ut ipsum etiam post hac aratri pudeat ac plebei laboris. Nec alius hac in parte Agnus Apocalipticus, isq; tanquam occisus, & ecce, quia plusquam leonino vivebat animo, solemmniter illi acclamatum: *Vicit Leo de tribu Juda.*

Abſq; animo  
nihil ma-  
gnum omnia  
extrema &  
abjecta.  
Exod: 32.

Diversa longè hac in parte vituli Israe-  
litici sorte. Aureus ille fuerat: sed quia absq;  
animo, nihil simile gessit, solisq; choreis circa se  
actis ingloriè celebris, in pulverem abiit, cum  
aquis



aquis defluxit. Nee plus illi etiam ad thronum Salomonis subsistentes gessere leones: quia & illis sola species leonina aderat, non animus. Ita scilicet hoc uno deficiente, omnia aliter succedere.

3. Reg: 10.

Scimus quonam non ignota illa Regis Babilonii devenerit statua: Pedes illi erant magna parte ferrei, venter & femora ex ære, caput aureum, pectus tandem argenteum, sed animo vacuum. Nihil illi ad potentiam & gloriam defuisse visum: sed quia defuit animus, ideo cum nullo facinore inclaruisset, imò præclari quidquam ne cogitasset quidem etsi aureo fulsisset capite, ab uno inermi lapide prostrata iacuit.

Dan: 2.

Neq; minus deflenda Ephraimi, qua in extremam deciderat calamitatem, conditio, ut abunde prophetica refert narratio, genuinam totius mali allegando rationem: *Ephraim* (inquit) *columba seducta non habens cor*. Parum scilicet illi erat, leonino caruisse vigore & spiritu, parum, virum & hominem exuisse, parum columbinos induisse metus, imò sic metu pavidio in columbam degenerasse, etiam cor ipsam amisit.

Osea: 4.

Quid verò Davidem tot hostium cata

C

fra-

fractorem celeberrimum domitorem eò rede-  
git, ut miserè nimis, quia ad unius Bersabeæ  
aspectum, nudo ac tunc inermi amorì, succu-  
buerit? nimirum non aliud, quam quod ipse  
de se lamentabili comploratione fatetur: *Ad-  
hesit pavimento anima mea. Cor meum dereli-  
quit me.* Id est, quòd abjectiore animo, il-  
le olim magnanimus heros, ad pavementum se-  
se hoc est terrenos sensualesque carnis appeti-  
tus demisisset. Cor illud sublime sibimet pas-  
sus eripi. Triumphaturus absq; dubio, si tan-  
tum hìc animi contra Veneris pusionem, quan-  
tum contra Goliath Philistæum Gygantem, a-  
ut urfos leonesq; quos toties straverat, habuif-  
set. Uti alibi idem de se ipso: *Viam inquit  
mandatorum tuorum cucurri, cum dilatasti cor  
meum.* Ita certè, ut nulli tentationum insul-  
tus adversus eum prævaluerint.

*Puillanimi-  
tas ardua ef-  
fic.*

Et sane habent hoc magna & ardua,  
imò etiam mediocria non modicum, ut eo ipso  
evadant difficilia dum talia abjecto animo fin-  
guntur, & ultra se tumeant dum timentur: ita  
ut etiam formica aut lepusculus in leonem  
grandescat, si se timeri sentiat. Uti planè illi  
contigit, qui in Proverbis imbellissimè queru-  
latur. *Leo est foris in medio platearũ occidẽdus  
sum.*



*Sum.* Cum è contra leones in formicas aut lepores degenerent, si in erectos spiritus incidunt. Sicut defacto Samsoni, leo sævus aliquin & rugiens degeneravit in hædum, ubi in illum magno animo Samson irruit. *Dilaceravit* (inquit Scriptura) *Leonem tanquam hædum.* Sic quoq; & Davidi ursi leonesq; in agnos versi: ita ut illi cum iisdem non pugna sed ludus esset. *Cum Leonibus* (refert Ecclesiasticus) *ludit quasi cum agnis, & in ursis similiter fecit.* Nec aliter omnino meticulosis sibiq; usq; ad locustas metu ignavo decrefcentibus exploratoribus terræ Chanaan, illius regionis accolæ in monstrosos de stirpe Enac crevère (Gygantes, quibus (inquiunt) *comparati quasi locustæ videbamur*, cum tamen animosioribus inter quos Calebus fuerat, nihil simile nihilq; supra vulgarem staturam & conditionem habuisse videretur. Quid verò celebris illa turris Babel, illud orbis prodigium, illud prorsus humanæ industriæ ac viribus vix possibile facinus? quia tamen magnis animis inceptum, ideò suis ædicatoribus ad instar ludicri operis fuit. Solus videlicet mihi credite imbellis animus, ubi ardua non invenit, facit: atq; etiam unius pili magnitudinem ex umbra illius meti-

*Judic: 14.*

*Magnitudo  
animi maxi-  
ma ac diffi-  
cillima ex-  
tenuat atq;  
facilitas.*

*Numer: 13.*

tur ac æstimat: ut hîc defacto fidem mereatur,  
quòd Stoicus de plerisq; *Non quia* (inquit) *diffi-*  
*ficilia sunt, non audemus; sed quia non audemus*  
*difficilia sunt.*

*Id ipsum  
circa Sancti-  
monia affe-  
ctionem lo-  
cum habet.*

Quòd cùm ita sit, hoc ipsum igitur  
nobis etiam, non humilem religiosa mente agi-  
tantibus Sanctimoniam agendum est, ut non  
viles abhinc assumamus spiritus humi repentes  
hactenus sursum erigamus animos, pares nos &  
capaces non vulgaris Sanctimonix sentiamus  
aliquando? Quodsi nobis cor nostrum pusil-  
lanimitate emarcuit, induamus patrum & he-  
roum nostrorum sublimes ausus, simusq; etiam  
ipsi inter exempla & heroas. Neq; nos ulla dif-  
ficultatum monstra ab incepto deterreant: hæc  
enim vel tunc maximè superantur dum non ti-  
mentur: audeamus modo: & illico omnia infra  
nos erunt, ipsiq; nostris ausibus Numina non  
deerunt propitia. Illud quòd Alexander Ma-  
cedo animo versemus: *Nihil tam altè* (inquit)  
*natura constituit, quòd virtus non possit eniti?* E-  
nuntiavit de quopiam Psaltes: *Accedet homo*  
*ad cor altum, & exaltabitur Deus.* Et hoc pla-  
nè est quod à nobis quoq; Supremum exoptat  
Numen, ut scilicet per nostræ vitæ morumq;  
Sanctimoniam, non medtorem sui nominis  
obtineat

*Curtius*



obtineat exaltationem & gloriam. Id verò haud difficulter futurum, modò ex pusillanimitatis nostræ profundo assurgentes, ad altitudinem cordis & spiritus accedamus.

Hoc nempe modo magnò utiq; animò Patres nostri qui jam absoluti sui stadii retulere præmium, ad eam, cujus nobis reliquere vestigia, evasere sanctitatem, hoc modo tam magna & multa in orbe terrarum gessere, ac orbem ipsum orthodoxæ subegere fidei: hoc modo amplissima gloriæ DEI toto mundo protulere incrementa, hoc modo tot difficilia, tot adversa & ardua triumpharunt: his in tantum profecere auxiliis. Audentissimi Indiarum Apostoli effatum est: *Si quid (inquit) magnas habere videtur difficultates, cave propterea ab incepto deterreant. Prima quippe ac potentissima difficultas in nobis est.* Sic locutus, sic egit Indiarum Apostolus. Cur igitur nobis quoq; eam tenere praxim, paribus uti ausibus non expediat? Cur non libeat tot prodromos sequi? quid dedeceat tam insignes heroas æmulari?

S. Xav: Lib:  
2. Epist: 5.

PARS PRIMA  
MOTIVA & INVITA-  
M E N T A

Ad non plebeiam & non  
vulgarem


SANCTIMONIAM

Proponens.



# ADHORTATIO I.

*Vocationem Religiosam, non vulgarem a nobis* MOTIVUM  
*Sanctitatem exigere.* h.

 Uamvis currentibus calcar, volan-  
tibus alas addere, supervacaneum  
sit: satis tamen superq; nuper egi-  
mus, ut nobis ad sublimiorem san-  
ctimoniam animos adderemus.  
Vidimus etiam, quanto sicut ad majora omnia,  
ita ad eam Sanctitatem opus animo sit? Jam  
quæ nos ad illam efficacius urgent & provo-  
cant? attentius videamus. Vocatio inprimis  
religiosa est, quæ nobis eam obligationem in-  
dicit, necessitatem imponit, curam & studium  
injungit, ut non vulgarem, sed dignam eadem  
vocatione Sanctimoniâ totis viribus amplecta-  
mur. Hanc ego igitur, svadendam in præsens  
suscipio idq; non ex alio interim respectu &  
motivo, quam ex vi & motivo ejuldem vocati-  
onis religiosæ.

Quanti sit vocatio religiosa, quantum-  
ve excedat vocationem secularium, nemo est  
qui non advertat. Si quis utriusq; conditionem  
accuratiùs expendere velit, facile mensuram il-  
lius

lius vel inde colliget, quantum vita religiosa  
vitam & statum superat sæcularem. Nimirum  
non minus quàm præcellsa rupes super subje-  
ctum quo circum quaq; alluitur mare; Olym-  
pus super minores circumpositos colles; cælum  
super quæcunq; sublunaria ac terrenas aurum  
super alia metalla eminet ac æstimatur. Præfer-  
tim cùm ille status censeatur sublimior qui  
Christo conformior. Quo igitur excellentior  
religiosa vocatio, eo excellentiorem Sanctimo-  
niam sibi vendicat. Procul hinc vulgaris vir-  
tus, procul plebeia Sanctimonie abjecta cura  
& studium. Nihil hinc humile, nihil mediocre,  
omnia summa, omnia eximia cogitanda. Ita  
ut plane velut in frontispicio cujuscunq; Reli-  
gionis ac etiam religiosæ domus illud inscriptum  
esse censeatur, quod Plato suæ Scholæ inscribi  
curaverat: *Huc nihil vulgare ingreditur.*

Id verò *Luc. 6.* satis clarè expressum  
legimus: Ubi Christus, postquam diutius in  
præalto monte sanctioribus discipulos suos, &  
ex iis ibidem delectos duodecim Apostolos in-  
stituisset sermonibus: tandem *descendens de e-*  
*odem monte stetit in loco campestri & turba*  
*Discipulorum, & multitudo copiosa plebis.*  
Unde palàm est, Apostolis ac selectioribus di-  
scipu-



scipulis montes, turbæ & plebi plana & campe-  
stria delecta. Quid verò hac in parte mysteriū?  
Divus Ambrosius hunc locum expendens in  
hæc verba ait: *Adverte omnia diligenter quo-  
modo Cum Apostolis ascendat, & descendat  
ad urbas?* Ubi huius ipsius rationem subnectit.  
*Quomodo enim turba nisi in humili Christum  
videret? non sequitur ad excelsa, non ascendit  
ad sublimia.* Ac si diceret: Apostolorum ac Di-  
scipulorum Christi est, humilibus non esse con-  
tentos, altiora petere, scandere sublimia: tur-  
bæ plana ac mediocria sufficiunt. Nec illi tan-  
topere vitio verri, quod sublimius non ascen-  
dat, quod ad excelsa Christum non sequatur.  
Et ita planè de secularibus ac religiosæ vocatio-  
nis hominibus censendum est. Illis scilicet  
quamcunq; sanctitatem sufficere, sublimiorem  
ab illis non requiri, nisi sanctè generoso atq;  
glorioso plurimum ausu, sponte ferantur in e-  
andem. Jam istos è contra quidquid humile  
est, imò quidquid etiam mediocre nimium de-  
decere: ita ut cum ipsomet Christo montem al-  
tissimæ perfectionis illos conscendere, consiste-  
re in summo, apicem & fastigium apprehende-  
re, necesse sit. Non aliter quam ut olim Cas-  
siodorus cuidam à se ad fascēs apud Regem

Theodoricum promoto: *Culpa est te non agere quod summum est.*

Cant: 9.

Plane hic Sponsi insistendū vestigio: de quo Sponsa: *Crura ejus columnæ marmoreæ, quæ fundata sunt super bases aureas.* Tales scilicet Sponsi pedes, non ferro, non æri, non argento, sed soli auro, id est sublimi & excellenti præ aliis omnibus insistentes metallo. Nec diversi sunt pedes hominis religiosi. Figant alii vestigia sive in plano, sive in declivi, figant supra lateritium pavementum, supra marmor, hoc est supra cujuscunq; mediocritatem virtutis: Jam religiosus homo attollat se supra bases non qualescunq; sed aureas. Nil scilicet in ratione Sanctimonix aut vile & vulgare, aut mediocre sapiat.

Hujus verò ipsius non leve ultra documentum esto, duplex illa Moysis & Aaronis Virga; Thaumaturga quidem utraq; fuit: illa tamen sæcularis, hæc religiosæ vocationis hominum insigne Symbolum. Et sanè sat inprimis celebris omniq; fama per orbem vulgata, virga Moysis fuerat. Visebat Regum Ægyptiorum augustalia, castigabat Ægyptum, terrebat Pharaonem, omnibus elementis, terræ, aquis, mari, æri, imperabat, tot editis collucebat, ac prædi-



prædicabatur ubiq; prodigis: inter hæc tamen id felicitatis non habuit, ut vel modicè in florem reviresceret, ut vel uno saltem virenti ramo seu folio quod ex se progigneret ad ornamentum tegetetur. Nec interea etiam eo in crysim prolapsa, quod non semel in draconem & colubrum deformata, quod serpentibus, draconibus pasta sit. *Devoravitque* (inquit Scriptura) *virgas eorum quæ versa erant in dracones.* Jam Aaronis virgæ alia omnino hac in parte conditio. Insolitum an probrum illi ante omnia fuerat, non colubros sed muscas etiam & culices deglutire. Parum similibus cum Virga Moysis coruscare miraculis. Florere etiam, in folia diffundi, turgere gemmis, in fructus maturescere debuit. Et quidem supra naturam, supra communem rerum ordinem, usq; ad prodigium. Et huic quidem ipsi, dum adhuc inter sylvas, profanaq; arbusta promiscue creveret, satis fuerat qualicumq; folio indui: nec eam eguiss: fructu. Verùm cum admo-  
veretur Sanctuario: plura longè ab illa requiri. Nempe ut non tantùm quoscunq; flores & folia sed etiam fructus non obvios, eosq; prodigiose pariat. Nec tandem etiam ultra licuit eam profanis servire usibus, vel manibus attingi,

*Numer: 17.*

fulcire gressus, evagari quocunq; terram vel locum premere. Ad arcam ipsam: hoc est, illud veteris testamenti Sacrarium delata est, & inter tabulas legis divinæ tanquam aliquod Sacrosanctum reposita. Idq; non obscuro vocationis religiosæ hominibus relicto exemplo, quonam modo intra suæ religiositatis sphaeram versari debeant? Nempe longe illos sæcularibus, quos virga Moysis denotabat, debere esse vitæ & moribus dissimiles, ideoq; vulgari sanctitate minimè contentos. Ita ut cum in illis hoc est vitæ sæcularis sectatoribus vix crysim mereatur, quod graviora delicta velut colubros & viperas prompte ac sine nausea & scrupulo deglutiant: jam hinc pæne crimen sit, etiam levia quædam ad instar muscarum & culicum admittere. Illis si in quamcunq; sanctitatem evirescant, omnino sufficiat, hic autem non quoscunq; sed multum eximios virtutum fructus progignere, perquam oporteat. Nec jam ultra ut pote Sanctuario religiosæ vocationis receptos, ac divino initiatos obsequio ad quidquam profani se se demittere, tractare sæcularia, attrectare terrena intra mundana verlari, præterquam solo nonnisi sanctitatis contineri sacratio liceat.

Vestes olim eorum, quorū ignaviam aut scelera  
rege:



cegebant, verberabantur. At quoniam ipsi  
religiosi homines verberare digni essent, si ve-  
stem religiosam stragula utiq; virtutis suâ pude-  
facerent ignavia, nec dignam eodem vestitu &  
statu religioso sumerent Sanctimoniam.

Quamquam & à quatuor illis currui *Ezechielis* n.  
gloriæ DEI adjunctis animalibus, quorum apud  
Ezechielem celebris exstat mētio, non mo-  
dicum nostræ veritatis accedit argumentum.  
Sex alas illis concessas in Scriptura legimus. Ve-  
rum quid bovi, quid leoni, quid homini cum  
alis? imò quid etiam aquilæ cum tot alarum  
impendio? si bos est, si leo, si homo? binos vel  
quaternos pedes, quibus super terram gressus  
efforment, satis illis esse. Si Aquila? duas a-  
las nec plures, ut quocunq; evolet, illi suffi-  
cere. Nisi quod hæc animalia non usui cui-  
cunq; non cuicunq; currui profano vg: etiam  
Salomonico, sed currui sacro, currui divino  
deputata iunctaq; fuerint: ac proinde tot alis  
instrui debuerint ad volandum. Aliud nempe  
quam vulgari super terram vel aerem tramite;  
erat illis abhinc eluctandum. Alias dum ad-  
huc intra nativam sortem & sphæram viverent:  
& homini, & leoni, & bovi; quaecunq; tene-  
re seminan, Aquilæ quocunq; loco nidum stru-

De

ere

ere licuerat. At verò postquam se è communi consortio & animantium greg: extulêre, postquam propria domo, caula, antro, nidoq; relictis, divino sese addixêre currui & obsequio, tot alis iisdem fuisse opus, ut supra vulgarem conditionem, supra solem & lunam, ac cælum ipsum, usq; ad thronum DEI evolarent. *In circuitu throni* (inquit in sua Apocalipsi Joannes) *quatuor animalia.* Atq; in hoc sanè ipso perspicuum nostræ vocationis religiosæ Symbolum, qua nobis ex mundana sorte & contubernio ereptis, ac divino mancipatis servitio, non aliud convenit quam ut ultra terram imò & sydera vulgaribus non contenti vestigiis, eximia sanctitate evolemus. Antequam nos mundo efferremus, sacroq; subderemus iugo, licebat quocunq; calle progredi, postquam nos currui gloriæ DEI adjunximus, jam ultra humi repere non licet.

Hic defacto locum habet mulier illa Chananæa pro filia à dæmone excruciatâ Christum Salvatorem exorans: *A finibus suis* (inquit Evangelium,) *egressa clamavit. Misereere mei Domine Fili David.* Verum unde didicit mulier Ethnica sic Christum vocare, tantaq; de eo sentire? Respondet S. Hieronymus Lib: 2,

Comit:



Comm. in caput: 15. *Matth: Inde nō vit voca-  
re filium David, quia egressa iam fuerat defi-  
nibus suis & errorem Tyriorum ac Sydoniorum,  
loci ac fidei commutatione dimiserat.* Et si in  
ea tantum effecit loci mutatio. Quid in nobis  
egressio nostri ē mundi finibus ex promiscua  
saeculi turba valitura est, ut altiora cogitemus,  
loquamur, sentiamus. Idq; planē fuit primum  
Divi Romualdi (uti in vita ipsius legimus,) post  
egressum ē mundo, accessum ad servitium DEI  
studium: quo se ad *Marinum* vita sanctitate ce-  
lebrem contulit, ut ad arctam & sublimem per-  
fectionis viam eō magistro ac duce uteretur.

Lebeat hic tritas illas Religionis com-  
parationes retexere, sive cum speciosis poma-  
riis, sive cum Libano, aliisq; caelo propinquis  
montibus, sive cum praeclis turribus ac ad fi-  
cis; sive cum terra promissionis ac tandem cae-  
lo etiam ipso. Unde facile constet, quidnam à  
nobis Sanctimoniae vocatio Religiosa ex gat?  
Quae enim inprimis arbor illa esset regio digna  
pomario? quae sylvestria nonnisi folia & pomia,  
aut nescio quod vile fructuum genus pareret.  
Quod decus Libano si pusillis tantum, & vix à  
terra prominentibus viresceret arbutis. Quid  
gloriae imò quid non opprobrii ac ludibrii es-

set pignæro, si præalto monti, aut turri excellæ  
insidens, inde sibi plausum posceret. Quid pro-  
portionis etiam si Rhodio colosso statua insiste-  
ret palmaris vel cubitalis saltem. Quid com-  
mendationis terræ Israelitis promissæ? si nihil  
speciale supra Egypti ubertatem habuisset.  
Tandem quid si etiam cælo, pro primæ vel se-  
cundæ magnitudinis syderibus, minores accen-  
derentur lychni, faculæ & igniculi. Si itaq;  
regale pomarium est? non gramine solo aut  
vulgaribus herbis turgat & crescat sed rariori-  
bus quibusq; emineat arboribus, non obviis fru-  
ctibus æstimetur. Si Libanus? Cedris vel Pal-  
mis assurgat. Si Turris si Colosus Rhodius, vel  
Traiani Adrianiq; moles? non palmaribus se fa-  
stigiis vel statuis sed cælo pæne minantibus at-  
tollat & nubibus inferat. Si terra promissio-  
nis? nihil simile cum Egypto habeat. Si Cæ-  
lum? soles, Lunas, Joves, Saturnos, primæ, secun-  
dæ, tertiæ magnitudinis planetas eosq; vel ter-  
ra longè majores vel non minores saltem con-  
tineat. Et hoc ipsum summus rerum omnium  
artifex, dum mundi initia ex nihilo poneret  
seriavit providentissimè, ita totius universi cæ-  
li ac terræ attemperando symmetriã, ut sibi in-  
vicem omnia aptissimè congruerent. Nec alia  
nobis



nobis in vita spiritali ac religiosa tenenda ratio. Id est, si nobis religio cælum est? Soles Planetasq; alios virtutis splendore imitemur, nec infans diluculum sed adultam perfectionis exhibeamus meridiem. Si Terra promissionis, in quam de sæculi Ægypto deducti sumus? non minores uvas sed prægrandes usq; ad admirationem progignamus virtutum botros, illis non absimiles, quorum unum in vecte duo viri exploratoribus terræ vix portarunt. Si cæleste Regis Regum pomarium? dignæ eo loco ac statione in sublimem Sanctimoniam excrescamus arbores, dignosq; vocatione nostra proferamus fructus. Idq; ne illud ipsum nobis pro crysi appingatur, quod de quapiam apud Pœtā arbore: *Miraturq; (inquit) suas frondes Et non sua poma.* Si Libanus? Cedros proceritate sanctitatis æmulemur. Simons alius vel Turis? neq; nos Pigmæi, sed Gygantes simus, eoq; nos conspicua religiositate attollamus ac meritis donec sublimi sidera vertice feriamus, cæloq; ipsi virtutibus coronatum inferamus caput.

E

ADHOR-

## ADHORTATIO II.

MOTIVUM  
II.

*Vocatio ad Societatem JESV, quidquid in Sanctitatis studio vulgare est, a nobis proscribit.*

**S**anctimoniam non vulgarem ex vi & motivo vocationis Religiosæ nuper suasimus. Sed quia non unum est, quod nos ejusdem sanctitatis admonet; ideo hæc ipsa in medium proferre, est animus. Post vocationem Religiosam in genere, vocatio ad Societatem, locum ante alia omnia sibi vindicat. Illa scilicet est, quæ dum nos nihil humile, nihil vulgare aggredi, imò cogitare etiam, finit: solam nobis per omnia sublimem Sanctimoniam in meta statuit. Quò ut nostra quoq; collimet dictio, mei in præsens studii & conatûs erit.

Sicut habet hoc sortis propriæ & conditionis æstimatio, ut nos ad magna quæq; & eximia excitet: ita è contra illud est, quod nos à sublimibus deturbat ausibus, ac in extremam præcipitat inertiam: Nempe ipsa sortis & Nominis originisq; nostræ alta oblivio. Ideoq; non parum excitamenti ad omnem virtutem Spartanis illud ipsum adferebat, quod se Spartanos esse,



20  
se, Spartā oriundos, Spartana matre & urbe pro-  
gnatos meminissent: ex eoq; illud profluxisse.  
*Lacanam viros parere.* Hinc si nobis etiam,  
id esset, quod defacto deberet, Cunarum no-  
strarum, hoc est vocationis ad Societatem pre-  
tium ac recordatio, id nobis pæne unicum ad  
insignes ausus satis esset.

Liceat hujus ipsius ex funda Davidis pe-  
tere fundamentum. Congressurus ille cum Go-  
lia, *elegit sibi quinque limpidissimos lapides de  
torrente: quorum unum lapidem tulit, eumq; fun-  
da iaciens percussit Philistæum in fronte, & in-  
fixus est lapis in fronte ejus.* Eximium sanè in  
hoc Davidico lapide excelsi genii symbolum:  
qui non pedes, ut lapis ille propheticus, non  
fæmur, non pectus, sed ipsam frontem & caput  
feriit. Dicitur ille ab Auctoribus Nomen Josue  
seu Nomen JESU sibi inscriptum prætulisse.  
Nec mirum eò illum collimasse. Dum adhuc  
intra congeriem aliorum versaretur lapidum,  
antequam in peram, inde in fundam sumeretur,  
antequam eo scriberetur nomine, poterat se  
ad quæcunq; usum & scopum demittere. Post-  
quam id fortis & nominis nactus est; non alia  
meta illum decuit. Et verò in nobis etiam ad  
Societatem JESU vocatis, ea deberet esse ani-

2. Reg: 17.

mi excellitas. Si non eo insigniremur nomine;  
si non ea vocatione gauderemus, utcunq; veni-  
am mereremur, nosmet ad vulgaria demitten-  
do. Verum postquam ad eam sortem & No-  
minis JESU consortium admissi sumus; jam  
nobis non ad humilem metam omnino colli-  
mandum. Uti sanctissimus ille noster Genera-  
lis Carafa in suis exhortationibus ad nostros  
dicere solitus: *Serpere non debet humi nostra  
perfectio.* ( In vita Ipsius ) si enim eo nomine  
insigniti sumus de cujus præstantia & celsitudi-  
ne Apostolus: *Dedit illi nomen super omne no-  
men.* Si idem ipsum nomen oleo effuso in  
Scriptura assimilatum: *Oleum* (inquit) *effusum  
nomen tuum:* quod certè cunctis supernat &  
supereminet liquoribus. Quomodo eidem  
ipsi nomini similis in nobis non respondeat vir-  
tutis excellitas super omnem sæcularium ho-  
minum virtutem & gloriam sese efferens?

Placeat verò hic ex Arena Davidis præ-  
liari, in agrum cum Josepho somniantе descen-  
dere. Sic ille suum fratribus somnium retulit:  
*Putabam nos ligare manipulos in agro, & quasi  
consurgere manipulum meum & stare: vestrosq;  
manipulos circumstantes adorare manipulum  
meum.* Ubi illico iusta se imprimis admirationis  
aperit



aperit occasio: Nempe quidnam fuerit, quòd aliis manipulis in sua sorte & statura relictis, hic unus Josephi manipulus ultra illos alios assurrexerit, creverit? scio equidem hac visione futuram Josephi in Ægypto, qua supra reliquos omnes, ac fratres etiam suos natu majores, eminere debuit, adumbratam fortunam. Sed neq; mihi illud ignotum, eundem Josephum, in eo ipso fuisse typum & figuram Christi. Hinc nomen Salvatoris, hoc est Nomen JESU sortitum: *Vertitq; id est Pharaos, (inquit Scriptura) Nomen ejus & vocavit eum lingua Ægyptiaca, Salvatorem mundi.* Neq; hic amplius minor manipulum Josephi sic crevisse. Ex quo enim eo nomine meruit insigniri, totaq; proclamari Ægypto, certè illius messem vulgarem esse haud decuit: *Putabam (inquit) quasi consurgere manipulum meum, &c.* Atq; hinc etiam nostræ applaudendum fortunæ, qua in Societatem recepti, nomine JESU consignati sumus. Simul tamen diligenter animadvertendum: non levem per hoc ipsum, nobis impositam necessitatem, ut eidem vocationi & nomini, nequaquam vulgari respondeamus Sancta monia, ac locupletè admodum meritorum excellentium messe: & sicut differentius præ

cæteris cum Christo nomen hæreditavimus, ita etiam si non ultra cæteros, qui nos velut fratres natu minimos ( sic enim Societatem S. Pater noster vocari voluit ) venerando in Ecclesia DEI longè præcessere uti senio, ita & meritis, saltem cum illis ultra quoscunq; alios sublimitate ( si id ipsum dicere fas est ) emineamus virtutis. Idq; ne præclaro nomine tantum insignes esse videamur, aut magni nominis umbræ, Neve tam sanctum ac gloriosum nomen in nobis mentiri faciamus.

Videamus enim cui nomen Divinum in Scriptura inditum? *Et est ( inquit ) nomen meum in illo.* Certè non cuiquam alteri sed Angelo, imò Archangelo Michàéli. *Ecce ego ( inquit DEUS ibidem Exod: 23. ) Mittam Angelum meum, qui præcedat te.* Hoc autem non de alio, quàm de Michàél'e populi Israelitici ad terram promissionis ductore, intelligendum. Utiq; Michàél interpretatur. Quis ut DEUS? Certè namq; quicunq; divino, vel JESU insignitur nomine, aut Angelus aut Archangelus omnino sit, id est Angelicà imò Archangelicà Sanctimonià effulgeat.

Sic illa Apocal: 14. Cum Agno cælesti scilicet Christo: *Supra Montem Sion stantia centum*



*centum quadraginta quatuor millia habentia  
nomen ejus scriptum in frontibus suis. Et ecce  
quid ultra de illis Apocalipticus textus? Hi  
sequuntur* (inquit) *Agnū quocunq; iterit: Sequun-  
tur inquam excellenti imitatione & insignibus  
meritis: ita ut throno etiam ac lateri divino  
per illimem Sanctimoniam meruerint admo-  
veri: sine macula enim sunt ante thronum Dei:  
Ut vel hinc pateat: quanta ab omnibus eo no-  
mine insignitis requiratur virtutis excellentia  
& sublimitas. Idq; ne aut mores, aut nomen  
mutare cogantur.*

Si in Abrahamum adauctum nonnisi  
duabus ex divino nomine (ut pleriq; deducunt)  
sumptis literis: *Nec ultra vocabitur nomen tu-  
um Abram, sed appellaberis Abraham*, ea de-  
voluta obligatio; ut ibidem illi dictum sit: *Am-  
bula coram me & esto perfectus*. Ad quam cer-  
tè, nos non degeneres societatis obligamur a-  
lumni, Sanctimonix perfectionem qui non u-  
nam & alteram. Nominis JESU literam, sed to-  
tum integerrimum nomen quasi ex asse posse-  
dimus.

Planè in illa celebri mulieris Apocali-  
pticæ visione, tum Societatem JESU, tum ejus  
filios, ad vivum esse expressos censeo: *Appa-  
ruit*

*vult illa amicta sole, luna sub pedibus ejus, in capite ejus corona stellarum duodecim.* Ubi quis non miretur, tam non vulgare, tam extraordinarium illius ornamentum? Alios scilicet in splendore virtutis & gloriæ, soli nonnisi assimilatos legimus. *Fulgebunt justi sicut sol.* Alios Stellis: *Fulgebunt sicut stellæ.* Alios lunæ tantum: *Sicut luna plena in diebus suis.* Hic ista omnia simul in hujus unius mulieris, quò supra omnes alios emereret, ornatum & splendorem abjère. Et quia non dum satis illi erat, supra lunam, solem, & stellas constitisse: adhuc illi insuper, ut evolveret sublimius, *Data sunt alæ duæ, idq; alæ aquilæ magnæ.* Nec verò aut deiectionis animi, aut deterioris conditionis & fortis, ejus soboles: *Peperit (inquit) filium masculum & raptus est ad DEVM, & ad thronum ejus.* En qualis Mater quali filio digna? Nempe cui nihil humile, nihil pateret mediocre, sed quidquid esse potest maximè eximium, sublime, ipsiq; DEI throno affine. Atq; hic non dissimilem societatem cogitate: eò scilicet tot DEI dignationibus, donis ac privilegiis in se congestis sublimatam, quò nec ipse sol, luna & stellæ ascenderint: tot simul splendoribus virtutis, doctrinæ, talentorum, per solem, lunam, & stel-



las designatis, indutam, quot in pluribus aliis invenias: ut quæ cæteros, divisa sparsaq; per singulos, beatos efficiunt, (sæculares quoscunq; loquor) Societas intra unam se collecta teneat. Unde facilè sit concludere, quos ea tam splendida mater filios exigit, nimirum à se nequaquam degeneres, hoc est omnium sublimium capaces, ac throno etiam supremæ Sanctitatis & gloriæ non impares.

JOANN: 19

Non aliter quàm dum Christus in Cruce Matri suæ Sanctissimæ Joannem in filium traderet: *Ecce (inquit) filius tuus.* Sed qualis hic tantæ matris filius? unde illi tanta excellentia tanta dignitas? Respondet Petrus Damiani, hæc verba Christi habuisse quandam vim Sacrificam, similem illi quâ verba consecrationis pollent: ita ut sicut vi verborum illorum panis in Corpus, vinum in Sanguinem transit: Ita etiam hic, Joannes vi horum verborum verus ac genuinus Matris Beatissimæ, tantaq; matre dignissimus omnino filius effectus sit. Nec frustra ac sine mysterio Christum, postquam dixisset: *Ecce filius tuus,* illico addidisse: *Ecce mater tua:* Nimirum eo ipso præmonuisse Joannem, ut secum expendens, quàm & quan-

F

tam

tam protunc matrem nancisceretur, facile concluderet, qualem se ejus filium exhibere deberet? Ac si Christus Joanni hisce innuisset: *Ecce id est vide, accuratiùs fixiusq; in eam intende, quæ nã sit & quanta hæc Mater Tua? Nempe eadem quæ mea, ut hinc maturè dispicias, qualem & te deceat esse ejus filium, scilicet à me nequaquam degenerem. Quod si verò hæc de Joanne non absurdè cogitata: quis prohibeat, simile quid de matre nostra societate ejusq; filiis ratiocinari? Et sanè an non illud etiam, dum ad Societatem vocaremur, reciperemurq; in eandem, illi nobisq; intimatedum est: *Ecce filius tuus: Ecce mater tua.* Quidni igitur dignitatem & excellentiam ejus Matris apprehendamus vivaciùs? quidni æstimemus, communem nobis cum Xaverio, Borgia, Stanislao, Aloysio, & mille aliis insigni Sanctimoniâ celeberrimis Societatis heroibus, matrem esse? Quidni nos ipsos veros genuinos, non degeneres, dignos ea matre sentiamus filios, nec vulgaribus probemus actis? identidem nobis cum quopiam inculcando: *Ad majora natus sum: ad majora vocatus sum?* Aut certè nos cum Joanne filios exhibeamus tonitru, naturam imitando*



tando fulminum, quæ dum altissima feriunt, humiles metas dedignantur. Ut illud scilicet de nobis Societati præstemus solatium, quale olim Lacæna mater, ex suimet filii indole retulit: cùm eximiâ quæq; ab illo in prælio gesta audiens: ac inter cætera mortem fortiter obitam, toties exultabunda ad singula repeteret: *Erat verò (inquebat) meus.* Alioquin si nihil dignum vocatione nostra, nihil dignum hac matre gesserimus: verendum nobis, ne illud probri incurramus, quod degener alterius matris Spartanæ filius; quem illa trās fugam è prælio pariter inaudiens, illud prolocuta: *sanè meus non erat.* Tandemq; domum ingloriè reducem protrudens, exprobransq; inertiam, indignabundè affata est: *I Spartâ & me indignus.* Ne inquam & nos, simile quid à sancto Patre nostro audire mereamur, I Societate & me indignus.

Plutarch: in  
apoph: Lac-  
con:

## ADHORTATIO III.

Obsequium & cura salutis animarum, Societati  
ex fine vocationis ac Instituti præfixo, aliis qui-  
buscunq; ex quocunq; titulo, motivo, præseri-

MOTIVUM  
III,

F2

pro

*pro, incumbens, nihil vulgare in ratione Sanctimonie requirit.*

**N**ON temerè sublimiorem Sanctimoniam svadendam suscepimus. Cum id ipsum, uti vidimus, svadeat inprimis vocatio quæcūq; Religiosa, svadeat quoq; nobis peculiariter societatis hominibus ad eandem Societatem Vocatio, ipsumq; nomen quod gerimus, quove ad eximia quæq; stimulamur. At verò quid est, quod quemcūq; etiam ejus Sanctitatis non ad monet? Non admonet inquam, non tantum ejuscūq; strictioris Ordinis Religiosos, sed ipsius etiam statūs secularis homines, ut infra sæpius visuri sumus. Quod autem ad homines societatis? quidquid religiosi ipsius Instituti, quidquid Regularum, quidquid Ordinationum ac quorumcūq; monitorum, nec non exercitiorum spiritualium est, an non eo collimant omnia? ut nos ad non vulgarem provehant Sanctimoniam. Excutiamus totam, quanta, quanta est societatas, nihil in ea reperiemus, quod nos qualicūque Sanctitate contentos esse sinat. Finis ipse Societatis: nempe obsequium & cura salutis alienæ, quid oro à nobis Sanctimonie non exigit? Quam curam & studium o-  
mini-



innigenæ virtutis non exposcit? Verùm quoniam idem ipsum circa animarum salutem ministerium cum aliis quoq; licet ex diversis titulis nobis commune est, proinde hic in præsens, quoscunq; etiam huic ministerio deditos concernens, nostræ allocutionis tenor esto: Curam & obsequium salutis animarum nihil à nobis in ratione Sanctimonix vulgare ac mediocre requirere.

Quam sit latè patens eorum campus, qui se ministerio præfato addicunt, ac proinde quanta etiam ipsius finis sollicitatis, quem S. P. Ignatius nostris præfixit ausibus, amplitudo, facile quisq; conjiciet, si advertet: non unum hic terræ angulum, unum districtum, & Regionem, Regnum aut imperium, sed orbem totum curæ nostræ & obsequio commissum, nostris studiis ac laboribus excolendum, nostris rigandum sudoribus, nostro etiam sanguine facundum; ita ut illi vitam nosq; totos impendere, illius salutem vix non cum nostræ quoq; salutis impendio, quærere incumbat. Jam quid eo ministerio sublimius quid curâ salutis animarum excellentius quæ nobis tum cum Angelis, tum cum Apostolis, tum cum ipsomet

Christo communis est? Quid igitur tanto operi, tantoq; fini cum vulgari Sanctimonia, quid cum mediocri virtutis studio? Mihi credite tanti istud esse momenti negotium, tanti moliminis opus, ut frustra se ad illud accingat, quisquis sese parum virtute instructum sentit ac judicat.

Audiamus, quidnam huic eidem se negotio committenti cuipiam, DEUS per Prophetam injungat? *Super montem* (inquit) *excelsum ascende tu, qui evangelizas Sion*. Non hic in valle, in planitie jubetur consistere, non in quemvis montem conscendere; sed in montem omnino excelsum, in ipsum ejus fastigium eluctari, hoc est (juxta Ambrosium & Bernardum apud Cornelium) *in virtutum montem, in culmen ac sublime perfectionis*, sese attollere. Quid verò hac in parte arcani? Nempe illi cura Evangelii, cura salutis animarum demandanda: *Super montem excelsum ascende tu, qui evangelizas Sion*. Et defacto, quisnam verbum DEI prædicaturus intra turbam se recipiat, intra plebem & tumultum sese misceat, infra, deorsumq; lateat, & non in exedram ascendat aut non sublimiore aliquo loco consistat, omnibusq;



busq; se conspicuum, omnibus visendum exhibeat? Cùm expressè in locum prædictum D. Gregorius Papa: *Vt qui (inquit) celesti prædicatione utitur, ima jam terrenorum deserens, in rerum culmine stare videatur, tantoq; facilius subditos ad meliora protrahat, quanto per vitæ meritum de supernis clamat.* Idem D. Basilii orat: 6. *Qui labentem erigere vult, debet omnino longè altior esse illò qui cecidit.* Itaut hic etiam illud aptè conveniat: *Plus debere esse virium in latore quàm in onere:* plus idèq; sanctitatis debere inveniri in illis, qui onus alienæ salutis velut quidam Atlantes sustinent, quàm in quibuscunq; aliis, circa quorum salutem & animas laboratur.

Aristot: 1.  
Polit: c. 1.

Neq; alio pertinet, quod de Divis Apostolis Ambrosius enuntiat. Intendit inprimis ille fixiùs oculum in Petrum, super fluctus ambulantiem, eumq; Moyse Isràelitici populi, thaumaturgo Ductori, jam non super mare, sed per imum ac fundum ipsius incedenti, comparat. Tum hisce ad extremum concludit: *Moyse, (inquit,) in imo, Apostoli in summo.* Ac si dixisset: Duces ac Principes populi politicos, & si imum virtutis cum Moysè infra mare gradiente

diente teneant, tolerari uterentur. Verum Apostolicos viros summum, ipsumque Sanctitatis fastigium obtinere omnino necesse est.

2. Cor. 12.

Et hoc ipsum est, quod S. Paulus ad tertium usque cælum assumptus sit: idque non post exantlatos tot labores Apostolicos, peragratas Provincias, innumeras ærumnas ac passiones toleratas, tot edita Sanctitatis documenta, sed ad prima suæ conversionis initia; tunc cum adhuc in Apostolico munere Tiro censeretur. Nimirum eo usque, hoc est ad tertium cælum, debebat provehi qui aliorum erat procuraturus salutem, ut eos cælo lucraretur, ac inferret. Ideoque etiam non quodcumque vas, sed *vas electionis*, id est vas non vulgaris, sed selectissimæ Sanctimonix & gratiarum donorumque DEI capax, denominatus: quia scilicet nomen JESU coram gentibus erat portaturus: *Vas (inquit) electionis erit mihi iste ut portet nomen meum coram gentibus.* Quis vero etiam nobile aliquod magnisque usibus destinatum vas viliori & ignobiliore loco reponeret? Quid autem curâ salutis animarum nobilius, ideoque quid insigni dignius Sanctimoniam.

Joann. 21.

Non dissimili hac in parte Principis  
Apostol-



Apostolorum sorte; cui etiam antequam Christus pascendas oves suas, curamq; salutis earum commisisset, prius trinam ab eo de amore sui, confessionem elicuit, ac tandem subintulit: *Pasce oves meas.* Nempe non qualicumq; DEI Joan: 21. charitate ad hoc illi ministerium fuisse opus, sed omnino perfectâ omnibus numeris absolutâ, trino videlicet eoq; perfecto numero significatâ.

Absit hic illud quod lux Sponsæ insurrat Salomon: *Si ignoras te o pulcherrima:* Cant: 2. (apud Cornelium à Lap: legitur) *si ignota tibi nec perspecta tua conditio: egredere & abi post vestigia gregum tuorum.* Absit inquam ut viri Apostolici post vestigia suorum gregum quos verbo salutis pascunt, ignavo passu abeant, & non selectioris virtutis tramitem teneant, iiq; velut lux conditionis & obligationis ignari & immemores.

Hinc illud est, quod omnibus universim Apostolis à Christo in cælum ascensuro fuit inculcatum: *sedete* (inquit) *in Civitate quoad-* Luc: 24. *usq; induamini virtute ex alto.* Ac si dixisset: *nocte,* vel pedem etiam, extra limen proferre, tanto magis in vicos plateas, urbes, oppida, re-

gratia, disseminandi gratiam Evangelii excurrere, nisi prius non quacunq; virtute, sed virtute ex alto, virtute admodum sublimi, virtute à cælo ipso petita, cælo contermina induamini. Induamini inquam: quia parum est, virtutis, ut ita dicam, frustum vel laciniam sibi met assuere, parum etiam umbratili ejus specie vel pallio utcunq; involvi: ipsa integerrima virtute, velut ampliore toga, circumquaq; indui convenit ac oportet.

Nec miror, in utero etiam ipso, extraordinario plane modo, ultra communem praxim, Prophetam Sanctificatum: *In utero* (inquit) *Sanctificavit te*. Audite enim quidnam immediatè sequatur? *Prophetam in gentibus dedi te*. Et certè non vulgare illi aliquid debatur, non ordinaria Sanctificatione decuit esse decorandum, cui negotium salutis gentium erat committendum.

Quamquam non humanam sed Angelicam etiam hic Sanctitatem DEUS videtur requirere, apud Prophetam inquiring: *Ite Angeli veloces ad gentem expectantem, Et conculcatam, ad populum terribilem*. Hoc autem ipso viros Apostolicos eo loci significatos admone-

*Ysa: 60.*

*Majoribus  
manu nempes  
Angelice sã-  
ctitas requi-*

51  
si; nihil illos terrenum, nihil humile atq; huma-  
num etiam, debere, vitâ moribulq; præferre,  
sed imò ipsos Angelos æmulari: ex quo ad eam  
legationem deputari meruere.

Quod ipsum in illa Jacob Patriarchæ  
visione satis exhibitum: cùm vidisset per so-  
mnium *scalam stantem super terram, & cacu-*  
*men ejus tangens calum, Angelos quoq; ascen-*  
*descentes & descendentes per eam.* Neq; hic aliud,  
juxta plerulq; per hos Angelos, quàm preco-  
nes Evangelii, & quoscunq; alios curam salutis  
animarum gerentes: per scalam autem seriem  
virtutum ac perfectionis intelligi. Ut inde  
colligere liceat, qualisnam his ipsis DEI preco-  
nibus, Sanctimonix conveniat sublimitas: non  
alia videlicet quàm Angelica, id est quæ ea vir-  
tutum serie tot Sanctitatis gradibus, constet,  
queis à terra ad Calum usq; pertingat.

Parum verò id etiam esse, plus adhuc  
longe ab alienæ salutis curatoribus requiri. Cir-  
cumspicite hic apparatus Pontificium Aaro-  
nis. De hoc imprimis Sap: 18. *In veste poderis*  
*quam habebat, totus erat orbis terrarum.* Sed  
quid vesti illi tam Sacræ cum profanis, cum  
mundo, cum terra? in qua nihil nisi cæleste

Gen: 28.

imo potest  
divina.



Exod: 28.

comparere debuisset. Plures apud Cornelium à Lap: hanc vestem, aiunt fuisse Symbolum obligationis Sacerdotalis, qua unusquisq; non unius anguli, sed totius mundi ejusq; salutis curam, gerere tenetur. Hinc idem Sacerdos in pectore nomina filiorum Israel portare jussus. Verùm ubi tanto muneri conveniens Sanctimonia? Inspicite iterum unà mecum caput & frontem, inspicite tyaram summi Sacerdotis: *Facies laminam de auro purissimo in qua sculpes sanctum Domino, eritq; super tyaram imminens fronti Pontificis.* Sunt qui legunt: *sanctum Domini.* En igitur quale hic sanctum? non plebeium, non aliud quàm Dominicum, quam Divinum. Nimirum hoc ipso præmonitum veteris testamenti, salutis humanæ baiulum, Sacerdotem, qualis ab eo exigeretur Sanctitas, cujus sanctitatis illum meminisse oporteret? non alius videlicet quàm admodum sublimis supra frontem & caput defixæ, omnium oculis conspicuæ, ac planè divinæ. *Erit (inquit) Sanctum Domino fronti imminens* Ita ut quicumq; orbis terrarum saluti suam vitam addixerint, non quacunq; non plebeia non de feria ut aiunt, sed Dominicâ sed divina pane Sanctimo-

niâ collucere teneantur.

Non aliter quam educturo Israelem Moyſi de Ægypto ipſa quædã divinitas collata eſt: *Conſtitui te Deum Pharaonis*: Ac illis etiam, eidem Iſraeli ex eadem Ægypto prodromis dieq; ac nocte prælucentibus columnis divinum quid affuiſſe atteſtatur Scriptura imò DEUM ipſum: *Dominus* (inquit) *in columna nubis & in columna ignis*. Ut vel hinc pateat, quantum ii qui ex Ægyptiaca peccati vel infidelitatis ſervitute alios educturi ſunt, DEO, eſſe debeant eximiâ ſanctitate & vita ſimiliores quam hominibus. Unde etiam Chriſtus ipſe, Apoſtolos ad prædicandum mundo Evangelium miſſurus, *inſufflavit in eos*: ut nimirum non alio ſpiritu, quam ſpiritu Chriſti ſpiritu divino viverent ſpirarentq;.

Exod: 7.

Exod: 13.

Ut verò miſſa alia faciamus; illud bene novimus, quanta ſit in hoc campo boni exempli neceſſitas, quanta vis quanta efficacia, ita ut illo ad converſionem & ſalutem hominum nihil potentius nihil efficacius cogitari poſſe videatur. Magna fateor & pænè Thaumaturga linguæ vis eſt. Sat utiq; conſtat, quantum hæc ſive in profanis, ſive in ſacris uſibus ſemper va-

Ratio boni exempli non vulgarem ſanctitatem exigit.

luerit valeatq;. Interim tamèn si opera, si exem-  
pla desint; certè invalidi sunt ac inanes omnes  
linguæ verborumq; conatus. Unde autem oro  
tam efficacia tam robusta operum exemplo-  
rumq; auxilia? si non ab ipsa virorum Aposto-  
licorum Sanctimoniâ, quæ quo major quo su-  
blimior, eo pro salute hominum ad flectendos  
eorundem animos validior.

Daniel: 12.

Non frustra eos, *qui erudiunt multos,*  
*ad justitiam,* Stellis assimilatos legimus: quæ u-  
tiq; ut sublunaribus efficacius prosint, non ali-  
unde, quàm ab ipso sole lucem orbi illustran-  
do effundendisq; in eum suis influentiis parem  
capiunt. Imò Christus ipse suos Apostolos,  
*Lucem mundi,* id est, solem in Evangelio appel-  
lat iuxta illud Scripturæ: *Fulgebunt justi sicut*  
*sol.* Quo enim ille se altius in meridiem attol-  
lit eo clariùs, eo liberaliùs, eo ardentius illustrat  
omnia, eo in terrena agit efficacius. Hinc quoq;  
ut idem in alios etiam Planetas sui luminis di-  
spensaret beneficium, ut illud copiosius in or-  
bem diffunderet, ut non illiberales, in subluna-  
ria derivaret influentias, non infimo cæli lo-  
co defigi non vulgari & ipse lumine locu-  
pletari debuit. Atq; eadem est Curatorum  
salutis



salutis alienæ conditio; ita, ut tunc nonnisi non parum verbis & exemplis in animis hominum ad virtutem provehendis valeant ac proficiant, cum non modica & ipsi nec humili Sanctimoniam abundant.

Intelligent ii nubibus se non absimiles attestante Propheta: *Qui sunt isti, qui ut nubes volant?* Et has utiq; ni copiosis & ipsæ turgent humoribus, haud quidquam sterilibus glebis fecunditatis ac emolumenti allaturas. Ut non omittam illam Eliæ nubeculam: *Ecce* (inquit) *nubecula ascendebat de mari: & facta est pluvia grandis.* Non de modico utiq; lacu, sed de ipso mari, illam hausisse humores quos in terram sitientem effunderet: tuncq; defacto copiosum magno terræ emolumento profudisse imbrem cum se supra terram & mare propius cælo attolleret: non levi viris Apostolicis ad sublimiorem Sanctimoniam relicto illicio: tunc illos scilicet salutis animarum non parum profuturos, cum à terra terrenisq; avulsi non humili nec modicâ verum veluti ex mari hausta sanctitate ad cælum usq; sese provexerint.

Intelligent etiam, cum illa celebri arbore Apocaliptica commune aliquid sibiimet debere

Isai: 60.

3. Reg: 18.

Apocal: 22.

bere esse. *Ex utraq; (inquit) parte fluminis lignum vitæ afferens fructus duodecim, folia ligni ad sanitatem gentium.* Nimirum illorum etiam folia, id est verba, prædicationes, ac voces, tunc in sanitatem gentium evasuras, cum & ipsi fluvio copiosæ sanctimonix alluentur, fructibus excellentium virtutum ac meritorum onusti. Intelligant, frustra esse omnia talenta, omnes præstantissimas dotes curas laboresq; omnes, si sublimioris ampliorisq; virtutis laborent inopiâ. Intelligant, eximix sanctitati, adeo Thaumaturgam vim inesse, ut illa obstinatissimos animos expugnet, durissima pectora emolliat, effrenatissimas mentes cõerceat, efferratissimam cicuret barbariem. Hac Apostoli totum mundum Evangelicæ mancipavêre veritati. Hac tot Religionum Apostolici viri Divinâ in immensum propagârunt gloriâ Hac nostræ etiam societatis Herodës, Indos, Japones, Brasilos, & innumeros alios in agnitionem veri addoxêre Numinis: hac hæreticorum infregêre pertinaciam, peccatoribus resipiscentiam persvêre, orbi toti ac Ecclesiæ inter hostiles hæresum laboranti insultus attulêre salutem ac subsidium. Ita, ut hic etiam meritò locum habeat

beat id, quod Propheta de quopiam innuit:  
*Sanitas* inquit *in pennis ejus*. In pennis nempe  
 zeli Apostolici, quibus ille in sublimem eniti-  
 tur Sanctimoniam, sanitas tot animarum, sa-  
 nitas tot regnorum, sanitas orthodoxæ Eccle-  
 siæ, sanitas totius mundi.

Quod cum ita sit: proinde, si quid in  
 nobis etiam, hoc in puncto inertiae; si quid  
 dejectioris animi; excutiamus quamprimum,  
 nosq; ad sublimioris Sanctimoniae studium ac-  
 cingamus. Idq; nè abhinc vocationi ac cui-  
 cunq; obligationi nostræ, nè DEI cælitumq;  
 tum etiam tot populorum expectationi, nè  
 tot animarum saluti ex parte nostra deesse vi-  
 deamur.

## ADHORTATIO IV.

*Spectator mundus, censorq; Religiosi potissimum  
 nominis acerrimus, non vulgaris à nobis sancti-  
 monia exaltor est.*

MOTIVUM  
 IV:

**H**Actenus nobis non vulgarem Sanctitatem  
 religiosa suasit vocatio, suasere alia, ac etiam  
 obsequium & Cura Salutis animarum. Jam  
 ejusdem sanctimoniae, mundus etiam ipse sua-

H

for



for est. Ea scilicet illius natura ac ingenium, quod sicut eadem flagitia, quæ in se admittere consuevit, gravius ferat plectatq; in aliis: in suis sceleribus palpandis obstinatissimus, in alienis sive censurandis, sive puniendis acerrimus. Ita etiam quam in se ipso negligit aspernaturq; probitatem, in aliis eandem perlibenter habeat, ac severitatis exigat. Utamur igitur hodie nos quoque eodem ad nostrum propositum suatore: Illudq; perspectum habeamus: quod sicut idem mundus nostri spectator est Lynceus, censorq; Religiosi nominis, potissimum gravissimus, ita non vulgaris à nobis Sanctimonix severissimus exactor.

*Status Reli-  
giosus censu-  
ris mundi ob-  
noxius.*

Ea est illorum conditio quos natura, fortuna, superi sublimiùs posuere: ut passim in censores incurrant oculos, suorumq; omnium facinorum, mundum poenè totum lynceum habeant spectatorem: ita ut non tantum in minimos eorum naevos defectusq; accuratiùs advertat, sed plus etiam ab iis quàm ab aliis virtutis exigat.

Et quia religioso statui vix par alia in mundo sublimitas: hinc illud est, quod is etiam omnium poenè ora atq; oculos in se habeat conversos.

versos. Si de Principibus illud protulit Stoicus:  
*Vitam illorum perpetuam censuram esse*: Certè  
id de religiosæ vocationis hominibus longè  
verius. Ita ut vix sol ipse tot habeat spectato-  
res censoresq; quot unusquisq; vitæ religiosæ  
inquilinus. Planè unicuiq; idem hîc, quod  
soli contingit; cui à quopiam inscriptum:  
*Spektatur cùm deficit*. Neq; tot forsitan defi-  
ciente luna pulsati æris tinnitus olim auditi fue-  
re, quot hic obloquentium voces, quot calu-  
mniæ quot censuræ, ita ut postquam in publi-  
cis, privatisq; confessibus in mores vitamq; re-  
ligiosorum hominum sese exeruerint, tot simul  
æra tot tintinnabula, dicas cùm Satyrico pul-  
sari. Si olim ad oram vestis Sacerdotalis *singula*  
*mala punica singulis mista erant tintinnabulis*;  
certè vel unicum idemq; minimum ex omnibus  
malum à religioso admissum mille linguas so-  
nantesq; buccas, ceu tintinnabula habet sibi  
annexa, quæ ad levissimum motum & gestum  
reddantur vocalia. Non frustra in eadem veste  
Sacerdotali, teste scriptura, erat totus orbis  
terrarum, acu vel quocunq; alio modo depictus  
effictusq; eo hac in parte fortassis mysterio;  
quo pateat, cuilibet sacrationi personæ orbem

Exodi. 28.

Bartolus.

poene totum præsto ad latus adesse, ut singulos ejus actus motusq; observet: ita, ut sicubi, his omnino fidem illud inveniat: *Quoddamnis Ulfes suum à tergo Homerum habeat, errores ipsius non quidem itinerum sed vitæ in codicillos adnotantem.*

Mundus So-  
cietatis Cen-  
sor acervi-  
mus.

Si quis tamen status, si quæ religio mundo spectatori censoriq; obnoxia, profecto nostra, ac si sub infausto quopiam lidere nata Societas: ita ut quidquid oculorum quidquid linguarum quidquid crysium in orbe est, hoc totum in eam jurato odio congeri videatur. Ac si defacto (ut olim depravatis Romæ temporibus) *permissa* esset ceu publico jure promulgatoq; edicto, *deterriamo cuiq; licentia, impune probra & invidiam* in Societatem ejusq; personas *excitandi*: Atq; eo usq; mundi in eam censoria procedat severitas, ut in illa non tantum minimos etiam observet nævos eosq; in immensum exaggeret, ac velut in Commentarios referat: Sed quidquid etiam in ratione virtutis, quomocunq; vulgare aut mediocre foret, nequaquam dissimulet, nequaquam patiatur, omnia summa omnia sublimia exigat.

Planè



Planè hic quoad omnes etiam religio-  
 sas imò quascunq; spirituales personas locum ha-  
 bet, quod universim enuntiat Apostolus: *Spe-*  
*ctaculum facti sumus mundo & Angelis & ho-*  
*minibus.* En quot hic spectatores, ad quorum  
 nos desideria complacentias & gustus effingere  
 debeamus. Quid verò illi à nobis religiosis de-  
 poscunt? Nec dubium Angelos exigere an-  
 gelica, exigere cælestia. Verum quis crederet,  
 mundum etiam & homines, nihil mundanum  
 humanumq; , sed omnia ultra mundana, omnia  
 Sancta omnia Angelis similia requirere. Et ita  
 quidem ut vulgaria etiam ac mediocria in iis  
 respuere atq; proscribere videantur. Inde est  
 quòd S. Hieronymus in Epitaphio Paulæ ver-  
 ba Apostoli prædicta eo sensu legat: *Theatrum*  
*facti sumus.* Nempe Theatro quo Comediæ  
 vel Tragædiæ exhibentur, debere nos esse non  
 absimiles. Quanta enim ibi in exhibitoribus acto-  
 ribusq; inprimis, quanta inquam cura, quan-  
 ta sollicitudo, quanta præparamenta, quot im-  
 pensæ? idq; non solum, nè quidquam contin-  
 gat erronei, indecori confusi, sed etiam ut o-  
 mnia ornatissima, exquisita compositissima, in  
 voce, pronuntiatione, actione, gestu, ac in omni

1. Cor. 4.

*Durus etiam  
 exquisita  
 virtutis à quib;  
 buis Reli-  
 giosis & spi-  
 ritualibus  
 personis exa-  
 ctor.*

H 3

quo-

quoq; oris, oculorum, manuum, pedumq; ipsorum atq; totius corporis motu, in gradu supremo compareant. Jam in spectatore, quanta horum omnium expectatio; quam arrecti vultus, oculi, aures, cum quilibet eo se conferat, ut aliquid egregium, non vulgare, non obvium, audiat, videat, ediscat. Ita ut si è contra, tantillum eveniat minus exacti, minus ordinati, minus venusti, non satis eximii, illico pleno sequantur agmine expeditæ cryses, sinistra iudicia, molestum murmur, fastidia, sugillationes, depretiatio non levis: Nec verò alia mundi in nostras religiosas actiones arrecti intentiq; facies. *Theatrum nempe facti sumus mundo & Angelis & hominibus.* Hinc quanta ille expectatione tenetur, quanto inardescit desiderio, ut omnia à nobis defecatissima nihil defectuosum, omnia summa, nihil vulgare percipiat; tantâ nobis elaborandum curâ ac industriâ, ut nihil tale ejus exhibeamus oculis & auribus, quod nostra vocatione indignum, sua existimatione inferius merito censere possit; ut in hoc vitæ nostræ theatro unusquisq; nostrum velut Roscius in Scena compareat.

Et

Et in hanc profecto Scenam partemq;  
 Spectaculi in oculis Israëlitarum Moyles vene-  
 rat. Sed videamus quonam, hoc in theatro  
 successu? Redibat ille de monte Sinai à con-  
 fortio sermonis Domini: & ecce *Filii Israël* *Exod. 34.*  
*videbant faciem ejus cornutam.* Abulensis &  
 alii asserunt, fuisse non cornua, sed promican-  
 tes è capite Moysis binos splendentes radios.  
 Cur igitur illis non radii sed cornua visa? ni-  
 mirum non totam Moysis faciem, non totum  
 undiq; caput, splendore caelesti, nec toto etiam  
 adulto sole fuisse circumfufum, unus omnino  
 & alter radius hinc inde promicabat. En igitur  
 hæc ipsa censorio forsitan displicuere oculo, nec  
 tam pro evidenti diviniore indicio sanctitatis,  
 quam pro cornibus pro monstro Affricano vel  
 aliquo è Sylvestri faunorum grege reputata.  
 Is videlicet est censoris mundi genius, nihil nisi  
 magnum nihil nisi notabile à servis Dei expe-  
 ctare atq; exigere: ita ut si quid sua opinione  
 minus aut mediocre illis obveniat, proq; solari  
 v. g. verticem circumfundente Sphæra, aliquis  
 minor radiolus sese acuminet, jam hoc ipsum  
 sinistrè interpretari, magis magisq; attenuare,  
 ne seio quo detorquere consueverit. Atq; idem  
 nobi-



nobiscum etiam contingere solenne est. Si enim in nobis, non dico vitiosum, ac vituperabile, sed vel mediocre aliquid & obvium suspiciat; jam id ipsum severiore examinat iudicio, nec pro sanctitatis vel doctrinæ specimine, sed pro insigni defectu dedecore & probro reputat, omnia de nobis præsumendo maiora.

Dan. 2.

Patuit ea veritas longè expressius in illa Regis Babilonici Statua, quam abscissus lapis demolitus est. Aurea illa & argentea, magnâ eaq; principali parte fuerat. Parum tamen adhuc id lapidi, ipsi alioquin ignobili ac inculto visum. Parum: *quia caput erat aureum petusq; argenteum*, tanto magis quod *venter, & femora tantum ex ære*, pedes quoq; ex ferro nonnisi, partim ex luto. Atq; ideo fortassis in tam pretiosæ Statuæ ruinam sese præceps proripuit. Idq; quod non tota aurea aut argentea, non tota ex summo pretio conflata, sed quod aliquid etiam de mediocris pretii metallo, aliquid de luto habuerit. Ita nec aurum in illa argentumq;, æstimatum: postquam lutum, deteriusq; metallum in minore licet quantitate inventum esset. Atq; eadem omnino mundi Critici tot alioquin suis notati pravita-  
tibus

tibus nobiscum ratio, quod scilicet ille, omnia  
de nobis præsumendo æstimatissima : Si ali-  
quid defectuosi, aliquid lutei, imò etiam ali-  
quid minus æstimabilis, ceu inferioris metalli  
comperiat, illico omnes cryses depromat,  
omnes diras in nos moveat, linguas conciter,  
in ruinam nostri nominis & famæ juratus An-  
nibal.

Melior forsitan illius lilii conditio cui  
Sponsus Sponsam assimilare dignatus : *Sicut li-  
lium inter spinas sic amica mea inter filias* : En  
spinæ erant, nec nocuere lilio, nè pupugere  
quidem. Nempe hîc etiam lilium fuerat, li-  
lium omni ex parte candidum, longèq; pulcher-  
rimum lilium sinè macula, sinè nævo : deniq;  
illud non ex hortensi plebe, sed Rex florum.  
Decebat tantam pulchritudinem ac decorem,  
tantam sublimitatem dignitatemq; ea inter  
spinas reverentia. Nec aliud nobis quoq; ad-  
versus mundi cryses effugium. An non enim  
nos etiam, tot spinæ circumstant, quot infensi  
mordacesq; Zoili, qui in minimos nostros actus  
intentissimi, si quid in nobis vel maculosi vel  
plebei advertant, illico acriter pungunt, undiq;  
carpunt, famam nomenq; lacerant, animos  
cruen-

*Cant: 2.  
Adversus  
mundi cen-  
suras uni-  
cum reme-  
dium subli-  
mis Sanctitas*

crumentant, exprobrando id ipsum ac vitio vertendo quod sumus sicut cæteri, quod nihil supra alios habeamus agamusq;. Quid igitur ad hæc remedii? nisi ut lilia simus, tam defectus næviq; vel minimi expertia ac ignara, quàm etiam sublimitate & excellentia sanctitatis præ aliis conspicua, planeq; ceu *florum lilia Reges*: simus inquam, ut simpliciter dicam non plebeiis servi DEI, sed eodem servitio ac virtute Principes Regesq;. Ità ut etiam illud Iulii Cæsaris edictum ad amissim impleamus: *meos tam suspicione quàm crimine carere oportet.*

*Isch: 1. &  
Apocal: 4*

Sic defacto illa quatuor currui Gloriæ DEI mancipata animalia, de quibus illud prodigiosum recensetur, quod fuerint: *plena oculis antè & retro*: verùm suisne an alienis? si suismet propriis? non dubium quod nec alieni illis defuere oculi, idq; si non plures, certè non pauciores omnino. Scimus enim abunde, quàm totus poenè mundus in eos qui se DEI gloriæ dedicavêre promovendæ in eorumq; omnes actiones ac gestus vigiles circumferat oculos, ita ut iisdem antè & retro pleni esse videantur. Sed simul novimus etiam quod hîc vice versa, hæc eadem animalia censoribus mundi oculis



di oculis, ad omnem partem circumspectos  
 obicere oculos. Quid dico oculos: imò te-  
 stimonio Sacrorum interpretum, tot insignia  
 lumina, virtutumq; splendores, quibus cir-  
 cumquaq; ad prodigium collucebant. Idq; sat  
 efficaci exemplo, quam arte ac industriâ ad-  
 versus obrectatores ac Zoilos nostri nominis  
 procedendum? uti defacto visus processisse  
 Plato (de quo Anton: Serm: de contumelia)  
 cui cum quidam retulisset, repertos nonnullos  
 qui ipsum convitiis & maledictis insectarentur:  
 respondit: *At ego ita mores componam, ut illis  
 fides nulla habeatur.*

Hos ego interim Zoilos ranis illis Ægy-  
 ptiacis, de quibus Moyses ad Pharaonem,  
 censeo esse non dissimiles: *Et ebulliet (inquit)*  
*fluvius ranas, quæ ascendent & ingredientur*  
*domum tuam, & cubiculum lectuli tui, & su-*  
*per stratum tuum, & in domos servorum tuo-*  
*rum, & in furnos tuos, & in reliquias ciborum*  
*tuorum:* En quæ harum ranarum importuni-  
 tas, ita ut nihil ipsis inyium fuerit, nihil inae-  
 cessum, nihil tale quod illis non patuerit, quod  
 sua garrulitate non impleverint. Sola illis ea  
 fuere intacta, quæ notabilius excelsa, quæ

Exod: 8.

sublimius sita. Ideo non dicuntur ascendisse præcellas turres, summa ædificiorum tecta, sublimes speculas, sed nonnisi ingressæ domos cubicula, furnos, strata, mensas. Ranarum scilicet esse valles paludesq; incolere, domunculas serviles locis declivibus structas ingredi, illisque adrependo obstrepere. Sed sublimia illis vacua, ac immunia. Certè enim quis crederet ranam æmulo nisu cum sublimi aquila posse volatu contendere? aut in Cedris nidificare vel turribus? Nec alia obtrectatorum Zoilorumq; malignitas. Horum scilicet quoq; plena esse omnia. Non ab illis libera Regum augustalia, non privatorum domos, imò nec etiam religiosorum claustra, mensas, cibos, cubicula. Ita tamen ut hisce ranis illa potissimum non innoxie videantur infesta, quæ aut vitio foeteant, aut parum virtutis sublimitate attollantur. *Convitiis utiq; reprehensionem* (dicente Cleobulo apud Anton: & Max: Serm: de vituperio) *illos non attingere, qui secundum virtutem vivunt.*

Cum verò præ aliis, malignis ranarum talium incurfibus pateat Societas, ita ut planè nihil agat, nihil moliat, nihil in vita, & moribus

ribus præferat egregii cui non obstrepat:  
 Adeoq; eo usq; nos redigant ut ubi ( loquor  
 cum Stoico ) *vitarimus culpam , non tamen  
 sapere , effugiamus infamiam*. Quid itaq; hac in  
 parte consilii ? unum est illudq; efficacissimum,  
 ut non tantum eliminatis nævis omnibus , sed  
 omni etiam virtutis mediocritate posthabita,  
 eò nos sublimitate Sanctimonix collocemus,  
 quò nulla pertingat malevolorum contumacia.  
 Id faciamus proinde iuxtaq; gentium Aposto-  
 lum ad Rom: 13: *Abiciamus opera tenebrarum,  
 & induamur arma lucis sicut in die honestè am-  
 bulemus*. Nec enim certè adversus quovis lin-  
 guarum ac censurarum ictus validius ac victo-  
 riosius pugnatur quàm armis talibus lucidif-  
 simæ utiq; Sanctimonix ac virtutis. Nec quis-  
 quam solis etiam radiantia veretur spicula, quis-  
 quis omni virtutum honestate induitur &  
 effulget. Audacter aquila in Solem involat,  
 quia aquila est: Solus vespertilio & noctua  
 seu quicunque parum honestè vestitus lucem  
 diomq; fugit: *M. gnum* namq; etiam ( juxta  
 Cassiodorum ) *probitalis documentum est , ad  
 solent appellare*: Nec verò nobis quoq; alia  
 procedendi ratio servanda est, tum illud in-



super attenta cogitatione versandum, quòd  
juxta Senecam: *Nostra etiam facta dictaq; ru-  
mor excipiat; Et ideo nullis magis cavendum  
sit, qualem famam habeant, quam qui qualem-  
cunq; meruerint, magnam habituri sunt.* Quod  
si verò hoc ipsum ut par est reflexa mente ex-  
penderimus; absq; dubio nihil humile, nihilq;  
mediocre, unquam meditabimur. Ita omni-  
no non tantum DEO, vocationi nostræ, nomi-  
ni & famæ Religionis, sed Censori etiam mun-  
do exactoriq; severissimo satisfacturi abundè.

## ADHORTATIO V.

MOTIVUM  
V.

*Ratio vite activæ in plerisq; Religionibus ac  
etiam in Societate, non vulgariter Sanctos  
nos esse exigit.*

**A**Dhuc etiam nobis hodie mundus sublimio-  
ris nuper Sanctimonix lualor, sistit se in  
obtus. Verùm non ille jam censorio severus  
supercilio sed potiùs arridente, ad omnem hu-  
manitatem composito, plenoq; charitum vul-  
tu; ita ut nihil nisi affectus, nihil nisi juratas  
amicitias polliceri, nihil nisi omnium sincerita-  
tum, omnis benevolentix, omnium gratiarum  
cornu

cornucopiæ manibus præferre videatur. At  
verò sicubi hic certè timendus, vel maximè  
suspectaq; habenda omnia, ubi ad nos sibi met  
conciliandos hosce expedit *Danaos pacem &  
dona ferentes*: Plena scilicet hic esse omnia la-  
queorum, muscipularum, periculorum, frau-  
dium, quibus incauti tam facile capiuntur quàm  
nimis promptè mundi sese consortio & lenoci-  
niis permittunt. Quis autem crederet; vix  
magis quemquam alium, quàm Religiosas &  
quascunq; Spirituales Personas ac potissimùm  
nostram Societatem hisce tantis sive corporis  
sive animæ patere periculis. Illa scilicet est,  
quæ dum eidem vitæ activæ, ex vi sui instituti  
vacare, mundi q; saluti prospicere tenetur, tota  
quanta quanta est, intra mundum, mundanaq;  
consortia versari, totam se mundo exponere,  
totam ex assè impendere cogitur. Hinc autem,  
quot occasiones, ad internecionem noxiæ, quot  
salutis propriæ pericula, quot letalia scandala,  
quot spirituales eaq; inæstimabiles jacturæ?  
quid igitur adversum hæc suppetiarum atq; sa-  
lutaris auxilii? mihi credite: nulla re magis  
quàm sublimi Sanctimoniâ hic opus esse. Nec  
ego aliud in præsens suadendum afferò: dum  
illud

illud affirmo : ipsam rationem vitæ in Religio-  
nibus activæ, nihil potius, quàm non vulga-  
rem à nobis Sanctitatem exigere,

Minimè novum est, eos qui salutem  
alienæ navant operam, suæ non raro jacturam  
facere : nec pauca esse, ab ipsis etiam Aposto-  
lis ducendo initium, harum tam tristem tragæ-  
diarum exempla. Non aliter hic quàm pesca-  
toribus venatoribusq; contingere, qui piscibus,  
ferisque capiendis intenti, dum laqueos  
struunt; dum retia expandunt, dum hamos di-  
sponunt, sæpè iidem ipsi in casses incidunt, ita  
ut extremum etiam vitæ periculum incurrant,  
nec non in prædam & pastum eorundem ipso-  
rum piscium ferarumque abeant. Itaq;  
sicut illis non modica propterea circumspectio-  
ne, non mediocri apparatu, non levibus auxiliis  
opus, quibus se in omni tueantur discrimine :  
ita etiam eos ipsos, qui curam salutis alienæ su-  
scipiunt, non quæcunq; Sanctimoniâ, utpote  
unico adversus quæcunq; discrimina in vita acti-  
va præsidio, communitos esse necesse est.

Proverb. I.

Hoc enim Salomon illis verbis visus est  
innuere : *Frustra (inquit) jacitur rete ante ocu-  
los pennatorum.* Nimirum venatoribus solenne  
esse



esse retiâ distendere, casses disponere, struere insidias. Quod verò animalium quæ ferarum aut volucrum illis sese objecerit, involvere? Interim ex feris, solis ut plurimum hosce laqueos patere lepusculis, solis capreis, cervis, lupis; reliquæ animantium plebi. Ex volucribus, solis perdicibus, coturnicibus merulis, passerculis etiam, aliisq; ejusdem generis: idq; iis tantum quæ sublimiore volatu spreto pennisq; remissis in terram convolant. Jam contrâ sublime volantes aquilas, vigiles grues, perspicaces accipitres, frustra hæc omnia. Elephantos etiam leonesq; tum alias nobiliores feras eadem ludibrio habere. Nec alia laqueorum mundanorum conditio: & his scilicet eos illaqueari nonnisi, quorum vulgaris admodum, plebeiaq; & vix ultra terram provolans virtus est. Illos è contra eosdem impune transire ac evadere, quos pennata suplimiorq; Sanctitas sub cælum extulit.

At scimus etiam, quibusnam artibus, minores quantumvis feræ insidias eludant. Cant. 8. Inclamat Sponsa Sponsum: *Fuge dilecte mi* *Et as- simile caprea hinnuloq; cervorum super montes aromatum*: Et obsecutus defacto amicabiliter sese commonenti voci: Ut de illo pronun-

K cia-

ciatum esset : *Ecce iste saliens in montibus trans-*  
*siliens colles.* Verum quid illum ad hæc ipsa  
 compulit effugia ? novimus utiq; in capiendis  
 feris venatorum studia ac industrias : quomo-  
 do illi sylvas circumducant retibus, greges ca-  
 num venaticorum immittant, magno clamore  
 & strepitu pervagentur omnia, profundissimos  
 excutiant recessus, nihil intactum relinquant.  
 Felix hic hinnulus, felix caprea, si tempestivè  
 sibi consulens, quæsito effugio, obvia transi-  
 liendo, in rupes inaccessas evadat. Atq; ad si-  
 mile quid Sponsa Sponsum hortatur. Forsitan  
 illa mille laqueos, mille pericula, mille insidias  
 eidem structas, tot canes venaticos quot iura-  
 tos hostes illi imminentes advertit : en igitur,  
 ut in montes invios se recipiat, feriò nec serò  
 admonet. Nec profectò alia nobis etiam mun-  
 di laqueos evadendi ratio : O quot enim nos  
 quoq; qui vitam activam ducimus, quot in-  
 quam insidiis appetimur, quot circumdamur  
 hostibus & velut canum venaticorum moribus  
 exagitamur. Quid igitur hoc in passu consilii ?  
 Per montes aromatum à plerisq; intelligi subli-  
 mitatem virtutum. In hos itaq; saliendum  
 quàm primum ; imò etiam excelsiores quicunq;  
 transi-

transiliendi colles : hoc est non vulgares quique sancti non tantum quomodocunque amulandi, sed qualicunque etiam sublimitate posthabita, rara ac singulari admodum longe superandi eminentia virtutis. Idque si pericula, si tela & ictus, si letales morsus, si extremum exitium effugere in animo est.

Hisque plane passibus processisse visa celebris illa in Canticis Salomonicis anima: *Quæ* Cant. 8.  
*est ( inquit ) ista quæ ascendit de deserto sicut virgula fumi ex aromatibus myrrhæ & thuris. Univerſi pulveris pigmentarii delictis affluens innixa super dilectum suum.* Vitæ illa forsitan contemplativæ sese addixerat, & quasi longè à consortio hominum remota desertum incoluerat. Ex quo deinceps ad vitam activam inter homines processura: videte quonam se modo ad illam comparaverit? Quidquid scilicet esse poterat odorum aromaticorum quidquid aromatum, hoc est, insignium virtutum, id totum in se transtulit atque congeſſit. Quidquid etiam deliciarum, gratiarum ac donorum spiritualium, his omnibus affluebat abundè. Et cum neque his satis sibi videretur suffulta auxiliis, ipsi dilecto suo nempe Christo, tam sublimi utique su-



stentaculo niti voluit. Quibus verò hic præterea circumfusa comparuit luminibus? *Quæ est (inquit) ista quæ progreditur quasi aurora consurgens pulchra ut luna electa ut sol terribilis ut castrorum acies ordinata.* En quot hic iterum quantiç splendor, quot velut bellici apparatus quidnam inter hæc vulgare? ita scilicet illam instructam esse decuit: ita nos quoque comparatos esse expedit, quotquot vitæ activæ ac salutis animarum daturi operam, mundanæ nosmet arenæ commisimus.

Jerem. I.

Ita omnino Deus ipse suum Prophetam constitutum esse voluit, cum illum ad populi sui redarguenda scelera, à via prava reducendum deputeret: *Dedi te (inquit) in Civitatem munitam, Et in columnam ferream Et in murum æreum.* Præviderat etenim divina Sapientia quotnam illum manebant discrimina, quot ingruiebant insultus, quot parabantur machinæ. Neq; adversus hæc satis fuisse, quamcunq; , lateritiâ scilicet ut ita dicam, vel marmoreâ quantumvis virtutem. Hinc eundem non qualemcunq; arcem, vel domunculam quam glires vel Pigmæi subruerent, sed Civitatem munitatam omni commeatu omni ner-

vo, omnibus armis ac præsidio instructam: non qualem cunq; basim quam venti agitarent frangerentq; sed columnam ferream, stabilem sublimem cælo conterminam: non qualem cunque murum, quem Remus quispiam transiliret, sed murum æreum, murum omnibus machinis parem, hoc est excellentissima ac solidissima virtute, omni ex parte constabilitum in facie mundi comparere decrevit.

Quanquam quid mirum homines non vulgari indigere Sanctimonia, quo mundi pericula evadant; cum nec vulgarem Angelum, qui Apoc. 10. divina hominibus evangelizaret edicta mitti è cælo in terram necesse fuerit: *Vidi (inquit) Angelum fortem descendentem de cælo amictum nube. Iris in capite ejus, facies ejus ut sol, pedes ejus tanquam columnæ ignis, & posuit pedem suum dextrum super mare, sinistrum super terram, & habebat in manu sua libellum apertum.* En qualis hîc quàm non vulgaris nec vulgariter instructus Angelus. Adeoque quodnam hic & unde periculum? ubi micabat sol ipse in facie adversus quascunq; noctes ac tenebras, iris in capite adversus tempestates ac turbines. Nubes pro amictu adversus

K 3 *monstrum* quosvis

quosvis ardores ac æstus, columnæ igneæ pro  
 pedibus, adversus peccati lapsus & mundi lu-  
 bricum. Et si hîc & tantus tamq; omnigenus  
 in Angelo apparatus vix ad modicum in terris  
 hospite, quanta in homine perpetuo inter tot  
 discrimina rerum, mundi accelâ, virtutis omni-  
 genæ omnibusq; numeris absolutæ necessitas,  
 atq; exigentia? sicubi, certè hîc cum Messia apud  
 Prophetam quisq; necesse *induat pro thorace*  
*justitiam, sumat scutum in expugnabile equita-*  
*tem*: eaq; omni parte exquisitissima ac proba-  
 tissima. Ad instar illius (apud Cosmum Mega-  
 rensem præfat: in Josue) Scuti CrySTALLINI, quod  
 quidam suo antagonistæ, soli oppositum, re-  
 percussis in eundem antagonistam radiis in  
 duello objecit, eumq; sic ex arena pepulit, se-  
 met ab ictu defendit.

Mundus ipse utiq; mare est: quis autem  
 tenui phaselo sese marinis securè committat flu-  
 ctibus? est præliaris periculosa plena alex arena:  
 quis in hanc non satis armatus pollensq; viri-  
 bus audenter prodeat? est arcta admodum in-  
 numeris constans hostibus obsidio, quisnam se  
 illi, mediocri provisus com meatu includi pa-  
 tiatur? vita etiam activa est quædam prætereà  
 adversus efferatissimas belluas instituta Vena-



tio, est piscatio periculosissima, acerrima contra visibiles & invisibiles hostes suscepta pugna ac militia; quis illam modico apparatu ac levibus suffultus auxiliis subire audeat?

Planè hic idem recurrit, cuius olim apud Pòetam, Phàetontem currus sibi deposcentem Paternos Phæbus Pater commonuerat: Nempe quanta illum, toto illo tractu cælesti ab Oriente ad occidentem usq; terriculamenta manerent, quanta discrimina: *Per insidias* (inquit) *iter est ac monstra ferarum.* Per illos scilicet Arcitenentes Scorprios, Leones, Urso, Hydros, minaces cornibus tauros, Hippocentauros & sexcentos alios. Quibus omnibus impune superandis, vix se ipse Phæbus, parem esse inquebat, multò minus teneras adhuc nec adultas Phàetontis vires tot periculis suffecturas. Quodsi autem ibi super cælum inter innocuos ignes, ac sidera tantum discriminis, quid inter terrigenas, tot fraudium, tot machinationum simulationumq; architectos, quid in terra ipsa tot periculorum tot malorum, tot scelerum tot scandalorum officina: Ubi profecto verius, quocunq; te verteris: *per insidias iter est ac monstra ferarum.* Ita ut nec Zodiacus ipse  
imò

imò nec Affrica tot monstribus abundet. An non  
 etiam hîc *Leo est* & *quidem rugiens quærens*  
*quem devoret*: dæmon inquam infernalis? an  
 non Scorpius tot venenis & fraudibus imbutus  
 fallax mundus? An non insolens capricornus  
 caro: Quid ille arcitenens venerens cupido,  
 quid formosa mille monstribus nocentior virago?  
 Nec minori plerisq; amphora nocumento; ut  
 non memorem cancos illos à religiosa vita ad  
 sæculum retrogrados. Quis igitur non videat  
 non vulgari hîc certè, sed multum eximia  
 Sanctitate opus esse. Nec Phæætontes hic, sed  
 soles virtutis probatæ splendore ac meridie  
 adultos requiri, quos nullæ nebulæ extinguant,  
 nullæ eclipses inumbrent, nulla monstra ter-  
 reant, nulla frangant adversa, nulli de statio-  
 ne cælesti deturbent insultus, nullæ  
 prosternant machinæ, nulla ut  
 solem sagitta feriat.



## ADHORTATIO VI.

81

*Exempla Patrum uniuscujusq; Religionis domesticæ ad non vulgarem nos provocant*

MOTIVUM

VI.

*Sanctimoniam.*

**H**Actenus à mundo censore, ejusq; in vita activa periculis, sublimioris sanctimoniz admoniti sumus. Verùm nè illi soli nostros in sanctiore vita progressus debeamus, jam nos è mundi lubrico ad domesticum Larem, amans latere, revocat tantisper religiositas. Ne mpe etiam domi esse, quod nos ad eam virtutis sublimitatem, quam suademus, efficaciter extimulet, ac impellat. Et quia in omni foro exemplis nihil potentius; ita ut Pòeta asseruerit: *Nemo suos hæc est aula natura potentis sed Domini mores Casarianus habet:* hinc nobis quoque inde calcar, inde stimulus esto. Exempla ego in præsens, eaq; cujuscunq; religiosi ac religionis domesticæ, quibus utiq; vis motiva specialiter inesse consuevit, produco in medium: ex iis ipsis, nostri propositi pro non vulgari Sanctimonia, non leve deducturus argumentum.

L

Ma



Vis exemplo-  
rum profano-  
rum.

Plutar: in La-  
con:

Magnam esse ac poenē Thaumaturgam  
exemplorum præsertim domesticorum vim,  
omnis retro agnovit atq; experta est antiquitas.  
Scimus enim inprimis, quantum non pauci  
his iisdem aliorum exemplis profecerint. Hinc  
illæ etiam ceræ Majorum, hinc fumosæ paren-  
tum imagines, hinc illi posthumi heroum cul-  
tus & apothecoses, hinc erecti iisdem colossi,  
erectæ statuæ, hinc celebratæ historiis eorum  
memoriæ: Nimirum eo hæc spectabant omnia,  
ut quorum habebant vultus effictos in oculis,  
gesta legebant in paginis, famam & gloriam  
ituram per sæcula ex publico eorundem cultu  
æstimabant, mores etiam actionesq; in se posteri  
effingerent. Atq; ita ex ceris non cerea sed ferro  
robustior nobiliorq; auro, ex fumo non obscu-  
ra sed sole illustrior virtus procederet, ac supra  
Colossos & statuas sese erigeret sublimius. Huc  
planè spectabat Sparthanorum ille ritus ubi tres  
viscebantur chori, juxta triplex ætatis discrimen.  
Primus Chorus senum illud decantantium:  
*Nos quondam eramus inclyn bello viri.* Secun-  
dus Juvenum occinentium: *Nos ii sumus, fie-  
si velis periculum* Tertius puerorum in eas  
voces protoquentium: *Nos fortitudine pluri-*  
mum

*nam præstabimus.* Inter alios, Romanorum quoq; veterum, mos ille non illaudatus fuerat : quem postliminio restaurabant : ut scilicet inter solennes epulas celebratissima Majorum suorum gesta, & gloriosas memorias ad tibiam recantarent, destinatis ad hoc factitandum Seniorum gravissimis ut ea res non tam oblectationis, quàm institutionis speciem haberet : de quo more ejusq; fructu ita Valerius Max: *Quas Athenas, quam Scholam, quæ alienigena studia huic domesticæ disciplinæ prætulerim? inde oriabantur Camilli, Scipiones, Fabritii, Marcelli, Fabii.* Nec immerito Deutor: 32 Moyses: *Memento (inquit) dierum antiquorum, cogita generationes singulas. Interroga Patrem tuum, & annuntiabit tibi, Majores tuos & dicent tibi: Pariter quoq; Æneas suum ad virtutem instituens Ascanium quondam hisce commonuerat: Te Pater Æneas & Avunculus excitet Hector.* Nihil efficacius ad præclarissima quæq; lubeunda existimans, quam paternæ virtutis meminisse.

Et si hæc & tanta profanorum exemplorum efficacia : quid oro de Sanctioris vitæ exemplis censendum est? Illud certè de iis D.

*Vis exemplorum Sanctiorum.*

Basiliius: *Vita* ( inquit ) *beatorum hominum literis tradita sunt velut imagines quaedam viva, divina Reipublica ad bonorum operum imitationem proposita.* Non aliter quàm pictores assolent, dum ut suas depingant, alias excellentiorum pictorum pro exemplari sibi met ante oculos proponunt imagines. Aut quod Zeuxes fecerat, qui depicturus Junonem, quinque Virgines præ aliis formam conspicuas selegit, ut ex illis quod erat pulcherrimum in suam imaginem transferret, Hinc etiam Plutarchus convenientissime monuit: *Sicut* ( inquit ) *qui se communt, continuo specula aspiciunt: ita qui negotium feliciter & praeclare gerere cupit, laudatorum virorum exempla sibi proponat.* Uti huius etiam ipsius monuit Seneca Epist. 10. *Opus est aliquo ad quem mores nostri ipsi se erigant. Elige tibi virum, cuius tibi placuit vultus, & oratio, & ipsius animum ante te ferens & vultum semper tibi ostende vel custodem vel exemplum.* Et hæc est planè *Sapientia antiquorum*, id est exemplorum egregiorum indagatio, quam juxta Ecclesiasticum; *debet exquirere Sapiens,*

Ecclesi: 27

Nec:



Nec aliud mihi in præsens faciendum incumbit, ut scilicet eam in nobismet, quam non pauca alia suasere hactenus, Sanctimoniam effingam. Et certe quot mihi illico landatissimi viri Patresq; nostri incurrunt in oculos: quorum dum ego gesta innumera eaq; præstantissima tot voluminibus, & historiis edita evolvero, illud mihi intimari sentio, quod olim Daniel fraudes sacrificulorum detegens ad Regem Babilonicum: *Animadvertite cujus vestigia sint hæc?* ita ut cum eodem Rege mihi met etiam exclamandum sit: *Video vestigia virorum.* Et si verò ibidem in pulvere à Daniele consperso, visa quoq; fuerint vestigia, & mulierum & infantium, certe hic nihil muliebri nihil effoeminatum, nihil imbelles, nihil puerile, omnia adulta, omnia heroica omnia magnis viris ac heroibus accommoda & digna, quæ illi pro DEI gloria, pro salute animarum pro fama, & nomine suæ quisq; Religionis patrarunt insigniter, atq; nobis etiam *imaginem vitæ suæ.* (Ut olim suis moriens Seneca) *consignarunt.* Ita ut si olim Pythagoras ex uno vestigio in Olympico stadio impresso, totam Herculis Staturam per regulas proportionum investigare potuit;

L 3

profe-

*Exempla Patrum  
cujus-  
cunque Religio-  
nis qualia  
quanta?*

perfecto, tot nobis à Patribus nostris relicta  
 vestigia, quid aliud quàm non pigmæos illos  
 sed ipsos Alcidas cælo sustinendo non impares,  
 perspicuè demonstrant. Aristippus etiam cum  
 vi tempestatis in littus maris terræ cujusdam  
 ignotæ ejectus, notas ibi quasdam geometri-  
 cas in arena exaratas conspexisset in hæc verba  
 exclamavit: *Vestigia hominum video.* Et hæc  
 quidem notæ erant ut dixi Geometricæ, eaq;  
 terræ impressæ. Quodsi verò vidisset Patrum  
 nostrorum vestigia non telluri tantum, sed ipsi  
 etiam cælo impressa; vestigia inquam & e-  
 xempla, cælo Deoq; non indigna; an non ul-  
 tra homines eosdem extulisset, ipsis exæqua-  
 set diis, non homines sed Deos proclamasset:  
*Vestigia* inquiens, *DEORVM video.*

Prov. 30.

Tria captu difficillima Salomoni visa  
 fuerant: quantum autem penitus ignotum:  
*Via Aquila in Cælo, via navis in medio mari,*  
*via colubri super Petram, via viri in adole-*  
*scencia.* Nec miror eâ tunc ignorantia ac dif-  
 ficultate Salomonem laborasse. Si tamen he-  
 roum nostrorum vixisset sæculis, horum omnium  
 quæ ignoraverat, ad vivum expressa spectasset  
 vestigia. Idq; parum fuisset spectare, per ter-

ram

ram, petras & rupes inaccessas, necnon asperri-  
ma quæq; viam adinstar colubii decurrentes ac  
pæne reptantes illos Apostolicos Operarios, pa-  
rum per maria ad Indos & Japonès, aliasq; re-  
motissimas mundi plagas sæpè navium præsidio  
destitutos, per fluctus & procellas vectos, se  
navi se onerariâ usos. Plures etiam virilibus  
adultisq; passibus, in teneriori ætate virtutis  
stadium emetientes, ac planè viros in adole-  
scentia. Præter hos, plurimos quoq; insuper  
spectare potuisset, qui sublimitate Sanctimo-  
niæ, supra alios provecti, longè altiùs ipsis a-  
quilis sua vestigia posuère ipsiq; etiam inseruère  
cælo.

Defacto ego prima cujusq; Religionis  
ac nostræ etiam Societatis sæcula, cùm prima  
quoq; mundi ipsius ætate, in eo non modicè  
convenire adverto, quod Sacra Geneseos enun-  
tiat historia: *Gygantes (inquit) erant super ter-  
ram, isti sunt potentes à sæculo viri famosi.*  
Et utiq; habent hoc omnium rerum initia,  
quod rarioribus emineant exemplis, iisq; se  
commendent speciminibus, quibus ultiores  
earundem rerum progressus carere consueve-  
runt. Ita ut omnia in suis initiis quasi gygan-  
tea



tea mole assurgere, jam ulteriori temporum tractu ac decursa, velut in pumilionum mensuram decretere videantur. Sic mundus ab exordio sui Gygantes, etiam Pòetarum fabulis celebres recensēbat: postea successu ætatum, pænè in pigmæos decrevit. Nec alia Ordinum etiam quorumcunq; Religiosorum vicissitudo. Scimus utiq; quantum unusquisq; illorum inter initia creverit & in quid paulatim defierit: eâ forte quod, *sicut supremis culminibus, ita quoq; maximis Religiosis Ordinibus pænè in punctum desinere basilicum sit.* Hinc illa Cassini in aula monasterii acclusa Primorum ejus Ordinis Patrum capita, cum hac inscriptione: *Hi sunt filii primi Spiritus, pro quibus non erat necesse dicere Requiem.* Et certè an non etiam cujuscunq; ordinis, Primi Patres, omni ex parte Gygantes erant: iiq; verbo & opere potentes à sæculo? viri famosi, qui extra commenta Pòetarum, veriori Christi ipsius testimonio, subacti per Evangelium mundo, ipsi cælo vim intulere. Ita ut si verum dicamus, (quod olim exploratores terræ Chanaan retulere) illorum comparatione (saltem in futurum) velut locustæ videamur, sive gestorum magnitudinem sive virtutis sublimitatem spectando. Liceat

Liceat huc referre, quod textus Sacer de veteris testamenti Patribus pronuntiat: *Laudemus* ( inquit ) *viros gloriosos parentes nostros in generatione sua dominantes in potestatibus suis. Homines magni virtute & prudentia sua præditi, nuntiantes in Prophetis dignitatem Prophetarum: Homines divites virtute, &c.* An non verò nostris etiam Patribus idem de integro convenit elogium? Hinc ut omittam illos Antonios, Paulos, Romualdos, Benedictos, &c. nostros quoq; Lainios, Fabros Salmerones Canisios & innumeros alios, de Xaverio illud verissimè proclamatum: *quod nihil minus antiquis Apostolis gesserit.* Ideoq; Indorum & Japonum Apostolus merito appellatus. Quanquam in Lusitania illud nobis universim virtus ac zelus Patrum nostrorum contulit, quod hucusq; etsi multis in contra ex parte nostra expostulationibus non alio quàm Apostolorum appellemur vocabulo. Et id quidem nobis ad eruditionem insignem & exemplum. Uriq; enim P. Nicolaus Lancicius ( teste Patre Balbino in vita ipsius ) præter alios *Sanctum Patrem nostrum Ignatum magistrum Spiritûs & Sanctitatis appellabat, qui non obviâ Sanctitatem, sed se-*

M lectis-

lectissimam. *Eut ita dicam obryzam, & gemineam docuisset.*

*A magnis Patrum exemplis degenerare nefas.*

*Canti. 3.*

Quod cum ita sit licebitne ab hinc ab iisdem nostris Patribus nos esse degeneres? Ausus est suæ Sponsæ illud exprobrare Sponsus in Canticis: *Si ignoras te o pulcherrima, abi post vestigia gregum tuorum*: Ac si dixisset: vide quibus vestigiis insistas? expende quid te deceat? memineris originis conditionisq; tuæ, ita ut ea nihil indignum cogites, nihil unquam humile aggrediaris, Quodsi te tuamq; sortem ignoras, quodsi tui tuæq; celsitudinis vivis immemor: licet evagari quocunq;, quamcunq; tenere semitam, gregariis vulgaribusq; insistere vestigiis: etiam post vestigia gregum, id est sensualium partis inferioris appetituum, passionum, habituum, inclinationum serviliter abire. Et hoc ipsum defacto serio nobis etiam mente versandum esset: qua scilicet origine sumus: quo nos Patrum nostrorum vestigia ducant? nisi velimus nostræ sortis nostriq; ipsius, in probum ac dedecus proprii nominis vivere immemores atq; sic gregaria virtute contenti.

Uti olim ille Rex Ægypti Pharaon: qui cum se jactaret *Isai. 19. Filius Sapientum ego sum*



*sum Filius Regum antiquorum*, turpibus suis demeritis Majorum suorum suumq; sedavit nomen & gloriam. Pariter imbelles Israëlitarum qui Patrem se habere Abraham jactavere, nec ejus gloriosissimis institere exemplis. Cum & illud Christus in Evangelio ipsismet intonuerit; *Va vobis, qui edificatis monumenta Prophetarum.* Justa utiq; illis comminatio qui cum luculenta eximiarum virtutum extruerent ac in conspectu haberent memorialia; ipsas virtutes exprimere vita & moribus negligebant. Qualis quoque Jacobus Patriarcha fuerat: Stertebat ille gravi abreptus somno: Et dum videt *Scalam stantem super terram, ipsumq; cacumine tangentem cælum, tum Angelos sursum ascendentes per eam*: non tantum se illis per æmulam imitationem non adjunxit, sed nec etiam se è somno & loco proripuit, inani spectaculo, ascendentium in cælum generososq; ac sublimes gressus in scala figentium Angelorum contentus.

Non absimili certè hoc in puncto illis spicis & bobus Ægyptiis quas Pharaon somniaverat res peragitur censurâ: Uno scilicet agro *Genes. 41.* eoq; fertilissimo spicæ pullulaverant. Ecce ve-

rò ex istis priores *septem* plene admodum atq;  
*formosæ*: aliæ autem posteriores, *septem* t-  
*nues* & percussæ uredine idq; omnem priorum  
*devorantes pulchritudinem*: Præterea una ea-  
 demq; ripa fluminis, iisdem pratis virentibus  
 boves pascebantur. Interim ex his etiam:  
*septem pulchra* & *crassa nimis*, aliæ autem *to-  
 tidem fædæ confectæq; macie evasere*. Ubi si  
 iusta omnino tam inspicias steriles, quam in  
 boves macilentas indignatio: quis nobis etiam  
 vitio non verteret, si dum eâ vocatione, eâ  
 omnimoda sorte iisdem spiritualibus auxiliis  
 cum Primis nostris Patribus vivimus ac susten-  
 tamur, nec tamen eâ plenitudine, ea pulchri-  
 tudine, & crassitie abundamus virtutis, omnem  
 ab iisdem nostris patribus diligentissimè ac la-  
 boriosissimè conquistam nobisq; relictam turpi  
 inertia absumendo famam & gloriam,

Illud planè hic nobis esset metuendum  
 probri, quod olim degeneres à suis maioribus  
 Romani retulerant. Solebant illi in vestibulis  
 domorum imagines clarorum virorum, qui ibi  
 quondam habitaverant statuere & quidem cum  
 spoliis armisq; quæ hosti diripuerant, cum Co-  
 ronæ insignibus præmiisq; quæ obtinuerant à  
 Repu-

Republica à Senatu. Neq; cuiquam fas erat  
ea decora refigere. Sed ( ut ait Plinius ) *lib: 35. c. 2.*

*Triumphabant etiam dominis mutatis ipsæ domus. Et erat hæc stimulatio ingens, exprobrantibus testis quotidie imbellem dominum intrare in alienum triumphum.* Quid autem imbellius nobis ipsis in tot Patrum nostrorum toto orbe prolatos intrantibus triumphos, nec ex parte nostra ullum simile virtutis heroicæ specimen exhibentibus. Eo crimine quod nostri similibus appingit Chrysostomus: *Crimen (inquit) est habere exemplum domesticum & non imitari virtutem.* Eoq; pariter dedecore quo Athenienses quoq; laborabant, qui cum excellentes majores habuissent, ipsi non tantum ullis egregiis inclarescebant facinoribus, sed imò plurimis infecti fuere flagitiis, ita ut illud de iisdem à Julio Cæsare prolatum sit: *Cum multa deliquerint Athenienses, nonnisi à mortuis eos conservari:* Hic planè locum habet quod Deus de Israëlítico populo ad Prophetam: *Ostende eis templum ut confundantur:* Et si unum illud ex quo tam magnificum amplum sublime splendidum Israëlitarum confusione serviebat. Quis

Xiphilinus.

**M 3** nobis



nobis rubor ex tot collucentibus insigni San-  
ctimoniâ ( Patres nostros loquor ) Sacrariis ?

Utinam proinde tantum effugiamus de-  
decoris , intelligamusq; aliquando tam præcla-  
ra Heroum nostrorum exempla eidem nobis  
debere esse usui , cui olim fuerant virgæ illæ  
discolores à Jacob ovibus concipientibus ante  
oculos propositæ , ut scilicet similes fetus con-  
ciperent parerentq;. Reassumamus proinde si-  
mile vestimenti genus quo Aaron nixit ; *In*  
*veste poderis* ( inquit Sapiens ) *Magnalia Pa-*  
*rentum erant sculpta* : Et hæc certè ipsa , id est  
egregia Patrum nostrorum exempla in nobis  
nostrisq; actibus cælo & mundo spectanda eni-  
tescant nihilq; illis dissimile appareat Ducto  
etiam à Boleslao Crivousto Rege Poloniarum  
exemplo qui in usu habuerat parentis sui è collo  
super pectus suspensam effigiem circumferre ,  
cum eâ ad ejus aspectum in cujuscunq; aggressu  
negotii allocutione : *Absit Pater ut te aliquid*  
*indignum geram* : Intelligamus id nobis planè  
agendum esse quod Jacob de utero matris egre-  
diens, idemq; natus minor egerat ; nempe quod  
*fratris majoris plantam tenens*, eundem protin-  
us in lucem secutus fuerit. Sequamur & nos  
itaq;

Sapient. 18.

itaq; tam præclara Patrum tenentes ac premen-  
tes vestigia. Et si vulpem aliquando vestigia  
ingredientium ad Leonem & non egredientium  
animalium terruere, nos vestigia prædicta pro-  
vocat invitent & ducant. Sint nobis præ-  
oculis Patrum eorundem exempla velut illæ  
apud Jones majorum statux, quibus inscri-  
ptum fuerat: *Salve, Responde*: per id succe-  
daneis posteris inculcando, ut domos suorum  
avorum Ingressi, velutq; à ceris & statuis eo-  
rundem salutati, non dissimilibus responderent  
facinoribus. *Si electorum filii sumus*, loquor  
cum D. Gregorio, *restat necesse est ut per eo-  
rum exempla gradiamur*: Atq; sic (uti Tiberius  
Cæsar à Mauritio Filio expetit) *sepulchra  
eorum virtutibus nostris exornemus*: Quorsum  
enim defacto tot & tanta ab illis gesta, nisi ut  
nos quoq; similia audeamus, idq; sentiamus ex  
animo: ideo illos præivisse ut nos sequamur,  
ideò tot ardua, tot aspera, tot difficilia per-  
pessos; ut nobis expeditiorem ad heroicos passus  
viam redderent: ideo in tam sublimem San-  
ctimoniam eluctatos; ut nos omni similium au-  
suum desperatione ac inertia excussa, ad parem  
virtutis sublimitatem nolumq; provocarent.

Id

Id igitur nobis agendum quam primum, illudq; Primis nostrarum Religionum auctoribus, ac Sancto etiam Patri nostro in omnes actus nostros intentissimo præstandum Solatii, quod Aquilæ de suorum pullorum volatu sibi met applaudenti inscripsit quispiam: *Mei (inquit) non degenerant.*

## ADHORTATIO VII.

MOTIVUM  
VII.

*Exemplis externis Sæcularium DEO & virtuti  
solidè famulantium non vulgaris suadetur  
Sanctimonia.*

**I**Terum exemplis non vulgarem promove-  
mus Sanctimoniam. Hæc tamen jam non  
è domesticis penetralibus, non è Religiosorum  
Claustis, non è severioris observantiæ ascete-  
riis, non è profunda Thebaide, non à Bene-  
dicto, Basilio, Antonio, Romualdo, iisq; sive  
Ascetarum sive Eremicolarum Antesignanis,  
aliisq; vitæ Religiosæ rigidis cultoribus; sed à  
mundo ipso, à sæcularis vocationis hominibus  
in præsens petimus. Nimirum habet etiam  
mundus, quo Sanctissimis ordinibus sese com-  
paret: habet periculolum hoc mundi mare,



ut non solos virtutis scopulos, non solos laqueos, non sola corporis & animæ pericula intra se recenseat, sed gemmis etiam hoc est insignibus sublimioris Sanctimonix exemplis gloriatur. Hæc ego igitur nobismet ante oculos proponenda suscipio; idq; ut rubore quodam, ac verecundia succensi, tanto efficacius ad nostri propositi metam nosmet convertamus.

Habent hoc generosiores animæ, quod nulla re magis ad eximia quæq; quàm à magnis aliorum exemplis, incusso sibi rubore & confusione excitentur. Ita ut omnino verum sit quod à quopiam prolatur: *Æmulatio est calcar ad capeffenda ardua & difficilia.* Juxta verò Plutarchum: *Vt non est verus amor, qui caret zelotipiâ ita non amat vehementer virtutem, nisi ardeat æmulatione recte factorum ab aliis:* Quod ipsum ducta ab equo similitudine apud Pœtam declaratur: *Tunc bene fortis equus reſerato carcere currit: cùm quos prætereat quosve ſequatur habet.* Hinc ſcimus quantum Æmula Romæ Carthago, ipſiſmet Romanis ad virtutem profuerit, ita ut Roma putaret tamdiu ſuorum Civium Fortitudinem non caſuram, quamdiu Carthago ſtaret, & ruituram illico, ſi illa cor-

N

rueret.

rueret. Idq; ex eo quod quantum ruboris ex Carthaginensium fortitudine Romana capiebat juvenus, tantum inde incitamenti ad similes ausus referebat. Jam Alexander Macedo quantum ex solo Achillis tumuli aspectu commotus? idq; ut ait historicus: *Studio gloriae & æmulatione virtutis*: Julius Cæsar ex aspectu simulacri ipsius Alexandri? ita ut in illud proruperit: *Nos autem quid?* Ut non memorem Themistoclem. Miltiadis trophæis semet ad similes ausus excitantem. Zeuxem & Parthasium in arte pictoria mutuae æmulationis impulsu famâ per orbem redditos celebres.

Nec aliunde est, quo DEUS ipse per Prophetam, Sidonem ad resipiscentiam extimulat ac provocat: *Erubescere* (inquit) *Sidon ait mare*: Et certe non pauca forsitan mare invenisset objicienda Sidonitis, si loqui potuisset. Verùm unde etiam nobis Religiosis jussum pudorem posset incutere videamus? Illud ego interea adverto, quod Psalter innuit: *mirabiles* (inquit) *elationes maris*: Quid enim defacto mirabilius? quàm ad modicum venti flatum mare commoveri intumescere, ultra nubes fluctibus, in immensum assurgere, ac panè

panē cælo ipsi se inferre. Et hoc ipsum est ;  
 quod non Sidonem tantum sed nos etiam Re-  
 ligiosos meritissime facit erubescere : in quos  
 cū tot & tanta Divinior Spiritus exerat flami-  
 na , interim turpi detenti inertia , vix ad hæc  
 commovemur animo , vix nos è terra in altum  
 modicè proripimus , nec unquam satis torpidæ  
 mentis nostræ excutimus malatiam. Et si per  
 mare communi & trita admodum interpretatio-  
 ne mundum intelligimus ? quanta etiam nobis  
 inde ruboris provenit materia , quod à munda-  
 nis quoq; hominibus hac in parte tantopere su-  
 peremur. Quot enim sæculares homines insi-  
 gni admodum supraq; cælum ipsum provectâ  
 Sanctimoniâ celebres novimus ? quot inter  
 mundi laqueos, inter mille delinquendi occasio-  
 nes ac illecebras, inter continua scandala edu-  
 catos; hos tamen eâ effloruisse virtutis laude  
 ac si inter Eremitoria, inter Asceteria strictissima  
 vitam exegissent. Quales illi Henrici , Ludo-  
 vici , Eduardi , Casimiri , Elsearii & innumeri  
 alii terræ cæloq; cogniti. Et id omnino in hunc  
 locum S. Gregorius 3. part. Pastor. cap. 29.  
*Quasi per vocem maris ad verecundiam Sidon*  
*adducitur , quando per comparisonem vitæ sæ-*



cularium atq; in mundo fluctuantium, ejus qui DEO dedicatus, & quasi munitus & stabilis cernitur, vita reprobatur.

3. Reg. 18.

Planè hic locum habet illa Eliæ nubecula: *Ecce* (inquit) *nubecula parva ascendebat de mari & facta est pluvia grandis*. Non illa videlicet de quopiam Paradisi emerferat fluvio, non de illo flumine vitæ Apocaliptico, non de aquis super cælestibus aut de Nilo saltem, ortum vaporesq; traxerat: sed de mari falsedinis & amaritudinis pleno, eoq; non ubertatis sed procellarum nonnisi sterilium, parente: *Ecce* tamen ultra mare terramq; sese attollens, quàm eximios de se effudit fructus, protulit solatia: *Facta est* inquit *pluvia grandis*. Atq; eò etiam ipso mundanorum illa hominum retulit symbolum, qui cùm suam sterili mundo solasq; spinas & tribulos germinanti conditionem debeant, nec iis quibus Religiosi homines abundant subsidiis ac spiritualibus fomentis; interim tamen sæpe uberiores virtutum proventus exhibent; sæpe ampliori divinæ gloriæ suarumq; animarum emolumento deserviunt. Seu etiam velut: *Lilia interspinas sanctimoniâ efflorescunt, sicut malus inter ligna sylva-*

*Sylvarum* dignos DEI palato fructus proferunt. Non absimiles illi spectaculo quod Moyfi in rubo exhibitum fuerat: *vadam* (inquit) & *videbo visionem hanc magnam*: quænam vero illa: Respondet Philo: *E. medio præmicabat. Forma quædam pulcherrima nulli visibili similis.* E medio inquam non Palatii non regalis horti, non nobilioris hortensis arboris, sed Sylvestris ac spinosi rubi.

Hinc advertite, quo Christus suorum Discipulorum provocet oculos: *Considerate* (inquit) *lilia agri*: Eccur verò illos ad lilia hortis pomariisq; acclusa attentius spectanda non invitat? Hæc nempe intra omnia comoda & subsidia crescere, intra cogitabilem culturam ac providentissimas hortulanorum manus versari, his omnem curam laboremq; impendi, omnem custodiam ac vigilantiam adhiberi, extra omne periculum, extra omnem insultum, ac auræ etiam noxiæ afflatum, eadem longè degere: atq; sic similitudinem hominum religiosorum in se referre. Illa è contra, utiq; lilia agri, omni culturâ ac providentia destituta evirescere, nullâ sui curâ & labore propagari, omnibus undiq; patere periculis

ac incurſibus, omnibus obijci tempeſtatibus  
& incommodis, ventorum etiam quorumcun-  
que acerrimæ hoſtilitati exponi: ita ut cuius  
liberum ſit, decerpere arrodere exſcindere  
conculcare, nullis utpote ab omni parte ſepi-  
mentis clauſuris, cuſtodiis defendentibus. Ideo-  
que hæc eadem ſæcularium ſtatum ac vitam  
appreme in ſemet exprimere. Animadvertite  
tamen, quidnam de talibus liliis Chriſtus ſen-  
ſerit? *Nec* ( inquit ) *Salomon in omni gloria*  
*ſua ſic coopertus eſt ſicut unum ex iſtis.*  
Ubi quantus exinde Salomoni illi per totum  
orbem glorioſiſſimo pudor & confuſio, quis fa-  
cile non intelligat? nec verò minor nobis e-  
tiam rubor, dum à ſæcularis vitæ hominibus,  
eâ ſanctitate in qua palmam cuius præripere de-  
beremus, noſmet turpiter vinci permittimus,  
ita ut Chriſtus ipſe ſæcularium exempla, veluti  
lilia agri, ad juſtiſſimam noſtram confuſionem,  
nobismet ante oculos exhibere videatur.

Ita certè ſicut Judæis electo utiq; DEI  
populo non injuſta confuſio fuerat, dum genti-  
les tres Magi, plusquam illi, licet ab unica ſtel-  
la de nato Meſſia calitus illuminati, hunc  
ipſum ſedulo apud eodem progenitum inqui-  
rerent



ferent, inventumq; muneribus colerent, quem  
 ipsimet turpiter inter tot Prophetarum oracula  
 velut sexcenta lumina cæcutientes, apud se  
 hospitantem ignorarent. Ad quod D. August:  
 Serm: 2. de Epiphan: *Hæc (inquit) Magorum  
 illuminatio magnum testimonium cæcitatæ extitit  
 Judæorum. In terra eorum isti requirebant,  
 quem illi in sua non agnoscebant* Ec. Heu verò  
 longè majorem Religiosorum hominum con-  
 fusionem quod non raro à sæcularibus, illumi-  
 natione circa divina & spiritualia, tum cog-  
 nitione DEI proindeq; ejus ipsius amore & cultu  
 longè superentur.

Quamquam liceat hic tum ad illas vac-  
 cas Philistæas, arcam DEI in Israël revehentes,  
 tum ad illos boves Israëlitos eosq; Sacerdota-  
 les sub eadem arca calcitrantes advertere. De  
 illis imprimis, illud in scriptura legimus: *Tol-  
 lentesq; duas vaccas, quæ lactabant vitulos,  
 junxerunt ad plaustrum, vitulosq; earum conclu-  
 serunt domi. Et infra: Ibant autem in dire-  
 ctum itinere uno gradiebantur per gentes, &  
 mugientes, & non declinabant neq; ad dexteram  
 neq; ad sinistram.* Dignæ sanè omni admiratio-  
 ne ac encomio istæ Philistinorum gentiles vac-  
 cæ;

1. Reg. 6.

2. Reg. 6.

cæ: quod tam fideliter tam exactè tam constanter arcæ DEI ministraverint. Non illas domesticæ caulæ, non socii greges, non relictæ domi lactentes vituli non eorum ejulatus, à diviniori retardarunt ministerio: ita ut non tantum tædio victæ non redierint, non tantum incommodo itineris, ac onere plaustrî defatigatæ non subsisterint, non tantum non deflexerint vel minimum, sed nè retro quidem obtutus verterint: constantissimè ad præfixum terminum anhelantes: tunc nonnisi capto respirio, postquam illum tenuère. Idq; sine ullo præduce, sine directore sinè flagello. Aliter verò longe, boves illi Isràelitici, boves arcæ ministerio consecrati se gesserant. Juncti quoq; ipsi ad plaustrum, in quo arca DEI fuerat deposita. Vix iter ingressi, ecce illico in hanc & illam partem deflectere, calcitrare illico, flagella non ferre, jugum excutere, ac etiam ipsi arcæ periculum facere, nisi illi cadenti Osa Sacerdos manu admota opem attulisset. Ubi quis non indignetur, his bobus Isràeliticis, tam Sacro usui deputatis ad idq; unicum enutritis ministerium: Illisq; vaccas illas Philistæas ac gentiles longè non præferat? Nisi quod nos etiam

Reli-

Religiosi, planè eòdem laboremus probro eodemq; vitio. Cùm enim soli Sacratiori mancipati jugo & ad hoc, tot DEI gratiis ac beneficiis enutriti, omnibus aliis curis ac sollicitudinibus vacui, toto conatu & viribus, divino nosmet deberemus impendere obsequio, atq; sic ad supremæ Sanctitatis terminum rectâ contendere: ecce nos calcitramus toties, toties deviamus ac retro cedimus, jugum hoc divinius non semel excutimus, adeoq; nimis languidè ad metam præfixam, nimis perfunctoriè nimisq; inconstanter provehimur. Utinam nobis rubori essent, tot sæcularis vitæ homines, longè in divino alacriores obsequio, quos non curæ domesticæ, non numerosa pignora, non sollicitæ victus & amictus rationes, à studio virtutis retardant. Quanta illis peccatorum fuga, quam scrupulosa, nè in quoquam devient conscientia, quam seduli in via virtutis progressus, quanti ad eximiam etiam Sanctitatem nisus, quanta in proposito pietatis suscepto constantia, ita ut non tantum pleriq; illorum religiosos æquare sed etiam longè superare videantur.



Non



Proverb. 6.

Non frustra quispiam piger in scriptura vadere jubetur ad formicam, ubi deposita ignavia laborem ediscat: *Vade* (inquit) *piger ad formicam*: Certè enim idem sibi intimari putet tepidus quicunq; Religiosus. Quidnamq; aliud illi homines sæculares laboriosi rudes plebei: quam innutritæ laboribus oneribusque formicæ. Interim ab illis etiam habent quod ediscant religiosi inertia dediti. Quàm enim indefessum in horum plerisq; elucet sanctimonie studium, quam elaboratæ virtutes, quanta omnium adversorum onerumq; tolerantia, quam bene abundeq; provisos bonorum operum meritorumq; commeatus, quanta simplicioris aliàs mentis illuminatio, ita ut illi ipsi toties, quibus eorum perspecta conscientia, tantam in tam abjecta & humili conditione virtutis sublimitatem suspicere & admirari cogantur.

Illud verò mirum quò Sponsam etiam Sponsus ablegat? *Si ignoras* (inquit) *te o pulcherrima, abi post vestigia gregum*. Quæ autem oro eadem vestigia? an non hominum sæcularium? ad quæ relegenda in persona Sponsæ nos ipsimet Religiosi à Sponso nostro Christo

sto non invitamur modo, sed etiam propellimur ac protrudimur, pari rubore doloreq; quo insignissimus ille vitæ austeritate & Sanctimonia Antonius ad unum ribicinem insperata comparatione relegatus. Aut quò Abbas Silvanus in vitis Patrum lib. 5. de compunctione, ex raptu ad se rediens, ac flens dixit: *Ego ad iudicium raptus sum & vidi multos de habitu nostro euntes ad tormenta, & multos seculares euntes ad regnum.* Abbas quoq; Alexander ita se excitabat: *Vae tibi Alexander! quanta erit confusio tua, cum ceteri coronabuntur.* An non verò seculares illi præ Religiosis & ascetis, imò Eremitæ etiam cultoribus?

Horum igitur saltem exemplis nos quoque discamus sublimius eniti, illorum comparationibus sapere, iusto ab iis incusso rubore ad egregia quæq; stimulari: Alioquin ni hic nostram satis erubuerimus inertiam, formidandum nobis, nè dies ipse iudicii, qui Religiosas virtutes cum secularibus palàm conferet, longè gravius cogat nos erubescere, ac irremediabiliter confundi.

## ADHORTATIO VIII.

MOTIVUM  
VIII, *Exemplis sæcularium mundo & vanitati mili-  
tantium non vulgaris Sanctimonix cura  
suadetur.*

**N**ondum satis rubori datum; adhuc illum  
etiam exempla sæcularium accendunt.  
Verum longè hæc diversa à primis. Illa scili-  
cet DEO virtuti Sanctimonix militabant: ista  
mundo terrenis vanitati mancipata, illis se ex  
integro dedicant ac debent. Hæc igitur ipsa,  
ad nostrum iterum ruborem, pariterq; excita-  
mentum in præsens exhibeo, ut his saltem exem-  
plis non vulgaris Sanctimonix curam & stu-  
dium in nobismet promoveam.

Illud est mundi vanitatisq; ingenium;  
quo se in oculis hominum depingit effingitq;  
insinuat in animos: Nempe quod in illos ve-  
lut præstigiis agere videatur, eousq; infasci-  
nando eosdem, ut cæco pæne impetu, ac si  
philtro epoto; in omnem ejus amorem & ob-  
sequium rapiantur. Hinc ea etiam est generis  
humani cæcitas quod longè plura longeq; ma-  
jora, pro mundo terrenis vanitate quam pro  
DEO virtute Sanctimonia merito præmioq;  
æterno aggrediatur, impendat sustineat. Hu-



Huius verò ipsius in posteris Nòë post diluvium turris Babel ædicatoribus evidens documentum esto. Audiamus quid illi secum consilii ineant, quid moliantur? *Venite inquit faciamus nobis Civitatem & turrim, cujus culmen pertingat ad cælum & celebremus nomen nostrum*: Ubi quis non advertat: quanta huiusce operis futura erat sublimitas? hinc quale profundum, qualis item latitudo ac circumferentia? Unde ulterius facile quisque conjiciet, quantis hic laboribus, quantis curis studiisque quantis impensis opus fuerit? Verum quænam tantorum conatuum intentio, quis finis? non alius scilicet quam sola & unica vanitas, nimium evanida proprii nominis celebratio. Huic uni tantum sudarum, tantum impensum est: Ut inquit *celebremus nomen nostrum*. Utinam verò has tantas curas labores ac impendia ad sublimem potius cæloque conferminam virtutis & Sanctimonie fabricam convertissent; certè longè citius eam eduxissent in fastigium, plusque sibi gloriæ, plus emolumentum comparassent, nec tantis eguissent laboribus tantoque ærario.

O. 3.

Utinam

Utinam & ille Nabuchodonozor hac etiam in parte non desipuisset, illud superbè, & jactabunde ad semetipsum proloquens: *Nonne hæc est Babilon magna? quam ego ædificavi in domum Regni in robore fortitudinis meæ, in gloria decoris mei.* Quid enim lucri hinc etiam ille retulit? nisi quod eam sibi, quam in nomine præfert Babilon, extremam videlicet confusionem, in bovem transformatus consci-  
verit. Melius egisset longè, si pro cælesti magis Jerusalem quàm pro Babilone terrena, tantum impendisset, proq; illis turribus ac propugnaculis, quæ nubibus admoverat, ipsemet sublimitate eminuisset virtutis. Huc illa mundi miracula, huc Ægyptiorum Regum Mausolæa ac pyramides. Huc illa amphitheatra, huc Colossi ultraq; nubes porrectæ moles. Quas etiam quid profuit prope cælum attollere, se autem deprimere infra terram. Quid profuit immortalitatem nominis tot sustentaculis fulciri, omnem interim boni honestiq; rationem turpiter corrumpere. Quid profuit in posthuma mortalium versari memoria, mortem autem animæ propterea oppetere sempiternum. Et hoc tamen ipsum est: quod nos non mediocri  
rubore

rubore afficiat: idq; ex eo: quod cum illi tot  
& tanta pro vanitate laborassent, tamq; subli-  
mes pro ea gessissent spiritus, quos tot structu-  
ris ultra nubes prominentibus atq; impendiis ac  
sudoribus testati sunt: Nos interim infra jacea-  
mus, virtutis non dico mediocritate sed extre-  
mitate ipsa sordidè contenti: nihilq; dignum  
Cælo, dignum Æternitate, dignum DEO,  
moribus profiteamur ac vita. Non dissimili  
hinc nostra confusione illi ipsi, quam Themis-  
tocles Atheniensi militiæ ex occurso duorum  
gallorum gallinaceorum inter se pertinacissime  
pugnantium incutere voluit: *At hi* (inquiens)  
*neq; pro Patria, neq; pro diis familiaribus pu-*  
*gnant, neq; pro gloria, neq; pro libertate, neq;*  
*pro liberis.*

Nè tamen illi vanitatis jurati assecræ,  
solis ædificiorum ac turrium fastigiis sui excel-  
sitatem genii testari viderentur: liceat ad alias  
eorum impensas progredi. Exod: 32. Isrâelitæ  
per Moysis absentiam non modicum ausi, ad  
Aaronem magnis vocibus clamavere: *Fac no-*  
*bis deos qui nos præcedant:* Inaures ille aureas  
ab omni multitudine sexus utriusq; ad id operis  
præstandum postulaverat. Nec in his ulla cun-  
ctatio:



Statio : omnia non tantum ad sufficientiam,  
 sed etiam ad abundantiam contributa : in  
 ignem projecta : *Et egressus est vitulus*. En  
 quanta liberalitatis effusio, quantæ consequen-  
 ter tantæ multitudinis in unum congestæ im-  
 pensæ ? Sed quo tandem ista ? nimirum non  
 pro DEO, non pro diviniore aris, non pro  
 sanctioribus delubris sed pro vitulo. Ventum  
 hic quoq; fuerat, breve post temporis interval-  
 lum ad illum celebrem, mirificum, letales solo sui  
 aspectu perlanantem morsus, ac ipsius Christi  
 in se referentem figuram exaltatum in deserto ser-  
 pentem. Fabricandus ille etiam à Moysè fue-  
 rat. Qua vero materiâ quibus impensis ? *Fe-  
 cit* ( inquit ) *Moyses serpentem aneum*. Ve-  
 rum ubi aurum, ubi in aures aureæ, ubi illæ  
 tam profusæ in vitulum opes ? Ea scilicet est  
 hominum vecordia, quod se plus uni vitulo,  
 lasciviæ ac voluptatis symbolo, plus mundo  
 plus carni, plus vanitati quam DEO ac virtu-  
 ti impendat. Et si huic & tantæ indignamur  
 amentitiæ ; nostræ etiam simul in DEUM tena-  
 citati indignemur necesse est : quod cum sæcu-  
 lares homines erga mundum atq; vanitatem  
 tam liberaliter tam profusè se habeant, nec exi-

II  
miis quibusq; impensis ac metallis parcant, nos  
Religiosi vix stanneam ut ita dicam in veri Nu-  
minis cultum exhibeamus virtutem. Non hic  
memoro filium prodigum, totam substantiam,  
usq; ad extremam sui egestatem in meretrices  
expendentem. Non recenseo luxus Neronis,  
Caligulæ, Vitellii, in quos cum illi solius vani-  
tatis gratiâ immensa exhausissent æraria; eo ipso  
nosmet admonuere, quanta nobis etiam im-  
pendia, in gratiam DEI, in possessionem vir-  
tutis essent conferenda?

Jam si excellentes ausus atq; heroicos  
desideramus? Prætermiſſis aliis, solos fortes  
David 2. Reg. 20. enumeratos producamus in  
medium. Quid enim Eleazaro Bellicosius?  
qui dilapſo omni exercitu, unicus ipse con-  
tra densas Philistinorum Phalanges dimicans,  
tamdiu manu valida decertabat: *donec defice-  
ret manus ejus & obrigesceret cum gladio*: Ac  
tandem hostis partim cæsus partim fugatus il-  
lustrem victoriam ac opulenta spolia relinque-  
ret. Quid audentius tribus illis, qui ut de  
Cisterna Bethleem poculum aquæ frigidæ Da-  
vidi sitienti porrigerent, armata hostium agmi-  
na hinc & inde pervasere. Quid animosius

P

Abisai?

Abisai? qui unus etiam *levavit hastam suam contra trecentos*, & interfecit eosdem: Quid tandem fortius Banaia trium leonum Gygantisque Ægyptii interfectore triumphali; Jam quid illi, gentili antiquitate celebres, Curtii, Horatii, Scevolæ, Cynegiri, Zopyri & innumeri alii. Et hos quidem tantosq; heroas mundus pro se recensuit, qui ipsum etiam sibi litârunt sanguinem & vitam idq; solo famæ evanidæ intuitu. Pro ingens pudor! si Religiosi athletæ mediocribus velitationibus contenti palmam sibi in eo præripi paterentur.

Si de quo certe de mundi affeclis illud Psalmi: *Anni nostri sicut aranea meditabuntur.* Profecto enim illorum omnia telis aranearum simillima. Ipsi vero velut araneæ semet eviscerantes in tot laborum certaminumq; impendia. Quo vero id emolumento & lucro? Non alio scilicet, quàm quo suis aranea solas muscas concludens retibus, id ipsum intra summam reponit sortem. Quid enim illæ in immensum congestæ opes? quid summa honorum fastigia quid famæ & gloriæ temporalis lucra, nisi densa muscarum avolantium ægmina. Et ecce quantum pro his laboratur desudatur, certatur vitæ  
& fan-



63

117

& sanguinis absumitur, nec simile quid pro DEO, pro virtutis & meriti præmiiq; excellentia agitur. Et si indignamur, aureo reti piscanti vilesq; pisciculos in illud concludenti Antonio, quantum hæc ipsa humana indignationis mereretur tanta pro temporalibus agens & impendens amentia.

Quia verò non agere tantum sed etiam sustinere & pati Heroicum est: hinc talium quoq; mundi heroum excutiamus exempla. Et licet illorum plenus ubiq; mundus est: interim unum mihi Jacob Patriarcham sufficiat producere. Ipse de se clarè profitetur, quantum ille pro Rachele laboravit, quantum sustinuit, sudavit, & alit: *Die ( inquit ) non-  
Itaq; estu urebar & gelu, fugiebatq; somnus ab oculis meis: sicq; per viginti annos in domo tua servivi tibi*: Pluribusq; adhuc aliis Labanum alloquitur. Quod si verò tot & tanta promeruit unius Rachelis sterilitate laborantis pulchritudo: quid decor ac fecunditas virtutis; quid venustas Sanctimonix, quid pulchritudo ac bonitas immensa Numinis?

Genf. 31.

At quidnam homines mundi gratia non audent? quid non agunt? quid non sustinent?

P 2

nent? Quid illi præter alios, sacrificuli Baal non egere? qui 3. Reg. 18. ut ignem in sua evocaret sacrificia: *Clamabant voce magna & incidebant se juxta ritum suum cultris & lanceolis, donec perfunderentur sanguine: Quod etiam spectat illa Spartanorum puerorum consuetudo, qua (ut testatur Plutarchus in Laconicis) jubebant se cædi super Aram Dianæ, concertando secum ad invicem, quisnam illorum plus verberum sustinuisset? Unde (inquit Plutar:) nec gemitum nec vocem dabant, nec scapulas aut corpus contrahabant, tantum ut victoriæ hujus nomen & decus obtinerent. Ubi quis oro sui corporis delicatus fautor non erubescat? nihil se pro DEO simile, agere, nihil perferre simile quod illi sustinuere pro Baal, aut specioso evanidæ gloriæ lucro. Ita ut hic etiam non uni, integro intra corpus venasq; cruore in faciem exprobrari possit: *Nondum ad sanguinem restitisti: Aut certe quod Apostolus de decurrentibus stadium: Illi quidem (inquit) ut corruptibilem coronam accipiant, nos autem incorruptam.**

Et hoc plane ipsum est, quod Religiosos imò quoscunq; etiam homines non ad ruborem modo

modo sterilem sed simul ad eximia quæq; pro  
DEO patranda & toleranda non leviter exti-  
mulare deberet. Uti de quopiam Psaltes: *La-  
vabit* ( inquit ) *manus suas in sanguine pecca-  
toris*. Id est: eluet & abolebit manuum suarum  
& operum ignaviam , exemplis peccatorum  
mundo , carni, diabolo etiam profusione san-  
guinis & vitæ militantium, atq; sic manus quoq;  
suas ad heroica quævis pro DEO agenda & su-  
beunda aptabit.

Quod cum ita sit : an non etiam idem  
præstandum nobis, merito cum quopiam excla-  
mando : *O si tantum DEO quantum mundo !*  
Consulendumq; abhinc iusto pudori nostro ,  
atq; eò demum assurgendum animis , ut non  
tantum mundanos herodés æquare , sed longè  
etiam laborum sudorumq; ac ipsius quoq;  
sanguinis & vitæ impendiis an-  
teire possimus.



AD-



## ADHORTATIO IX.

MOTIVUM  
IX,*Non vulgarem in nobis Sanctimoniam singulariter à DEO probari atq; exigi.*

**P**Luribus hætenus motivis non vulgarem promovimus Sanctimoniam. Et hæc quidem Religioſæ ad omnem virtutem optimè animatæ alacritati abundè ſufficerent. Sed quia multum ſublimem nobis metam propoſuimus, ideo non vulgaribus quoq; ad eam paſſibus, non humilibus enitendum principiis. Unde verò hæc interea, ſi non à ſummo, quo nihil ſublimius, nihil ſanctius rerum omnium auctore, convenientius perenda? Hunc igitur nobis, ejuſq; divinam complacentiam & guſtum pro motivo ſublimioris Sanctimonie in præſens ſtatuimus: ut ſcilicet cujus placito ad illam movebimur, ejus etiam auxilio & gratiâ ad eandem efficaciter provehamur.

Illæſt Principum terrenorum conditio, quod ad eorum vitam, & mores, famulantium ſubditorumq; turba ſe in omnibus componat. Juxta illud: *vultus regum ſunt facies populorum*: Aut quod alius quisq;: *Nemo ſuos hæc eſt aula natura potentis, ſed domini mores*  
Cæſar.

*Casarianus habet.* Hinc illud Plinii de Trajano: *Eo obsequii continuatione pervenimus; ut prope omnes homines unius moribus vivamus.* Hinc etiam cæcutientes aulicos cum cæcutientibus Principibus, claudicantes cum claudicantibus legimus. Quales illi Æthiopes de quibus Historicus: *Turpe (inquit) existimantes Rege claudo non & omnes domesticos claudicare.* Jam ad placitum & gustum suorum magnatum ministri aulici quantum se in omnibus fingant, quis nesciat? ita ut vel nutum ipsum, vel minimum eorum placiti indicium, vigilantissime observent: imò etiam prævertant. In quo præcipua Turcicæ Politicæ ac statûs elucet ratio, ubi ad unicum Imperatorium nuntium supremi etiam ejus aulæ ac Imperii ministri sua capita vix non ea promptitudine morti devotent, qua vitam vel magistratum acceptarent.

Nec vero dispar supremi Auctoris in eos fors esse deberet. Tum quod distantusq; sit, ut omnia in se exhibeat imitatione dignissima; longe aliter quam mundi principes, in quibus plura reperias quæ deestheris, quam quæ æstimes: inq; tuos mores ac vitam transferas. Tum quod ipse pro exemplari ac Prototypo se nobis

*Deus vult ut  
eum in san-  
ctitate imi-  
temur.*

nobis proposuerit, ac inculcarit toties, ut ejus sedulæ imitationi nosmet impendamus: *Estote* (inquit) *sancti sicut & ego sanctus sum, Estote perfecti, sicut & Pater vester perfectus est.* Jam quid congruentius quid justius, quàm ad ejus complacentiam, & gustum vivere, eò dirigere omnia, iuxta illius voluntatem & nutum cuncta expedire, contraire in nullo?

DEVS multum sibi complacet in sublimiter sanctis.

Quid autem oro eidem divinæ complacentiæ & gustui conformius? si non sublimioris Sanctimonix, sedula cura & studium. Patuitq; id ipsum in illo notissimo Jacobi Patriarchæ spectaculo: Ubi vidit in somnis *scalam stantem super terram, & cacumen ejus tangens cælum. Angelos quoq; DEI ascendentes & descendentes per eam, Dominum autem innixum scalæ:* Cujus verò gratiâ idem Dominus huic scalæ innixus accumbit? ita ut ex ejus summo velut è specula aliquid fixius prospectare videatur? Num hîc terra rarius quidpiam idq; diviniore dignum oculo exhibuit? Hoc tamen etiam ex cælestis gloriæ throno an non spectari licuit, ut ad scalam inferius sese demittere opus non esset? Adverto ego facile: quodnam illud DEO ipsi tam gratum acciderit spectaculum.

An-



Angeli erant, iiq; magnis passibus in sublime  
 ascendentes, quorum jucundissima visione ca-  
 ptus, etiam throno suo teneri non potuit: ut  
 ipsimet scalæ assistens, propius visioni interef-  
 set. Cumq; adhuc tam dulci illecebrâ satis exla-  
 tiari non posset: ut attentius curiosiusq; specta-  
 ret (sic enim divinissimum etiam Numen in  
 talibus curiositate tangitur) eidemq; tantisper  
 indulgeret, sese vicinius quodammodo accli-  
 navit, scalæq; accubuit: plerisq; eum locum  
 legentibus: *Dominum incumbentem scalæ.* In-  
 de autem non leve documentum est; quam  
 grato ii DEUM ipsum delectent ludo, qui  
 mediocritate virtutis posthabita, usq; ad ejus  
 fastigium sese promovent. Si enim Ange-  
 lorum connaturalis utiq; in sublime ascensus,  
 tantum divina movit præcordia; quanto ma-  
 gis hominum poene contra naturam prægravan-  
 te corpore luctantium nisus, ejusdem DEI  
 oculos in se provocabit. Advertite tamen ad-  
 huc, non inferioribus scalæ gradibus, aut me-  
 diis illum accumbere, sed summo gradui inni-  
 ti, ut scilicet pateat, illos tantum in DEI pos-  
 sessionem venire, qui mediocribus spretis, su-  
 premum virtutis gradum tenuerint.

Q

Idem

Cant. 2.

Idem est quod Sponsa de Sponso in Canticis. *Ecce iste saliens in montibus, transiens colles*: Unde vero illi, hi tantiq; saltus? Cur non valles, cur non planities saltem, huic ludicro ac saltatorio ului deputatae? Nisi quod nulli bi sit gratius Sponso nostro vestigium ponere; quam quos sublimior sanctitas mundo spectabiles fecit, ultraq; terram notabilius extulit: ita ut illi velut saltatoris ludus sit, in talibus plantam gradumq; figere.

mulum in  
illos est li-  
beralis

Psalm. 103.

Quid dico gradum figere? cum etiam, nulli liberalius præterquam iis ipsis, quorum adinstar culminum erectior surrexit virtus, se DEUS ipse impendat, suaq; in eos beneficentiae sinum largissimè effundat, ut ait Psalter: *Rigans montes de superioribus suis*. An verò valles etiam vel planities hoc DEI beneficio ac liberalitate non gaudent? itane in solos montes tam copiosæ eluviones redundant? Nimirum hic, de Sanctioribus ultraq; alios virtute eminentibus viris res est: in quos adeo liberales gratiarum suarum, donorumq; supremus arbiter dispensat rivos, ac si alios quosvis nè gutta quidem beneficentiae suæ dignaretur. Atq; ita si quondam Rex Artaxerxes notabili

Stobæus  
Sermon. 54.

bili unius pomi, quod sibi à quodam hortulano  
 muneris gratia oblatum fuerat, ita erat dele-  
 ctatus magnitudine, ut eundem muneribus re-  
 giis ornaverit, ac etiam regimine cujuscunq;  
 civitatis dignum judicaret. Quantis præmiis &  
 donis non mediocrem Sanctimoniam in suis  
 servis DEUS remunerari solitus?

Nisi quod etiam parum sit in donis ex-  
 terioribus liberalem esse, si intimæ delectionis  
 viscera non pateant. Patuere vero eadem urbi  
 Sion, ita ut Psaltes palam profiteri ausus esset :  
*Fundamenta (inquit) ejus in montibus sanctis:*  
*Diligit Dominus portas Sion super omnia taber-*  
*nacula Jacob.* Unde autem hæc ipsa dilectio-  
 nis prælatio? Cur non etiam eadem taberna-  
 cula æquè DEO dilecta? quid in Sione, ut  
 sic in dilectione præferretur, meriti? quid de-  
 meriti, ut sic postponerentur, in illis? Ad-  
 vertite hic velim quidnam eo loci antecedit, &  
 quidnam inde immediatissimè consequatur.  
 Nimirum in Sione celebrantur ita sublimia  
 fundamenta, ut vertices montium occupave-  
 rint: *Fundamenta (inquit) in montibus san-*  
*ctis:* Quid autem legitimè ex eo antecedente  
 consequitur? Nimirum non aliud quàm prælati-

*Singulari di-*  
*lectione in*  
*eisdem fertur*

*Psalm. 86.*



va amplissimæ dilectionis dignatio: *Diligit Dominus portas Sion*: Idq; ut non habeant amplius quod Sioni invideant tabernacula Jacob, utpote sive in declivi sive in plano sita. Et quia juxta Hieronymū, Sione culmen & perfectio virtutum denotatur: hinc palam est, quantam iis DEUS dilectionem exhibeat, qui sese in sublimiore fundant Sanctimonia.

Uti quoq; illi exhibuit de quo *Psalmes*: *Accedet homo ad Cor altum: & exaltabitur DEVS*. Quod autem Cor illud? nisi divinum: ad quod ipsum facilis patet iis accessus, qui in eam sese elevant sublimitatem virtutis, quæ exaltando Divino Nomini par sit, ad idemq; usq; Cor supremi Numinis collimet ac pertingat.

*Psalm. 82.*

Nè verò solum velut per transfennam idem DEUS his ipsis affici videatur. Expendite ubinam stabilem sibi figat stationem? *In sole* (inquit scriptura) *posuit tabernaculum suum*. Neq; hic illum solem, qui terram diurno colustrans lumine oritur & occidit, intelligendum esse. Verum potius illustriores solisq; æmulos DEI servos, de quibus ejusdem scripturæ sacer textus: *Fulgebunt justi sicut sol*: In his scilicet  
DEUM

DEUM sibi sedem figere, illis se communicare liberalius, in his sibi singularius complacere.

Ideoq; illis etiam pro speciali suo ornamēto uti, prout advertit in Apocalypsi Joannes: *In dextera sua* ( inquit ) *habebat stellas septem*: cū apud Cornelium pleriq; asserant: *His stellis pro annulis usum*: Et defacto viros illustriori Sanctimonia conspicuos, ita DEUS apud se æstimat, eoq; loco reponit, ut eos velut pretiosos annulos manibus suis induat, cæloq; ostendet. Qualis ille fuerat, quem Deus ipsemet benevolentissimè allocutus: *Servus meus es tu, in te gloriabor*: Nimirum non vulgares DEI servi ii sunt, quorum sanctitate idem DEUS in facie terræ cæliq; universi solennissimè gloriari consuevit.

Quanquam quis hic humile aliquid ac mediocre etiam cogitaret? Ubi excelsa omnia, omnia sublimia, omnia tanto Numine digna, omnia cælo exiguntur majora, solo inferiora DEO: Ubi thronus ipse non vulgari sublimitate adeo conspicuus, ut de illo Propheta dixerit: *Vidi* ( inquit ) *Dominum super solium excelsum ac elevatum*: Cū hic etiam non ex quibuscunq; Angelis, sed ex ipsis Cherubim consti-

Isai. 6.

Psalm. 79

constitutus: *Qui sedes* (inquit Psaltes) *super Cherubim*: Ac si eâ esset divini genii excelsitas, is rerum delectus, quodd sola nonnisi eximia quæq; sibi in Thronum deposcat, quidquid humilior est, infra pedes despiciat, attestante scriptura: *Celum sedes ejus, terra autem scabellum pedum ejus*: Suâ videlicet ad id obsequii dejectione condemnata.

Nec alia quoq; diviniore ipsum latus è proximo stipantis satellitii facies. Nempe id etiam ex ipsis Seraphinis omnium Angelorum antesignanis conscriptum: *Seraphim Stabant & clamabant Sanctus*: Et his adhuc singulis, sex alæ fuerant, non humili utiq; volatui destinatae. Si autem animalia etiam ad idem admissa obsequium; certe & hæc ipsa non vulgari volatu insignia, utpote alis totidem cum ipsis Seraphinis instructa: *In circuitu throni quatuor animalia habebant alas senas*.

Eoq; pertinet, quod David enuntiat: *Qui facis Angelos tuos spiritus & ministros tuos ignem urentem*: Ubi quanta iterum divini famulitii magnificentia ac sublimitas: Idq; quod imprimis ex puris spiritibus nihil cum inferiore mundo cum terra cum aere habentibus. Jam  
ignis



ignis etiam non humile elementum est. Quocunq; ponatur locus; sursum se erigit, sursum affurgit sursumq; tendit, insigni terrenorum & humilium imò mediocrium quoq; contemptu: ut pote qui *nunquam dicit sufficit*: Nec ideo frustra supremo tantopere arrisit Numini, ut ab igne velut prodrômò antecedi, ab illo comitari, ab eodem stipari undiq; , in illo ad suæ majestatis pompam ostentari velit: *Ignis* (inquit scriptura), *ante ipsum præcedet: Ignis in circuitu ejus: In igne Dominus*. Et hoc ipsum est, quo suam erga non dejectioris animi servos suos, propensionem, pretium ac æstimationem testatur: ita ut non alios ad suum latus ac ministerium noverit admittere, quam quos vis poene ignea effert in sanctitatis sublime.

Quæ cum ita se habeant: abhinc igitur, eo nostra omnia convertamus studia, ut non vulgari Sanctimonix intenti, divinæ in eo complacentiæ & gustui toto conatu serviamus: quo unice delinito, affluentium DEI gratiarum donorumq; necnon eximii in Cælo præmii evadamus participes.

## ADHORTATIO X.

MOTIVUM  
X.*Non parum DEO displicere in Religioso sublimioris Sanctimonie neglectum.*

**Q**uantum sublimior Sanctitas complacentiæ & gustui divino arrideat, satis perspeximus. Jam interea noscendum esset, quantam ejusdem DEI displicentiam, nè dicam indignationem & bilem provocet sublimioris Sanctimonie neglectus? Hoc igitur nobis in præsens materia dictionis esto: ut si complacentia divina ad non vulgaris virtutis studium non smet non satis permoverit; saltem displicentia ab ejus neglectu efficaciter deterreat.

Tanti est apud sæculares quosvis aulicos Principum indignatio, ac vel modica iis exhibita displicentia, ut si eam incurrere contigerit, id ipsum morte gravius ducant. Hinc plerosq; legimus necem sibi conscivisse, ex quo alicujus indignationis adversum se, vel leve advertere indicium. Ideoq; novimus etiam, quæ illi metu offensionis ejusdem, in gratiam & gustum suorum magnatum non faciunt, quæ non subeunt, quas curas sollicitudines ac studia non impendunt, quos modos ac industrias non adhibent,

hibent, quas vires conatusq; non exerunt, qua se sedulitate ac circumspectione ubiq; non circumagunt, quibus vitæ morum actionumq; speciminibus, sese in eorum oculis non commendant? idq; nè illis minimam indignationis ac displicentiæ materiam ansamq; præbeant. Præsertim cùm adeo delicata sit Principum natura, ut offendatur vel minimis, imò eo etiam ipso, si sibi met exhibeantur, non satis exquisita. Meminimus utiq; quidnam incurrerint supplicii, illi duo celebres Pharaonis ministri: Pincerna videlicet ac præfectus Pistorum. Idq; ea non nisi culpa (attestantibus Thalmutistis) quod illi dum calicem Regi porrigeret, musca involarit in vinum: huic autem pulvisculus aliquis vel lapillus in panem regium irrepsit; seu etiam quod in vino aliquid minus defecati, in pane aliquid parum exacti fuerit inventum ac in mensam illatum.

Nec verò supremi etiam Numinis adversum nos offensio, minus à nobis pensanda esset. Cùm nemo inprimis tantum aut præstare favoris & gratiæ placatus, aut inferre supplicii iratus possit. Tum quòd inter alia, ejus quoq; gustus adeo delicatus sit, ut non tan-

R

tum



tum nostris trabalibus offendatur delictis, sed etiam eximia quæq; ac selectissima sibi deponat, juxta illud ad Prophetam: *Si separaveris pretiosum à vili quasi os meum eris*. Nempe eius naturæ ac teneritudinis os divinum est: ut vilia quæq; atq; vulgaria penitus respuat, sola nonnisi pretiosa & exquisita admittat, suoq; gustui secernat. Atq; inde consequens est: quod si quid illi admoveamus non satis eximium, id tenerrimè sentiat, iustaq; in nos propterea, indignatione exardescat. Cur enim Apocal. 1. *ex ore dominico gladius utraq; parte acutus visus est processisse?* si non ideo quod hic sit illico ad ulciscendum expeditus, quo casu ori eidem aliquid apponeretur vulgarius minusq; dignum. Hinc illud est quod idem DEUS in lege veteri nihil sibi mancum nihil aliqua parte deforme vel debile, nihil habens maculæ offerri iusserit, & quidem sub interminatione gravioris indignationis suæ: vel eo ipso nosmet edocens quàm etiam in ratione virtutis omnia exactissima omnia integerrima omnia perfecta eidem Numini sint à nobis in sacrificium exhibenda. Cùm illud quoq; non aliunde sit, quod munera Abel DEO tantopere fuerint

erint accepta, munera autem Caim à divinis repro-  
bata oculis, nec digna aspici: Nempe quod  
hæc ex obviis *terra fructibus*, illa ex *primogeni-  
tis gregis ex ipsisq; eorum adipibus* constarent.

Si qui tamen, certè religiosi vel maxi-  
mè huic indignationi ac displicentiæ divinæ ob-  
noxii, ut pote ii, qui quò maioribus à DEO  
beneficiis præventi, quò amplioribus ad rectè  
sancteq; vivendum instructi auxiliis, tanto eti-  
am magis ad deservendum divinæ complacen-  
tiæ & gustui, eiq; exquisitissima quæq; in ratio-  
ne sanctimonix ministranda sunt obstricti. Uti  
ille, ad quem illud in Apocal: *Quia tepidus es,*  
*incipiam te evomere ex ore meo.* Ori is divino  
ac prope cordi ( prout quisq; etiam ex religio-  
sis hominibus ) admotus nec tamen dignum  
DEI palato & gustui sese exhibuit obsonium,  
ideoq; tantam in eodem DEO provocans nau-  
seam, ab hoc ipso ore & corde excludi meruit.

Audiamus quidnam per Prophetam  
DEUS nescio cui sub allegoria quercu Basan  
interminet? *Vlulate* inquit *quercus Basan.* Zach: 11  
Verum cur non etiam in alias arbores similis  
detonat interminatio, cur non in vites & hede-  
ras Bacho, Myrtos Veneri sacras? Quidnam

R2

oro

oro delicti in solis hisce quercubus inventum  
 sit, ob quod ingruente divina in illas vindicta  
 ululare præ miseria & calamitate jubentur?  
 At facile conjicio : adverte quæ non alias hic  
 quercus, Prophetica acclamatione impeti, sed  
 solas quercus Basan, id est quercus in terra &  
 Regione summæ ubertatis, qualis erat Regio  
 Basan optima sorte confitas, quercus illas fa-  
 cunditate ac favore foli admodum proceras,  
 conspicuas frondosissimas. Decebat ut eo be-  
 neficio ipsa malogranata, aut alios Regiâ men-  
 sâ dignos fructus proferrent : & ecce nihil spe-  
 ciale, nihil ab aliis dissimile, nihil non vulgare,  
 nihil supra quercus alias, nihil præter glandes  
 suis & porcis natas edidere. Justam igitur  
 indignationem, justam retulere vindictam. Ut  
 vel hinc pateat, quod non levior quoque illos  
 Religiosos DEI indignatio maneat : quos cum  
 DEUS in loco ubertatis inter tot virtutis &  
 Sanctimonie adjumenta ac opportunitates con-  
 stituisset : illi interim pro dignis sua vocatione  
 fructibus, vix glandes DEI palato indignas  
 proferunt.

Non aliter quam illa vinea de qua Isaia s.  
 Circa hanc cum Paterfamilias tantum, curæ &  
 sollicit.



sollicitudinis expendisset, cum omnia ei fecundandæ, & fructibus ex ea percipiendis opportuna suppeditasset: *Sepiuit* (inquit) *eam* *Et lapides elegit ex illa, Et plantavit eam electam Et edificavit turrin in medio eius Et torcular extruxit in ea.* Ecce vero post hæc omnia post impensas curas, post elocatos sumptus: dum expectat insignes aliquos, dignos his impendiis botros, ecce inquam nihil supra vulgares sylvisq; nasci solitas uvas & fructus protulit scilicet solas labruscas: *Expectavi*, inquit *ut faceret uvas Et fecit labruscas.* Nec mirum quod eam quã refert Propheta, pœnam & calamitatem subierit, nempe destructionem sui & conculcationem extremam. Et id ipsum certè metuentum foret, Religiosæ vocationis hominibus; qui post tot impendia & adiumenta spiritualia sæcularibus nihilo meliores, sublimioris sanctimonix curâ posthabita, vix vulgaria virtutis sectantur.

**M**eminisse velint illius Evangelicæ ficulneæ, quæ cum post omnes sibi ab hortulano curas & labores exhibitos, solis foliis onusta, sterilisq; remaneret; illud contra se editum retulit: *Succide ut quid terram occupat.*

**E**t

Et sane si hæc intra sylvas & arbusa, ita se gessisset vix tantillum contra se indignationis accēdisset, imo forsitan facilem obtinuisset veniam; sed quia intra hortum inter tot circa se providentias & sollicitudines enutrita talem se exhibuit, hinc inevitabili sententiæ eiq; iustissimæ subijci meruit. Nec aliud quidquam favorabilius, religiosis sublimioris exactiorisq; sanctimonix contemptoribus sperandum esset. Utinam & illi in eam non veniant sententiam: *succide ut quid terram occupat.*

Sicut defacto in simile quid devenit celebris illa ex pluribus metallis composita, (de qua iam toties) Babilonica statua: Refertur de illa, quod ab uno inermi lapide, percussa in pulverem abjerit: & quidem nullum discrimen fuisse, inter caput aureum, pectus argenteum ventrem æreum, pedes ferreos & luteos, ita ut aurum non in pulverem aureum, argentum in argenteum, æs in æreum ferrum in ferreum, lutum in pulverem terræ fuerint dissipata; *sed omnia contrita pariter*, in eandem favillam nulla horum omnium metallorum differentia defierint. Quid vero in eo ipso causæ ac mysterii fuerit? Nempe caput illud ut dixi erat aureum

70  
135  
aureum; pectus etiam ex argento venter &  
femora ex aere. Decebat ut unum quodq; illo-  
rum aliquid non vulgare aliquid supra pedes lu-  
teos ageret. Caput aliquid sublimius auroq;  
dignum cogitaret, pectus aliquid eximium  
auderet nec vile cor intra se gereret. Manus  
ad insignia quæq; sese extenderent, nec modi-  
ca patrarent. Venter difficillima omnia &  
ardua suaviter absumeret ac concoqueret, fe-  
mora voluptatem carneam generosiùs contem-  
nerent, pars pedum ferrea quibusvis adversis  
fortius resisteret. Interim hæc & tanta omnia  
nihil plus supra pedes egere luteos. Quid  
igitur mirum? eadem ipsa, nullo ullius habito  
respectu, pari cum luto involuta ruinæ & exitio.  
At sapius graviore etiam supplicio, ignaviam  
Religiosorum quam sæcularium DEUM ple-  
ctere consuevisse. Quod cum illi maiore quam  
seculares rerum divinarum cognitione polle-  
rent, maioribus talentis & auxiliis spiritualibus  
instructi essent: Nihil tamen excelsius de DE-  
O & pro DEO cogitaverint nihil egerint excel-  
lentius, nihil superaverint difficilius, nihil susti-  
nuerint notabilius: ita ut hic maxime locum  
habeat: *Cui plus datum, plus requiretur ab eo,*  
Et



Et hoc plane est quod Daniel: 5. in palatio Regis Balthasaris cum adversus eum scriberetur decretum, soli inermes contra profanum regii hipocausti candelabrum apparuerint digiti: *Apparuerunt digiti quasi manus hominis scribentis contra candelabrum in superficie parietis aulae regiae.* Jam cum Apocal: 1. ad Ecclesiastica ad sacra candelabra esset deventum: & ecce ibi supremus Iudex Christus terribili specie cum gladio utraq; parte acuto: *Conversus vidi septem candelabra aurea & in medio septem candelabrorum aureorum similem filio hominis, oculi eius tanquam ignis, et de ore eius gladius utraq; parte acutus exibat.* Certè enim contra quoscunq; utcunq; agitur: secus contra sacras Deoq; dicatas tanto magis religiosas personas in dictis candelabris septem Ecclesias denotantibus adumbratas, si parem tam nobili planeq; aureo suo statui lucem sanctimoniae non diffundant

An non de iis illud Psalmi: *DEVS stetit in synagoga deorum, in medio autem deos dijudicat;* Ad quos enim peculiarius si non ad illos ea spectat allocutio: *Vos dii estis & filii excelsi omnes.* Quod si tamen iidem ipsi id est religiosi paulò inferiorem ea dignitate

& nomine virtutem contineant, o quàm distri-  
cto DEI manent obnoxii iudicio !

Hinc illa apud Prophetam allegorica  
comminatio : *Dies Domini exercituum super* Isa: 2.  
*omnes Cedros Libani sublimes, super omnes mon-*  
*tes excelsos, super omnem turrin excelsam, su-*  
*per omnem murum munitum, super omnes naves*  
*Tharsis.* An non verò illis hìc Cedris ista in-  
terminatio ? quæ cum proceritate sua eximiis  
quibusq; usibus ac structuris servire potuissent,  
vix vulgaribus tectis ac plebeiis sese concessè-  
re tuguriis : cùm in illarum frondibus aquila  
nidificare debuissent, vix nidis passerum  
aliarumq; ignobilium volucrum patuere. Quan-  
quam Divus Basilus illud etiam culpæ  
iisdem appingit in Psal : 31. *Appellari* ( in-  
quit ) *merentur Cedri Libani, quod alienâ sub-*  
*piti altitudine intempestivo gaudio diffundun-*  
*tur.* Illis itē montibus quos cùm auro ac pretio-  
sis quibusq; abundare decuisset metallis ; vix  
illi plumbo vel ferro intra se dedere locum .  
Illis turribus & muris, qui cum validissimis ho-  
stibus sustinendis & propulsandis pares essent,  
nullos vel modicos sustinere insultus intusq;  
hostem admiserunt . Illis navibus quæ cùm opu-

S

lenta

lenta deferre valuissent mercimonia vix aliqua levi pretio æstimanda devexere ad portum . Nec ideo iustam indignationem effugere . Perquam utili nobismet religiosis relicta cautela : ne sublimioris neglectu sanctimoix, solis vulgaribus ac mediocribus intenti , solaq; statûs religiosi sublimitate atq; excellentia, subnixa ac tumidi in turpem prolabamur inertiam .

Atq; ita simus solis glandibus abundantes quercus, solarum labruscarum feraces vineæ, solis foliis onustæ ficulneæ, otiosæ nullis egregiis actionibus conspicuæ statuæ, sola proceritate commendatæ Cedri, ad solam speciem erectæ turres, solius plumbi continentes montes , solius vanitatis mercibus instructæ onerariæ : illis non absimiles, de quibus Scriptura : *Transferunt* ( inquit ) *sicut naves poma portantes* . Imo ne Petro quidem in monte Thabor similes, qui diviniore luce spectaculi circumfusus, & hac sola sorte apprime contentus exclamavit : *Bonum nos hic esse*, ideoq; eam crysim in evangelio meruit : quòd tunc *nesciebat quid diceret* .

Tandem verò illam totius cæli incurramus querelam , quam Diya Mechtildis in sua  
extasi



extasi retulit, accusantibus illam Seraphinis ob  
 tepidum ac mediocre DEI amorem, Cheru-  
 binis ob ruditatem scientiæ sanctorum, Apo-  
 stolis ob exiguam doctrinæ suæ curam, Mar-  
 tyribus ob pusillam fortitudinem, Confessori-  
 bus ob virtutum segne exercitium, Virginibus  
 ob defectum maioris puritatis. Et si hæ &  
 tantæ de Sanctissima Virgine querelæ; quas  
 oro contra nos diras, idem Cælum totaq; eius  
 curia effunderet? Quod cum ita sit, id igitur  
 nobis ab hinc agendum est: Ne vocatio religi-  
 osa, ne propria cuiusq; religio, ac etiam ne soci-  
 etas, ne DEUS, cælum & terra, ne ipse infernus  
 & conscientia omnino habeat cuius nos accuset.

## ADHORTATIO XI.

*Cælestis gloria ac beatitudo non leve ad subli-* MOTIVUM  
XI.  
*mem sanctimoniam invitamentum.*

Ad sublimioris sanctimonix metam no-  
 bismet contententibus, non pauca ut vidimus  
 quæ nos ad eam magis magisq; urgebant,  
 hactenus occurrerunt. Post hæc tamen illud  
 nobis potissimum in hoc sanctitatis tractu præ-  
 standum incumbit, quod navigantibus evenire

affolet. Dum enim illi mare enavigant, dum fluctibus & procellis iactantur, dum sexcenta subeunt discrimina: inter hæc in unum illud intenti sunt, ut in cælo ac sideribus constantem oculum figant. Et hoc est quod illos ad portum efficaciter dirigit, quod adversus quosvis pelagi errores tuetur, erigit in tempestatibus & procellis. Nec igitur aliud nobis quoque nostro in passu, attollendi vultus, dirigendi oculi. Cum id etiam in præsentem mihi enucleandum sit, quod si quid certe attentus cælestis gloriæ ac Beatitudinis respectus, non postremum ad sublimem sanctimoniam motivum & calcar sit.

Quantos ad eximia quæque stimulos, etiam terrena conferant, non modicâ experientia probatum. Hinc tot illi heroici ausus, tot profusi sudores, tot cruenta merita, tot tantæque ærariis exhaustis impensæ. Idque vel ob evanidam nominis gloriam, vel ob sublimiorem aliquam curulem ac magistratum, vel ob quodcunque præmium temporale. Ut iam illud proclamatum sit: *Nemo gratis bonus*. Cum etiam iis calcaribus usus ille, qui de semet apud Poetam: *Magnum iter ascendo, sed dat mihi gloria vires: non venit è facili lecta corona iugo*.  
Et

Et si ea apud mortales terrenorum ac evan-  
 idorum æstimatio, cuiusnam oro pretii ac pon-  
 deris erunt cælestia & æterna? Heu quantus  
 vel hinc nobis rubor esset, si plus pro terrenis  
 quàm pro cælestibus nostra desudaret cura &  
 industria!

Ita omnino eum planè visa habuisse  
 sensum, Quatuor illa Ezechielis animalia. Cur-  
 rui hæc divinæ gloriæ deservierant. Sed quàm  
 eximiis huic sese devovère obsequiis: ita ut is  
 ipsius etiam fulguris prodigiosam pæne hæc in  
 parte fuerint imitata naturam: *Ibant* ( inquit  
 Sanctus Vates ) *in similitudinem fulguris coru-*  
*scantis*: Totq; aliis apud eundem Prophetam  
 recitatis inclaruerint encomiis. Quid verò illis  
 ad hæc & tanta stimulum attulit? Non aliud  
 forsitan, quàm quòd idem Propheta ibidem  
 adfert: *Super capita* ( inquit ) *eorum simili-*  
*tudo firmamenti*: Id est continuus de cæ-  
 lestibus cogitatus, eorumq; intuitus. Et  
 hoc ipsum defacto est: quod nobis quoq; sta-  
 dium virtutis decurrentibus, ad non segnes  
 pro gloria DEI conatus nec non eximia quæ-  
 que studia invitamèto esse deberet. Nempe atten-  
 tus arrectusq; semper cælestis firmamenti ac beati-

Ezech. 1.



tudinis respectus. Quem tantopere æstimavit  
celebris Machabæorum Mater, ut hunc unicū  
promotivo ad summa & gravissima quæq; pro  
DEO & legibus à filiis perferenda, satis esse  
duxerit, dum singulos allocuta fuisset: *Nate  
peto ut cælum aspicias.*

*Cant. 4.* Quid verò etiam Sponsæ efficaciter per-  
suasit, ut in culmine honorum & fortunæ ve-  
lut in Libano collocata, infra, spretis omnibus  
se demitteret, idq; ad unicam sibi insinuatam  
vocem: *Veni de Libano?* Nisi hoc idem invi-  
tamentum, quo cælestem sibi audiit appromis-  
sam coronam: *Veni de Libano coronaberis.*

*Cant. 6.* Nec aliunde est quod Salomon in suis Can-  
ticis, nescio quam animam tot tantisq; splen-  
doribus illustrem exhibuerit, ut de illa cum ad-  
miratione exclamarit: *Quæ est quæ progredi-  
tur quasi aurora consurgens, pulchra ut luna,  
electa ut sol.* Unde verò illi tot tantorumq;  
splendorum collectio? cū alibi de illa illud  
nonnisi edixisset, quod solummodo: *Sicut vir-  
gula fumi ex aromatibus,* sese altiùs attolle-  
ret? Nimirum hoc ipsum fortassis ad tot lumi-  
num possessionem illi profuisse, quod juxta fu-  
mi aut incensi naturam sese sub cælum ferret.

Cū

Cum defacto nihil magis spirituales in nobis splendorum propaget & accumulet, quam constans mentis in cælum directio.

Quid verò dicam de innato hominibus æmulandi supraq; alios eminendi, studio? quod quantum apud non deiectionis animi homines, ad insignia quæq; patranda valeat quis nesciat? Quales olim inter alios fuerunt Julius Cæsar ac Pompeius: ut nec ille in publica fama ac magistratibus priorem nec iste parem ferre posset. Qualis item ille: qui toties ingeminare solitus: *Aut Cæsar aut nihil.* Et si hæc & tanta in terreno ambitu, animi excelsitas ac æmulationis studium: Quam longè excelsiorem in nobis animum cælestia ac perennia requirerent?

Et defacto plebeio ortu Apostoli emerferant. Interim tamen cum terrena omnia contemnere didicissent, minime circa cælestia abiecto fuere animo, ita ut etiam æmulatione quadam supraq; alios eminendi appetitu eò evaserint, ut secum contenderent: *Quisnam maior illorum esset in Regno celorum?* Neq; in hoc ullam crysim notamq; vitiosi ambitus incurrissent, si in hoc ipso nihil terrenum sapuissent aut, se intra sphæram apostolicæ hac in parte moderati-

onis

onis tenuissent, nec ad rixas contentionesq; processissent mutuas, atq; sic ad vitiosa extrema declinassent. Et in hoc certè ipso clarissimum sui instituti sectatoribus citra præfatum annexum vitium reliquere exemplum, qua & illi excelsitate animi esse debeant, ubi pro cælo eiusq; gloria laborandum est: ita ut illis etiam cordi sit non quæcunq; sed suprema quantumvis in cælo statio. Quæ quia non quibuscunq; sed insignibus admodum comparatur meritis, ideo in horum etiam possessionem mens nostra & studium extendendum. Quanta enim hæc esset deiectio, ac mentis vilitas: modicæ ad instar velle lucere faculæ, cum sol in cælo esse possis: cælestis Curia sustinere gregarium, cum supremi senatûs accollam possis agere: excubare ad limen, cum throni divini vicinia præsto sit.

Planè id ipsum erat in intuitu viri illius cælestis, cuius Joannes Apoc. 6. accuratus spectator fuerat: *Vidi ( inquit ) Ecce equus albus, & qui sedebat super illum habebat arcum & data est ei corona, & exivit vincens ut vinceret.* Verum quid diademati quid coronæ cum arcu cum præliis? si illi corona cessit? throno insidere, in illoq; conquiescere debuerat, non tendere



tendere arcum non exire ad prælia. Nisi quod excelsioribus animis, non satis esse debeat, qualemcunq; Regni Cælestis adipisci coronam. Hinc & si eandem in manu tenerent, nequaquam eo ipso deberent cōquiescere, sed arcum in altiorem metam tendere, amplioremq; semper & ampliorem spectare gloriam; eamq; repetitis toties demereri victoriis.

Uti illi Prophetici Seraphim quos solio excelsio ac elevato adstantes Propheta videns: *Isai: 6.*  
*Duo inquit Seraphim stabant;* illud insuper addidit: *Duabus alis velabant faciem ejus,* ( id est DEI in solio sedentis ) *duabus pedes, duabus volabant.* Verum ad quid volatus hic? cum jam ipsi throno divino vicini adstitissent? Nisi quod Seraphicis etiam genis illud innatum, ut ubi de cælesti gloria agitur, semper altius altiusq; evolare studeant, nec in summo etiam consistant.

Quamquam ea est ipsius quoq; Cælestis gloriæ ac beatitudinis conditio, ut qualemcunq; virtute haud sit contenta, ideoq; quidquid in ea vulgare ac plebeium, id à se omnino proferbat ac respuat. Alia est. longè cæli ratio ab ea quam sibi finxere ethnici: cum illud non tantum de astrorum plebe, sed scelerato-

T

rum

Lib: 2.  
C: 65.

rum etiam fece impleverint, ita ut questus sit non nemo: *Pellices calum tenent*. Imo satyricus etiam irriserit: *Osanctas gentes! quibus hæc nascuntur in hortis numina*. Jam apud Plinium quanto ludibrio in consessu deorum Bacchos satyros faunosq; Momus habuit? illud edicens: *ut egregii illi prius ex integro homines fierent quam in deos evasissent*.

Procul à Cælo nostro turba ejusmodi, quod non nisi eximæ virtuti patet, Uti apud Psaltem non alii portæ patuere cælestes, sed non nisi *Domino virtutum, Regi gloriæ*: virtutum inquam, non unius alicuius virtutis. Neq; hic quidquam plebeium aut vulgare cogites: Ubi Dominum ubi Regem audis.

Bene quatuor Cherubicis animalibus non duæ verum sex alæ adaptatæ. Ut enim aliò quocunq; evoles, duæ sufficiunt, ut ad cælum pertingas, pluribus instructus esto.

Nec verò aliam ætatem præter 24. Seniores Throno DEI assidentem Joannes in sua Apocalypsi vidit: ut vel inde colligas: non quacunq; virtute, ut throno cælesti appropies, sed matura admodum opus esse,

Inde

Inde est quod Christus in Evangelio pronuntiaverit : *Nisi abundaverit justitia vestra, plus quam scribarum & Phariseorum, non intrabitis in Regnum Cælorum.* Jacob autem Patriarcha non qualemcumq; scalam sed ipsi cælo conterminam qua Angeli ascenderent vidit. Angeli inquam : Angelica namq; virtute scalâq; , cælesti altitudini commensuratâ, ut eo devenias opus est.

Non frustra cælestem civitatem habere *murum altum* dilectus Christo discipulus edixit : Ut scilicet edoceret : non quascunq; , sed plusquam Aquilinas alas id est sublimes admodum virtutes, ad eum transvolandum assumendas esse : uti Propheta : *Assument pennas ut aquilæ, volabunt & non deficient.*

Huc spectat quod idem Apostolus ac Evangelista eandem Civitatem sponsæ perquâ ornatæ, omnibus ornamentis & dotibus conspicuæ assimilat : *Vidi (inquit) Civitatem sanctam Jerusalem novam paratam ornatam viro suo.* Quis igitur non tam generis quam virtutis plebeïæ eius connubium ambiat? Plane simili hic crysi opus esset ; qua olim non in dissimili casu



usus Poëta est: *Mopso Nisa datur: quid non speremus amantes?*

Jam si Civitatis rationem sub cujus allegoria à Joanne Cælum describitur perspiciamus: Certè quo nobilior Civitas, eo magis non plebeios accolat postulat. Quales olim Romæ Cyneas conspicatus testatusq; , se non tam Cives inibi quam ipsos potius spectasse Reges. Et si tales Roma recensuit terrestres: quales nam Jerusalem requirit cælestis?

Si in Evangelio, Regali ejectus triclinio, qui veste caruerat nuptiali, licet forte aliam utcunq; nobilem induerat. Si præterea teste Polybio Palatium Neronis, quod coeli ipsius splendorem videbatur æmulari, solemq; & alios cum cæteris astris repræsentare Planetas, insidente illud ipsomet velut Jove altero Nerone, splendida Senatorum suorum majestate cincto, quispiam cum lampade ingressus Philosophus, in hæc prorupit verba: *Luci lucem non addo, sed pudori ducò, me in tanta tum astrorum, tum heroum luce primum in obscuro pallio sine luce apparere. Quis oro cuicunq; cælestem aulam cum mediocri virtutis indumento, ac luce ingressuro pudor?*

Quan-

Quamquam si totam quanta quanta est ,  
 cælestem perlustremus Jerusalem , quid ibi  
 non excellens? non sublime? non pretiosum?  
 non nobile non lucidissimum: sive in muris sive  
 in portis, sive in fundamentis sive in plateis sive  
 in quocunq;: Quis igitur non parem illuc  
 quod ad omnia virtutem afferat?

Id certè nobis omnino spectandum est,  
 Id versandum mente; quod Alexandro pu-  
 gnaturo cum Dario insinuat: *Maçte Ale-  
 xander pro Regno tibi cum leone pugna*: Ea  
 resolutione utendum, qua Philippus Macedo  
 commonstrata sibi in tabula à Demade Legato  
 Atheniensi urbe usus est: *Ut hæc (inquit) mea  
 urbs sit, ferro & auro efficiam*. Simile quid  
 pensandum, quod Abulana Rex Fessæ: qui  
 cum domum sibi Regiam absolutissimæ digni-  
 tatis plenam fabricasset, ejusq; rationes audire  
 cepisset, jamq; ad 40. aureorum millia devenis-  
 set impensa, cætera discerpfit, nec audire vel  
 legere voluit dicens: *Quidquid charum, quam-  
 vis carum, si pulchrum, non est carum*: Simili  
 rerum omnium, cui olim Helveti (teste Ju-  
 lio Cæsare in Comment:) rerum suarum, in-

*Apud Engel-  
 grave.*

150  
sistendum contemptui, qui occupaturi Gallias  
terram suam & omnia habitacula absumpserunt  
incendio. Iis passibus ea via procedendum :

*Qua procures abiere pii : Procures  
inquam virtutis : quorum insisten-  
do vestigiis, illud nobis insinuari  
intelligamus : Hac iter est  
superis.*



PARS



PARS SECUNDA;

ESSENTIALIA

&

PECULIARIA

SANCTIMONIÆ

Non vulgaris

Proponens;

AD:

## ADHORTATIO I.

*Sublimitas Sanctimoniae in præcellis cogitationibus Filiorum DEI.*

**P**ost expedita tot & tanta ad sublimiorem Sanctimoniam invitamenta atq; motiva: naturam ejusdem Sanctimoniae, in quam illa consistat, nobismet exponendam duximus. Et quia omnia prius in intellectu ac voluntate, quàm ad executionem & praxim externam deveniant, repræsentari ac velut, primam ibi stationem tirociniumq; figere novimus; ideo etiam nunc à præcellis filiorum DEI cogitationibus sumimus initium: in iisq; imprimis rarioris Sanctimoniae sublimitatem non incongruè statuimus.

Abiectionis suæq; originis immemoris animi est: omnia humilia aut mediocria, nihil sublime nihil egregium mente versare. Mens quippe nostra aliquid divinum refert, adeoq; illud, quo supra omnia terrena eminent, infra nos despiciamus omnia, ipsis æquamur Angelis. Quis igitur illam ad infima quæq; dejiciat, quis usq; ad terram deprimat? si omnipotens Numen, *os homini sublime dedit calumq; tueri jussit*

*Præcella  
mentis cogi-  
tationes.*

*jussit Erectos ad sidera tollere vultus* : Tanto magis non alibi quàm in cælo , imò supra cælum etiam mentem tam nobilem figere , ita ut nihil nisi eximium , nisi sublime , nisi Angelicis mentibus par meditetur.

Tale olim Sponsi Salomonici caput Cant. 5. Quod cùm Sponsa aureum pronuntiaffet : *Caput* ( inquit ) *ejus aurum optimum* : simul etiam non vili crine conspicuum asseruit : *Comæ illius sicut elatæ Palmarum* , Ac inprimis quo ad caput aureum ? unde illi oro tantum pretium ? An non ex eo : quod illud nihil vile , nihil abjectum , nihil vulgare , nihil de luto , ferro , ære , imò etiam argento , sed id solum quod æstimatissimum , quod auro optimo non absimile cogitaverit. Intellectus utiq; capiti insidens cogitando cognoscendo intelligendo fit omnia. Jam de capite tali id est aureo , certe non alios crines succrescere decuit. Per hos autem non aliud quàm cogitationes , conceptusque humanos , usitata Doctorum interpretatione intelligi : eosq; hîc non cuicunq; gramini de terra enascenti , non humilioribus ignobilioribusq; virgultis , non herbis parietinis , sed sublimioribus iisq; victricibus palmis compara-



ri. Ut hinc scilicet perspectum habeamus, qualesnam mens etiam nostra caputq; auro nobilius, cogitatus, qualesve partus, victoriosos utiq; heroicis ac triumphales edere debeat. Ita ut si olim de cerebro Jovis, non rana aut vile aliquid, sed diviniior Minerva prodiit: Neq; nostri quoq; cerebri officina in similes foetus sterilecat.

Quodsi verò pretiosus adeo, auroq; optimo æstimatus Sponsi vertex: certe non ignobilius etiam Sponsæ caput: *Caput tuum* (inquit Salomon) *ut Carmelus, Et comæ capitis tui sicut purpura Regis vineta canalibus.* Ubi quis non advertat, quanta hujus capitis, nempe Carmelo æmula sublimitas: Sed neque etiam degener comæ excellentia. Et si per hanc itidem, non postremum cogitationum nostrarum valorem intelligimus, quid oro his etiam ad excellentiam defuturum est, si parem cum Sponsæ crinibus nanciscantur dignitatem ac pretium. Et profecto si Carmelus interpretum testimonio, idem quod Cognitio: certe hac in parte Religiosis capitibus omnigena rerum divinarum DEIq; ipsius cognitione admodum pollentibus, nihil locupletius. Quid igitur

igitur humile, quid abjectum, quid plebeium, quid non regium, quid regali, purpuræ non agnatum ab illis prodeat? Probrum utiq; non leve esset: si Absalon pulcher ille nequam, tanti ut scriptura testatur sui capitis ponderasset Cæsariem, nec Religiosæ cogitationes ad simile saltem pretium possent ascendere. Probrum, si nostrum etiam religiosum ideoq; illo non ignobilius, ejusmodi sortis incapax caput esset. Si caput Moysis Exod: 34. post quadraginta dierum cum DEO consortium in cornua excreverat: hoc est juxta Abulensem & alios effulserat in radios; idq; in thaumaturgæ indicium sanctitatis, certè ex Religiosis etiam capitibus, præsertim post exactum vitæ religiosæ in continuo pænè cum eodem DEO consortio non exiguum spatium non dissimiles promicare deberent pro sublimioris specimine sanctimonix cogitatus. Uti olim vertex Ascanii ignitis in omen Regni arsit radiis.

Si de quopiam alio, de Religiosis maximè illud pronuntiatum: *Vos dii estis & filii excelsi omnes*: Aut quod Apostolus: *Vos genus electum, gens sancta, regale Sacerdotium*. Quis igitur, vilius aliquid suaq; tanta condi-

rione ac origine indignum mente volveret ?  
 De DEO utiq; Psaltes : *Cogitationibus tuis ,  
 non est qui similis sit tibi* : Tum alio quoq; loco :  
*Nimis profunda facte sunt cogitationes tue* :  
 Ac si scilicet ponderosi admodum pretii & ad  
 fundum usq; abyssi prægravantis. Hinc con-  
 venientissimè suos monebat insignis ille magni  
 spiritus Asceta P. Balthazar Alvarez : *Noli-  
 te degenerare à præcelsis cogitationibus Filio-  
 rum DEL*. Quod ipsum ita imbiberat Novi-  
 tius ejus Franciscus Perez : unus è 40. nostræ  
 Societatis Martyribus, ut in ipso cædis articulo  
 identidem repeteret : *Eja Fratres non degene-  
 mus à præcelsis*, &c. Nimirum juxta divinum  
 Psaltem : *Gloria Filia Regis ab intus*, hoc est  
 ut Græcus legit : *Ex cogitationum excellentia* :  
 Cujus autem Filia Regis ? Si non animæ Re-  
 ligiosæ eximiis cogitationibus mentem suam in-  
 ternam admodum conspicuè exornantis.

Quamquam inde etiam non levem ipsius-  
 met DEI promanare glorificationem necesse  
 est, juxta eundem Psaltem : *Reliquia* (inquit)  
*cogitationis diem festum agent tibi* : Septua-  
 ginta legunt, *diem festum celebrabunt* : En qua-  
 les hîc filiorum DEI cogitationes ! Non qua-  
 les-



lescuntq; scilicet, non primo primæ, non ob-  
viæ, sed selectiores illæ & quasi ultimæ distil-  
lationis, adeoq; non initia sed reliquæ cogi-  
tationum. Præterea non profanæ aliquæ, non  
de feria ut ajunt, non ad ullum opus servile  
directæ, sed multum solennes ac festivæ, exi-  
mioq; divino cultui, ac celebritati ex integro  
dedicatæ, in DEO Solo defixæ: tandemq;  
ipsius etiam DEI Augustissimo sinu ac intima  
admissione dignæ, juxta illud scripturæ: *Co-  
gitatus illorum apud Altissimum.*

Ne vero hic per præcellas filiorum DEI  
cogitationes, solos intellectus nostri conceptus,  
sed pias etiam affectiones, intentiones eximias,  
excellentiæ desideria, ac vota intelligamus;  
ideo his quoq; sublimitatem Sanctimoniar, in  
præsens adstruimus. Juxta id quod Psalter de  
quopiam justo pronuntiat: *Ascensiones* (in-  
quit) *disposuit in corde suo*: Quæ autem  
ascensiones istæ in corde Justî dispositæ? Si  
non sublimia cordis quorum hic sedes est, desi-  
deria, ac elevatæ intentiones, per quas velut  
per gradus quosdam ad ipsum excellentis San-  
ctimoniar scandimus fastigium. Talia inquam  
desideria quale fuit Davidis illud, quod ad ipsi-

*Præcella cor-  
dis desideria.*

us DEI thronum ipsumq; ejus conspectum  
sele extulit : *Ante te omne desiderium meum.*

*Psal. 103.*

Nescio an non de hujuscemodi desideriiis  
Regius Propheta : *Qui ambulat* (inquit) *super*  
*pennas ventorum* : Desideria utiq; & affectus  
veluti quidam venti sunt. Qui ut nos in su-  
blimem provehant Sanctimoniam pennati sint  
omnino , non prope terram repant. Sunt quo-  
que iidem affectus pennæ de quibus Vates :  
*Sanitas* (inquit) *in pennis ejus*. His namq; fe-  
rimur in sublime, in sanitatemq; pariter ani-  
mæ, ac non humilem sanctitatem provehimur.

*Ezech. 17.*

Nimirum voluntas nostra : *Aquila ma-*  
*gnarum alarum* : Hoc est ingentium desiderio-  
rum est , quibus non tantum in Libanum cu-  
juscunq; sanctitatis , sed ultra cælum etiam re-  
cta evolat , ut ibi non medullam Cedri , sed  
ipsum cor divinum sibi rapiat. Aut certè me-  
dullam, hoc est interiora animi per quæ olim  
B. Aloysius intus operando magnam adeptus  
gloriam. Nec solum corticem, id est solam  
tantummodo extraneam sanctimoniam. Adeo  
scilicet insigni ac pænè Thaugmaturgo volatu  
hæ pennæ , nostræ voluntatis præditæ sunt :  
*ut nihil omnino ita difficile , ita sublime itaq;*  
*inac-*

inaccessum sit, quo illæ eniti non possint. Hinc illud apud viros Spirituales proclamatum gnomē: *Velis & potes*. Modò ea eiusdem volitionis sit vis, qua pollebat Brutus, de quo Cicero: *Multum interest, si quid velit: quidquid enim vult, valde vult*. Talibus alis erat cum suo exercitu præditus Magnus Alexander, qui in Sogdiana regione rupem inaccessam, & à triginta armatorum millibus intessam obsidens irrisus ab Arimaze rupis præfecto, rogatusq;: *An Alexander volare possit? Faciam*, ait *proxima nocte, ut credas, Macedones volare*: Atq; ita immixtis trecentis fortissimis rupem Magno animo ac virtute occupavit: simulq; suo exemplo, occupaturis inaccessam pariter plerisq; sublimioris Sanctimonix arcem præluxit.

Nec dubium quod eo collimaverit ille de quo David: *Accedet homo ad cor altum*: Seu juxta Cæsarium Arelatensem *Ad altitudinem cordis*: Hanc autem nihil aliud esse quam Cor ipsum magnis desideriis & exquisitis intentionibus sublimatum. Quale cor suavit Paulino D. Hieronymus cum diceret: *Noli esse in te mediocris, totum summum, totum perfectum desi-*



*desidera.* Et si verò quandoq; ea non liceat desideria explere, saltem id ipsum in pretio, quod tantum in gratiam DEI volueris! uti de Phæronte Pœta: *Hic situs est Phæton currus auriga paterni, quem si non tenuit, magnis tamen excidit ausis.* Plane id non absimile illi volucris quam Monocoditam appellant, dicuntq; alas illam habere in corde, ideoq; corde volare, & quidem volatu continuo, ex quo nunquam palpitare idem cor cessat, in quo est principium volatûs, etiam in sublimè quodcunq;. A plerisque, avis quoq; Paradisi nominatur.

Tale plane fuit cor Seraphicæ Virginis Thereffiæ, quæ ut in horis Canonicis legimus: *Christo consulente maxime arduum votum emisit, efficiendi semper quidquid perfectius esse intelligeret.* Qualia item vota Patris Jacobi de Sauræ nostræ Societatis, de quo illa Patris Nadasi: *Vovit (inquit) se voluntatem DEI impleturum quàm perfectissimè, nunquam se suam facturum, sed quo ad posset, quidquid in quovis opere majoris perfectionis, magisq; eximium agnosceret.* Insuper sanguine suo sequentia exaravit: *Ex amore Sanctissimæ Trinitatis, JESU, MARIE, & Sanctorum omnium voces procurare Majorem*

*rem perfectionem: Voveo non habere affectum ad rem ullam præter DEVM solum, & procurare ut habeam continuum actum amoris divini. Nec minus sublimis illa Patris Adami Gorski, apud eundem Patrem Nadasium resolutio: Juro (inquit) Domine ac testor, quod nihil velim, nisi maximam gloriam Nomini tuo. & maximam confusionem faciei meæ. Non recenseo vota illa insignia admodum ac heroica Patris Gasparis Druzbicki: Quæ si non licet æmulari multo magis adimplere, saltem liceat ad similia generosius aspirare. Atq; sic saltem per desideria ad culmen rarioris conniti Sanctimonix.*

## ADHORTATIO II.

*Vana Sanctitatis sublimitas in solis præcellis cogitationibus ac desideriis.*

**N**aturam sublimioris Sanctimonix aggressi exponere, in præcellis filiorum DEI cogitationibus ac desideriis, eandem inprimis constituimus. Etcerte quid promptius, quid facilius quid expeditius, quam per cogitationes ac desideria volare in sublimè. Ad quod nullo labore, nulla defatigatione, nullis impensis, nul-

lis etiam pennis opus est. Ea verò hujus volatilis conditio, ut nec Aquila suarum connisualarum eo possit pertingere, quo mens voluntasque nostra conceptibus affectibusque suis nullo negotio provehitur. Non illam nubium ventorumque, imò fulminum etiam ac immanium tempestatum detinent obstacula, non regionis ardentioris, frigidiorisque æstus & algores retardant, non tot millionibus miliarium dimensi tractus defatigant, non sexcenta cælestium monstra ferarum deterrent, non ipsi etiam coeli solidissimi alioquin, (iuxta Job) & quasi ære fusi viam præcludunt. Ultra terrena omnia, ultra cælum ultra universum fertur; ita ut nihil illi invium, nihil inaccessum sit, cuncta pateant. Nisi quod hac in parte, quantum facilitatis est, tantum etiam vanitatis, si solis hisce præcellis conceptibus affectionibusque nostra sanctitas contenta sit, iisque nonnisi ut ita dicam volatibus delectetur. Hoc igitur in præsens mihi urgendum est, nè in illis duntaxat, nostræ sublimitatem collocemus Sanctimoniam.

Quanta vanitas sit solis cogitationibus ac desideriiis in DEUM & Sanctimoniam ferri, abunde expressit Psaltes, dum de homine pronuntia-



nuntiavit illud : *In imagine* ( inquit ) *pertran-*  
*sit homo* : Quæ autem oro hæc imago ? Si non  
 illa , quam in mentibus cordibusq; nostris sive  
 cogitationis sive desiderii depingimus penicil-  
 lo. O quot hic hujuscemodi imagines ! Non  
 memoro illas quas mundus caro dæmonq; de-  
 pingit. Has in præsens spectare est animus ,  
 quibus effingendis Apelles virtus & Sanctimo-  
 nia sese impendit. Videre ibi est illam ipsis  
 laudatam gentilibus temperantiam , cataphra-  
 ctam ac imperterritam adversus omnia , fortitu-  
 dinem , omni conspicuam majestate omnibus  
 numeris absolutam Justitiam , flagellis omnige-  
 nisq; mortificationum instrumentis instructam  
 pœnitentiam , Seraphicum DEI Amorem. Sed  
 quorsum hæc omnia , si in imagine tantum ,  
 seu ut interpretes legunt , in imaginatione , si in  
 mente nonnisi & corde depicta ? Si homo reli-  
 giosus hisce imaginibus contentus , eximiis vir-  
 tutum operibus manum non admoveat , atq;  
 sic vitam otiose transigat sicq; pertranseat.  
 Non aliter quàm si quispiam suomet in palatio  
 Scipionum , Fabiorum , Catonum , Emiliano-  
 rum vultus depictos haberet , nec ipse , turpi  
 interim deditus inertiae , ullis sese egregiis fa-

facinoribus accingeret. Plane ego hosce intentionales Apelles ac desiderios illis pictoribus non absimiles judico, quibus depingere in more est perspectivās illas repræsentantes quasi à longè viva palatiorum simulacra, hortos, lucos, sylvas, delubra, excellas turres, nubes, sydera, ac ipsum etiam patens empyreum. Ecce vero hæc omnia, nihil in re sunt præter imaginem, præter colorem, & picturam, præter artificiale oculorum ludibrium. Quanquam & nosmetipsi hac in parte non multum dissimiles sumus illi depicto exercitui armatisq; militibus, qui videntur promptas in hostem manus extendere, vibrare enses, expedire tela, intentare ictus, vultu & oculis vivum spirare Martem, ingentes omni gestu parare ac polliceri victorias; interim, neminem unquam hostium feriunt, nulli ictum infligunt, in eodem situ, manus, enses, ac tela retinent: idq; ideo quia hæc omnia, omnes illi assultus, omnes martiales minæ ac gestus in imagine tantum umbratili, & non in vivo præliari exercitio. Uti irrisit quispiam Lacedæmon Atheniensem, qui cum præ oculis haberet depictam Atheniensium cum hoste pugnam ac jactabundè exclamaret:

*O quam*

*O quàm fortes Athenienses ! Subdidit ille : sed in tabula.*

Verba Davidis prædicta S. Basilius Theodoretus Cyrillus apud Lorinum legunt : *Ad instar speculi pertransit homo : Rursus alii : Ad instar somnii, ad instar umbræ.* Et revera in speculo in primis, quàm multa repræsentari consuevere, quàm eximia, quàm decora ac venusta quàm præclara. Sed ad quid hæc ? ex quo ibi inanes nonnisi, rerum imagines, non res ipsæ. In somnio præterea quanta imaginatio, num quanta phantasmatum indigesta farrago ? Non raro videmur nobis tolli in aera, cum volucris volare, sub solem ac cælum efferri, imò in cælo ipso figere stationem : & ecce hæc universa nonnisi merum somnii ludibrium ac phantastica imago : Cum interim terranos & cubile arcte detineat. Jam & umbra quàm non pauca videtur agere, huc & illuc pogredi, discurrere, orare flectere, manus ad cælum tendere, elevare, crescere. Verum cui hæc & tanta usus ? plane huic, cui usus ipsa umbra. Nec vero diversa eorum ratio, apud quos omnia in imaginatione, in intentione, omnia in sola repræsentatione intellectus, in otioso cordis desiderio &



affectu, non in effectu: ita omnino, sicut in speculo in somnio in umbra. Plane talium genuina expressio in illa apud veteres sive Thebis sive Romæ (de qua Pausanias & Caussin lib 4. Symbol:) *Statuâ hominis* (ita appellabatur) *aliquid volentis*. Erat forma adolescentis marmoris incumbentis, ac utraq; manu eidem innixi tanquam surgere incipientis, vultuq; & oculis volaturi, interim tamen marmoreo lapidi infixi. Et de hac una ubicunq; collocata legimus: jam quot similes viventes statuas cernimus, imò in nobismet ipsis effingimus. Non absimiles in eo ipso testudini quoque ac limaci, caput ex sua concha toties ostendenti ac si de eadem egressuro, nec tamen egredienti unquam.

Hujus etiam farinæ sive seculares sive Religiosos S. Judas Apostolus in sua Epistola appellat *Nubes sinè aqua, arbores autumnales infructuosas, fluctus feri maris despumantes confusiones suas, sidera errantia*: Seu ut aliqui interpretantur: *Stellas cadentes, exhalationes, ignes fatuos*. Et ita videmus imprimis, nubes infra coelum congeri, in immensum intumescere, densari, solem ac coelum contegere: Ingens ubiq; spes pluviae: Interim dum integri  
tor-

torrentes de coelo simul ruituri sperantur, nè  
 gutta quidem in agros sitientes defluit. De ali-  
 quibus etiam in Palæstina arboribus, refert Sal-  
 meron, quod in decursu autumnus eximie flo-  
 reant. Ignarus climatis quispiam, copiosos  
 inde expectaret fructus; & ecce hic etiam tota  
 spes in herba. Idem de fluctibus marinis co-  
 gita: qui dum in altum intumescunt, dum ul-  
 tra nubes, assurgunt, diceres in coelum usq;  
 sese illaturos; Ecce vix quiescente paululum  
 vento, & ipsi in sinum maris redeunt. Quid  
 dicam de illis exhalationibus? quæ dum accen-  
 duntur in aere, seq; in supremam usq; regionem  
 porrigunt, putares facile insignissimos planetas  
 suo superaturas splendore ipsumq; accensuras  
 orbem, aut certe copiosis in eum exundaturas in-  
 fluentiis: Sed quia & hæ nullâ solidâ materiâ  
 constant; ideo nullus ex iis coelo nullus telluri  
 proventus: nec iis ipsis stabilis ac diuturna in  
 aere consistentia. Atq; eadem defacto huma-  
 narum cogitationum ac desideriorum conditio.  
 O quantum scilicet & hic inane! ô quantum  
 & hæc de se pollicentur, quàm in sublime sese  
 proferunt: Sed quia in his etiam nihil solidum  
 nihil reale; ideo simili fato cum nebulis, cum  
 mari-

marinis fluctibus cum autumnalibus arborum floribus cum exhalationibus nullo aut paucò admodum fructu & solatio vanescunt. Quid dico fructu? imò sæpè ingenti nostro dedecore ac spiritali detrimento, juxta illud: *Desideria occidunt pigrum*: Dum enim suis quisq; desideriis contentus, manum iis exequendis non admo-  
vet, ac si ullis operosis adversus mundum carnem infernumq; assultibus opus non esset, ipse se in extremam præcipitat inopiam ac rerum spiritalium meritorumq; jacturam, ita ut hic illud ipsum verificetur quandoq;: nempe *Infernum plenum esse bona voluntate & bonis propositis*: Talia nimirum desideria, Icarix pennæ sunt, quæ nos locò cælestis Patriæ in baratrum damnationis non rarò devolvunt. Sunt quoq; instar Æsopicæ turris in àère absq; calce & lateribus fabricandæ, nec perficiendæ unquam, soli elusioni perquam idoneæ. Qualiter Deum eludere piaculum est imò crimen immane perditioni eludentis obnoxium.

Unde etiam illa celebris Regi Babilonio per somnium exhibita statua, non alia forsitan de causa corruit: nisi quod in solum caput & pectus, hoc est in cogitationum ac desiderio-



rum officinam, totum quidquid pretiosissimi in eâ fuerat expensum abierit; nihilq; simile in executrices potentias ac membra remanserit. *Caput* (inquit) *aureum pectus argenteum*: Reliqua de ære nonnisi ferroq; ac luto.

Ideo non inconvenienter Sponsa ad Sponsum in Canticis: *Surgamus ad vineas videamus si floruit vinea, si flores fructus parturiunt*. Nam & Deus ipse Sponsus animarum nostrarum parum foliis seu floribus desideriorum nostrorum afficitur si fructibus rerum desideratarum careant: Nec iis fructibus, quibus affabre & ut aiunt ad vivum depictis, illuserat apud Plinium convolantibus volucris Parthasius. Hinc scimus, quod nam in Evangelio maledictum incurrerit ficulnea, in qua Christus fructum non invenit: *Nisi folia tantum*.

Quæ cum ita se habeant: quisnam amplius hujuscemodi pennis in sublime enitatur Sanctimonix: quis hisce imaginibus ac speculis delectetur, quis hisce somniis fidat, illisq; se ludi permittat, quis umbras hasce inanes, ludicrè persequatur ac ipsis colludat: quis spem aliquam Sanctioris messis in his nubeculis sterilibus collocet, quem hi flores autumnales

aut quicumquē alii recreent, quis iisdem despumantis animi sese committat fluctibus, quis eas intellectus cordisq; humani exhalationes tantopere æstimet, & pro genuinis reputet sideribus? Quis solum caput præcellis cogitationibus deauret, pectus eximiis desideriis deargentet? Quis cerebrum in solos conceptus cor in desideria & affectus eliquet? nisi sponte sua extremè decipi velit, ac pro sublimi sanctitatis, præmiiq; æterni fastigio, misere perpetuæ *levaria sonitum ruinae.*

## ADHORTATIO III.

*Excellentia Sanctimoniae ab eximiis operibus.*

Cum vanitatem Sanctimoniae in solis præcellis cogitationibus ac desideriis immediatè ostendimus; non ideo eorum pretio ac æstimationi in omni sensu detraximus. Novimus utiq; ac supra fatis exposuimus, quanti hæc valoris, quanti meriti sint: quantumve cordi & gustui divino oblectamenti adferant. In eo verò nonnisi crysim haud effugiunt, cum absq; ullo operum consortio, totam sibi sanctimo-

Etimoniz plenitudinem vendicant. Illud igitur mihi in præsens exhibendum erit: sublimitatem nostræ Religiosæ virtutis in eximiis operibus potissimum consistere.

Magna fateor ( ut jam innui ) præcellarum cogitationum vis est, magna excellentia: sed tunc cum aut eximiis actionibus sociantur, aut si harum copia desit, saltem vicem earum suppleant, eadem præcellæ cogitationes ac desideria; Et in eo sanè nostræ sanctitatis genuina sita est sublimitas: ut si insignium facinorum campus & facultas adsit, solis hisce otiosis conceptibus ac volatilibus affectibus, nequaquam contenti simus: Sed simul menti & cordi sublimia meditantibus, manus etiam rerum magnarum effectrices, atq; non plebeia opera adjungamus.

*Cogitationibus ac desiderijs opera adjungenda.*

Exemplar ac Prototypon hujus ipsius præsto est in illa visione Amos 7. *Ecce Dominus stans super murum & in manu ejus trulla Cæmentarii.* Sed quid trullæ Cæmentarii, cum Dominicis manibus? scimus utiq; gloriosam Principum aliarumq; magnarum mentium doctorem esse, non diruere, non vastare, non usq; ad pulverem deprimere, sed imò fastidire rui-



nas, in altum exstruere, augere, sursum elevare omnia. Cur tamen in ea manu, non potius Libella perpendiculum, linea, funiculus, arundo, circinus, & alia hujusmodi? Nempe murus hic, & præaltus quidem exstruitur. Quis vero solo circino, solis Circini in omnes partes circumducti delineationibus & notis, solâ libella vel perpendiculo murum è fundamentis vellet educere, itaq; totam molem absolvere? Trullâ hîc sedulaq; manuum applicatione ac labore opus est. Præterea quis ille celebris architectus esset, qui venustas nonnisi & magnificas, Templorum, palatiorum Turrium, delineationes in charta vel tabula exhibere, icones & figuras depingere nosset, nec ullum unquam opus extra paginam, & imaginem, ullum templum vel palatium vel tugurium etiam exstrueret. Et si hic talis architectus, non tam laudandus quàm ridendus, esset: tanto magis Religiosus ille, qui structurâ virtutis & Sancti. moniæ in mente & corde exquisitis cogitationibus ac desideriis, quasi circino vel penicillo toties ad amussim delineatâ & depictâ contentus foret, istisq; talibus delineationibus, ac imaginibus delectaretur, nec unquam ullis  
virtu-

virtutum operibus manum apponeret. Ut quid enim nostra Sanctimonia & virtus sive in scripturis, sive apud Doctores & Ascetas nomine Fabricæ ac ædificii spiritualis, nomine Civitatis, domus vel turris toties denotatur? nisi quod sicut in construendis quibuscunq; ædificiis ac structuris solæ delineationes solæ Architectonicæ imagines ac figuræ, imò etiam libellæ funiculi parum conferunt, ni trulla Cæmentarii, ni lateres & cæmentum, ni manus operi admoveantur. Ita quoq; in educendo spirituali ædificio, egregiæ cogitationes atq; excelsa desideria non multum conducere, si opera virtutum deessent. Hinc ipse etiam Dominus cum trulla Cæmentarii à Propheta conspectus. Ipsi scilicet supremi Numinis rerumq; omnium perfectissimi artificis est, non tantum celsissimis cogitationibus, divinam mentem implere, sed celebratissimis quoq; in totam æternitatem operibus, suam omnipotentiam testari, dignasq; suo genio suisq; manibus fabricas & moles sub cælum usq; attollere.

Nec aliunde fortassis est: quod cum Propheta quatuor illa non ignota animalia sæpe descripsisset, cum illis vigiles circumqua; ocu-

Esch: i. v. 8

los, cū senas præterea alas adaptasset, cum  
 alis illico manuum etiam expressè meminit;  
*Manus* ( inquit ) *hominis sub pennis eorum* :  
 Ubi si per alas desideria & affectus, communi  
 Doctorum ascetarumq; sensu intelligimus, cla-  
 rum ac evidens est, eadem ipsa, manuum seu  
 operum sociali indigere fœdere & consortio.  
 Hinc non homini vel vitulo tantum animalibus  
 ad operandum à natura ordinatis, sed Leoni  
 etiam & Aquilæ liberioribus alioquin, otioq;  
 innutritis animantibus operatrices adaptatæ ma-  
 nus; nè scilicet his quoq; volare nonnisi aut di-  
 scurrere per sublimia, & non etiam operosis in-  
 sudare actionibus liceret.

Nec dubium quod neq; illi Angeli quos  
 Jacob Patriarcha, vidit per scalam ad cælum  
 usq; erectam ascendentes, alis caruerint. Et si  
 hæ defuissent, puri utiq; spiritus erant, adeo-  
 que omnibus pennigeris volucris perniciores.  
 Cur igitur sine scalæ adminiculo non evolarunt  
 in sublime? Nempe ad cælum non volare tan-  
 tum id est per sanctiora desideria ferri, sed etiam  
 scalæ inniti, singulis ejus gradibus, id est di-  
 stinctis seorsim virtutibus, earumq; operibus  
 insistere, hæc eadem quasi manibus laboriose  
 prensæ



prehendere necesse est. Hinc etiam de Angelis  
 Psaltes : *Benedicite Dominum omnes Angeli ejus  
 potentes virtute qui facitis verbum ejus.* En  
 ille solum virtute potens, cui manus ad facien-  
 dum verbum DEI id est ejus exequenda impe-  
 ria expeditæ. Quanquam de ipso etiam Chri-  
 sto Evangelium *quod erat potens opere & ser-  
 mone.* Ac si de ratione potentis & absolutæ  
 nec otiosæ virtutis essent, non cogitationes &  
 verba sed operosa efficacia.

Non frustra Sponsa Canticorum 2 sui  
 Sponsi erga se liberalitatem deprædicat : *Intro-  
 duxit me in Cellam vinariam ordinavit in me  
 charitatem.* Aliqui legunt : *Erudit me manus  
 meas charitate.* Alii : *Exercitum vexillatum  
 instruxit.* Certè enim parum est ardentioribus  
 charitatis affectibus erga Deum Sponsum ani-  
 marum nostrarum fervere, nisi eandem mani-  
 bus quoq; ac ipso exhibeamus effectum testemur-  
 que. Quid verò vexilla quid exercitus sine  
 operatione bellica absq; manu?

Idemq; omnino visus alibi desiderasse  
 Sponsus ab eadem Sponsa cum diceret : *Pone  
 me ut signaculum super cor tuum, ut signacu-  
 lum super brachium tuum.* Ubi scilicet solita-

Cant. 2.

rio

rio corde affectuum utiq; officina ipsisq; cordialibus affectibus non satis contentus, brachium insuper manusq; operis artifices depoposcit. Hinc rectè Evangelicus Adolefcens illo interrogatorio ad Christum usus: *Quid faciendo vitam aternam possidebo?* Faciendo inquam non cogitando desiderando vel loquendo tantum.

*Ecce opera  
eximia.*

Quod verò hic non quibuscunq; sed eximiis omnino operibus nostra sanctitas contenta esse debeat: ex his ipsis, quæ diximus hactenus, dilucidè deducamus.

Ac inprimis non infra sed supra murum cum trulla Cæmentarii quempiam cum Prophetâ subsistentem vidimus. Parum videlicet illi fuerat fundamenta posuisse, parum ultra terram murum eduxisse utcunq; , altius omnino ultra mediocritatem promovendus fuerat: in perfectam fabricæ molem ac sublimitatem erigendus.

*Apoc. 1.*

Et hæc defacto est ipsius DEI summa æquè ac infima operantis conditio: Hinc in ejus manibus non aliquas minores faculas, sed ipsos Principes Planetas Joannes se vidisse testatus est: *Et habebat (inquit) in dextera sua  
stellas*

*Stellas septem.* Quis enim defacto summus rerum creator esset? cui minutiores nonnisi creaturæ, muscæ v. g. & culices, & non Elephantum suam deberent existentiam. Quis ille etiam præter DEUM Sol? qui solas nonnisi ranas, ac vile vermium vulgus pareret. Quis ille nobilis Architectus, qui sola strueret tuguriola. Quis ille aurifaber? qui solis votivis tabellis fabricandis insisteret. Quis faber ferrarius, qui solis claviculis cudendis operam insumeret? Quis demum artis sartoriæ peritus? qui sola panni frustula, solas assueret lacinias. Scimus irrisum ab antiquitate Domitianum, quod solas imbelles muscas telis configendo de illis triumphum ageret. Jam è contra celebratum Philippum Macedonem, quod puer adhuc non humile quidquam sed desilientes de nocte stellas sagittis impeteret, ex quo Diogenetus Vates coniecit: *Eum dominaturum multis.* Et certè cui plebeia virtute non contento in animo est, supremum Sanctimonix obtinere dominatum, illi quoq; videndum est, nè ad quidquam humile abjectiore genio manum expediat seq; deiciat. Uti de Magno Alexandro: quod mundi occupaturus imperium non quidquam

Z

medio.

*Ptolomeus*  
*Hph. & ex*  
*eo Causin:*  
*lib. 4.*  
*Parabol: Hi-*  
*stor: cap. 56.*



mediocre sed una manu Orientem altera Occidentem prensaverit, disperferitq; cum sole manus.

Jam qua de causa manibus quatuor animalium apud Ezechielem ut supra meminimus adaptatae pennae: *Manus* (inquit) *eorum sub pennis*? Nisi ut illae, pennatae utiq; ac proinde humilioribus actionibus non contentae ad sublimiora opera evolarent. Cum etiam juxta Plutarchum *pensanda sint opera non opuscula*.

Scala etiam Angelis ascendentibus, porrigentibus sese ad coelum ipsum gradibus erecta: ut illos in inferioribus subsistere pueret, ad superiora non pigeret aspirare: ex quo praesertim iidem ipsi tot sublimiores in oculis constituti gradus, non desides manus, ut se quantocyus arriperent, pedesq; ultro invitabant.

Huc consulto in Cella vinaria à Sponsore eruditae Sponsae manus: ut nimirum satis scirent ac nossent, quibusnam sese actionibus impenderent, nec se stulto delectu ad vilia & plebeia demitterent: Multo magis illa ad instar vexillati manibus tamen mutilati exercitus esset: Ubi certè *ferro res eget, & manu & magnis animis*.

Quamquam & illud pensandum:

Quis

Quis ultra foret ille exercitus? qui cum maximis quibusq; par esset operandis ad- minuta aliqua atq; ludicra procederet. Uti Nero qui cum se ad ingentem pugnam prope littus maris simulasset ordinare exercitum, subito ad colligendas in hoc ipso littore conchas cum eodem exercitu prorupit.

Tandem etiam non manus non palmæ, non digiti sed brachium ab eodem Sponso pro signaculo deponitur. Digitos videlicet, rebus ac operibus minusculis, manus & palmas adhibemus mediocribus. Jam brachiis totaq; consequenter manu, ad non modica, nec levia uti consuevimus. Quod ipsummet Ennodius S. Epiphanio in vita ipsius attribuit: dum illum *virum in opere immensum nominat.*

Illud autem insuper de sponso in Canticis: *Manus illius tornatiles aureæ plena hyacinthis.* Ubi nihil omnino vulgare nihilq; vile in manibus. Et quia à plerisq; legitur: *Manus ejus circuli aurei:* Figura vero sphærica præ aliis capacior; quis igitur hîc minutum quidpiam aut ignobile depositum, seu inde proditurum autumaret? Uti etiam David catalogum virorum suorum illustrium 2. Regum 23.

texendo, quempiam *virum fortissimum magnorumq; operum* nominavit. Uti quoq; ea Spartani juvenis indoles magnis scilicet nonnisi rebus innutrita fuerat, ut mortem potius illito parietis capite præelegerit, quàm ad inferius sua conditione obsequium ~~marum~~ apponere. Exclamante etiam apud Senecam in simili casu quopiam: *Ad majora natus sum*. Neq; vero aliæ pro assecutione sublimioris Sanctimonix laborantes, sed omnino magnarum actionum capaces ac operatrices manus sunt. Planeq; manus Giganteæ, qui ut coelum conscenderent non minores terræ glebas sed montes ipsos grandissimos prensantes manibus, imponentesq; Pelion Ossæ, suis pedibus adsternebant.

Id igitur ipsum nobismet ipsis præstandum omnino: nec solis cogitationibus ac desideriiis, sed totis etiam manibus pedibusq; iisque pennatis quales olim Mercurio fuerant, in sublimitatem Sanctimonix non tantum enitendum quomodocunq; , sed etiam altius altiusq; volandum: Id est eximiiis pro gloria DEI pro animarum nostraq; salute insudandum operibus: uti id ipsum Cardinalis Ludovisus insignis Societa-



cietatis nostræ amicus ore suo professus est : *Minimam se dicit Societas cum maxima agat pro gloria DEI.* Id proinde agamus, & sic in omnibus uni eidem DEI gloriæ militemus, cum Ecclesia Orando : *DEVS in te sperantium fortitudo adesto propitius invocationibus nostris : Quia sine te nihil potest mortalis infirmitas : præstet auxilium gratiæ tuæ ut in exequendis mandatis tuis, & voluntate tibi & actione placeamus.*

## ADHORTATIO IV.

*Excellentia Sanctimonie in ordinariis & communibus non ordinariè nec communiter obediendis.*

**E**Xcellentiam Sanctimonie in sublimibus & eximiis operibus collocavimus. Sed nè desperationem potius, quam alacres animos ea nobis pariat sublimitas; aliquantum de hoc ipso sanctitatis rigore tantisper remittimus: ita ut illam ordinariis etiam & communibus, non invicè concedamus. Hoc itaq; præsentis nostræ dictionis argumentum esto: Excellentiam religiosæ virtutis, non in solis admodum eximiis ac selectissimis quibusq; actionibus, sed in or-

**Z 3** dina.

dinariis etiam & communibus, modo non ordinariè nec communiter obeundis consistere.

Fallitur quisquis existimat in sublime per sola sublimia ascensum esse. Velimus hic meminisse, scalæ Jacob à terra in cælum usq; porrectæ. Hæc utiq; innumeris iisq; non summis tantum sed mediis etiam inferioribus ac infimis gradibus constabat, per quos ad ipsa cæli Augustalia enitendum foret. Nec aliter sublimis ille thronus Salomonis ad quem per sex gradus ascensus fuerat summos pariter inferiores ac infimos. Imò quidquid in orbe sublime existat, semper ad illud iter est per declive. Sic in augusta palatia, sic in excelsas turres, sic in præalta montium juga, sic in ipsa scandendum astra.

Sive itaq; scalam ad cælum erectam, sive Olympum cælo conterminum, Sanctimoniam cogites, non solis illam sublimibus actionibus constare, non per sola eximia opera viam ad illam ducere agnoscas necesse est. Quod si eandem ædificium quodpiam spirituale cogitaveris? & hic tibi facile occurret: Augustissima quæq; ædificia non solo rerum excellentium delectu, sed pluribus etiam ignobilioribus partibus,

tibus, ac mediocri materia componi. Nisi quod ibi infima summis, inferiora sublimibus, nobiliora vilioribus admodum eximiè, admodum concinne adaptentur, sibiq; invicem conveniant, insigni rerum omnium vilissimarum etiam coordinatione & cultura. Et in hoc ipso defacto nostræ quoq; sanctitatis, consistit ratio ac simmetria: ut scilicet extraordinariis ordinaria, singularibus communia, gratâ permissione copulentur.

Plane ad instar Reginae illius, cuius ornatum de scribit Psalter: *Astitit Regina investitu deaurato circumdata varietate.* Ubi videlicet non omnia aurum, sed ob gratam ubiq; varietatem, aliquid etiam minus pretiosi metalli ac ornamentum permixtum erat. Hinc Sponsus quoq; ad Sponsam: *Murenulas (inquit) aureas faciemus tibi vermiculatas argento.* Atq; hic etiam nequaquam totum de auro, sed argentum quoq; minoresq; vermiculi in partem ornamentum assumpti. Nec alius virtutis & Sanctimonie ornatus: isq; non de eximiis tantum, sed ordinariis etiam & communibus. Ita tamen ut in his non ordinaria eluceat cultura ac diligentia. Uti defacto in ipsis supradictæ Davidicæ  
Regi-

*Psalm. 44.*



Reginæ fimbriis spectare licuit : quæ etsi postremam vestimenti rationem habeant : quia tamen ibi tum auro tum arte exquisitâ nituerent. *In fimbriis ( inquit ) aureis circumamicta varietatibus* : Ideo non vulgare toti illi amictui ac ipsimet Reginæ præstiterè decus.

Cùm multa præterea novimus in quibus non materia sed ars industria & labor pensatur. Nec illos æstimamus artifices, qui ex auro nonnisi sua opera norunt effingere : Sed illos etiam qui ex viliori licet & obvia materia, non obvia conficiunt, atq; ita se orbi ac posteritati insinuant. Qualia fuere opera Apellis, Zeuxis, Mironis, Praxitelis, Phidiæ, quæ non semper materiæ nobilitas sed ars commendabat. Unde illis, illud Pœtæ quadrare posset : *Materia superabat opus*. Quale etiam Cælum Archimedis & Cosrois ex sublunari licet materia ad æmulationem ipsius Jovis seu potius Creatoris DEI effectum. Hinc idem apud Claudianum

*Jupiter, in parvo cùm cerneret æthera mundo*  
In eam admirationem ac verba prorupit :  
*Huccine mortalis progressa potentia curæ?*  
*Jam meus in fragili luditur orbe labor?*

Atq;

Atq; ideo simile quid de cultoribus Sanctimonie censendum est: si scilicet per quascunq; etiam actiones parem ipsi cælo eandem Sanctimoniam contentur effingere.

Eluxit id ipsum in illa visione ac spectaculo Principi Apostolorum Act: 10. representato: *Vidit descendens vas quoddam velut lintheum magnum, in quo erant omnia quadrupedia, & serpentina terræ & volatilia cæli?* Cùmque circa eam visionem quorsum spectaret dubitat: ecce omnia sine discrimine iubetur occidere & absumere: *Occide* (inquit) *& manduca.* Et cùm adhuc reponeret: *Absit Domine quia nunquam manducaui, omne commune & immundum:* Advertite quidnam responsi retulerit? *Quod DEVS purificavit, tu commune ne dixeris.* Nempe non sola ibi fuere volatilia cæli, non solæ in sublime volantes Aquilæ, non solæ raritate ac sapore celeberrimæ volucres: non soli magnitudine ac fortitudine conspicui Elephanti leonesq; , sed humi etiam reptantes vermiculi ac serpentes. Hæc tamen etsi alioquin communia & vulgaria, nequaquam amplius talia dici meruere, postquam accessu divinæ purificationis suum acceperere nitorem & pre-

Act. 10.

tium. Idq; ipsum de nostris quibusvis intelligendum operibus : videlicet & hæc , tunc communia ac ordinaria esse desinere : si divini-  
 or eorum cultura atq; extraordinaria ab omnibus imperfectionibus nævisq; depuratio subierit.

Hac fortassis de causâ Justos in scriptura soli comparatos legimus : *Fulgebunt justi sicut sol.* Solis quippe est sublimia decurrere , in ortum ac meridiem eluctari. Nec tamen , tunc ille se ipso minor , minusq; agens , dum se inferius ad occasum inclinât , dum se ad antipodas præcipitat. Præterea dum signa Zodiaci percurrit , dum in Leone in Libra in Arcti-  
 tenente aliisq; celebrioribus signis hospitatur , non eo ipso nobilior , illustrior , activior , quàm dum in Cancro aut in geminis subsistit. Ubi-  
 que videlicet suæ retinens naturæ ac splendoris est : ubiq; & circa omnia eadem virtute , eadem activitate , eadem luce versatur , seque commendat : ubiq; sui similis , sive aurum in montibus , sive ferrum & vilius quodpiam metallum parjat : sive ranas in paludibus , aliaque insecta alibi , sive nobiliora viventia super terram vel æra generet. Nec verò alia in  
 cursu



cursu Sanctimonix ratio : ubi non illud spectandum , quidnam agatur , sed quomodo agendum sit, neq; illud ut semper eximia agamus, sed ut perquam eximie.

Non dissimili ratione , sicut de summo rerum omnium principio , deq; omnibus ab eo creatis in Genesi prolaturum est : *Vidit DEVS cuncta quæ fecerat & erant valde bona.* En quanta omnium rerum creatarum excellentia. Et tamen non solæ tunc erant recens creatæ cælestes machinæ , non sola illimi splendore nitentia cæli luminaria : In mundo etiam inferiore , non sola excellentiora animantia : non solæ proceræ ac fructiferæ arbores , flores multiplici pulchritudine coloreq; conspicui , sed simul viliora quæq; ac imperfectiora viventia , ignobiliores arbusculæ , plebeix herbæ & gramina. Unde itaq; tanta illis commendatio : unde cum supremis coæquatio creaturis , ita ut non simpliciter non qualitercunq; , sed valde hoc est extraordinarie bona dicerentur ? Quidnam illis eam contulit dignationem tamq; laudatam bonitatem ? Non aliud certè quàm ipsa omnimode exacta , omnibus numeris absoluta perfectissima , æqualis tam circa maxima quam

circa minima divina operatio: per quam omnia quæcunq; cum omni sibi debita perfectione naturali creata.

Quod ipsum solidissime confirmat Psaltes dum exclamat: *Magna opera Domini, exquisita in omnes voluntates ejus.* Sed omninè magna tantopere DEI opera? Quid enim magnitudinis in formicis, apibus, vermiculis aliisque ejusdem generis? Vel ideo scilicet in sua quantumvis parvitate, magna omnia, quia exquisita, hoc est, exquisitissimâ DEI circa se operatione nobilitata insigniter.

Hinc ultra adverte: quod ibidem in Genesi, cùm DEUS creando hanc universi machinam, ante singulorum creationem ediceret: *Fiat hoc vel hoc v.g. Fiat lux, fiat firmamentum, fiant luminaria, &c.* Post creationem illorum, præter lucem non subintulit de iisdem: *Factum est hoc & illud, v.g. facta sunt luminaria &c.* sed: *Factum est ita.* Nempe in rebus creatis minimè pensandum, quidnam promanaverit ab Omnipotentia divina, sive id magnum sive mediocre sive minimum ac vilissimum: sed: quomodo aliquid factum? ita scilicet, eo modo, quo circa excellentissimas quascunq; creaturas labo-

laboratum, quo DEUS ipse illud fieri voluit, quo ideæ in DEO contentæ ad amissim satisfactum.

Quod ipsummet visum in formatione etiam Adami *de limo terræ*. Quid enim limo vilius & abjectius? Quia tamen huic se non vulgariter divinæ applicuere manus: ideo non vulgare quoq; opus, DEI spectatissimum imagine consurrexit: id ipsum commonstrante Tertulliano: *Recogita* ( inquit ) *DEVM totum ibi occupatum ac deditum*.

Quid verò trullâ Cæmentarii ignobilius? Ecce tamen hanc ipsam suismet tractasse Deum manibus describit Vates: *Dominus* ( inquit ) *supra murum, trulla Cæmentarii in manu ejus*. Apud alios legitur: *In manu ejus Adamas*. Sic ergo trulla ignobilis in DEI dextera in pretiosum adamantem transiit, ab ipsius manibus & operatione pretium & nobilitatem traxit.

Nec aliunde est quod ipsemet Christus in Evangelio de Joanne Baptista pronuntiavit: *Non surrexit major inter natos mulierum Joanne Baptista!* Sed quid illum eousq; extulit, ut ita supra omnes homines censeretur? numquidpiam supra alios quoscunq; gessisse visus? In-



coluit ille eremum? fecere id ipsum, & pluribus quidem annorum spatiis, illi Antonii, Arsenii, Hilariones, & reliqui. Arctam servavit à cibis omnibus abstinentioniam? Et hoc illi cum tot aliis commune. Dire non molliter suum licet innocuum tractavit corpus? plures eodem modo cum sua carne processere. Prædicavit Christum Messiam? Neq; huic eidem tot viri Apostolici defuere officio. Baptisavit in Jordane non paucos? certè non paucioribus alii Christianum contulere Baptismum: Redarguit liberrimè Herodem? Tot alii similes veridici cordatiq; prædicatores inventi sunt. Gladio à lictore per Herodiadem immisso percussus? Innumeros illi hac in parte Martyres, sexus utriusq; oppones. Quid igitur illum tantopere effecit singularem? Non aliud omnino, quàm ea ipsa, quæ cum aliis alioquin communia, insigni sua operatione modoq; agendi fecerat extraordinaria. *Quia (inquit Algerus) etsi plures laboraverint diutius, nemo tamen ferventiùs illo & puriùs.* Ex hoc fortassis fundamento laborantibus in vinea per unam horam, idem præmium cum iis, qui tota die laborarunt collatum. Idq; ex eo, quod licet nihil supra alios, imò

imò minus aliis egissent, majori tamen & exactiori conatu id totum egere. Par & illius ratio, quod Sauli ac Davidi fuerat acclamatum: *Percussit Saul mille & David decem millia.*

Cum tamen hic unum non nisi Philistæum lapide è funda ejecto stravisset. 1. Reg: 18. Nimirum actus hic Davidis unicus tanti conatus tantq; ausus, & consequenter tantæ æstimabilitatis fuerat, ut magnæ ad instar victoriæ computari meruerit. Eo inde documento: Spirituales etiam, ordinarias licet minoresq; victorias, in censum magnorum triumphorum non rarò abire, si extraordinariis resolutionibus & conatibus subli-  
mentur.

Quid verò ille uterq; lapis? quorum unus in fronte percussit Philistæum alter Statuam in pedibus. Cùmq; hic ipse crevisset illico in montem magnum ac impleisset universam terram, ille in sua relictus est parvitate, etsi plus notabiliter præ alio egisse visus. Cùm enim Propheticus, mutam, inermem inanitemq; statuam, & quidem ad pedes destructus contrivisset: lapis Davidicus staturâ procerum, bel-  
lacem, cataphractum Gigantem posstravit, ipsumq; caput ferit. Quid igitur à Danielis la-  
pide

pide tantopere patratum singulare, atq; illum  
 in eam promovit magnitudinem, ut in portento-  
 sum montem excreſceret? Advertite utriusq;  
 in ſimili facinore diſcrimen. Ac inprimis quòd  
 Davidicus lapis non ſpontè, non alacriter, non  
 liberè, ſed coactè, ſed violente, manibùs alie-  
 nis è funda eiectus, in hoſtem irruerit: jam è  
 contra Prophetæ lapis proprio motu, ſine cu-  
 iusquam manibus, ſua ſponte & conatu, in  
 ſtatuam illapſus: ille vaſtiore circumactus am-  
 bitu & gyro ventum & aerem verberans, tan-  
 dem inſilierit in frontem: hic omnem auram pe-  
 roſus, rectæ ac ſilenter ſtatuæ ſe impreſſerit:  
 illum terrenæ mercedis regiiq; conjugii in Da-  
 vide profanaverit appetitus: hic nulli tali am-  
 bitioni obnoxius, nec auri nec argenti cupidi-  
 tate ſuperatus. In illo elationis cujuſpiam in-  
 dicium, dum ad caput ſeſe efferret: in iſto de-  
 miſſionis Symbolum, dum ſe ad pedes uſq; deji-  
 ceret. Illi ſatis fuerat, ſolùm ad terram pro-  
 ſtraviſſe Goliath, huic necelle totam contere-  
 re ſtatuam in cinerem & favillam. Et hæc tanta-  
 que communem illi alioquin cum Davidico la-  
 pide victoriam ſingularem ac extraordinariam  
 reddidere. Ita utiq; ordinaria & vulgaria quæq;  
 in



in singularia transeunt, nec uni insignem pal-  
mam fastigiumq; sublimis Sanctimonix confe-  
runt: ita ut in montes magnos ac prægrandes  
excrecant, nec terram solùm, sed cælum etiam  
famâ & præmio virtutis impleant.

Quamquam quid comuniùs quam pa-  
nem frangere & sumere? De discipulis tamen  
Christi, agnoscentibus eundem in Emmaus  
pronuntiavit Evangelista: *Cognoverunt eum  
in fractione panis.* Verùm quid oro illa fractio  
panis habuit singulare, quo discipulos in Chri-  
sti cognitionem duceret? Pleriq; Interpretes  
imò etiam A catholicis existimant Christum habuif-  
se specialem, diversum ab aliis modum ac con-  
suetudinem, tractandi, frangendiq; panis. Si-  
mile quid de eodem Christo ascendente in Cæ-  
lum Lucas: *Convalescens (inquit) præcepit  
eis.* Et post pauca: *Videntibus illis elevatus  
est.* Ad quod D. Gregorius Papa: *Notate  
verba, signate mysteria: Convalescens elevatus  
est, comedit & ascendit.* Ac si dixisset: Eam  
fuisse, & si cum omnibus aliis communem  
ipsam comestionem Christi, ut post ipsam illico  
velut eximix virtutis actum ad cælum usq; ipsumq;  
Patris æterni solium elevari meruerit. Et si

Humil: 29.  
in Evangel:

B b

hoc

hoc de Christo : non dissimile quid , servis & affeclis ejusdem imitandum. Nimirū ut illi dum ordinaria quæcunq; aliisq; communia obeunt , sive prandent sive dormiunt , peculiare diverfosq; ab aliis modos ac industrias usurpent , quibus eadem sua opera extraordinaria efficiant.

Genes: 6.

Idq; planè præstent quod circa arcam , Nòé præstare jussus. *Fac tibi* ( inquit DEUS ad eum ) *arcam de lignis lævigatis.* Ad quid verò hæc lævigatio lignorum ? Num conductura erat reliquiis mundi ad salutem ? Minime quidem. Id tamen ipsum documento est , qualia nostra quoq; opera , esse debeant ; hoc est non qualiacunq; , non perfunctoria , sed quasi lævigata , id est omni parte absoluta & exacta. Hinc si antiquitus etiam naves sive eximiis picturis sive aliis quibuscunq; modis exornabantur splendidiùs ; unde de illis illud Plinii : *Pericula* ( inquit ) *pingimus.* Quis prohibeat quascunq; etiam actiones nostras , excellentibus quibuscunq; spiritualibus exornare industriis : quæ quò ampliori abundant ejusmodi ornatu , eò faciliùs & securiùs per illas ad sublimioris portum sanctimonix , cælumq; ipsum navigatur.

Hoc

Hoc verò etiam in Templo Salomónico eluxit, ubi etsi non omnia de auro vel argento fuerant, cuncta tamen, non arca tantum vel propitiatorium, non sola thuribula & candelabra, sed forcipes quoq; aliaq; minora deaurata luxere.

Tanto verò magis id in cælesti à Joanne descripta Jerusalem: Ubi quoq; non ipsa tantum nobilior ejus structura de auro, margaritis ac omni lapide pretioso, sed ipsum etiam fundamentum, imò plateæ ipsæ & pavimenta iisdem adornata impendiis: *Platea ejus aurum mundum tanquam vitrum perlucidum.*

Apocal. 21.

Nec aliter nobis quæcunq; nostræ non nobiliores tantum sed infimæ etiam adornandæ actiones. Adornandæ inquam accuratissimo exquisitissimoq; operandi modo. Quali excelsit Epaminondas de quo proditum: *Quod non minori diligentia canales & expurgationem Civitatis curabat, quam aciem instrueret, aut confliceret cum hoste.* De Beato autem nostro Aloysio Gonzaga Ceparius in ejus vita. *In suis actibus nihil habuit mediocre.* Utpote omni ex parte exquisitum. Idem de B. Stanislao Kostka in suo panegyrico Ad: R. P. N. Ge-



neralis Oliva: Cūm ( inquit ) actionum humanarum pretium ex intensione actūs , & operantis principii excellentia , uti Theologi loquuntur pendeat : necesse est Beati adolescentis virtutem , ut qui tam ardenti esset in DEVM charitate , gratiaq; celestis tanta ubertate præditus , eamq; in rebus omnibus , quas gereret , totam exereret , eo usq; excrevisse , ut in actionibus cætera mediocribus , maxima multorum facinora , superaret.

P Tanner  
de vita P.  
Jobi de  
Guzmann.

Id planè respexit celebris ille Avildum Patri Guzmanno & Loarti ad Societatis tyrocinium digressuris inter alia documenta scripto mandata , hoc quoq; dedit : Nihil commoveat vos , quā tandem in re opera vestra adhibeatur ; vel ipsas lances patinasq; purgare , id demum est animas convertere , & summā voluntatē est peragendum. Idq; ipsum est quod nostris quibuscunq; actionibus pretium conciliat & valorem. Si quondam in aula Valentis & Valentiniani Cæsarum ( teste Cardano ) viles & detritæ scopæ in omen floruerunt dignitatis : quis dubitet , viliores alioquin & contemptibiliores externa specie religiosas actiones , per excellentiores spirituales industrias ,  
rarius

rariùs excultas in eximium sublimioris Sancti-  
monia ac etiam cælestis coronæ posse efflore-  
scere ornamentum.

Hinc illud axioma : *Non verba apud  
DEVM aestimari sed ad verba.* Nempe : non  
id quod agimus etiam naturâ suâ præstantissi-  
mum, sed quàm bene, quàm exactè, quàm ex-  
quisitè.

Atq; id ipsum observandum monet Sa-  
piens : *In omnibus ( inquit ) operibus tuis præ-  
cellens esto :* Hoc est insigni applicatione, cona-  
tu & studio, omni devotionis affectu, ex al-  
tissimis quibusq; motivis ac principiis, subli-  
mibus intentionibus, singularibus industriis,  
omnes tuas qualvis actiones ad amissim obire  
velis. Illam mente versando historiam de An-  
gelo quorundam Religiosorum in Choro ca-  
nentium devotionem aureo caractere anno-  
tante, aliorum argenteo : quorundam nigro,  
aliquorum aqueo ac pænè nullo. Quod cum  
ita fuerit : Quid ni igitur nos quoq; eo emita-  
mur ut omnia nostra, facta dictaq; ab Angelis  
excipi, auroq; notari digna sint. Notabuntur  
verò, ac in catalogum sublimium Sanctorum  
unà nobiscum referentur, si ex modo agendi

pretiosiore id pretium præmiumque merebuntur.

## ADHORTATIO V.

*Excellentia & sublimitas Sanctimonie ab exacta observatione & cura minimorum.*

**N**E nimis magna, nimisq; ardua ad rationem Sanctimonie videremur exigere; communia id circo & ordinaria, non ordinariè tamen obeunda in eam partem admisimus. Sed nè hoc quoq; ipsum, utcunq; saltem difficile censeatur, jam hodie in minimis etiam ejus amplitudinem proponimus. Illud pro argumento dictionis assumendo: Excellentiam & sublimitatem virtutis etiam in exacta observatione & cura minimorum sitam esse.

Habent etiam minima, quo vel ultra majora crescant, vel saltem in eorum comparisonem veniant. Rerum omnium natura parens, non quidquam in contemptum edidit, & si parva aliquando tulit, tamen sæpe negatam magnitudinem, aut virtute, aut pretio, aut utilitate pensavit; ita ut nec humillima & abjectissima quæq; sine fastigio reliquerit, nè dicam



cam sine fastu. Imò per cuncta, debitam cuiq;  
enti dispensando dignitatem & gloriam, in mi-  
nora eò liberalior extitisse visa; quò magis sine  
potiori dote despici potuerunt. Non eo per  
singula: gemmas, uniones, extra molem & va-  
ritatem Rhodopæis pretiosiores montibus,  
terræ mariq; intactas relinquo. Intra me met-  
ipsum consisto: Cor, oculum, linguam, minuta  
utiq; corporis humani membra, eximiis interim  
refertissima dotibus in medium affero. In sua  
videlicet parvitate, naturæ prodigia hæc sunt;  
nec hominem tantum, sed orbem etiam re-  
gunt. Jam vel ex eo minimorum æstimanda  
dignitas & pretium, quod nulla absq; iis im-  
mensitas, nulla moles. Quidquid in orbe ma-  
gnitudinum, ex minimis confectum est. Atq;  
sic apud Pòetam: *ex atomis, tumuere montes.*  
Apud Zenonem, continuum quodvis ex mini-  
mis indivisibilibus constans. Hinc procerrimæ  
arbores, hinc Alpes, Olympus, Pelion, Ossa,  
hinc globus terraqueus, hinc totum universum.

Idem verò in Asceticis ac spiritualibus  
cogita. Ubi etiam minima non exigui mo-  
menti sint necesse, ex quo ab ipso DEO non  
levi pretio æstimantur, tum quod immensum  
quod-

quoddam ac sublime virtutis & Sanctimonie efficiant.

*Ex minimis  
non parvum  
Sanctimonie  
ac merito  
aggregatum.*

Huiusq; ipsius videre est inprimis illustre documentum in illa muliere Apocaliptica, amicta sole, suis lunam adsternente pedibus, duodecim stellis in capite coronata. Ubi quis non advertat soli & lunæ majoribus principibusq; luminaribus minores stellas longe præferri; cum lunæ, vices pavimenti, soli, vices amictus, sideribus vices diadematis, ipsumq; caput delatum, Advertite verò ulterius, stellas, si solitariè luceant, modicam sui ostentare speciem, nec nisi stellas esse: jam si simul collectimq; plures appareant; quàm pulchrum de se præbere spectaculum, quàm insignes variasq; constellationum species exhibere, atq; in coronam etiam abire. Hinc Borealis ac Berenices Coronæ. Nec alia minimorum operum ac meritum ratio. Et hæc quidem dum solitaria sunt, etiam talia hoc est minima apparere; quod si accumulentur plura in unum, eximium sanè ac præstantissimum virtutis & Sanctimonie aggregatum, exactas justitiæ libras, invictæ fortitudinis leones, intaminatæ castitatis Virgines, mansuetudinis agnos, innocentie gemit.

geminos, victores mundi carnis inferni Alcidas  
vel Perseus, sublimis contemplationis ac devo-  
tionis aquilas, puritatis olores, pœnitentiæ Eri-  
danos, concordia & charitatis lyras, ac ipsas  
demum consummatæ sanctitatis præmiîq; cœ-  
lestis coronas efficere.

Hic plane locum habet via in cælo quæ  
dicitur lactea. Hæc ex eo, candore notabili  
refulget spectabilis, quòd, etsi minoribus,  
innumeris tamen stellis sit confertissima.  
Eâdemq; viâ ipsi juxta Pœtas Herodës ac superi  
in cælum ferebantur: hinc illud: *Est via  
sublimis candore notabilis ipso, hac iter est su-  
peris.* Quod vero de sideribus, idem de vitæ  
Religiosæ minimis censendum est. Illa quoq;  
videlicet, si parem stellis illis numerum & co-  
piam habeant, plane nobis viam virtutis la-  
cteam, adeoq; viam ad cælum ipsum expedi-  
tam ac illustrem constituere; juxta illud scri-  
pturæ: *Iustorum semita quasi lux splendens.*

Inde est quod D. Joannes portas cæle-  
stis Jerosolimæ ex singulis margaritis constan-  
tes adverterit: *Duodecim portæ 12. margaritæ.*  
Et novimus utiq; quæ nam sit margaritarum  
parvitas; per has tamen ad cælestem Jerosoli-

*Apoc. 21.*



mam triumphalem ingressum esse. Nè minima etiam cuiquam neglectui sint ; per quæ nobis ad sublimis Sanctimonix adyta , via ac porta est , per quæ ipsum etiam cælum in immensum patet.

Nec frustra Sapiens postquam insignia opera ac encomia fortis cuiuspiam mulieris recensuisset : tandem ad infimum minimumq; devenit : *Digiti ejus* ( inquit ) *apprehenderunt fusum.* Verum quid fortitudini decori laudibusq; amplissimis cum filis cum fuso ? nisi quod illud hic æstimandum sit ; quantum ex hoc ipso fuso ornamento, insignisq; amictus prodierit : *Stragulatam* ( inquit ) *vestem fecit sibi. Byssus & purpura indumentum ejus.* Adeoq; quis & illa minima contemptui habeat , ex quibus tot ornamenta animæ , tot regalia pæne virtutum indumenta , tot stolæ gloriæ texuntur. Longè feliciori sorte quam quæ cuidam rusticæ mulieri de vico Montagnano obtigit. Hæc cum filum tenuissimum rudi quamvis pollice subtilissimè duxisset , illudq; in glomum convolutum Bertæ Henrici IV. Imperat. conjugii obtulisset , pro munere id præmii ac mercedis , retulit : ut tantum terræ possessio-

Beyerlinck &  
Vasconcellus.

ne caperet , quantùm illo filo protenso metiri posset. Atq; ita subito opulenta evasit ; ut etiam clarissima Patritiorum Patavinorum familia de Montagno dicta ex hoc fulo profluxisset.

Quanquam quid mirum ea quæ diximus in pretio haberi , cùm nivis vel grandinis, imò & arenæ copia thesauros efficiat : *Nunquid ingressus es thesauros nivis aut thesauros grandinis*, ait Job : tum Moyses : *Inundationem maris quasi lac sugent & thesauros absconditos arenarum*. Et certè quis inter alia , tenuem despectui propinet arenam ? intra quam non divites tantum cum Gange Pactoli sed amplissima etiam concluduntur maria , & quidquid in se pretiosi continent, gemmas, lapides, uniones, opulenta mercimonia ; hoc totum in eandem exonerant. Et si hæ & tantæ unius arenæ , tum etiam nivis & grandinis divitiæ : quis non simile aliquid de nostris minimis cogitabit ? Illa scilicet esse , quæ nobis ingentes virtutum thesauros constituunt , illa quæ intra se mare meritorum, gratiarum, ac donorum spiritualium concludunt , illa quæ in nos tot opes ac merces cælestes congerunt.

Ex quo verò (videamus,) Turris illa posterorum Noe, usq; ad cælum surrectura erat. *Faciamus inquit civitatem, & turrim cujus culmen pertingat ad cælum.* Certè non ex ingentibus Saxis, non ex divulsis magna mole rupium frustis: aut super impositis sibi & coadunatis iisdem ipsis rupibus ac petris: Et unde tandem? Ecce ipsimet Architecti enuntiant: *Faciamus lateres & coquamus eos igni.* Ex minutis itaq; lateribus tanta fuerat erigenda moles. Ut vel inde nos quoq; erigamus animos: ex minimis etiam pares nos imò majores, cælo ac æternitati posse educere machinas.

Imò etiam pabulum pro eadem æternitate habere. Non aliter quàm Filii Israel Exod: 16. qui quadraginta annis comederunt Man, hocq; cibo pasci sunt. Quid vero illud? nisi quoddam *minutum*, & *quasi pilo tusum in similitudinem pruinae*, seu (uti infra) *quasi semen coriandri*: Sunt verò qui legunt: *In similitudinem Margaritæ* Acsi etiam minutissima quæcunq; ex parte virtutis sese tenentia in Margaritas quoq; hoc est divini cordis alimentum degenerent, in eamq; admirationem veniant, cum qua prædictum Man à Filiis Israël exceptum est



est, ad primum ejus aspectum cum stupore  
querentibus; *Manhu? quid est hoc?*

Præsertim cum ipsa etiam minima id  
habeant non modicum, quod intentionis ad-  
miniculo in immensum extendi dilatari attolli  
possint. Sic Angelus Apocalipticus *habebat*  
*mensuram arundinam auream.* Qua certe me-  
tiretur Civitatem caelestem Jerusalem. Ve-  
rum quid in primis abjectæ arundini ad aurum?  
Nisi quod Angelicæ eam tractarunt manus,  
quæ minima ac vilissima quæq; in aurum trans-  
formare norunt. Aurum inquam præ aliis me-  
tallis ita ductile, ut modica ejus particula & in  
longum & in latum ad eximiam amplitudinem  
diduci & extendi possit. Idemq; ipsum de  
quibuscunq; minimis, intentionis thaumaturgâ  
vi in aurum transformatis cogita.

Nec aliunde est, quod DEVS ipse eadem  
minima tantopere æstimet, ut illis efficacissimè  
capiatur, ideoq; cum Sponso exclamet: *Vul-*  
*nerasti cor meum soror mea Sponsa in uno oculo-*  
*rum tuorum, in uno crine colli tui:* Alii legunt:  
*Cepisti cor meum.* Sed quid crini cum oculo.  
Cum in primis oculi tanta sit in corpore huma-  
no præstantia, crinis è contra tanta vilitas, ut

*Præsertim in-  
tentionis ad-  
miniculo.*

*Minimorum  
apud DEVM  
æstimatis.*

inter excrementa naturæ numeretur; eundem incolere etiam animâ dedignante. Præterea quis nesciat eam oculis inesse virtutem ac efficiam, ut ipsa corda captiva teneat, potentemq; in ea exerceat dominatum: hinc quispian apud Pœtā retulit: *Suis me Cynthia cepit ocellis.* De Crinibus autem quid simile auditum est? Respondet D. Franciscus Salesius in hæc verba: *Ideo DEVM in persona Sponsæ vim oculo ac crini pariter adscripsisse, ut (inquit) ostenderet, non tantum sibi grata esse opera magna justorum, sed etiam minima ac infima.* Tunc verò vel maximè, si crini hoc est minimo cuiq; operi, oculus, id est intentio associetur. Ab hac utiq; associatione vilissimi ac minimi etiam crines id nanciscuntur pretii, ut ipsis cor etiam Divinum capiatur tenerrimè.

Nec jam miror tanti Neronem quanti referunt historiæ, suæ Poppeæ Crines æstimasse, ut scilicet singulos numeraverit, singulis nomen indiderit singulare, singulos uno carmine celebraverit, ac etiam pectine donaverit aureo; si quis autem capite excidisset, auro curaverit includi, & in templo ad caput Junonis reponi.

reponi. Non miror & Absalonem quòd ille suam toties totq; Siclis appendisset Cæsariem. Cùm apud DEVM ipsi nostri quoq; capilli, hoc est juxta Salesium minima merita, tanti sint, ut illa attentè exactè numeret, ac cælo ipso rependat: *Capilli capitis vestri numerati sunt.* Imò etiam suo capiti velut pretiosam induat Cæsariem, attestante Sponsa: *Caput ejus aurum optimum: Comæ ejus sicut elatæ palmarum.* Ita scilicet nostri capilli, hoc est minima opera in palmas norunt excrescere, ac ideo aureo Christi capiti inferi implantariq; pulcherrimè. Seu quod etiam aureum Religiosi caput crines hosce id est eadem minima in præstantes velut diviniore quâdam magiâ palmas norit efformare.

Cùm illud præterea accedat: quod etiam minutissimis nostris actionibus insignes quandoq; gratias ac beneficia DEVS consueverit adnectere: ut olim uni per Joam Regem sagittæ jactui, extremam deletionem Syriæ, uni in Paradiso à pomo abstinentiæ perennitatem beatitudinis humanæ, uni aquæ frigidæ poculo pauperi propinato eximiam in regno cælesti mercedem & præmium alligaverat.

*Annexæ illis  
gratiæ.*

Si



Si verò scriptura Dan: 14. testatur Habacuc Prophetam ab Angelo *Portatum capillo capitis sui & positum in Babilone.* Jam alter Propheta Ezech. 8. profitetur se à manu quapiam *apprehensum in cinctu capitis & elevatū inter terram & calum adductumq; in Jerusalem.* An non similis minimorum quorumcunq; ratio, quibus neglectis æterna Babilon, prompto acceptatis animo cælestis annexa Jerusalem. Si enim unicuique Regi Artaxerxi ab homine villano donò porrectum pomum id meruerat, ut supremo totius civitatis rependeretur gubernio: quid de Divina erga minimaliberalitate censendum est?

Et si in eopotissima terrenorum artificum elucet ars ac industria, si minusculis quibusq; artefactis grandia quæq; inferant, vel insculpant: ut nucleo quispiam totam Homeri incluserat Iliadem. Certè nec in eo divinum deficit ingenium, cum illud etiam in minimis quandoq; nostris meritis, immensam magnorum donorum suorum farragineam ac totam gratiarum Iliadem includat.

Id certè spectavit Divus Indiarum Apostolus, dum illud suis ingeminaret: *In rebus etiam*

*etiam parvis, magni ipsi existere conemini: Et idem alibi: Nemo se ipse fallat: Non potest quisquam magnis in rebus excellere, qui non prius excellat in parvis. Et tandem: Si non potes, quod voles, velis quod poteris. Utiq; in linea æque ac effigie tota se magistrū probavit Apelles: Quod olim uni ex Pontificibus pro crisi adscriptum: Pontifex maximus in minimis: Hoc nos revera in laudem eximiam nobismet convertamus: ut in minimis velimus esse maximi.*

lib. 3. Epist. 3.

idem lib. 3.

Epist. 5.

*Quod si ad amissim impleverimus, id profecto fiet, quod Titus Livius lib. 6. in simili: Parva (inquit) sunt hæc, sed parva ista non contemnendo majores nostri, maximam hanc rem fecerunt.*

*Nec de his interim plura: hæc utiq; quæ hætenus memoravimus, tum ad conciliandam minimorum æstimationem tum ad promovendam in nobis per illa excellentiorem Sanctimoniam abundè sufficient,*

D d

AD-

## ADHORTATIO VI.

*Ravioꝛis Sanctimonie est eniti ut vivat sine defectu ac nævo, Et quidem cum quadam im-*

*potentia peccandi*  
**P**ostquam <sup>eam</sup> sublimitatem in minimis actionibus constitutumus: non dum satis illius mensuram implevimus. Parum scilicet est illam tot tantisque nitere splendoribus, si nævi adsint, qui eam inumbrent. Talis alioquin sanctitas eam Crysim facile incurreret, quam rudiori cuiquam pictori viraginem inter gemmas, torques monilia, sed inter hæc vultu aliquantum deformiorem depingenti quispiam adnotarat: *Non potuit facere pulchram fecit divitem.* Et id sanè est, insignibus virtutum ornamentis fulgere, interim nævis pluribus deformem esse. Illam igitur in præsens vere sublimem excellentemque Sanctimoniam agnoscimus quæ sit sine nævo:

Ea est generis humani conditio, ut inter eximias etiam dotes vix possit vivere sine nævo. Hinc illud Plinii: *Adhuc nemo existit, cujus virtutes nullo vitiorum confinio lederentur:* Non aliter quam de speciosissimis ho-

tis



tis & arboribus Pœta occinit : *Sunt & virentes inter adorea, plerumq; turpi degeneres situ rami & stolones, sunt decari dedecus opprobriumq; trunci* : Sic de Alexandro : *Omnia licet Ducum Regumq; exempla transierit, nihil tam magnum quam cædes Calisthenis*. De Vespasiano etiam : *Si avaritia abesset, antiquis ducibus par*. Ac tandem de quopiam Cicero : *Omnes in tuis laudibus excipiunt iracundiam*. Quid de illis quos Beatissimos, Sanctissimos, Catholicissimos, Christianissimos nominamus? cum de ipsis cælis Angelisq; illud enuntiatur novimus : *Cæli non sunt mundi in conspectu ejus, & in Angelis reperit pravitatem*. Ac ideo Apocal: 1. 2. 3. illis Angelis Ecclesiarum toties inculcatur : *Pœnitentiam age: habeo adversum te pauca*. Proindeq; illud probatissimum, quod sicut nulla est pulchritudo, quæ suos non habeat naves, ita nulla aut rara virtus, quæ aliquo sibi annexo vitio non laboret. *Et sicut in pessimis aliquid boni, ita in optimis aliquid pessimi invenitur*.

Eam igitur raritatem Sanctimonix inpræsens suademus, quæ inter non paucos virtutum splendores ab omni naves sit aliena.

D d 2

Qua-

P. Ines.

Seneca.

Tacitus.

Qualis olim inprimis fuit sanctitas Elifæi, quam eandem Sunamitis in eo agnoverat ac proclamaverat dum 4. Regum: 4. ad suum conjugem diceret : *Animadverto ( inquit ) quod vir DEI Sanctus sit iste.* En non quomodocunq; probum nominat, sed insigniori potius titulo viri DEI, Prophetam exornat. Neq; vero hoc etiam satis contenta, insuper eum apotheosi donat, sanctum toto ore pronuntiat; ut eo ipso non simplicem non quamcunq; sed auctiorem aliquam præ aliis sanctitatem duplicatis titulis in ipso recognoscat. Verum unde hæc illi, Prophetæ sanctitas patuit? dicerem quòd ex externa ad omnem modestiam & probitatem composita viri specie. Sed hanc etiam sceleratissimos quosq; sibi met adsciscere, forte illa compertum habuit, atq; sic non ex hac e mentitæ non raro virtutis impossura, sufficiens sanctitatis propheticæ documentum collegit. Salomon Rabbi apud Lyrannum existimat, ex eo Sunamitidem de Elifæi sanctimonia opinionem concepisse, quod in ejus cænaculo nullam unquam comparuisse muscam adverterit. Etsi autem hæc arbitraria parumq; solidæ veritati consona sententia: certe ex illius

lius occasione, illam ego plane eximiam sanctitatem proclamo, quæ non extra camelos tantum grandium delictorum, sed extra muscas etiam, & culices minimorum defectuum, adeoque extra omne vitiorum quorumcunque vulgus versatur. Et talem absque dubio Sunamitis suspexerat Elisæi virtutem, scilicet ab hisce muscis & culicibus immunem: ideoque rariorem aliquam & excellentiorem præ aliis. Ut enim illa virtus planè spuria est, quæ dum culices & muscas excolat, camelos glurit; ita nec illa rara admodum & singularis, quæ licet camelos averteretur, à minori tamen muscarum & culicum grege non abhorret. Si legitima, omni ex parte defecata sanctitas est, sit instar Imperatorii Domitiani Cæsaris cubiculi: de quo cum quæreretur: essetne quisquam apud Cæsarem? Respon: *Nemusca quidem.*

Inde est quod Ecclesiasticus de quoque piæ iusto pronuntiat: *Beatus vir qui inventus est sine macula. Quis est hic? Gloriamur eum? fecit enim mirabilia in vita sua.* Plura ille quidem huius ejusdem viri iusti decora ac virtutes eo loco recensuit, ac præcipuè auri mundanarumque opum contemptum: *Post au-*

*Id d. 3*

*rum*

*Cap. 31.*



*rum* ( inquit ) *non abiit* : pro principali tamen illud retulit , quod fuerit sine macula sine naevos : idemq; ipsum iterum iterumq; ampliori periphrasi explicuit : *Qui potuit transgredi & non est transgressus , facere mala & non fecit*. Atq; in eo ipso raritatem ejus collocavit Sanctimoniam , dum quæreretur , *quis est hic & laudabimus eum* ? illudq; magni adinstar prodigii propalavit : *Fecit mirabilia in vita sua*.

Hancq; talem sanctitatem in se non minus expressere , à me toties memorata Prophetica animalia : idq; in eo , quod totum illorum corpus plenum esset oculis ante & retro : Non sola scilicet facies non pectus non manus nonnisi , sed pedes etiam , & quidquid in toto corpore membrorum fuerat. Verum quid oculo cum immunitate à naevo quocunq; novimus utiq; : si quid , certe oculum adeo rem esse delicatam ut non trabis tantum sed etiam festucae , imò minimi pulvisculi sit impatiens. Atq; non alia nostra sanctitas sit necesse. Ita nimirum delicata , ut omnem naevum omnem à se defectum excludat : ac si unusquisq; nostrum vel totus oculus , vel plenus circumquaq; oculis esset , ut nullibi in toto corpore in ullo sensu  
& affe-

& affectu, etiam in pedibus, nævo vel minimo locus foret: juxta id quod Christus præcepit Apostolis: ut pulverem pedum suorum excuterent: hinc acclamante Propheta: *Quam speciosi pedes Evangelisantium*: Addit vero Aélredus. *Quibus (inquit) ne pulvis quidem è terra adhæsit.*

Antiquorum sensus fuit: culpas hominum in dorso annotari solere: ita ut dum abeuntes ad alterum mundum isthuic tergum obvertunt, hæ eædem culpæ à superstitionibus legantur: hinc illud Perlii: *Vos o Patritius sanguis, quos vivere fas est: occipiti cæco, posticæ occurrere sanna.* Et hoc ipsum non vulgari studentium Sanctimonix proprium est, ita toto corpore & animo, ante & retro esse oculatos, ut non habeant, quo loco nævum & notam vel minimam recipiant.

Sic illa mulier Apocaliptica, quam D. Joannes signum magnum appellat: *Apparuit signum magnum in cælo*: Idq; etiam vel ideo quod rota in splendoribus refulserit, ita ut nec umbræ levissimæ locus in ea fuerit. Qua enim sui parte umbram admisisset, quæ tota sole amicta comparuit, duodecim stellis caput irradiant-

apocal. 12.

radiantibus. Et si luna utcunq; maculosa, ibi locum invenerit, sed sub pedibus. Et certè illa mihi adinstar signi magni, adinstar magni prodigii, planeq; cælo digna sanctitas, quæ omni ex parte maculæ cujusvis ac umbræ expers, quidquid vitiosi aut maculosi est, hoc totum infra se pellit & calcat.

Nec aliunde liliū inter flores supremum obtinuit principatum: *Florum* (inquit profanus vates) *lilia Reges*: Nisi quod intaminato citra omnem maculam candore niteat: Atq; ita illam etiam, omnino non plebeiam sed principem sanctitatem comprobet, quæ lilio simillima, hoc est illimi vitæ morumq; munditiæ commendata: quam nulla delicti labes asperferit.

Uti pariter mare illud Apocalipticum: *Mare* inquam *vitreum simile crystallo*: Eo ipso forsitan meruit ante thronum DEI proxime collocari, quod omni ex parte diaphanum atq; pellucidum ab omni limo purgatum fuerit. *In conspectu* (inquit) *sedis mare vitreum simile crystallo*.

Eademq; de causa illa centum quadraginta quatuor millia tot tantisq; exornata privilegiis



vilegiis Apocal 14. leguntur , atq; etiam ad eundem DEI thronum admissa, quod absq; ulla macula inventa fuerint : *Sine macula enim sunt ante thronum DEI.* Ea scilicet non cuicunq; subsellio , sed ipsi DEI throno digna admoveri sanctitas quæ cujuscunq; labis & culpæ nescia.

Nec incongruè Apostol: *Speſtaculum* (inquit) *facti sumus mundo , Angelis, & hominibus,* D. Hieronymus ut alibi diximus, legit : *Theatrum facti sumus.* Nempe sicut ille in theatro & comædia admodum egregius ac insignis suæ scenæ actor est, quisquis sive in pronuntiatione ac voce , sive in actione ac gestu , sive in quovis alio ad oratorem Comœdumq; spectante nè minimum quidem erroris committit. Ita ille quoq; insigniter & eximiè sanctus censendus est , cui nihil omnino devium à regula virtutis contingit. Hinc ipsa quoq; cælestis Jerosolyma , non aliunde in Apocalypsi Nomen Sanctæ promeruit : *Vidi Civitatem sanctam Jerusalem :* Nisi quod de ipsa illud pronuntiatum sit : *Nihil ( inquit ) coinquinatum intrabit in eam.* Parum videlicet illi fuerat tot & tantis , qualia D. Joannes recenset , nituisse

ornamentis, nisi omne etiam inquinamentum à se exclusisset.

*Apocal. 21.*

Qua vero alia causa arundine aurea hanc eandem Civitatem caelestem Jerusalem Angelus metiri iussus : *Habebat*, (inquit Joannes) *mensuram arundineam auream ut metiretur Civitatem.* Certè enim tunc ea Civitas jam exstructa jam perfecta jam plenè consummata erat. Utiq; autem tunc applicari assolent arundo, & quæcunq; mensura, dum quæcunq; exstruitur moles, non vero cum jam exstructa & ad coronidem perducta est? Præterea arundine, mensurâ exploratur defectus quicunq; rectitudinis : an rectum vel non rectum quidpiam? Ibi autem quid devians quid declinans à recto? ubi omnis proportio, omnis rectitudo? Nempe viva hîc Sanctorum ac perfectorum virorum expressio ac imago : quorum ea est ratio ; ut ipsi in omni sui rectitudine sese explorent examinent diligenter ; Si vel minimus rectitudinis defectus inveniri queat, eum illico corrigere parati sint, semperq; ac semper ad maiorem exactioremq; rectitudinem proficere velint. Juxta Jacobi Apostoli edictum (cap. 1. Epist. Cathol.) *Vt sitis perfecti & integri in nullo deficientes.* Pla-

Planè locum hic habet illud vas quod fecit Moyses de speculis mulierum. In quo se Exod: 38.  
 (addit Cornel: à Lapid: ) specularentur Sacerdotes an maculis essent aspersi? Et quia scimus idem ipsum vas pro lavacro fuisse: an igitur non satis erat illi affundi aquam qua eluerentur maculæ? Quæ insuper necessitas muliebris & quidem non unius speculi? Nisi quod speculum exactius nævos repræsentet ac prodât, quàm nescio quæ etiam clarissima ac limpidissima lympha. Hoc itaq; ut nè minimos quidem veteris testamenti in se paterentur Sacerdotes, non lymphiâ tantum nec unô speculô sed pluribus etiam opus fuerat.

Quamquam hujus ipsius quam assumptimus deducendæ veritatis perspicuum speculum est Domus Marthæ & Magdalenæ. Dum enim recenset Evangelista quomodo in eam JESVS intraverit, quomodo illum exceperit Martha, Magdalena pedibus ejus assederit: S. Bernardus nescio cujus nomine miratur ac interrogat: *Cur ibi nulla prorsus Lazari mentio fiat?* simulq; respondet: *Virginalem domum intelligi volens spiritus, siluit incongruè penitentiam:* ( hæc enim Lazari voca-



bulō interpretatur ) *quæ malum utiq; comitatur.*  
*Absit enim , ut proprii quidquam inquinamenti*  
*domus hæc aliquando habuisse dicatur , ut in*  
*ea proinde scopa Lazari quæreretur.* Et hinc  
 certè similem excellenti Sanctimoniâ conspi-  
 cuam decet esse conscientiam , quæ scilicet  
 scopâ pænitentia non indigeat.

Atq; id defacto S. Paulus à suis Philip-  
 pensibus requirit , dum illud iisdem inculcat :  
*Ut suis ( inquit ) sine querela & reprehensio-*  
*ne :* Quod ipsum de semetipso Job profitetur :  
*Cor meum non reprehendit me in omni vita mea.*  
 Idemq; in sua Sponsa Sponsus agnoscit : *Tota*  
*( inquit ) pulchra es , amica mea , & macula*  
*non est in te.* Qualem etiam Divus Apostolus  
 vult esse Ecclesiam : hoc est *non habentem ma-*  
*culam neq; rugam.* De semet autem ipso Psal-  
 tes : *Probasti me & igne me examinasti , & non*  
*est in me inventa iniquitas.*

Jam Apostolus ad Rom: cap. 8. univer-  
 salius : *Quis accusabit adversus electos DEI?*  
 Electos, vero certè non quoscunq; , sed non  
 vulgari commendatos Sanctimoniâ , quorum  
 ea est vitæ integritas, ut non inveniatur qui  
 eos cujuscunq; valeat accusare delicti. Qualis  
 ille

ille qui de se in Psalmo : *Circumdederunt me sicut apes.* Circumdederunt inquam tanquam florem innocuum : ex quo præter dulcem mellis materiam nihil omnino venenosi ab iisdem apibus delibatur.

Atq; hæc plane est ( de qua apud Prophetam ) *Vindemia defacata.* Hoc illud speculum in quo ipsa Divina majestas sese admodum spectabilem exhibet ; hæc imago in qua se ejusdem DEI bonitas insigniter depingit : *Speculum DEI Majestatis sine macula & imago bonitatis illius.* Hæc eadem sanctitas qua olim Beatus Aloysius Gonzaga , Joannes Berchmanus , aliiq; claruere , in quorum moribus & vitâ non lincei tantum quicunq; oculi quidquam vitiosi poterant advertisse , sed ipsi quoq; Confessarii quibus ex integro eorum fuerat perspecta conscientia nihil penitus noxæ saltem gravioris etiam venialis deliberatæ comperere. Longe verius ac laudabilius , quàm quod de semet Titus Vespasianus , conquerens de diis , quod se è vivis nimis cito raperent : *Quum nullum* ( inquit ) *per omnem vitam extaret factum , cujus paniteret , uno duntaxat excepto. Id cujusmodi fuerit ? nec ipse prodidit , nec*

*quisquam conjectare potuit: addit Suetonius. Et hæc genuina defacto excellentissimæ ac defæcatissimæ virtutis laus est absolutissimâ absq; ulla exceptione, cujuscunq; noxæ gaudere carentiâ. Qualem olim assidentes morienti Octavio Augusto Cæsari per adulationem appinxerunt Romani Senatores, dum interroganti: Rectene (hoc est absq; erroris ac vituperii admistione) *M. mum vitæ egi?* responderunt: *Recte*, illo concludente: *Ergo plausum date.**

*Impotentia  
quædam pec-  
candi.*

Nisi quod illud etiam à sublimioris sanctimonix sectatoribus exigendum videretur; ut etiam non tantum omni prævaricatione ac nàvo careant. Sed etiam quandam delinquendi contrahant impotentiam. Qualem videtur in se exhibuisse Josephus Patriarcha, cùm illud Dominæ suæ, uxori autem Putiphar opposuisset: *Quomodo possum hoc malum facere? & peccare in DEVM meum.*

Qualis item ille ad quem illud Jerem. I. *Dedi te in civitatem munitam, & in columnam aream, & in murum ferreum.* Unde enim ipsi in tanta firmitate vel modicè succumbendi labendiq; periculum, ac potentia? Uti quoq;  
illi,



illi, de quo apud Psalterem : *Sicut mons Sion non commovebitur in æternum* : Cui scilicet id est monti, moveri etiam vel minimè pro miraculo esset. Idq; ipsum de semet ipso idem Psalteres : *Ego autem Dixi in abundantia mea : non movebor in æternum*. Hujus ipsius rationem subjungens : *A dextris est mihi* (scilicet DEVS) *ne commovear*. Quis enim in tali circumstantia, commotionis ad prolabendum utiq; in peccatum metus ?

Jam universaliter de quocunq; solidè Justo Proverb. 12. *Radix justorum non commovebitur*. Certè enim profundè in virtute radicatus, haud facile corruere aut subverti, imò etiam quâcunq; tentatione commoveri potest. Ad instar illius arboris, cui eundem justum David assimilat : *Sicut lignum, quod plantatum est, secus decursus aquarum : plantatum* inquam non quomodocunq; superficialiter hærens. Virtutes utiq; superficiales ex solæ pronæ ad ruinam. Aut etiam instar Salomonici Sponsi, de quo ipsamet Sponsa : *Cru-ra illius columnæ marmorea, quæ fundatæ sunt super bases aureas*. Quanta enim talium à potentia & periculo cadendi distantia, præsertim

tim ita se super auream id est excellentem DEI  
charitatem fundantium.

Quanquam nec illi eadem potentia ad  
lapsum facitis, qui pariter de se ac de DEO:  
*Eduxit me de lacu miseriae, & de luto facis, &  
statuit super petram pedes meos.* Ne scilicet  
ille posset prolabi amplius, imò nè cespitare  
quidem. Huc quoq; pertinet & illud: *DEVS*  
*qui præcinxit me virtute, & posuit immacula-*  
*tam viam meam, perfecit pedes meos tanquam*  
*cervorum, & super excelsa statuens me.* Et  
*posuisti ut arcum arcum brachia mea* Ubi  
quamnam tentatio & culpa tali balteo præcin-  
ctum aggredi, tam illimi viâ incedentem fædare,  
tam pernici cursu contendentem assequi, tam  
firmo & excelso consistentem loco è fastigio de-  
trudere imò attingere, tam robustis instructum  
brachiis frangere ac superare valeret?

Quod si illud scripturæ: *Cælum sedes*  
*ejus*, de animabus justis intelligitur, Divo Gre-  
gorio Papa Homil: 38. in Evangel: attestante:  
*Dum* ( inquit ) *cælum dicitur sedes DEI; cæ-*  
*lum ergo est anima justī.* Uti igitur cælum non  
tantum peccati cujuscunq; licentiam, sed  
ipsam quoq; potentiam excludit peccandi, ita  
etiam

etiam ab anima, in qua DEVS sedem suam fixit, eadem longe sit necesse.

An non vero insuper de hac impotentia peccandi in illis Psalmi verbis: *Quantum distat ortus ab occidente, longè fecit à nobis iniquitates nostras.* Quomodo enim orienti posset occidens componi atq; coniungi? Hujus autem ipsius normam & exemplar in se visus exhibuisse Christus, illud de se in Evangelio enuntians: *Venit Princeps hujus mundi, & in me non habet quidquam*, tam scilicet de quocunq; delicto, quàm de potentia delinquendi. Et revera inventi sunt tales in quibus similis quædam visa eluxisse ad non peccandum ac si in Adam non peccassent (quod præter alios ac inprimis Divum Joannem Baptistam ex hujusmodi impeccabilitate Angelis annummeratum, de quo apud Prophetam: *Ecce ego mitto Angelum meum ante faciem tuam*, de Beato etiam Stanislao Kostka proditum) impotentia. Ad quam si nobis quoq; difficile pertingere, saltem niti ad eandem quis prohibeat?

Hanc igitur talemq; hoc est omnis quantum fieri potest maculæ expertem ac impotentem quodam modo peccare Sanctimoniam si



nos quoq; ad summum ejus fastigium perdu-  
ctam sectabimur; eo tandem quo nihil coinqui-  
natum intrabit, cum insignis possessione præ-  
mii, facile pertingemus.

## ADHORTATIO VII.

*Excellentia Sanctimonie in heroicis actionibus  
& victoriis sui ipsius.*

**N**ON unum est, quod jam ad sublimioris  
Sanctimonie fastigium contendentibus sua-  
simus, tam per infima quam per summa tri-  
tum tot vestigiis monstrando iter. Sed quia  
ad magna & sublimia arduus plerumq; ascensus  
est: ideo ad hæc heroicis passibus enitendum.  
Illud igitur in præsens nobis quoq; enuclean-  
dum erit: nempe ad excellentiorem etiam  
Sanctimoniam, non quibuscunq; sed heroicis  
omnino actionibus strenuisq; sui ipsius victoriis  
opus esse.

Exerrat non modicè quisquis solum  
duntaxat mundum, & non etiam statum Re-  
ligiosum heroum feracem existimat. Si ille  
heroes parit, certè nec religio hac in parte ste-  
rilis

rilis est. Imò si heros quandoq; est impietas ;  
quis virtutem eb ea laude excludat ; & non  
heroem esse velit ?

Tanto verò magis fallitur ille, quis-  
quis excellentem sanctitatem omni ex parte  
facili constare, nec heroicis indigere ausibus  
temerè autumat. Ut scilicet non cuius olim  
triumphaliter ingredi licuit Capitolium ; nisi  
prodromæ, eaq; non qualescunq; præcessis-  
sent victoriæ : ita sublimioris virtutis fastigium,  
non aliter omnino licet attingere ; nisi per he-  
roicas actiones insignesq; sui victorias iter sit.  
Præsertim quod juxta ascetas Religiosus status  
perpetua sit naturæ violentia.

*Excellentis San-  
ctimonie he-  
roica.*

*Non coronabitur* ( inquit Apostolus )  
*nisi qui legitime certaverit.* Nimirum ut quis  
palmam qualemcunq; præripiat, minores quas-  
cunq; pugnas ac velitationes sufficere. Jam  
quisquis coronam non plebeia utiq; debitam  
Sanctimonie nititur apprehendere, ideoq;  
Rex virtutis esse : non quomodocunq; sed le-  
gitimè hoc est strenuè, insigniter, fortiter, admo-  
dum heroice, non ignavè, non perfunctoriè,  
non leviter ei decertandum.

Hoc idem est quod de se ipso Divus  
Apostolus: *Certamen certavi cursum consum-*  
*mavi, fidem servavi: in reliquo reposita est*  
*mibi corona Justitiæ.* Ubi quis non videat?  
quænam ad coronam, principatumq; justitiæ  
pertineant? quibus e viis ad id culminis per-  
veniendum sit? Nempe per heroica certamina  
& victorias. Atq; sic parum hic visum est, fi-  
dem antesignanam virtutum servasse: parum  
consummata cujuscunq; probitatis decurrisse  
olympia: nisi heroicis certaminibus via sterner-  
retur ad coronam. Utiq; enim teste etiam  
Pœta: *non venit e facili lecta corona jugo.*

*Genes. 22.*

Cujus ut etiam Abrahamum participem  
DEVS redderet, heroem esse voluit non vul-  
garem: ex quo sui unici immolatorem filii:  
Et quidem non alio loco, sive in valle sive in  
planitie; sed in monte excelso; ut vel per hoc  
ejus heroicismum augeret; ut scilicet Abraham  
etiam à longe habens sibi montem incurrentem  
in oculos repetitio ejus aspectu, toties dolorem  
in corde paterno innovaret, nutrirer, totiesq;  
heroicum animum exerceret, heroem ageret.

Ideoq; in Psalmo etiam Davidico non  
Alteri Dominium virtutum, id est sublimioris  
titulus



titulus Sanctimoniae regnumq; gloriae defertur;  
 nisi qui se eximie fortem potentemq; in praelio  
 planeq; heroem exhibuisset: *Dominus* (inquit)  
*fortis & potens, dominus potens in praelio*: Et  
 tandem *Dominus virtutum, ipse est Rex gloriae*.  
 Ubi hic idem Regni candidatus, non simpliciter  
 fortis, sed potens etiam, nec id ipsum semel,  
 sed iterum potens, hoc est in gradu eximio  
 heros celebratur: *Dominus fortis & potens,*  
*Dominus potens in praelio.*

Idemq; plane est quod in Apocal: pro-  
 mittitur: *Qui* (inquit) *vicerit, dabo ei sede-*  
*re in throno meo*. En hic quoq; non ignavus  
 quispiam non imbellis cujusvis Sanctimoniae  
 cultor: imò non quivis etiam pugnator, &  
 Athleta, in possessionem throni divini qui subli-  
 mis utiq; praeium esse consuevit virtutis, di-  
 citur admittendus: sed non nisi perfectus con-  
 summatusq; heros ac victor: nisi ille ipse,  
 quem non vulgares sui vel mundi inferniq; vi-  
 ctoriae commendaverint. Qualis ille, quem  
 eadem talium ferax exemplorum Apocalypsis  
 exhibet: *Et vidi Ecce equus albus, & qui se-*  
*debat super illum habebat arcum, & data est ei*  
*corona, & exivit vincens ut vinceret.* En quis

Cap. 3.

Cap. 4.

hic diadematis particeps? nisi heros arcu armatus, victoriis insignitus.

Jam quid illud quod in eadem ipsa Apocalypsi ore ipsiusmet Christi promulgatum est: *Qui vicerit faciam illum columnam in templo DEI mei.* Ubi palam est: non aliter melius, nos in sublimes, Divinæ Ecclesiæ & gloriæ sustentatrices, Sanctimonix columnas posse assurgere, quam per egregias nostri victorias, & plane heroicas depressiones. Dum enim sic carnem nostram nosq; ipsos infra deprimimus, pæneq; humi sternimus; eâ ipsâ nostri ruina in sublime virtutis elevamur: decrefcentibusq; in nobis mundo carne ac vitiis, crescimus sive in Ecclesiæ Atlantes, sive in columnas. Alioquin ni illa corruant, minimè in nobismet assurget virtutis sublimitas: ita ut si hac in parte segnes nec heroes fuerimus, vix fungos aut humi repentes cucurbitas mole probitatis æquare possimus.

Si enim 2. Esdræ 4. non aliter muri Jerusalem assurgere in altum poterant, nisi unusquisq; *una manu sua faceret opus, & altera teneret gladium*, heroicus utiq; architectus: quomodo sublimioris Sanctimonix assurgeret fabrica

fabrica, si non eam herōici ausus promovere-  
rent?

Nec aliunde est quod ipsemet Christus  
in Evangelio pronuntiavit: *Regnum celorum  
vim patitur & violenti rapiunt illud.* Ubi si  
ad capeffendum quodcunq; cæleste præmium,  
iis opus impensis est, iisq; viribus; quantis oro  
laborandum pugnis ac victoriis ad insignis San-  
ctimonix coronam in eo regno obtinendam?  
ita ut hic etiam illud, planè acclamari jure me-  
rito possit quod (utialibi supra adduximus) Ale-  
xandro olim pugnaturo fuerat inculcatum:  
*Matte Alexander pro regno tibi cum leone  
pugna.*

Et certè si non alteri i. Regi 17. filia Re-  
gis in conjugium appromissa, nisi qui Gigan-  
tem Philistæum prostravisset. Nec etiam alteri  
Axa Filia Principis Calebi cedere debuit, nisi  
qui Civitatem Cariath Sepher percussisset. Quis-  
nam sibi regali ac plane divina stirpe proceden-  
tem Sanctimoniam auderet polliceri? qui vile  
nonnisi hostium spiritualium vulgus & non Gi-  
gantes, manu invalida sterneret, nec potentes  
mundi, carnis, diaboli, machinas expugnaret.

Nec



*Unus actus,  
heroicus, aliis  
pluribus æ-  
quivalens.*

Nec mirum illam post interfectum Goliath secutam acclamationem : *Percussit Saul mille & David decem millia.* Ubi quis crederet, aliquid hac in voce veritati consonum? dum in uno à Davide percusso decem millia computantur. Nempe unus Gigas pro tot millibus censendus est dum sternitur. Non dissimili hinc deductâ asceticâ veritate : unum actum intentum ac heroicum mille æquivalere remissis atq; non heroicis ; adeoq; sui unius exercitio grandem efficere Sanctimoniam cæliq; plausum. Ecce namq; quidnam ipsemet Saul post decantatam superius Davidicam victoriam subintulit? *Quid ei (inquit) superest nisi solum Regnum?* Regnum utiq; sanctimonix non aliter facilius possidetur quàm per heroicos, similes Davidi Goliath triumphanti actus, eosq; licet vel paucissimos.

*2. Reg. 23.*

Inde est quod illi heroes qui Davidi aquam de Cisterna Bethleem attulerant vocati *tres robustissimi ex Israël:* An verò hostiles exercitus fugarunt aut ceciderunt, an prostraverunt leones? Minimè: hoc tamen apud Ascetas non dubium, quod unus actus heroicus heroes fortissimos facere possit; plurium actuum vices agere.

agere. Ita ut hic etiam non raro, *unum pro cunctis fama loquatur opus.*

Quod ipsum in præfate supra Abrahamo patuit : de quo Apostolus : *Respicite ad Abraham Patrem vestrum, qui justificatus est ex operibus : Filium obtulit.* Quid vero est? unum opus oblatis filii commemoratur, & multa interim in plurali ab Apostolo numerantur : *Justificatus, est ex operibus?* Nisi quod non raro vel unicum heroicum quale fuit oblatio Isaac facinus non tantum æquivalet pluribus sed imò superat. Inde est quod pariter antiquitas plures unius licet actus heroici patratores pro insignibus reputavit heroibus : sic Horatium Coclitem, sic Scævola sic Cingirum & alios non paucos : Præter illam celeberrimam Holofernem triumphatricem Judith.

Plus dicam minora ac leviora quandoq; insignes heroicismos in se gerere. Atq; eo spectat quod de nobili muliere Salomon : *Matrem suam misit ad fortia : Quæ vero illa? Digiti ( inquit ) ejus apprehenderunt fusum.* Nempe etiam circa tam modicam ac despectam rem heroicæ Fortitudinis campum esse. Hinc S. Gregor: Papa de Davide coram arca Saltante

*Materia a-  
quum heroi-  
corum res e-  
tiam mino-  
res.*

*A pud Hugo.  
nem Cardi:  
in Psal: 17:*

& à Michol irriso: *Quid de ejus factis ab aliis sentiaturo ignoro: Ego David plus saltantem stupeo quam pignantem. Pugnando quippe hostes subdit, saltando autem coram Domino semetipsum vincit. Quid vero hic de eodem Davide aquam de prædicta Cisterna Bethleemtica sibi in ardente siti allatam libante Domino dicendum? Hinc quoq; Plinius de Trajano: Ex omni occasione triumphum capere didicit.*

*Compendiosa  
via ad Sanctimoniam  
ejusq; præ-  
mium actus  
heroici.*

Nec ideo alia compendiosior in sanctitate crescendi ratio juxta illud Psaltis: *Justus ut Palma florebit.* Nimirum non pulchrius non facilius, justis Sanctimoniam efflorescunt: quam dum Symbolum victricis palmæ per actus heroicos suiq; victorias in se exhibent: ita ut licet cætera virtutum deesse videantur; hinc illis non modicus sanctitatis & gloriæ adveniat proventus. Juxta id quod de Insulis Maldivanis Historiographus. *Sterilis ( inquit ) alioquin Regio, quam tamen genus palmæ nobilitavit.*

Id ipsum Apocal: 7. Scilicet eos in conspectum Agni, diviniq; throni viciniam admisso, in quorum manibus victrices eviruerunt palmæ: *Stantes ( inquit ) ante thronum & in conspectu agni & palma in manibus eorum.* Illis  
scili-



192  
235  
scilicet non nisi ut ad virtutis apicem, ita ad sublime DEIq; throno affine subsellium patere aditum, qui ad illud per victrices palmas quas de se, carne, mundo, ac inferno reportant, Ap-piam sibi sternunt triumphalem.

Pari ratione sicut ad lectulum Salomo-nis regiiq; lateris proximum Satellitium non alios adlegere licuit, quam qui se eximiâ præ aliis fortitudine probaverant: *Sexaginta* (inquit) *fortes ex fortissimis Israël ambiunt lectu-lum Salomonis tenentes gladios in manibus.* Non dissimilem utiq; esse sublimioris sanctimonie majestatem & pompam: videlicet ad hujus etiam diviniq; cordis adita, non cuivis acces-sum esse, nisi quos heroica virtus, excellens sui victoria reddit celebratissimos. Ita ut hic etiam (quod alibi superius allatum) locum habeat quod de Alexandro Macedone in Curtio le-gimus: Hic cum in Sogdiana Regione rupem inaccessam, & à 30. armatorum millibus infes-sam obsidens, irrisus ab Arrimaze rupis præfecto rogatusq; : *An Alexander volare possit? fa-ciam aut proxima nocte, ut credas Macedones volare.* Et si mundanæ virtuti, certè non mi-nus sanctioribus heroibus nihil inaccessum.

Cent: .

*Facilitas in  
exercitio a-  
ctuum heroi-  
corum apud  
vires heroicas*

Ita ut etiam dum ii heroes arduis infi-  
stunt operibus, non tantum quidquam difficul-  
tatis in eo non reputent, sed etiam ludi  
adinftar habeant: uti de Davide Ecclesiasticus:  
*Cum leombus lusit quasi cum agnis, & in urfis  
similiter fecit.* Quis vero hic lusus? luctari  
pugnare cum feris, extremo vitam obiicere  
discrimini? Nisi quod Religiosi heroes eo usq;  
in heroica vitæ ratione debeant proficere, ut  
pro æquo illis sit difficillima peragere certami-  
na, ac ludicris animum distrahere exercitiis.  
Uti quoq; de Samfone Sacer textus Jud: 14.  
*Dilaceravit leonem quasi hædum in frusta di-  
scerpens, nihil omnino habens in manu:* Ubi  
par in lacerando leone ac in hædo facilitas di-  
scerpendo. Non minus quàm dum Hercules  
tot illa famosissima monstra facili negotio ster-  
neret. Aut quod de Honorio Cæsare adhuc  
infante Claudianus: *Reptasti per scuta puer,  
Regumq; feroces exuvia tibi ludus erant.*

Quid ille supra relatus? de quo Apo-  
cal: 6. *Exiit vincens ut vinceret.* Cui scili-  
cet prodeunti in arenam, ipsæ in limine occur-  
rebant victoriæ, ipsumq; exire ad prælium,  
vincere fuit. Adinftar Julii Cæsaris de se il-  
lud jactantis: *Veni, vidi, vici.* Et

Et iis defacto ivère passibus tot insigniores DEI servi. Hæc iter fuit quem jam diximus Patri credentium Abrahamo : præter immolationem finii, illud etiam DEI mandatum heroicè implenti : *Egredere de terra tua, & de cogitatione tua, de domo Patris tui.* Hæc iter paternis pressum vestigiis, non minus heroico animo ad sui immolationem præbenti jugulum Isaaco. Hæc iter ( ut omittam plures alios ) post tot certamina cum Angelo etiam victoriosè luctanti Jacobo.

Non memoro hic recentiores novi testamenti Athletas. Non memoro tot gloriosissimos quarumcunq; religionum & statuum herodes. Non memoro nostræ etiam Societatis antesignanum Ignatium, per ærumnas, ludibria, vincula, verbera, & asperrima quæq; ad eam metam contendentem. Non memoro Xavierium, innumerosq; quoscunq; alios juratis votis in heroica incumbentes certamina. Cum quibus si nos quoq; idem tenere bravium voluerimus, vitam nobis heroicam vivere, continuisq; nostri victoriis non annos tantum aut menses diesq; sed horas etiam illorum exemplo distinguere necessè est.



## ADHORTATIO VIII.

*Sublimitas Sanctimoniae à sublimitate intentionis  
in quibusvis actionibus.*

**Q**Uoniam nobis Religiosa sanctitas ex Asce-  
tarum sensu cujuspiam adinstar fabricæ  
ac ædificii, imò ædificium quoddam spirituale  
est: ideo sicut structuræ cujuslibet moles, per  
tot sui partes & constitutiva quibus componi-  
tur, assurgit & crescit: ita etiam non pauca  
sint necesse, per quæ, eadem nostra sanctitas  
sele porrigat in sublime. Si quid tamen illam  
fursum erigit; certè vix aliud magis, quàm in-  
tentionis omnibus Religiosis actionibus præfi-  
gendæ sublimitas. Ab hac igitur, nostræ subli-  
mitatem non parum provehi Sanctimonix, in-  
præsens declaremus.

Satis illud in Scholis proclamatum no-  
vimus: ut malitiam ita & bonitatem actus ex-  
terni ab actu interno desumi, ideoq; illud con-  
sequenter sentiendum est, nostrorum sublimi-  
tatem operum à sublimitate intentionis deriva-  
ri. Proinde hinc etiam nostræ excellentiam  
Sanctimonix æstimandam esse. Idq; juxta il-  
lud

lud Christi in Evangelio : *Si oculus tuus fuerit simplex, totum corpus lucidum erit.* Ubi quis non videat quantus hic ab uno oculo totius corporis fulgor? Per hunc autem (oculum videlicet) intentionem, per corpus totam hominis conscientiam, seu integram virtutis & Sanctimoniae Symmetriam Sacri interpretes intelligunt. Unde palam est, quantum ab unius intentionis excellentia totus religiosus homo in se derivet Sanctitatis splendorem; quò toti caelo terræq; conspicuus appareat.

Hanc vero ipsam veritatem eximie adumbratam videre est Apocal. 6. *Vidi (inquit Joannes.) ecce equus albus, & qui sedebat super illum, habebat arcum, & data est ei corona, & exiit vincens ut vinceret.* Symmachus extrema textus ejusdem legit: *Habebat arcum & tetigit circulum.* Et sane quotquot in hac vita degimus, in arcu & sagitta militamus. Intellectum & voluntatem arcum dicimus, sagittam intentionem, quà quisquis coronam sublimioris sanctimoniae nititur apprehendere, in circulum collimet necesse est, eumq; non alium quàm DEUM ipsum. DEUS utiq; juxta veteres : *Circulus est, cujus centrum ubiq; , peripheria*

*sphæra nusquam.* Parum itaq; sit, telum hoc nostrum in terrena mundanaq; dirigere, parum ultra terram metam illi constituere ac definire, parum aerem, hoc est vanitatis Symbolum verberare. Parum inter signa usq; Zodiaci, in amphora præsertim, hoc est in Symbolo cujuscunq; sensualis voluptatis & commodi consistere. Parum, ipsum etiam ferire solem: ultra solem coelumq; Scopus designandus est, in ipso DEO ac circulo æternitatis designandus, infra DEUM temporalia spernenda omnia. Et certe si Godofredo Bullonio gloriæ & eximii omnis fuerat, in aere tres simul alites, uni eidemq; induisse sagittæ: aut cuipiam alteri, uno telo leporem, piscem & hirundinem confixisse. Sublimioris Sanctimonix sequacibus non minor gloria, si ad supremum DEI statum circulum rectè colliment: in illoq; suæ intentionis tela defigant.

Ad instar laudatissimæ apud Salomonem mulieris: *Digitus (inquit) ejus apprehenderunt fufum:* ad quod Hugo Card: *Per fufum rectitudinem intentionis intellige, per quam electi omnia opera, quasi quædam fila in orbem æternitatis retorquent:* Fila inquam (ut addo)



ex se tenuia ac viliâ, vel sic tamen in ipsum degeneratura aurum: Uti etiam S. Liberia virgo frondere colum suam vidit seu flores producere. Amphiarai autem cujusdam telû in sublime jactû indeq; delapsum in laurum effloruisse proditur.

Non aliter hic: quàm Sponsa in Canticis egerit, quæ non alio suum oculum, hoc est intentionem, quàm ad ipsum cor Sponsi direxit: ita ut illud idem Sponsus proclamârit: *Vulnerasti cor meum Sponsa in uno oculorum tuorum.* Et defacto non pauca alia fuerant eo digna aspectu hujus Sponsi decora. Ac inprimis pedes pretioso marmore auroq; divites: manus etiam pariter plenæ illicjâ, ut pote aureæ quoq; , hyacinthisq; onustæ: nec tamen in his illa obtutum defixit. Jam faciem quot Charities, quot venustates infederant? Neq; eo versa ipsius lumina. Tandem ipsum caput non quovis auro, sed optimo, ac Salomonicâ inprimis Sapientiâ, totq; aliis fulgebat insignibus. Et hoc quoq; oculum Sponsæ non traxit. Unum sibi cor stare in meta voluit. Atq; sic nos erudit: nostrarum etiam intentionum non alium omnino esse debere scopum, quàm ipsius adita divini cordis. Idq; meliori ac feliciori longè successu

H h

quàm

quàm dum quidam sagittarius teste Olao Magno lib. 25. videns ab adversario in se directum arcum, triplici sagittâ sumptâ ita prævertit ictum, ut primâ cor, alterâ manum, tertiâ applicatam nervo sagittam tetigerit. Procul verò ab illa impietate, quâ Filii Regis Cymmeriorum cor sibi paternum, telis in illud directis, proposuerunt in metam.

Isai: 49.

Quo autem collimavit ille? qui de semet apud Prophetam: *Posuit me (inquit) sicut sagittam electam, in Pharetra sua abscondit me: Et dixit mihi: servus meus es tu, quia in te gloriabor.* En quid illum eo sublimitatis atq; apud DEUM æstimationis ac pretii provexit? Si non directissima semper in omnibus mentis ac voluntatis ad eundem DEUM collimatio. Certè enim illam selectissimam ac æstimatissimam sagittam vel aliud quodcunq; iaculum seu sclopetum dicimus, quod à suo scopo novit aberrare nunquam. In quo ita felix fuerat Elius Verus, ut quidquid oculo destinasset, sagittâ configeret.

Nec alio certè seseuq; omnia direxerat ille, qui in illud prorupit: *Erectavit cor meum verbum bonum: dico ego opera mea Regi: Regi utiq;*

utiq; coeli & terræ: nec cuiquam alteri. Sicuti mos apud Persas fuit, ut profecturi ad bellum singuli sagittam suo nomine inscriptam ad pedes Regis abicerent: quæ postea reducibus à bello, adscripto Regis nomine reddebantur.

Alioquin si extra DEUM alio nosmet cum nostris intentionibus direxerimus, parem indubiè Domiriano muscas in pariete configenti crysim merebimur; ipsâ etiam infeliciores araneâ, quæ tot laborum ac ipsorum quoq; viscerum impendiis vile nonnisi muscarum vulgus venatur. Certè enim vix alia nobilior præter muscas eorum præda, qui solis terrenis mundanisq; præmiis ac solatiis intenti, à supremo sese rerum omnium auctore & scopo avertunt.

Iusta olim Elisæi contra Joam Regem fuerat indignatio, quod tribus nonnisi vicibus terram jaculo percusserit, toties Syriam triumphaturus. At justior longè in eos, qui in terra fixis oculis, cœlum ac DEUM turpi inertia negligunt, ut mundi ac temporalium portiantur: insignissimos alioquin de spiritualibus quibusvis hostibus triumphos acturi, ipsumq; supremæ sanctitatis & gloriæ conscensuri Capitolium. Nempe si averfis à terra luminibus

4. Reg. 13.



totam suæ intentionis vim sursum converterent.  
 Illius adinstar sagittæ de qua apud Pòétam :  
*Parva sagitta quidem sed cælum fertur ad usq̃.*

Sic vilus est egisse David cùm è pera sumens lapidem ac infundam deponens non aliter ipsum Philistæi caput ferit , quàm quod hanc ipsam fundam à terra elevans, & ab ipsamet boni temporalis privatiq̃ asservatrice pera elongans, in gyrum seu circulum, DEI ac æternitatis Symbolum eandem circumegerit : atq̃ ita sibi prælulerit ad coronam. Cujus imò excellentioris omnino, si qui, certè ii compotes sunt, quorum mens per sublimes intentiones ultra terrena quæcunq̃ se elevans ipsi cælo se infert : ipsis talibus intentionibus in coronam degenerantibus. Uti Julius Cæsar ex 130. sagittis quas Tribunus quidam suo scuto in prælio infixas illi attulerat, coronam componi iussit, eaq̃ Tribunum illum exornavit.

Verum quam misera etiam eorundem terrenorum possessio ! scimus quid egerint, quove suos conatus protulerint, celebres illi suo errore ædificatores turris Babel: *Faciamus (inquiunt) Civitatem & turrim, cujus culmen pertingat ad Cælum, & celebremus nomen nostrum.*

*strum.* En quanta hîc impendia, quanta structuræ sublimitas? Sed quid hæc profuit, in ea, quam sibi præfixere intentionis humilitate vanissima; ita ut quantum sese moles illa supra provehere debuit, tantum infra jacuerit, solâ vanitate tumens intentio. Utinam illi sui proprii obliti nominis, altius ad divini celebrationem auctoris se erexissent, nec tam pro altitudine structuræ illius, quàm pro sublimitate intentionis laborassent. Certè minus inde laboris ac impendii, plus emolumenti & gloriæ collegissent. Sed quia de suo tantum evanido nomine famaq; posthuma, cura illis sollicita fuerat, ideo nihil ultra præter eam, quam ea turris, ab eis exædificanda prætulit confusionem, retulere. Parum dissimili sorte ab ea quam Heliogabalus ex sua pretiosissimis ab auro & margaritis impensis in eum finem exstructa turri retulit, ut semet ingruente ineluctabili periculo ex ea præcipitaret deorsum. Certè enim in quæ nos quoq; & in quanta devix à debito scopo intentiones ruere faciunt præcipitia? idq; utinam non ad confusionem sempiternam!

Felicioꝛ longè eorum conditio, qui egregio sui terrenorumq; neglectu, toto se in-

tuitu ad DEUM obvertunt : ita ut hic locum habeat quod David de sagitta Jonathæ : *Sagitta* ( inquit ) *Jonathæ nunquam rediit retrosum*. Intentiones videlicet ad terrena ac temporalia directæ , illis sagittis sunt non absimiles , quæ in aerem emissæ , vix aliquantulo per volatum emenso spatio , inanes & vacuæ retro deorsum redeunt : secus intentiones , quibus rectà in DEUM ferimur. Hæ scilicet , ita ad cor DEI usq; penetrant , ut in ejus pariter , ac eximie Sanctimonie possessionem ingenti æternorum lucro deveniant. Si Abaris scytha tantum cursu valuit , ut emissam è suo arcu assequeretur sagittam : certè suarum intentionum ad sublimem quemcunq; scopum directores , planè non minus celeri cursu cum iisdem suis intentionibus eundem scopum , simulq; par illis præmium attingunt. Ita ut hic etiam locum habeat , quod cuidam adscriptum sagittæ : *Consequitur quodcunq; petit*.

Et hoc nobis omnino tum alii quicunq; tot dignissimi æquè ac sanctissimi , tum etiam Pater noster Divinissimus Ignatius impensissimè commendat , toties inculcando , ut rectam in omnibus intentionem habere studeamus,



mus, ut in omnibus quæramus DEUM, ut ubiq; majoris DEI gloriæ habeamus intuitum. Commendat inquam velut quodam hic etiam cum Divo gentium Apostolo instituto certamine. Ille enim suis edicere contentus, ut omnia ad gloriam DEI facerent: noster verò sanctissimus Pater non quæcunq; sed majorem ac majorem DEI gloriam spectandam voluit: ac sibi nec non quibuscunq; excellentioris Sanctimonix sectatoribus proposuit.

Nec aliis sese tot viri sive aliunde sive è Societate nostra Apostolici rexere principiis: non aliud in tot exhaustis à se laboribus, adversis ærumnisq; quàm unicam ejusdem DEI spectando gloriam & gustum. Juxta illud quod Psaltes enuntiat: *Qui facis Angelos tuos spiritus & ministros tuos ignem urentem.* Suos nimirum servos DEVS igneos esse voluit, ut semper quocunq; loco & officio fuerint, sursum ferantur, heroici, mundi terrenorumq; contemptores, ignis adinstar, quem quocunq; loco reposueris, semper eodem nisu ad coelum tendit, nec non sublimia spectat.

Idemq; ipsum nobis etiam agendum est, planeq; nova instituenda Gygantonomachia, quâ

quâ terrenis posthabitis, ipsoq; DEO pro mēta & scopo nobismet proposito, divinum cor ejus, sublimium intentionum spiculis feriamus: urgente etiam nos ad id Apostolo ac dicente; *Quæ sursum sunt quærite, ubi est Christus in dextera DEI sedens, quæ sursum sunt sapite, non quæ super terram.*

## ADHORTATIO IX.

*Non vulgarem Sæctimoniam in perfecto passionum dominio consistere.*

**N**ON parum jam sanctitatem Religiosam pro-  
veximus in sublime. Adhuc tamen est  
quò ascendat. Quis enim crederet, medio-  
cri posse esse contentam fastigio, quæ caput  
coelo inferens, solo DEO inferiorem se censer.  
Imò intra divina sese eaq; principalia attributa  
includit & continet. Passiones itaq; perfecto  
compressæ dominio scalam illi efficiunt, per  
quam sese erigat sublimius. Quanquam per  
hos etiam gradus nobismet ipsis in idem virtu-  
tis sublime ascensus est. Quod ut amplius pa-  
teat: id ipsum nobis materia præsentis dictio-  
nis

pis esto : quia non vulgarem quia dominatricem ac Reginam sanctitatem eo ipso proclamabimus : dum omnium victricem exhibebimus passionum.

Pridem illud etiam apud Gentiles proclamatum : domitorem passionum ac Regem idem esse. Hinc illud Poëtæ : *Latius regnes avidum domando spiritum, quam si Lybiam remotis Gadibus jungas, & uterq; Penus serviat uni.* Imò tunc omnia jure tenebis cum poteris Rex esse tui. Ita quondam Sinelius : *Illud profectò primarium, ac summè regium est, sui ipsius regem esse ; mentemq; domesticæ belluæ quasi moderatricem præficere.*

Inde est quod Christus apud Lucam in Evangelio : *Multi Propheta & Reges voluerunt videre quæ vos videtis :* apud Matthæum vero idem legitur . *Multi Propheta & just.* Ad quod Vener: Beda : *Ipsi enim sunt Reges magni, qui tentationum suarum motibus, non consentiendo succumbere, sed regendo præesse noverunt.* Idemq; est quod alibi in Evangelio : *Quis rex iturus committere bellum adversus alium Regem &c.* Ad quod S. Eucherius Lugdunensis Episc: *Rex est unusquisq; fidelis, qui*  
*li se ipsum*



*se ipsum & virtutum exercitium bene regere no-  
vit.* Et defacto prædominantes passionēs & af-  
fectus Reges sunt : sed ille Rex tantò major  
tantoq; augustior atq; ut ita dicam : *Rex Regum  
& Dominus Dominantium*, quisquis huius Re-  
gibus iugo imposito didicerit dominari : Juxta  
illud ad Caim : *Subter te erit appetitus tuus.  
Et tu dominaberis illius.*

Regnū tamen hoc non de hoc mundo regnū  
esse quis nesciat ? Terrā scilicet & mundo al-  
tius, ultra coelum ( ut toties diximus ) sese  
terrenorum contemptu porrigit, DEI ipsius  
throno affine. Regnum inquam istud est non  
plebeia virtutis & Sanctimoniae, Regnum in-  
tra nosmetipsos ; ad quod inter cætera per edo-  
mitas passionēs ascenditur.

3. Reg 10. Thronus illius planè Salomonicus ad  
quem inter leunculos & leones per gradus di-  
spósitos ascensus fuerat. Leunculi verò illi  
non sævi non rugientes erant, sed taciturni, sed  
modesti, & quasi edomiti, ac mansuefacti :  
nempe ex ebore auroq; efficti, quietissimè absq;  
ulla feritatis nota, suis gradibus insistentes.  
Et certè effrenes passionēs quid aliud, quam feri  
leones sunt : si tamen comprimantur ac edo-  
men-

mentur, thronum dominatricis Sanctimonix,  
 eximiè adornant, ad illumq; ascensum admo-  
 dum speciosum & magnificum efficiunt: ita ut  
 verius quàm de throno Salomonis, *non sit fa-  
 ctum tale opus in universis regnis*. Planè leo-  
 nes hi edentuli sunt, quales olim Nero in suos  
 aulicos immiserat ut illuderet, plusq; illis me-  
 tus inanis incuteret, quàm noxæ. Aut inter  
 quales Daniel in specu delituerat, quorum ora  
 concluderat Angelus, ut plus gloriæ quam no-  
 cumenti afferrent, magisq; conspicuam redde-  
 rent Danielis tum innocentiam, tum sanctita-  
 tem. Et ita omnino comprimendæ passiones  
 sunt, ut edomitæ non tantum non noceant,  
 sed prosint. Non aliter quàm Leo ille Sam-  
 sonicus, Sævus in primis & rugiens, extremamq;  
 Samsoni perniciem minitans: Sed postquam  
 devictus est, favum mellis ore proferens. Ita  
 scilicet vividæ in nobis passiones in nosmet  
 ipsos efferaſcunt & sæviunt, sed proſtigatæ,  
 dulces nobis admodum virtutum ac meritorum  
 favos progenerant ac propinant. Unde illud  
 Christi Apocal: 2. *Vincenti dabo edere de ligno  
 vite. Vincenti dabo manna absconditum.*

Psalm. 90.

Non immerito Psalter admonet: *Super aspidem & basiliscum ambulabis & conculcabis leonem & draconem.* Tot videlicet feræ hoc est virulentæ passiones nobis etiam calcandæ sunt; ut nos in sublimi virtutis attollant cæloq; ipsi inferant. Nec aliter quàm instratis his ipsis edomitorem affectuum monstris, Religiosa instruenda Appia: quæ nos egregios nostri victores in ipsum Sanctimoniam regnatricis Capitolium deducat. Uti hujus ipsius nos admonet S. Hipponensis Præsul (Sermon: 176. in fine) *Ipso affectu pariter & profectu ascendamus etiam per vitia ac passiones nostras. Si utiq; unusquisq; nostrum subdere eas sibi studeat, ac super eas stare consuescat, ex ipsis sibi gradum construit, quo possit ad superiora conscendere. Eleuabunt nos si fuerint infra nos.*

Apocal. 4.

At verò similis etiam hîc sanctitatis Thronus esto illi sedi Apocalypticæ, de qua in eadem Apocalypsi Joannes: *In conspectu sedis mare vitreum simile crystallo:* Nolter Cornelius addit: *Id est pacificum & tranquillum.* Ita nimirum omni perturbatione & confusione erat vacuum, ita compositum & quietum, ut in sua tranquillitate & malacia adinstar vitri crystallini



lini ad fundum usq; summa perspicuitate claresceret. Atq; sic per illud ad supremæ quia divinæ sanctitatis sedem iter esset. *In conspectu sedis mare vitreum* Quid verò aliud nostrarum motus passionum & affectuum sunt, quàm inquietum, turbulentum, omni amaritudine despumans, mille infestis belluis ac monstrosis refertum, sexcentis corporis & animæ fatale naufragiis æquor. Quodsi tamen hasce animi nostri perturbationes ac procellas composuerimus, quod si hoc idem mare passionatæ mentis, rectæ rationis vinculis comprehensum, ad integram reduxerimus malaciam, quodsi immanes hasce belluas & monstra edomuerimus; viam nobis ad thronum Sanctimonix per quam augustam seipso efficiet. Longè feliciori exitu, quàm cùm Xerxes Hellesponto compedes iniecisset. Aut cùm Princeps Goldingæ in gratiam pugnatoris terra mariq; pro Dania contra Suecos Stephani Czarnieci iussisset depingi navem, in cuius malo Corona Regia cum Lemmate: *Post sanguinis æquor.*

Videamus enim quisnam sedem illam Apocalypticam insederit? Non alius profectò, *Apocal. 5.* quam mansuetissimus præ omnibus animanti-

bus agnus, *agnus* (inquam) *tanquam occisus*, hoc est omni ex parte ab intus & ab extra perfectissime mortificatus ideoque omni passione pænè vacuus. *Et vidi Ecce in medio throni agnum stantem tanquam occisum.* Nec alius quispiam ibidem ad arcana libri septem signaculis signati admissus: Non alteri acclamatum: *Dignus est accipere virtutem & divinitatem & gloriam.* Ut vel inde facile constet, non aliis virtutis & gloriæ eminentiam, non aliis reconditorum mysteriorum adita ac ipsius quoque diviniore sanctimonix thronum expeditius patere, quam quos perfecta passionum mortificatio agnos exhibet tanquam occisos. Quod autem ibidem eidem throno & agno assistere 4. animalia? an non hæc præcipuas quatuor passionēs easque edomitas designant egregiè? Quid enim per Leonem quàm passionem Iræ: quid per aquilam quàm superbiam ac elationem, quid per bovem, quàm appetitum ad terrena sensualem, quid per hominem carne vestitum quàm concupiscentias eidem carni agnatas intelligimus. En tamen ista in ornamentum & gloriam ejusdem throni & agni abiêre.

Nec

Nec verò aliunde corona etiam Sancti-  
 moniæ textitur : *Veni* (inquit Sponsus ad Spon-  
 sam) *de Libano coronaberis, de cubilibus Leo-*  
*num, de montibus pardorum* En quot hic de  
 efferatissimis belluis, earumq; de occupatis de-  
 structisq; spelæis victoriæ in coronam abiêre ;  
 ita ut non dispari quoq; diademate, conspicua  
 apparuerit mulier Apocaliptica : *In capite ejus*  
*corona stellarum duodecim.* Ex Pœtis utiq;  
 novimus ferarum plerasq; in numerum stella-  
 rum relatas. Et si hoc vanissimum fabulæ com-  
 mentum : certè illud veritatis ipsius effatum,  
 insolentes passionum feras si edomantur, dege-  
 nerare in stellas : effingiq; in Coronas. Uti  
 quispiam Princeps Regi Galliarum Effigiem  
 Temperantiæ tres Coronas in manu deferen-  
 tis obtulerat, cum ea inscriptione : *Iram, vo-*  
*luptatem, gaudium, si temperaveris, Co-*  
*ronaberis.*

Hinc quoq; est quod iustos in scriptu-  
 ra Soli comparatos legimus. Quàm enim pul-  
 chrè quàm conspicuè sol effulget, non tan-  
 tum inter innocuas virgines, geminos, olores,  
 agnos, sed inter Martes etiam, Saturnos, Ve-  
 neres, Leones, Hydras, Scorpiones Urso, cor-  
 nupe-



nupetas tauros; Nempe hic etiam fera profanaq;  
ad speciem phænomena, adeo innocua ac edo-  
mita sunt, ut nomen nonnisi Leonum, Scor-  
pionum, cæterorumq; ejusdem generis retineant,  
non genium ac feritatem, ideoq; nec cœlum in-  
fament vel obscurent, sed tanto magis illumi-  
nent, longeq; pulcherrimum ipsimet soli utpo-  
te Principi siderum præbeant satellitium. Uti  
& illæ caliginosæ nubes, inter quas refulgenti  
adscriptum soli: *Me nubila victa coronant.*

Isaia, II.

Neq; alius fuerat inter cicuratissima ani-  
mantia in paradyso, ubi tunc eximia floruit  
sanctitas ac innocentia, Adami status. Non  
alia Noe in arca, inter tot feras, ibidem in-  
clusi vivendi ratio. Non alius deniq; Orpheus  
*in Sylvis inter Delphinas Arion.* Hoc ipsum  
inter miros advenientis in mundum Messiaë ef-  
fectus referente Propheta: *Habitabit lupus cum*  
*agno, Leopardus cum hædo accubabit, vitulus &*  
*leo & ovus simul morabuntur, puer parvulus*  
*minabit eos.* Id autem ingentis adinstar prodi-  
gii ac virtutis nec minoris gloriæ futurum erat.  
Ut non omittam quatuor illa Ezechielis anima-  
lia, quæ currum gloriæ divinæ sub cœlum usq;  
eyexere. Per hæc autem S. Macarius *Morti-*  
*ficatas*

*ficatas anime passiones* intelligit; quæ nos longè sublimius quam Romanos triumphatores, albentes equi seu Elephanti uti Julium Cæsarem in Capitolium, vel Sesostrem devicti junctiq; curru Reges, devehunt ac deportant.

Imò eo nos redigunt, ut postquam illas devicerimus, nihil nobis amplius invictum maneat: uti illi Apocalyptico triumphatori de quo jam alibi toties: *Habebat arcum & exivit vincens ut vinceret.* Quid verò aliud est vincere ut vincas, quàm totaliter debellare, ac subigere passiones, ut cætera vincas omnia. Et vinces procul dubio facilè si te ipsum viceris. Viceris inquam velut ad internecionem usq; eandem passionum. Pleriq; enim ita vincunt, ut postea vincantur, vel remissione, vel præsumptione, ac præfidentia, vel aciore tentatione, vel alio quovis modo, à casu scilicet resurgentibus, ac velut reviviscentibus iisdem passionibus ad nostram ulteriorem cladem. Conterendæ igitur pænitus velut vitulus ille Israëliticus in pulverem redactus: aut certe ad instar immolantis victimas suas Sapientiæ, veluti ferro & igne abolendæ. Alioquin nec in perpetuum vinces, nec diviniore Sapientiæ domum perduces ad

*Apocal. 6.*

fastigium. Quodsi verò passiones nostras Gigantibus illis apud Pòetas celeberrimis comparare voluerimus : & hi certè debellandi atterendiq; omnino Gigantes sunt, si in securo sublimioris Sanctimonix dominatum ac regnum habere voluerimus. Nam etiam : *Cælumq; suo servire Tonanti non nisi sævorum potuit post bella Gigantum.* Nec lapis ille Propheticus, celebris illius ex pluribus metallis compositæ triumphator statuæ crevisset in montem : si non simul in eadem statua principales in capitales lapsus ac peccata hominem protrudentes passionnes pænitus contrivisset. In capite scilicet passionem superbiæ, in oculis passionem Invidiæ, in manibus passionem Avaritiæ, in pectore ac præcordiis passionem Iræ, in ventre passionem Gulæ, in femoribus passionem Luxuriæ, in pedibus passionem Acediæ. Proinde insuper etiam eo nobis modo hîc quo apud Esdram (uti supra de heroicis actibus diximus) murus Jerusalem educebatur, procedendum. Nempè velut unâ manu tenendus gladius ad subjugandos hosce nostros hostes, alterâ circa construendam Sanctimonix fabricam laborandum.

Quan-



Quamquam advertite, ad quam nos edomiti planè passionum motus sortem usq; efferant? Nempe non ad humanam tantum, vel humanâ aliquanto maiorem, sed ad divinam etiam DEIq; ipsius vicariam. Uti DEUS ad Moysen mitissimum virorum: *Constitui te DEVM Pharaonis*. Ad quod Ambrosius: *Etenim victor passionum omnium mentem regens, carnem subiciens, Et regia quadam auctoritate castigans, nomine DEI vocatus est.*

Exod: 7.

Hinc est quod Plates sensit de DEO eumq; allocutus: *Domine quis similis tibi? tu dominaris potestati maris Et motum fluctuum tu mitigas*. Hoc enim planè divinum est, turbulentum passionum æquor nosse compescere. Proinde illud erat Divi Indiarum Apostoli editum (uti in ejus vita lib. 6 cap. 4. legimus) *Spektatur virtus ex sui ipsius victoria, Et turbulentorum animi motuum cupiditatumq; sedatione magis, quam ex specie quadam pietatis.*

Nec aliò proinde nobis etiam aspirandum, illâ nobis propositâ sorte, ut plebeia sanctitatis conditione non contenti, ad regiam usq; magnis ausibus enitamur: ejus ipsius facile compotes futuri, si iugo passionum nostra-

rum excusso, illas ipsas nobismet servire & obsequi cōdegerimus.

## ADHORTATIO X.

*Excellentia Sanctimonie ab omnigeno  
virtutum ornatu.*

**P**ost tot & tanta de sublimitate Sanctimonie pronuntiata, nondum absolvimus omnia. Ea scilicet est hujus materie amplitudo ipsiusq; talis sanctitatis ratio, ut multis non contenta, cuncta complecti velit ac debeat. Quid ergo adhuc ad supremæ virtutis desideramus apicem? Certè non aliud: quàm omnia. Illud enim inpræsens dicturifumus: *Excellentiam Sanctimonie haberi ab omnigeno virtutum apparatu ornatuq;*.

Sicuti rarus admodum, qui suo non careat nævo, ita longè rarior, cui inter eximias easq; numerosas dotes aliquid non desit. Non ita scilicet nos sive natura, sive fortuna, sive gratia dotavit, ut non alicujus saltem fecerit laborare inopiā. Quod de telluris fecunditate protulit quispiam: *Non omnis fert omnia tellus,* hoc de insignissimis etiam quibusq; hominibus *censet.*

consensendum est: Nempe nullum ita excellentibus splendere dotibus, ut omnibus abundet.

Atq; ex eo ipso nos quoq; illi Sanctimoniararitatem & excellentiam adstruimus, ad illamq; nosmet toties adhortamur; quæ ita se virtutibus spectabilem exhibeat, ut nulla ei deesse videatur.

An non talem Plates exhibuit de quo illud ex ore Principum cælestium prolocutus: *Dominus virtutum ipse est Rex gloria.* Sanctus verò Gregorius Nyssenus Orat: de Ascensione Domini subdit: *Qui (inquit) summam omnia in se colligit.* Ac si Regem gloriæ in sublimitate Sanctimoniararæ ceu in throno collocatum, non aliud quàm omnium virtutum deceret collectio, ac satellitium.

Psalm. 8.

Adumbrata ea ipsa talis sanctitas velut in Symbolo in veste Aaronica: de qua Sap: 18. *In veste poderis erat totus orbis terrarum.* Verum quid Aaroni, quid Mystæ ad Aram sanctiorem procedenti, cum mundo, cum terra? Coelum tunc potius, imò Angelum, Mystam induere, totum quod mundanum terrenumq; esset ac ipsum etiam minimum pulverem excutere decuerat. Nisi quod apud Cornelium à

K k 3

Lapi:



Lapi: idem textus in hæc verba legitur: *Omni-genus ornatus tunica, qua induebatur inerat.* Et certe sic decebat summum Antistitem ornari, ut hic exterior cultus, interioris Sanctimonie foret indicium. Defacto enim illa verè excellens sanctitas est, illa supremo Antistite, illa DEO Arisq; digna, quæ omni virtutum apparatu ornatuq; conspicua.

Nec dissimili forsitan vestimento nituit  
*Psalm. 44.* Regina illa de qua Psalter: *Adstitit Regina à dextris tuis circumdata varietate.* Ubi parum illi visum est, auro, id est aurea charitate eaq; principali virtute vestiri: nisi pulchram simul omnium virtutum varietatem circumquaq; indueret: atq; sic supremum Sanctimonie obtineret principatum: *Adstitit* (inquit) *Regina.*

Uti & illa de qua Salomon: *Quæ est quæ ascendit per desertum sicut virgula fumi ex aromatibus, myrrhæ & thuris & universi pulveris pigmentarii.* O quot hæc etiam anima odoramentis dives fuerat! Sed videte interim quantum se hac in parte ambitiolam præstitit? Nimirum, nec myrrhâ solâ, nec thure neq; pluribus aromatibus contenta, omnes universi pulveris pigmentarii thecas ac thesau-

ros in sui ornatum exhaustit. Locupletissimo documento, simile quid in studio Sanctimonie nobis agendum esse: scilicet ut non satis sit unius vel alterius virtutis imò plurium etiam possessionem capere: nisi tota virtutum universitas manu teneatur.

Nec aliud fortassis in sua Sulamite idem Salomon advertit dum de illa pronuntiaret: *Quid videbis in Sulamite nisi Choros castrorum: Equitatusque in curribus Pharaonis assimilavit*: Unde vero in una, tot & tanta, nempe integri castrorum apparatus Equitatusque spectari potuerant? D. Ambrosius hunc locum DEI paræ attribuens, in hæc verba ait: *Ne mireris unam equitatus multitudinem assimilata, si advertas quantæ in ipsa una, quæ tam sancta sit, virtutum acies habeantur.* Et hoc planè est, excellenti, ad quam eniti debemus Sanctimoniam fulgere: nempe ad exemplum Divinissimæ Virginis, adeò nihil virtutis intermittendo, ut velut inter Choros Castrorum, aut innumeros equitatus consistere, totos intra nos exercitus circumferre videamur. Juxta illud ejusdem: *Mille clypei pendent ex ea, omnis armatura fortium.* Quod enim defacto arma-

Cant. x.

menta-

mentarium esset, quod intra se, unum & alterum armorum genus, & non totam bellicam omnis generis suppellectilem recondere. Quis ille exercitus, qui uno & altero centenario militum constaret. Quod illud perfectum ædificium, cui vel tectum, vel atrium, vel fenestræ, vel aliud quidpiam deesset. Quis ille omnibus numeris absolutus homo, cui vel unus desideraretur oculus, sive manus digitusve. Et si hæc quæ diximus haud perfecta integræq; censemus, certè & illa Sanctimonia, omnino manca censenda esset, cui deesset vel una virtus. Præsertim cum etiam *Sulamitis* apud Interpretes idem sonet, quod *Perfecta*.

Hinc de cœlis ac de terra post creationem eorundem Sacer textus: *Perfecti sunt celi & terra, & omnis ornatus eorum.* Unde verò ea ipsorum tam absoluta perfectio? certè non aliunde, nisi ab eo ipso omnigeno, à natura illis convenienti ornatu: in quo si quid defuisset, quis eam cœlo ac terræ perfectionem attribueret? Atq; non alia etiam in homine religioso perfectionis summitas, quàm quæ omnem virtutum ornatum velut quædam Pandora complectitur,



Uti quoq; de Onia Pontifice Eccles. 50.  
 Lunæ assimilato : *Quasi luna plena in diebus  
 suis*. Certè enim vix quidquam aliud animam  
 plenitudine virtutum refulgentem adumbrat  
 exactius ; quàm eadem ipsa in suo Plenilunio  
 existens luna ; quæ ita tunc suum adimplet or-  
 bem , ut illi ad plenitudinem nihil deesse vi-  
 deatur.

Nec alio fortassis titulo Iris etiam A-  
 pocal: 4. usq; ad viciniam throni Divini admis-  
 sa : *Iris erat in circuitu sedis*. Nisi quòd cùm  
 aliàs juxta Plinium lib. 1. cap. 59. *Nunquam  
 nisi dimidiâ circuli forma* apparet : Hic totum  
 circulum impleverit , sedemq; DEI rotam in  
 circuitu cinxerit , in nullo quoad perfectionem  
 ejusdem circuli deficiens. Prout etiam Eze-  
 chiel: 1. Ubi circa sedentem in throno ( sic  
 enim Cornelius à Lap: explicat ) *Visio aspectûs  
 arcûs , cùm fuerit in nube in die pluvie : hic  
 erat aspectus splendoris per gyrum*, id est in cir-  
 cuitu : eò quòd hic arcus iste scilicet Iris, ple-  
 num ac perfectum circulum faciens , ita thro-  
 num ac in eo confidentem ambiret pulcherrimè.  
 Atq; in hoc ipso est plenissimæ , proindeq; ipsi  
 DEI throno affinis Symbolum Sanctimonix,

Utrū in eo quoq̃, quod sicut Iridem, vel ipsa colorum panē omnium collectio reddit spectabilem : Namq̃; juxta Pòetam *mille trahit varios adverso Sole colores*. Sic hominem Religiosum, imò quemcunq̃; etiam alium, similis omnium collectio virtutum, ipsi quoq̃; ejusdem DEI Solio propiùs admovet, ac in oculis totius cœli facit eximiè conspicuum.

Et hoc fortè angebat Psalterium dum diceret : *Notum fac mihi Domine numerum dierum meorum, ut sciam quid desit mihi*. Noluit videlicet aliter se, ex hac vita transiens, in conspectum DEI Judicis sistere, nisi in pleno integroq̃; virtutum omnium satellitio.

Idem de se protestatus in Evangelio Christus : *Sic nos ( inquit ) decet adimplere omnem Justitiam*. Certè enim cū ille ex discipulis quæreretur : *Quem dicunt homines esse Filium hominis ?* illiq̃; responderent : *Joannem Baptistam, Eliam, Jeremiam, aut unum ex Prophetis*, id non aliò spectabat, nisi quod horum omnium & aliorum quorumcunq̃;, ac proinde omnes in eodem Christo elucerent virtutes. Apostolus autem in Epistola Catholica omnes primavos Christianos atq̃; nosmet  
etiam

etiam ipsos absq; exceptione admonuit: *Vt sitis* ( inquit ) *perfecti & integri in nullo deficientes.* Ita ut hic planè locum genuinum habeat , verèq; dici de nobis possit quod de Solone apud Lucianum aliisq; adulatoriè aut hyperbolicè prolatum : *Omnia jam viso Solone conspexistis.*

Et certè si hæc fuerat aliquando ipsorum Ethnicorum laus, ut illis omnium virtutum attribueretur compendium. Uti olim apud Suetonium Germanico: *Omnes* ( inquit ) *Germanico virtutes, quantas nemini cuiquam contigisse satis constat.* De Cossò quoq; Velleius Patexculus : *Cossus in omnia virtutum exempla genitus.* Tum etiam Pòëta de quopiam : *Virtus ivit omnis in unum.* Quidni Religiosus sublimioris Sanctimonix sectator eà laude careat? ut velut *virtutum omnium latissimum templum* ( quod Cassiodorus de quopiam ) in Coeli DEIq; conspectu appareat.

Quidni ejus anima eo virtutum resplendeat ornatu, quo cælestis Jerusalem in oculis Divi Joannis refulsit : *Vidi* ( inquit ) *Civitatem sanctam Jerusalem paratam sicut Sponsam ornata viro suo.* Quid enim ibi, si Joanni

*Apocal. 21.*



totam quanta fuit describenti credimus, ad ornamentum defuit? præsertim cum illam non aliter quam in persona Neo-Sponsæ, in quam ordinariè omnis ornatus congeritur, exhibuerit.

Idq; certè ipsum nobis etiam sedulo laborandum, ut si cælesti Jerusalem pro dignitate desponsari voluerimus, non dissimili nos ad cælestes nuptias comparemus impendio. Quod si vero id defuerit, meritò illud, de quo Christus in Evangelio, extimescamus repudium: *Nisi Justitia vestra abundaverit, &c. non intrabitis in Regnum Cælorum.*

## ADHORTATIO XI.

*Sublimitas Sanctimonix à possessione gradus supremi in omni virtute.*

Cum excellentiam Sanctimonix in plena omnigenarum constituerimus virtutum collectione, ornatuq; , videri poteramus, jam nos absolvisse omnia. Et ecce ultra hæc, nova se nobis evolvit materia, ejusdemq; Sanctimonix sublimitas. Ita ut illud nobis etiam convenire videatur, quod de Alexandro Macedo-

cedo-

cedone Seneca : *Inventus est qui desideraret aliquid post omnia.* Et quamvis in illo, somniantis id ambitionis fuerit : in nobis certè legitimum & practicum promovendæ ad apicem virtutis studium. Quid vero tamen illud est quod omnium virtutum collectioni posset superaddi ? Profectò non aliud quàm supremi gradus in omni virtute acquisitio ac possessio. Et hoc mihi inpræsens pro fastigio sublimioris suggerendum ponendumq; Sanctimonix.

Non unum est cui spiritualis in virtutibus profectus assimilari possit. Undecunq; tamen ducat similitudinem, facile suggeret argumentum : non modico Sanctimoniam laborare defectu ; si ea post thesaurizatam & aggregatam sibi omnium virtutum collectionem, ad supremos earum gradus non ascenderit.

Atq; sic inprimis virtutis perfectionem cogitemus velut sublimem multis onustam fructibus arborem. uti nescio quem imaginatus in personâ Sponsi Salomoni dum diceret : *Ascendam in palmam, & apprehendam fructus ejus.* Et certè haud ignobile ejusdem virtutis in palma Symbolum. Tum quòd sicut ea arduo in sui ascensu septa corticè, sic virtus in arduo

Cant. 7.

sita. Tum quod sicut palma sub pondere crescit, ita virtutis est sub nescio quibus adversorum ærumnarumq; ictibus & machinis tantò altius assurgere & attolli. Illud verò præcipuum; quod sicut hæc ipsa arbor in summo ramorum suorum fastigio fructus progenerat, & enutrit, ita ut nequaquam quidpiam oblectamenti, gustui tuo ex ea capias, ni in ejus verticem evaseris: ita planè haud perfectionis summam, perfectorumq; integra solatia & gloriam apprehendes; ni supremum cujuscunq; virtutis gradum & apicem tenueris.

Quodsi sub vineæ similitudine perfectionem Sanctimonix exhibere voluerimus? Videamus quomodo quispiam circa ejusdem vineæ propagationem processerit? *Homo erat Paterfamilias* (ait Christus Matth. 21.) *qui plantavit vineam, & sepem circumdedit ei, & fodit in ea torcular, & edificavit turrim* Turrim inquam non domum quampiam, non aulam, non palatium. Et hoc est utiq; perfectionis fabricam constituentium: ut scilicet turres nonnisi ædificent hoc est in gradu sublimi virtutes. Quanquam quod illud esset quodcunq; licet perfectum ædificium, cui ad consummationem, seu tectum seu tegulæ deessent. Sic



Sic Propheta Dominum stantem super murum exhibuit simulq;: *Trullam Cæmentarii in manu ejus*. Ad quid verò illa? Utiq; jam murus in suo esse constiterat? Nisi quod adhuc ejus integritati ac summitati defuerat addendum aliquid. Hinc nè eo etiam laboraret defectu, trullam illi Dominus applicuit: ut ad fastigium omnimodè perduceret; doceretq; parem in perfectione virtutis rationem servandam esse, omnemq; illi summitatem, ne in quo gradu deficiat adhibendam.

*Amos: 7.*

Inde forsitan est quod Apocal: 21. Angelus assumpserit *Mensuram arundineam auream qua metiretur Civitatem Cælestem Jerusalem*. Hancq; ipsam velut nostræ perfectionis typum & exemplar monstraret. Ad quid autem ibi ea dimensio? certè non aliò spectabat, nisi ut manifestum esset illam cælestem structuram ita omnibus numeris absolutam, ut illi aut nihil omnino sive ad latitudinem sive ad sublimitatem defuerit: aut si defuisset quidpiam, id quàm primùm divinæ manus potentia suppleretur, perfectaq; donaretur summitate.

Et quia Divus Gentium Apostolus virtutis ac perfectionis studium velut cursui ac

certa-

certamini Olympico comparat: *Certamen* (inquit) *certavi cursum consummavi: In reliquo reposita est mihi corona Justitiæ?* Hinc id ipsum patet, quantum ea perfectio absolutissima esse debeat in omnibus: ut coronam justitiæ mereatur. Certè enim nec ille in Olympicis præmium sui cursus obtinisset qui vel uno gradu à meta distaret aliumq; sibi permisisset anteire. Ideo idem Apostolus admonet: *Sic currite ut comprehendatis.*

Videre id ipsum velut in speculo liceat in mari illo crystallino de quo Apocal: 4 *In conspectu sedis mare vitreum simile crystallo.* Quid namq; obstat quominus per illud aut intelligatur aut adumbretur virtutis cursus. Certè enim sicut totum usq; ad littus mare enavigandum est, ut portum desideratum apprehendas & teneas: ita tota virtutum quoad omnes gradus absolvenda perfectio, ut sedem & solium Regnatricis Sanctimonix occupes. *In conspectu* (inquit) *sedis, mare.*

Sex gradus thronus recensibat Salomonicus. Quis verò illum insedisset vel uno superiore gradu non conscenso? Quoniam autem virtutes etiam Religiosæ similibus gradibus

bus constant? Quisnam oro non omnibus illorum iisq; præsertim altioribus superatis ad sublimè Sanctimonix ascensus?

Scalæ Jacobo Patriarchæ monstratæ in terra stanti coelum contingenti, quis prohibeat Religiosam perfectionem conferre? Uti verò nec ibi Cælum quisquam conscendisset, si non se usq; ad gradum extulisset supremum; ita nec ille summam perfectionis obtineret; si quis ad summum virtutis gradum non pertingeret.

*Ascensiones* quispiam seu ut alii volunt *gradus* apud Psalterem *disposuit in corde suo*. Nec dubium quod hi, virtutum defacto fuere gradus, itaq; dispositi, ut desideraretur nullus. Alias nihil laudis extraordinariæ dispositor hic meruisset.

Uti nec laudasset Sponsa Sponsi vestigia, si non se eo extendissent, ut non tantum propius ad montium juga adrepissent, sed etiam summa eorum transiliissent fastigia: *Saliens* (inquit) *in montibus, transiliens colles*. Cum hæc ipsa sit stadium virtutis decurrentium laus; ut parum sit illis cliyum Sanctimonix quomodo-  
docunq; occupare ac tenere, nisi in summo ejus

Cant: 2.

M m

consi-



consistant, ac etiam collem ipsum & apicem  
transiliant.

Studeant hinc naturam ipsam imitari:  
quæ ita suos effingit foetus, ut nihil in illis de-  
bitæ quoad omnia perfectionis desideretur: ita  
adamussim efformat omnia, nè etiam capiti  
pilus desit, Et si deesset aliquid, jam eo ipso  
monstrum, non naturæ opus esset.

Cant: 6.

Atq; hoc ipsum in Encomiis Sponso à  
Sponsa accumulatis clarius eluxit. Ita illa o-  
mnes in eum congeffit laudes, ita omnia ejus  
membra convenientibus exornavit elogiis, ut  
supra caput ipsum altius ascendens, pilos etiam  
non sine exaggerata laude transierit: *Coma ejus*  
(inquit) *sicut elata palmarum*: Hoc ipso  
commonstrans, nihil illi pænitus ad consum-  
matam pulchritudinem & gloriam defuisse. Et  
si ea tantaq; circa naturales dotes accuratio &  
elaboratio, quanta certè circa super naturalem  
animi culturam habenda esset?

Neq; caruere eâ ipsâ defacto tum com-  
plures alii ex quocunq; etiam statu tum potis-  
simum Religiosæ vocationis homines: uti inter  
alios Sanctus quoq; Pater noster Ignatius de quo  
Venerabilis Pater Nicolaus Lancicius teste P.

Balbi-

Balbino in vita ejusdem P. Lancicii dicere erat solitus : *S. Patrem Ignatium omnium virtutum habitus in gradu altissimo tenuisse.* Non ab simile quid de Patre Thoma Sanchez in ejus vita legitur : scilicet quod & ille , *nullam virtutem non in summo tenebat fastigio.* In illud plane recidit quod de Hierone Rege Ægypti Pindarus Pœta Græcus : *Ex singulis ( inquit ) virtutibus solas decerpebat summitates.*

Illudq; omnino studiosis perfectionis Religiosæ spectandum est. Si summum uti Sanctimonix, ita & gloriæ apicem tenere voluerint.

## ADHORTATIO XII.

*Non vulgaris id est docta non rudis Sanctimonia.  
Seu Excellentia Sanctimonix à conjunctione  
cum doctrina.*

**T**Ot gradus sanctitatis emensi, nondum ejus apicem attigimus. Ita ut quidquid de illa hætenus protulimus, rude ac incultum merito videri possit. Etsi enim pleraq; satis excelsa satisq; sublimia novimus, hæc eadem tamen, sua non raro laborare ruditate, indige-

re culturâ perspeximus. Sic spectare solenne est in urbibus excelsas turre ac ædificia sed rudia sed deformia. Sic in Sylvis proceras, sed gibbosas quercus, incultas pinus. Nec alia sæpenumero sanctitatis vicissitudo. An non enim rudem ac rusticam sanctitatem audiimus? Hodie igitur illa nobis non vulgaris sanctitas esto, quæ docta, quæ omni scientiâ excul-  
ta, quæ cujuscunq; ruditatis experts.

Quantum in quacunq; ratione, & statu scientia ac doctrina valeat; cuicunq; vel modicè tincto literis, abundè constat. Hinc Thales apud Laertium lib. i. rogatus: *Quis esset felix?* respondit: *Qui corpore sanus esset, animo eruditus.* Socrates autem cùm interrogaretur: *Quodnam esset pulcherrimum animal?* Homo (inquit) *doctrinâ ornatus.* Hinc Glycon agebat: Doctrinam esse *Sacrum asylum omnium hominum.* Ut non omittam Salomonem, quidnam de Sapientia ac Doctrina abunde senserit? *Præposui* (inquit) *illam Regnis & sedibus, & divitias nihil esse duxi in comparatione illius &c.* E contra de rudibus ac indoctis Cleanthes dicere solitus: *Homines imperitos solâ formâ differre à bestiis:* Aristoteles verò interrogatus:

*Qua*



*Qua re different docti ab indoctis?* responsum reddidit: *Qua vivi à mortuis.* Inde est, quòd præfatus Socrates divitem stultum videns dixerit: *Ecce aureum mancipium:* Item alium: *Hic est equus argento ornatus* Alphonfus etiam Aragoniæ appellavit ejusmodi *vellus aureum.*

Jam quoad rationem virtutis? certè & hîc non modici eadem doctrina ponderis & pretii: ita ut etiam de eodem suo pondere, & pretio eidem virtuti non parum addat, absq; se autem eam quodammodo vilescere faciat.

Proinde Rudem ac indoctam Sanctitatem, non omnino raram in mundo esse, facilè quisq; intelliget, si in promiscuam hominum conditionem, ac in rusticas etiam casas oculum conjecerit. Ubi insigni plurimos cum Isidoro florere Sanctimoniâ, non raro conspiciamus, ita ut inde ipsa etiam sanctissima Religionum instituta, habeant quod erubescant.

Illâ itaq; nobis rarior, illâ excellentior ac pretiosior præ aliis, Sanctitas est quæ docta, quæ scientiâ exculsa: idq; comprobante D. Hieronymo: *Agrestis (inquit) sanctitas, sancta rusticitas, est inferior docta sanctitate.*

Hanc tamen interim duplicem cogitemus. Prima sit: quæ non simplices, & obvios sed excellentissimos quosq; & exquisitos admodum, tum ab ingenio divini amoris petitos magnisq; DEI servis conformes, operandi DEUMq; colendi sectatur modos ac industrias. Altera autem in unione multiplicis doctrinæ ac scientiæ cum virtute consistens.

*Doctrina Sanctitas, id est exquisitis operans Deūq; colens industrias & modestas.*

De Prima eaq; docta sanctitate Sap: 10. *Dedit illi scientiam Sanctorum.* Quæ verò hæc scientia, si non eximiis quibusq; industriis excolita sanctitas. Alia scilicet est scientia Sanctorum à scientia profana, à scientia mundi. Illa curiosè scrutandis rerum naturalium sive ultranaturalium essentiis ac naturis immersa: hæc practicæ rerum divinarum DEIq; ipsius cognitioni & amor, nec non excellentissimo circa hæc operandi modo intenta: eademq; ipsa est, quam nunc oculis exhibemus, docta nec ideo vulgaris sanctitas.

De hac Eccl: 44. *Sapientiam Sanctorum narrent populi, & laudem eorum annuntiet Ecclesia.* De Sapientia videlicet profana, imò de rudi etiam Sanctimonia non est tantopere quod orbis & populi loquantur, quod deprædicent,

dicent, quod laudibus efferant. Sola Sapientior sanctitas, & Sapientia Sanctorum (utpotè aliquid non obvium nec vulgare) digna non ore tantum, cujuscunq; populi, hoc est populari aliquo elogio sed ipsius Ecclesiæ encomiis, & laudibus celebrari.

Non frustra admonet Psaltes: *Psalite DEO nostro, psallite Sapienter.* Non satis nimirum DEO utcunq; psallere, id est, ejus sese laudi & glorificationi impendere. Sapienter omnino psallendum est. Cum enim idem DEUS, non tantum omni sanctitate, sed infinita etiam Sapientiâ polleat; ideo à nobis quoq; non rudem sibi glorificationem & obsequium vult exhiberi ac impendi.

*DEVS* (inquit scriptura) *scientiarum Dominus est, & ipsi preparantur cogitationes:* 1. Reg. 2. ac si dixisset: Cum DEUS ac Dominus noster omnis ut ita dicam ruditatis sit experts, imò omnium sit scientiarum Princeps, Dominus & auctor; ideo non rudibus quoq; & obviis sed præparatis eximiè, præmeditatis elaboratisq; admodum cogitationibus ac industriis colendus est.

Hinc illud in Evangelio: *Diliges Dominum*



*minum DEVM tuum ex toto corde tuo, ex tota anima tua, ex omnibus viribus tuis, ex tota mente tua.* Verum quid dilectioni ad intellectum ad mentem? Mens quippe seu intellectus cogitationum conceptuum cognitionum non amoris potentia est. Quod enim *ex toto corde* DEUS jubeatur diligere, inde est, quod cor defacto sit amoris sedes & officina. Quisquis diligitur, corde diligendus est: alioquin non is amor foret, sed hypocrysis execranda. Quod etiam *ex tota anima*? Cum enim similitudo sit fundamentum amoris, & anima singularius similitudinem ac imaginem DEI referat; quid convenientius, quam ab eadem DEUM ut par est diligere: ultra hoc quod illa mirabili admodum metempsychosi feratur, & transferatur quodammodo in amatum: juxta illud: *Anima ibi magis est ubi amat, quam ubi animat.* Nec etiam immerito, omnes vires huic amoris jubentur impendi. Tum quod amor fortis ac robustus sit, omniumq; adversorum victor: tum quod totis viribus totoq; conatu ille congruentissimè sit amandus, qui se totum nostro amoris impendit. Jam quid mens quid intellectus ad eandem dilectionem juris habet? Nisi quod

quod DEUS noster non corde tantum, aut cæca voluntate, nec rudibus animæ potentiis, brutisq; viribus, sed mente etiam ac intellectu, hoc est: doctè sapienter, scientificè velit diligi. Et hæc potissima non infima nec vulgaris dilectio & sanctitas est: ita ut S. Bernardus affirmaverit: *Ars artium est, ars amoris DEI.* Hac arte celeberrimi quiq; ascetæ & Sanctissimi DEI servi claruere, illamq; posthumis tradidere libellis, hac ipsa insignem coelo retulere gloriam præmiūq;.

Jam quod ad unionem & vinculum doctrinæ cum virtute? huc illud pertinet Propheticum Isa: 24.: *In doctrinis glorificate Dominum.* Nempè nostræ doctrinæ ac scientiæ non ad nostram tantū gloriam, sed ad divini etiā nominis cultum per conjunctionem cum virtute dirigendæ. Tum quod ex rudiori Sanctimonia modica sanè DEI glorificatio, aut pæne nulla proveniat. Quodsi doctrina in unionem sanctitatis venerit; insignem profectò eidem DEO glorificationem conferat necesse.

Hinc apud Ezechielem non alteri cuiuspiam currus gloriæ divinæ, quam quatuor animalibus, hoc est Cherubinis spiritibus singulari

N n

non

*Unio Sancti-  
tatis cum do-  
ctrina.*

non tantum sanctitate, sed & scientia pollentibus sub æthera usq; committitur devehendus.

Imò ipse etiam DEUS non alibi sublimem thronum sibi met defigit, quam super Cherubim, juxta illud Psalmi: *Qui sedes super Cherubim*. Quasi defacto doctrinâ ac scientiâ Cherubicâ veluti throno sursum eleveatur.

Nisi quod etiam in Apocal: non alteri cuiquam post DEUM thronus defertur quàm agno: *Uidi: Ecce in medio throni agnum*. Agno inquam cui acclamatum: *Dignus est agnus accipere virtutem, & divinitatem, & sapientiam, & honorem, & gloriam*. Agno præterea ultra quem nemo poterat mysteriosam illum aperire librum: Ubi quis non videat quantum hîc virtus cum doctrina evaserit honorata, quantaq; eo loco harum inter se, tum inter ipsam etiam divinitatem, ipsumq; divinum thronum, atq; sic amplissimum honorem & gloriam intercedat conjunctio.

Nè verò Sapientissimus ac scientissimus Salomon hic etiam suâ operâ deesset: Et ipse 3. Regum: 29. *Fecit Cherubim & palmas quasi prominentes de pariete*: Ad quod S. Bruno: *Cherubim ad scientiam (id est pertinent) pal-*

*me*



*ma ad victoriam.* Ubi quis non advertat unionem scientiæ cum virtute ; cujus potissima pars victoria sui.

Quamquam non aliud Aaronici etiam amictus perquam excellens ornamentum esse DEUS voluit quam unionem doctrinæ cum sanctitate. Ideoq; Sacro illi supremi Antistitis pectori *Rationale Judicii* induit, & in hoc ipso *doctrinam ac veritatem* appendit, ut utraq; ibidem arctè socians, idem pectus sacrarium utiq; virtutis, etiam rationali judicii ac doctrinâ adornaret.

Exod. 28.

Quale verò ibi capitis etiam insigne ? *Facies* ( inquit DEUS ad Moysen ) *laminam de auro purissimo, & sculpes in ea sanctum Dominum, eritq; imminens fronti Pontificis.* Sed quid sancto, quid sanctitati cum capite cum fronte ? Cur id potius non pectori appensum ? Nisi quod nullibi pulchrius sublimiusq; sanctitas insideat quam capiti quam fronti. Plebeia virtus, satis est cordi vel manibus aut cuicunq; alteri inhæreat, intra pectus lateat. Aaronica, sacerdotalis, Pontificia, ac Princeps Sanctitas caput & frontem, sapientiæ scilicet domicilium occupet, non aliter magis conspicua & sublimis.

Exod. 28.

Et id planè est cur Divinissimus etiam spiritus cum Sanctissimis suis Charismatibus, non alio sese quàm super capita Apostolorum demiserit, ut eo ipso forsan edoceret, strictissimam omnino cujuscunq; sanctitatis cum capite & doctrina unionem servandam esse: & quidem ita, ut ab hac omnis Sanctimonix structura, quam idem S. Spiritus pro tunc in cordibus eorundem Apostolorum ædificaturus erat, ornamentum ac splendorem derivet, Doctrina ab illa firmitatem & robur. Uti id ipsum Divus Indiarum Apostolus lib. 3. Epist. 4. docuit ac expressit: *Nisi (inquit) literis literatisve Domini Spiritus inhabitans præsit, litera paulo plus detrimenti afferent quam commodi.*

**Prov: 9.** Et certè sapientia est, quæ sublimem virtutis & Sanctimonix arcem erigit: Misit (inquit Salomon) misit inquam Sapientia ancillas ut vocarent ad arcem. Hac tamen arce ipsamet Sapientia le turatur. Cujus ipsius arcis neglectu quia Laborarunt Judæi, ideo ex ipsis etiam divinis literis earumq; scientia plus nocumenti quam emolumenti retulere iuxta D. August: Serm. 2. de Epiphani: *Quid aliud hic significavit divina Providentia, nisi apud Judæos*

*Judeos solas divinas literas remansuras, quibus gentes instruerentur, illi excacarentur.*

Nec aliud Zachar: 4. adumbratum, ubi se Propheta eam visionem habuisse testatur: *Vidi ecce candelabrum aureum totum, & lampas ejus super caput ipsius.* Et certè illustre hic unionis doctrinæ cum virtute documentum. Quid enim candelabrum aureum quàm eximix Sanctitatis, quid lampas super caput quàm excellentis doctrinæ, & scientiæ Symbolum. Quod nempe candelabrum sine lampade, idem virtus sine scientia: quantumve, candelabro à lampade luminis, tantum virtuti à scientia ornamentum, & splendoris. Utiq, enim de sapientia & doctrina Salomon Sap. 7. *Proposui pro luce habere illam; quoniam inextinguibile est lumen ejus.* Et vice versa quantum sustentamenti lampadi seu lucernæ à candelabro, tantum scientiæ firmitatis & soliditatis à virtute.

Quid verò Rex Balthasar ad Danielelem? *Audiui de te quoniam spiritum deorum habeas, & scientia, intelligentia, ac sapientia, ampliores inventæ sunt in te Dan: 5.* Ubi patenter utrumquè in eodem Daniele scilicet spiritus deorum



diis utiq; agnata virtus, & probitas cum sapientia & scientia gloriosissime componitur, ad ipsius Danielicæ Sanctimonix decus eximium ac splendorem. Quanquam ipsamet etiam Sapientia Prover: 8. de hac ipsa sui cum virtute unionis gloriatur: *Mecum inquit sunt divitiæ & iustitia: In viis iustitiæ ambulo. Arrogantiam & superbiam & viam pravam & os bilingue detestor.*

Jam de quo illud scripturæ? *Qui domini: 12. Et fuerint fulgebunt quasi splendor firmamenti & qui erudiunt multos ad iustitiam quasi stellæ in perpetuas æternitates.* Cum è contra in Evangelio fatuarum virginum intaminatæ licet virginitatis virtus, quod accensis lampadibus hoc est doctrinæ luce caruerit, adeo nihili æstimata; ut inter mediæ noctis tenebras relicta, à patria luminum meruerit excludi.

*Hæc ipsa unio  
curatoribus  
salutis an-  
marum per-  
quam neces-  
saria.*

Neq; dicamus rudes ac indoctos Apostolos ad prædicandum Christi Evangelium, ad orbis conversionem, ad tot & tanta pro DEI gloria & animarum salute patranda delectos. Hi enim non prius ad eam prædicationem dimissi, quam à S. Spiritu omnibus sanctitatis ac scientiæ donis repleti. Unde illis dictum:

**Sedete**

*Sedete quoadusq; induamini virtute ex alto. Ita ut etiam omnium tunc linguarum notitiā instructi apparuerint.*

Hinc illud etiam, quod Angelus Apocalyptricus Divo Joanni nescio cujus reconditæ admodum cælestis eruditionis ac doctrinæ librum porrigens: *Accipe* (inquit) *et devora librum, tum* illico subinferens: *Oportet te Prophetare gentibus, et populis, et linguis, et regibus multis.* Proindeq; eo ipso edocens, quanta sit ad conversionem etiam & salutem animarum scientiæ necessitas. Et quidem ut non sit satis eandem primis ut ajunt degustare labris: insuper quasi de integro absorbenda ac devoranda omnino: ita ut velut cibus, quodammodo in substantiam alit̃ transeat. Utiq; nec Propheta Jerem: i. injunctam sibi prædicationem ob inscitiam suscipere ausus inquit: *a a a Domine DEVS ecce nescio loqui: Neq; Prover: i. cuiquam alteri quàm sapientiæ, onus Prædicationis delatum: Sapientia foris prædicat &c.*

Et hæc defacto doctrinæ cum virtute unio: hæc inquam rudem alioquin orbem eruditivum ac illuminavit ad fidem ac iustitiam, hæc

erro-

errorum gentilium tenebras profligavit, hæreses & schismata subegit, tot SS. Doctoribus lauream in coelo doctorem contulit. Hac unione Præclarissimi tot Religionum inclaruere Fundatores, hanc à se fundatis iisdem Religionibus velut pretiosis inseruere annulis vel coronis, ab hac tot celebratissima universo orbe in tot cætibus Religiosis prodire Sanctimonix & Doctrinx numina: hac tandem nostri etiam Primævi Patres pretiosi & fortes totq; hostium & aduersorum extitere victores: hac DEI gloriam provexere in immensum, hac nobis posteris præluxere ad imitationem, ad exemplum, req; ipsa demonstrarunt, nimis pestiferum Licinii effatum literas appellantis *pestem Reipublicæ*: Tum & illam nimis vanam Neronis complorationem: *Vtinam* inquebat ille *Literas non nossem*! Cùm defacto nostri Præduces id palam ostenderint, quod in scientia, in literis, eluceat nitor ac splendor Sanctimonix, vigor virtutis, robur Ecclesiæ, vita orbis.





## ADHORTATIO XIII.

*Excellentia Sanctimonie ab umbra seu occulto  
operandi modo.*

**S**I quo, certè Sanctitate nihil illustrius: ita  
ut hæc non quoscunq; splendores sed  
illustrissimos quoq; Regum titulos non tantum  
exæquet sed etiam longè superet. Hinc unus  
sanctitatis titulus, supra omnes alios in summo  
Ecclesiæ capite tantum eminet, ut idem ipse  
orbem totum Christianum collustrare videatur.  
Nec immerito Divus Joannes Baptista insignio-  
ri præ aliis sanctitate conspicuus, non aliunde  
quàm à luce nomen obtinuit: *Erat lucerna  
ardens & lucens.* Imò quotquot virtutis glo-  
rià effulgent, eo ipso in Soles vel stellas scripturæ  
testimonio degeneraturi sunt, Et sic defacto  
nos etiam tot inter splendores nostræ rationem  
sanctitatis hætenus exhibuimus, ac nuper quoq;  
non parum illi à doctrina lucis accendimus.  
Quis tamen inter hæc crederet umbram sancti-  
tati amicam? & ita quidem ut ab hac ipsa sui  
splendoris augmentum capiat. Cum defacto  
illa nobis præsentis materia dictionis futura sit:

Q O

quòd

quodd nostra sanctitas non parum excellentiæ derivet ab umbra hoc est occulto operandi modo.

Quod proceræ moles, majoraq; lumina umbram suam habeant, non ignotum est. Sic magni montes turresq; aut arbores, sic ipse Sol non sine umbra. Sic olim Rhodius Colossus, ad milliare usq; eandem jaciebat. Imò quo major in terris proceritas, eo majorem umbram extendere consuevit.

Verum quisnam illud profiteri auderet, siue moles siue splendores quoscunq; ab umbra crescere? Illud ego ipsum inpræsens affirmo, dum excellentiam Sanctimonix, ab occulto operandi modo suum capere augmentum evinco.

Apocal: primo: Celebris ille vir, qui se Divo Joanni videndum præbuit: *Facies ejus sicut Sol, Oculi ejus tanquam flamma ignis, Habebat in dextera stellas septem.* Ubi quis illum non illustrissimum tantum, sed etiam serenissimum crederet, qui non igne solum aut stellis, sed sole quoq; toto inclaruit. Sed fuitne inter hos tantosq; splendores aliquis umbræ locus? Quid dico unius umbræ? Cum genuinam hîc umbrarum sedem liceat cogitare. Si

quis

quis enim inprimis adultam luce meridiem vellet exprimere, quid aliud quàm solem medio coelo prospectantem depingeret. Jam si quis nocti etiam umbrarum fecundissimæ parenti, penicillum admoveret; an non innumera stellarum agmina in imaginem transferret? Dum igitur utrumq; , solem videlicet & stellas in eo viro Apocalyptico secum conferimus: an non in illo diem simul noctemq; umbrosissimam velut in unum subjectum collectam conspiciamus: & quidem ita ut non tantum umbra tantæ luci non obfuerit; sed imò, ut quotidiano experimento novimus, eandem intenderit magis. Cùm in ipsa etiam imagine sereneiores colores à vicinia umbræ videantur inclarescere. Sic Angelus Apocalypticus præter solem quoq; in facie, *amictus nube, Iris in capite ejus*: Ubi an Iridi etiam nubis offecit affinitas? Non enim hæc pulchræ filia lucis, ita soli opposito suas cunas debet; ut nubibus etiam, licet alias subobscuris, sui splendoris non debeat proventum. Et ita se omnino tum Angelus hic, tum vir ille mundo spectabilem præbuit, eò insignior, quò pulchrius, admodum mirabiliter utraq; , lucem videlicet umbramq;

Apocal. 10.



intra se colligens, vivam sanctitatis ab occulto operandi modo inclarescenscentis imaginem expressit.

Apocal: 12.

Quamquam non alia illius etiam non minus celebris mulieris Apocalyptricæ facies: *Amicta sole, luna sub pedibus ejus, in capite corona stellarum duodecim*: Ubi pariter genuinam diei noctisq; effigiem, aut eximium splendorem & insignem umbram juncta connubio quis non agnoscat? neq; sic eam mulierem aut decrevisse tantillum, aut fulsisse minus. Dum enim ita intra se prædicta congerit, & diem suam intra noctem condit; in oculis divinissimi Joannis grandescit adeò, ut è summo etiam coelo, ubi primæ alioquin magnitudinis sidera spectatoribus terrigenis in minimas decrescunt faculas & igniculos, magni adinstar signi eximio fætu turgida sese spectandam offerat: *Vidi signum magnum* &c. Atq; etiam usq; ad invisi- diam tertiam partem stellarum caudâ trahentis draconis luceat. Illustri vel hinc documento: Religiosam Sanctitatem suâ umbrâ non tantum non obscurari vel minimum; sed inò magis conspicuam reddi. Ita ut hic etiam illud merito accommodari possit quod de se Psaltes: *Nox illuminatio mea.* Neq;

Neq; frustra Salomonica Sponsa Cant: 2.  
 sese ad umbram confert: *Sub umbra* (inquit)  
*illius quem desideraveram sedi.* Vix enim eo  
 se contulit, ecce illico quantis refulsit splendo-  
 ribus: *Quæ est* (inquit) *ista quæ progreditur*  
*quasi aurora, pulchra ut luna, electa ut sol.*  
 Nè vero sola hic luce dieq; videatur esse specta-  
 bilis, consulto lunam noctis inquilinam, au-  
 roramq; ejus sociam advocat; quasi parum es-  
 set à sole ornamentum mutuare, nisi etiam in  
 partem hujus ipsius nox veniat & umbra.

Hinc est quod summus quoq; rerum  
 arbiter non aliter primam mundi diem voluit  
 clarescere, quam vespere & mane in unum col-  
 latis. *Vespere* (inquit) *& mane dies unus.*  
 Ut omittam eundem ipsum supremum rerum  
 omnium auctorem, quasi sua luce quam inha-  
 bitat non contentum, umbram sibi adscicere:  
 idq; sive à nubibus, & caligine quibus undiq;  
 stipatur, sive ab alis Seraphim quibus tegitur:  
*Dominus*, (inquit Psaltes) *regnavit, nubes &*  
*caligo in circuitu.* Tum Propheta: Duabus  
 inquit *alis velabant faciem, duabus pedes eius.*  
 Et ecce tamen hic regâ simul tanto splendidias  
 illum dignitate fulgêre: *Dominus regnavit:*

Sublimiori folio honorari : *Vidi Dominum* ( inquit ibidem Sacer Vates ) *sedentem super solium excelsum & elevatum.* Nec ideo alias etiam Cunas idem ipse Dominus sui ab æterno Unigeniti esse voluit : *In splendoribus* ( inquit ) *ante Luciferum genui te.* Ac si non satis esset in splendoribus illum nasci , nisi ante Luciferum , hoc est quasi obstetricante , diei prodroma dictosq; splendores quasi intendente nocte ederetur. Hæc autem eo spectant omnia , ut inde palam sit , occultiore quoq; operandi modo non inumbrari , sed illustrari sanctitatem , sublimemq; magis magisq; attolli : Juxta illud quod universim Pœta : *Qui totus potuit latere major habetur.* Qualis ille Cato de quo Historicus : *Homo virtuti simillimus, & per omnia ingenio dius quam hominibus propior : Qui nunquam recte fecit ut facere videretur.* Quasi inde gloriam & lucem colligens , ubi se in noctem & umbram , ut oculos lateret , profundius abdebat. Ac si plane hîc locum haberet , quod de quopiam : *Nunquam tam celebris latuisset erat : Quanquam & ipse se sua Titus prohibet videri luce.*



Ita hic omnino sicut de Messia Psaltes:

*Qui ascendit super occasum*: Ubi non oriens nec meridies, sed umbrosus occidens ascensum splendoremq; confert: qui alioquin noctem mundo inferens, solem ipsum usq; ad antipodas præcipitat.

Et certè sicut plerosq; ipsa lux & apri- cum quandoq; inumbrat, ut olim illum de quo Elogiastes: *Clarior futurus si fuisset obscurior*: ita non paucos feliciori longè successu nox & umbra in lucem & gloriam protrudit: quod de Bruti Cassiq; imaginibus Historicus: *Brutus* (inquit) & *Cassius magis conspicui, quia non visabantur*. De Carolo autem s'to quispiam: *Major* (inquit) *in Eremo quàm in Imperio*. Jam Divus Hieronýmus, *Virtus publicum timet, de suo latibulo gloriosius scintillat*.

Quod si verò aliis, ipsisq; gentilibus tantifuerat vitæ occultioris umbra: quantis hæc orō induit splendoribus religiosos sanctitatis sectatores: inter quos Divinissimus Benedictus, de quo S. Gregorius lib. 2. Dialog: *Solus in superni spectatoris oculis habitavit secum*. Nec tamen solus ex quo inter tot luminum & gloriæ satellitia. Sic ille de quo in sua extasi S. Magda-

Magdalena de Pazzis proclamaverat : *O quam tam gloriam habet Aloysius, quia intus operabatur.* Intus inquam non extra, ubi illum lux & oculus inveniret, quem etsi fugeret, non effugit, sed imò ampliavit gloriam. Uti de quatuor Propheticiis animalibus de quibus illud : *Manus eorum sub pennis.* Quas dum sic cum suis eximiis operibus velut in umbra condunt, eo pulchrius *in similitudinem fulguris coruscantis* resplendent.

Ezechiel: 17.

Planè hîc adinstar illius Propheticae Aquilæ, quæ cum extra *plena plumis & varietate* esset, ad solitudinem & umbram Libani sese contulit, ut non corticem, sed *medullam Cedri*, id est intimioris & occultioris Sanctimonæ Symbolum tolleret: illos egregiè exprimens, qui simili sanctitate, & umbra delectantur illoq; sese Principioregunt : *Satis publicus est, quem Cœlum videt.* Aut effato stoici : *Tu-  
tior est in secreto virtus.*

Apocal. 12.

Id verò ipsum longè insignius præstitit sole luna stellis conspicua mulier, cui cum *data* essent *ala duæ* non cujuscunq; avis, sed *aquila* & quidem *magnæ* ? non illis evolavit sub solem : sed potius ad hoc eisdem usa, ut velut  
lucis

Lucis pertaxa è coeli consistentia se transferret  
 in desertum, & solitudinem. Ut vel hinc edi-  
 ficas, nihil excellentius, quam dum lucēs in-  
 gniter, talentisq; eximiis velut alis majoris  
 aquilæ sub solem attolleris, tantæ luci umbram  
 & angulum quærere, alisq; iisdem non ad vo-  
 landum, sed ad latendum uti, non sub sidera  
 in lucem, sed in obscurum latibulum deferri.  
 Uti & illi Reges Consulesq; ad quorum sortem  
 aspirans Job illud ex voto prolocutus: *Vtinam*  
*dormirem & somno meo requiescerem cum Re-*  
*gibus & Consulibus terræ, qui sibi adificant so-*  
*litudines:* in quibus suos splendores recondant.  
 Invidenda etiam Job sanctissimo sorte simulq;  
 veritatem oraculi nostri Præpositi Generalis  
 Joan: Pauli Oliva comprobante: *Principes*  
*(inquit) animæ splendoribus solitudinem quæ-*  
*runt:* An non tamen simul in solem incidunt?

Ut non omittam illum de quo Plaltes: *Psal: 17.*  
*Ascendit (inquit) super Cherubim, volavit*  
*super pennas ventorum.* Audi verò quid se-  
 quitur: *Posuit tenebras latibulum suum.* Nem-  
 pe pulchrum est, sic etiam suos splendores con-  
 dere. Quo tamen id exitu? ecce additur:  
*Præ fulgore in conspectu ejus nubes transierunt.*



Intendi videlicet lucem umbrā non adimi. Ut  
in sole contingit, qui dum *intrepidus* ( loquor  
cum Zenone Veronensi) *intra noctis cognata  
sepulchrum*, se condit; eo pulchrior ac nitidior  
ad posteræ diei exortum velut in Erythræo lorus  
emergit. Quanquam id etiam fuit quod suis  
aliquando splendoribus veluti saccum cilicinum  
induerit: *Factus sicut saccus cilicinus*. Apocal:  
Ubi tamen illi idem inscribi potuit, quod sub  
nube latenti: *Lateo non minuor*. Seu, *Clarior  
post nubila*.

Nec vero fundamentis cælestis Jeroso-  
lymæ in Apocalypsi à Joanne descriptæ, intra  
profundum more solito sepultis quidquam ea  
ipsa sepultura obfuit: cum & sic insignissimo-  
rum lapidum ornatu fulserint: *Fundamenta  
muri Civitatis omni lapide pretioso ornata*. Et  
ita dum amant pretiosa latere, eō magis pre-  
tiosa sunt; ita ut latendo, in Jaspides, Saphiros,  
Chalcedonios, Smaragdos degenerent.

Quod ipsum de amicis DEI Psaltes:  
*Nimis honorati sunt amici tui DEVS*: alii le-  
gunt *absconditi*, *nimis rari*, *nimis pretiosi*: Ac-  
si honorem, raritatem, pretium commodarent ab  
umbra. Evidenti hujus ipsius quod initio  
pro-

proposuimus documento : nempe non aliunde pulchrius sanctimoniam , quam ab umbra seu occultiore operandi modo inclarescere.

## ADHORTATIO XIV.

*Sublimis Sanctitas quæ multum laboriosa.*

**E**Ximiam satis hætenus sublimemq; admodum , usq; ad fastigium eduximus Sanctimoniam. Providimus eidem , etiam à doctrina culturam & ornatum. Interim tamen adhuc non omnino integram & ceu mutilam ac mancā , si docta sit tantum , & non laboriosa , cogitemus. Ut igitur omnibus numeris maneat absoluta , & velut membris omnibus integra , manus ei easq; multum operosas affingamus. Ea nempe meo sensu excellens sanctitas , quæ multum laboriosa , otiosa nequaquam.

Quocunq; vocabulo Religiosam vitam exornaverimus ; semper labori obnoxiam , ab otio comperiemus alienam. Proclamemus illam terram promissionis. An non etiam ibi laborum pugnarumq; campus ? Vocemus Paradisum terrestrem. An non etiam ibidem ,

Primus homo Adam otii & non laboris gratia  
 à DEO collocatus? *Posuit* (inquit Sacer textus)  
*DEVS hominem in Paradiso ut operaretur.* No-  
 minemus Regnum quoddam Divini Servitii :  
*Servire namq; DEO, regnare est.* An non in  
 Regno quoq; parva laborum sudorumq; seges?  
 Hinc Plinius cum inquisivisset causam, cur pri-  
 mis seculis tanta telluris fecunditas frugumq;  
 ubertas fuerit : id responsi adnexuit : *Tanta*  
*causa ubertatis erat, quod ipsorum tunc mani-*  
*bus Imperatorum colebantur agri, gaudente*  
*terra vomere laureato & aratore triumphali.*  
 De Rege quoq; Deiotaro Cicero : *Non solum*  
*Tetrarcha nobilis, sed optimus Paterfamilias &*  
*diligentissimus agricola & pecuarius habebatur.*  
 Alexandri verò apud Plutarchum vox erat : *Ni-*  
*hil magis regium esse quam laborare.* Annu-  
 meremus insuper vitam Religiosam vitæ Ange-  
 licæ. An non Angelis quoq; labor ingenuus  
 & non otium? Administratorii utiq; spiritus  
 sunt, ad ministeria non Creatoris tantum, sed  
 ipsarum quoq; creaturarum, deputati. Dica-  
 mus tandem Religionem Divinorem quandam  
 vitam. An non de DEO ipso illud Christi :  
*Pater meus Agricola operatur usq; modo.*

Neq;



Necq; vero ullus de sublimiore sibi blanditur Sanctimonia; si laboris expers inerti otio indulgeat.

Cherubicos spiritus eosq; pennatos Propheta aspexit, sed non sine manibus: *Manus* ( inquit ) *hominis, sub pennis eorum.* Ac si nec evolare in sublime liceret absq; manuum, id est operationis laborisq; adminiculo. Sic Ladislaus Rex Bohemiæ pro Symbolo depinxerat columnæ diadema impositum, ad quod homo alatus eluctabatur capeffendum, cum Lemmate: *Vel sic enitar:* Nec enim ad excellentioris etiam virtutis fastigium expeditior evolandi modus, quàm vitæ laboriosæ suffragio? Quamquam mihi credite nolle me viros Religiosos esse alatos nonnisi, ut solummodo volent nec manus habeant ad operandum. Aut illis Angelis non absimiles, qui solo capite & facie tenus, alati pinguntur, ita ut ne unguis quidem digiti ex alarum tegmine appareat. Noluit quispiam: *Se cum illis rem velle habere, qui plus saperent palato, quam corde.* Corde inquam ad operandum resolutio ac strenuo. Cui verò arrideat otiosa, soloq; capite ac ore, aut solis alis pollens Sanctimonia? Nisi forte illi mu-

*Laboriosa  
Sanctitas.  
Ezechiel: 10.*

scæ, cujus Nomine S. Franciscus Affisias otio deditos appellabat: quæ cum in sapidissima fercula involet, delicatissimos delibet liquores, nihil præterea laborat unquam. Aut etiam illis fucis, de quibus nonnemo: *Eam infortunatam asserens Rempub: in qua quod apes elaborant. fuci idem devorant*. Devorant inquam omnem gloriam & famam per alios partam.

Si vera excellensq; nec mediocris virtus est: vigiliis, laboribus, sudoribusq; nutriri, propagari, conservari debet. Imò hoc ipsum talis, id est sublimis Sanctimonix nota & Character est: *Altitudo* ( inquit Plaltes ) *manus suas levavit*. Si enim remissis manibus sit, Altitudo non est. Ex quo Saul humero laborum onerumq; capaci supra omnem populum eminuit, eo ipso à Samuele *nulli similis* proclamatus.

Issachar quoq; dum in benedictione paterna non segnis sed *fortis*, id est: oneribus laboribusq; innutritus, *asinus* nominatur, diciturq; *Supposuisse humerum ad portandum*, simul enuntiatur *accubuisse inter terminos, terraq; optima* particeps evasisse. Nec verò quisquam alius speret se intra sublimioris terminos

minos constitutum Sanctimoniam, fortisq; eximiam  
 futurum compotem, ni pari studio vitæ labo-  
 riosæ insuescat. Cum etiam de Justo illud  
 Sapient: 10. quod *DEVS honestaverit illum in  
 laboribus & compleverit labores illius*: comple-  
 verit inquam non alio, quàm eximio præmio,  
 gloria, & donis suis: honestaverit autem, hoc est:  
 honoratum reddiderit coram Deo & hominibus.  
 Utiq; etiam apud Pœtam non aliud Herculem,  
 quàm *duri celebrant labores*, &c. Idemq; etiam  
*pretium rursus ultimi cœlum meruit laboris.*

Rēgnū quoq; ipsum unde oro Jose-  
 pho Patriarchæ à Patre Jacobo imputatum? *Genes: 37.*  
*Numquid Rex noster eris?* Si non à manipulis,  
 quos ligare, circaq; illos suam operam & labo-  
 rem impendere sibi videbatur. *Putabam* (in-  
 quit) *nos ligare manipulos in agro*: Hinc ve-  
 rò etiam eo usq; dignitatis processit, ut eum  
 sol & luna & stellæ adorarent. Nec alia Jacobi  
 Patriarchæ Sors, qui certè non sub aliâ allego-  
 ria cumulum summumq; benedictionis pater-  
 næ obtinuit, quàm sub allegoria multis labori-  
 bus exculti agri: *Ecce odor filii mei sicut odor  
 agri pleni.* Et hinc ultra tot privilegia, totq;  
 fortunæ in Jacobum congestæ. Ut vel inde  
 quisq;



quisq; Religiosus intelligat, se non aliter Regnum virtutis occupaturum, ipsaq; etiam sidera ac cælestes planetas, donorum & Sanctimonix superaturum splendore, quàm si laboriosis negotiis prius inclarescat.

Non aliud forsitan Propheticum inter 4 animalia bovem currui gloriæ DEI admovit, non aliud Cherubicis spiritibus annumeravit, & homini, leoni, aquilæ æquari fecit, non aliud ad evolandum in sublime sex alas addidit, non aliud ad thronum usq; DEI (uti in Apocal: legimus) extulit, quàm ipsa natura labori assueta.

Unde etiam throno Salomonico ex utraq; ejusdem parte adjunctæ manus: *Dux manus hinc & inde tenentes sedile.* Insuper *duo Leones juxta manus singulas.* Idq; pro documento: heroicè laboriosis manibus quas nulli labores & onera terreant, ipsisq; heroicis invictisq; laboribus, uti quemcunq; thronum, ita etiam sublimioris principatum Sanctimonix parari, custodiri, conservari teneriq; Nec immerito apud Ægyptios teste Sabellico is eligendi Regis mos erat, ut post prævias ejus interrogationes: *Essetne Pius? essetne justus? essetne*

*essetne liberalis?* Hæc tandem sequeretur & concluderet: *Essetne laboriosus?* Ac si parum videretur esse liberalem iustum pium. Apud Peruanos vero is in Regem eligebatur, qui ex cumulo lignorum, grandissimum suis humeris in palatium deportaret.

Nec aliunde certè magnorum meritorum ac præmii prouentus. Quis enim apud Psaltem onustos messe manipulos coelo intulit? *Venientes autem venient portantes, manipulos suos.* Si non illi qui laboriosè excultæ telluri grana inferentes, eam sudoribus simul & lacrymis prius irrigarunt: *Euntes ibant & flebant mittentes semina sua.* Plane hic locum habet quod Prov: 10. Salomon: *Egestatem operata est manus remissa, manus autem fortium divitias parat:* Et has non terrenas tantum sed etiam cælestes ac æternas.

Sat bene non nemo exhibenti sibi cuiuspiam sua clenodia annulos torques lapides pretiosos, gemmas, reposuit, dixitq; se duos non nisi habere simplices lapides, qui sibi unum & alterum mille in annum conferrent, adeoq; pluris illos, quàm has & tantas opes se æstimare. Et cum hæc diceret, duos lapides molares, tot

Qq

proven-

proventuum obstetricante labore progenitores indigitavit. Ut vel inde pateat: nescio quæ virtutum insignia nihil aut saltem parvi esse ad gratiarum proventum præmiumq; æternum sibi & proximis comparandum absq; laboris impendio. Ita Proverb: 14. *Vbi plurimæ segetes, ibi manifesta est fortitudo bovis.* Ita S. Franciscus Xavierius lib. 5. Epist: 3. edixit: *Vnusquisq; (inquit) laboribus maxime spectatus erit, ita plurimum sibi & aliis proderit.*

*Labor sine  
cessatione &  
quiete.*

Verum quisnam in laboriosa vita obeunda servandus modus? Certè non alius quam qui omnem cessationem omnem quietem proscribat. Qualis ille de quo eiusq; operosa admodum manu in Apocal: *Habebat in dextera sua stellas septem* hoc est principales Planetas, quorum irrequietus absq; ulla cessatione cursus & labor. Uti Soli irrequietè pariter suam Sphæram obeunti inscriptum: *Nec charo requies cælo.*

*Genes: 31.*

Non aliter pro Rachele Jacob laborabat desudabatq;. *Die (inquit ipsemet ad Laban) noctuq; æstu urebar & gelu, fugiebatq; somnus ab oculis meis: sicq; per viginti annos in domo tua servivi tibi.* Et si ille tantum pro pulchri-



pulchritudine evanida sustinuit; an non plus pro pulchritudine virtutis semper duratura desudandum?

Cherubicorum illud in Apocalypsi Spirituum: quòd die & noctu in decantanda DEI gloria *non habuissent requiem*: Et quis vero in vita Religiosa, promovendæ gloriæ divinæ cultor quietem à laboribus quæreret?

Quod de se David in Psalmo: *Anima mea in manibus meis semper*: Hoc quicunq; de semet ipso Religiosus. Unde enim patet animam in manibus esse? & quidem continuo & *semper*? si non ab exercitio operationum & laborum iisdem manibus convenientium eoq; pariter assiduo. Uti in oculis existentis animæ non aliud potius documentum ac indicium, quàm exercitium actuum illis debitorum, & connaturalium, nempe visionum. Sic in capite, corde, pedibus &c. Proinde otiosæ manus, planè acsi absq; anima essent.

De rerum omnium Satore Liber Gene-  
seos quod *requieverit ab universo opere quod* *Genese*  
*patrarat*: scilicet tunc primùm quieti indul-  
serit, postquam omne opus absolvisset, nec  
habuisset ultra quod ageret. Ecquod verò in-

super istud otium & quies? Audiamus id ipsum; quod iam prius ex ore Christi innuimus: *Pater meus Agricola, operatur usq; modo.* An non id priori Geneseos textui contradictorium? *Requievit, operatur?* Nisi quod DEO optimo maximo ipse circa nostri conservationem quæ actione creativâ non minor est, susceptus labor, quies sit amplissima: ut vel hoc ipsum quisq; pro otio, pro quiete, pro deliciis reputet, si pro DEI gloria quàm plurimum laboret desudetq; etiam cum virum sanitatis vitæquæ iactura.

Uti quispiam apud Psalterem de se *In laboribus à juventute mea*: Alii legunt: *Exspirans à juventute mea.* Ac si tantus ille labor fuerit qui æquipararetur morti, aut mortem induceret, morte finiretur.

Quamquam non rarò evenit, ut labor etiam generosos animos non tantum non enervet, sed etiâ nutriat & conservet diu incolumes. Ad instar illius retis, quo cùm satis laboratum est, totq; grandes pisces, (uti refert Evangelium) capti sunt, nec tamen scissum apparuit. Uti etiam de suo Trajano Plinius, quod inter immensos labores ita integer vigore omni ac viribus extiterit: *Ut labore refici ac reparari videretur.* Atq;

Atq; hic planè talisq; labor si quos, cer-  
 tè Religiosos quoscunq; ac etiam Societatis ho-  
 mines decet : ad quam dum Patrem Nunnium  
 Beata Virgo vocaret : hoc ipsum illi proposuit :  
*Vis servire filio meo usq; ad defatigationem ?*  
 Quod de Atheniensibus proclamatum erat :  
*Atheniensis etiam moriens manum porrigit :* Sci-  
 licet ad laborandum & pugnandum : hoc idem  
 de Religiosis hominibus : ut nonnisi cum vita  
 à laborando desistant : tuncq; requiem tempore-  
 ralem capiant, cum æternam incipient. Si  
 quorundam Cæsarum vox erat non infrequens :  
*Laboremus, Militemus :* Hæc eadem in no-  
 stro ore semper personare deberet, idq; tamdiu,  
 quamdiu eandem extremo halitu mors non  
 præcludet. Idq; ad instar Gentium Apostoli  
 illud de se proclamantis : *Abundantiùs omnibus*  
*laboravi : laboro usq; ad vincula :* Debuerat  
 addidisse : usq; ad mortem. Sic etiam Dio-  
 genes teste Laertio : qui cuidam admonenti ;  
 ut jam Senex quiesceret à laboribus : *Quid*  
*( inquit ) si in stadio currerem , utrum opor-*  
*teret jam mete vicinum cursum remittere , an*  
*magis intendere ?* Id plane Arrianus hist. lib. 5.  
 Ego ( inquit ) nullum generoso viro laborum



*finem statuo, quàm labores ipsos, qui ad gloriam  
& decus ducunt.*

Monumento Absalonis titulus erat, ab eo ipso dum viveret inditus: *Manus Absalon*: Forte id edocens: usq; ad mortem, usq; ad sepulchrum, seu pugnandum seu laborandum esse, ab operando non desistendum: manus utiq; operationis Symbolum est. Ac inde non alio forsitan nostra quoq; sepulchra exornari fas esset titulo, quàm qui nostrarum manuum ad agonem usq; & tumulum productis operibus personaret. Imò æterna etiam simulq; temporalis, nostra beatitudo non aliunde promanare deberet quàm ex præteritorum solatio laborum: *Labores* (inquit Psaltes) *manuum tuarum manducabis, beatus es.* Uti Hercules aliquando teste Plinio è terra coelos prospectans, illasq; Hydras, serpentes, Leones, aliaq; à se edomita monstra inter Constellationes collocata suspiciens, cum quodam tripudio exclamavit: *Victor è terris meos specto labores.* Non alia præterea nostra quies, quàm in DEO Solo, ad quam nonnisi cum Augustino nobis aspirandum: *Fecisti nos ad te, & inquietum est cor nostrum, donec requiescat in te.*

AD-

## ADHORTATIO XV.

*Sublimitas Sanctimonie totius mundi, omniumq;  
terrenorum: atq; linguarum etiam ac respe-  
ctuum quorumvis contemptrix.*

**P**ostquam Fabricam sublimioris Sanctimo-  
nie ad supremumq; usq; apicem perduximus, atq; ut par erat operosius exornavimus eandem; quid amplius restat, quam in summo ejus constitutis fastigio, totum qua latepatet infra jacentem orbem ex alto despicere, illudq; quod apud Pœtam quispiam, sibi met occinere: *Jam super inferum despecto mundum: jam propinquos usq; licet tetigisse cœlos.* Quid dico despicere? imò contemnere etiam, fastidire, vix etiam oculo dignari; Magni adinstat Pompeii, cujus anima ad sidera usq; perlata: *Postquam se lumine vero implevit Ec. vidit quantâ sub nocte iaceret nostra dies, risuq; sui ludibria trunci,* Risit inquam contemptuq; simul ridenda omnia. Et hoc certè ipsum, quod pro coronide affero, sublimioris sanctimonie est: generoso utiq; contemptu & quasi sanctiore fastu omnia terrena, totum universum, linguas

*P. Ines in  
Lesbiade*

*Lucanus*

linguas etiam ac respectus quoscunq; despiceret, fastidire, calcare, proterere.

Sublimior sanctimonia, uti absq; suo, non est fastigio, ita neq; absq; fastu. Eum tamen non quisquam vitiosum reputer, imò omni dignum encomio ac præmio censeat: qui dum terram terrenaq; proculcat omnia, ipsi coelo se infert, ejusq; possessione rependitur atq; sic pretium facit sanctitatis.

Contemptus  
mundi terrenorumq;  
omnium.

Liceat hujus ipsius fastus ac generosioris terrenorum omnium contemptus pro exemplari illum Apocalypticum de quo Apocal: 10. velut spectatoribus oculis Angelum proponere: *Vidi* (inquit S. Joannes) *Angelum fortem descendantem de coelo, amictum nube, Iris in capite ejus, facies ejus ut Sol, pedes ejus tanquam columnæ ignis, posuit pedem suum dextrum super mare, sinistrum autem super terram, Elevavit manum suam ad coelum. Et planè in hoc Angelo viva contemptus rerum omnium terrenarum imago. Liceat horum contemptorem in illo spectare animum. Terra in primis ex una parte quidquid speciosi, quidquid honorati, quidquid voluptuosi, quidquid plausibilis, quidquid pretiosissimi ac æstimatissimi*

simi



fini habere poterat, totum congeffit & exhibuit; ex altera parte omnes iras, indignationes, contumelias, minas, arma exeruit omnia, omnes movit & produxit machinas. Mare pariter hinc onustas magnis mercibus auroq; divites exposuit onerarias, pretiosam gemmarum effudit grandinem; inde fluctibus intumuit, inhorruit procellis, in insanos furores abiit, horrendis fremitibus ac boatibus insonuit, naufragia, turbines, ac mille mortes comminatum est. Jam nubes quoq; hinc dulce pollicita refrigerium, in gratum ab æstu se extendit umbraculum, optatissimo desudavit rore: inde grandines, fulgura, tonitrua, fulmina egeffit. Quid verò ad hæc Apocalypticus Angelus? Descendit ille de coelo; certè non ut istis moveretur omnibus, ac quocunq; tangeretur respectu, seu blandis adhærendo, seu timendo sæviora; sed ut potius captos ac illaqueatos ejusmodi illecebris, hisce eximeret vinculis, in libertatem filiorum DEI assereret, contemptum terrenorum vel suo persuaderet exemplo, cum & ipse contemneret, calcaret, pedibus protereret universa: Et calcavit defacto, dum *posuit pedem dextrum super mare, sinistrum super terram*: Poterat ille

equidem, quod etiam Angelico convenientius erat spiritui, quasi suspensus hære in aëre, nec pedem in terra mariq; figere: fixit tamen, ut vel sic, terrena calcando, contemptum eorundem testaretur. Hinc etiam *Pedes ejus columnæ ignis*, id est: ex contemptore rerum ac metallorum omnium elemento erectæ. In quo se profecto Angelicum probavit spiritum coeliq; accolam, dum talem ut patuit, terrenorum omnium præsetulit contemptum. Quid enim Angelico ac cælesti spiritui ad terrena, eorumq; amorem & pretium? Vel ideò etiam non qualiscunq;, sed *fortis Angeli* nomen meritò obtinuit. Ubinam enim major elucet fortitudo, quàm ubi pænè succumbunt omnes ambitione, & amore, seu metu & quocunq; respectu. E contra quænam fortitudo illa; finire se capi, irretiri, in servitutem trahi à quibuscunq; terrenis? Ne autem in solis terram & mare calcantibus pedibus hic eluceret contemptus, etiam manibus eum testari voluit: dum dexteram ad coelum usq; levavit: vel hoc ipso demonstrans, quonam oculi, ac respectus, quò mentes, quò corda & affectus dirigendi? En verò ab hoc laudabili fastu, quantum

tum inclaruit hic idem Angelus: cum solis ad-  
 instar toto vultu illuxisset, ac Iridem sumpsis-  
 set pro corona: *Facies ejus sicut Sol, Iris in ca-  
 pite ejus.* Claro admodum documento no-  
 strā quoq; Religiosam non dissimili inclarefcere  
 ratione Sanctimoniam. Eo ipso grandescit illa,  
 ac erigitur sublimius, dum suis adsternit pedi-  
 bus quod calcet. *Parvulus est* (inquit Divus  
 Gregorius) *qui terrena diligit, magnus qui  
 eterna concupiscit.* Jam verò Stoicus: *Non est*  
*(inquit) magnus animus nisi magna despiciens.*  
 Hinc idem eodem titulo Diogenem ipsi Ale-  
 xandro prætulit inquiring: *Supra eum eminere  
 visus, infra quem jacebant omnia.* Ita ut hîc planè  
 locum habeat; quod initio libri de Olympo  
 apposuimus. *Vt altus Olympi Vertex qui spatio  
 ventos hyemesq; relinquit perpetuo, nullum te-  
 meratus nube serenum Celsior exurgit pluvius,  
 auditq; ruentes sub pedibus nimbos, & rauca  
 tonitrua calcet.*

Quod ipsum in agno etiam Apocalyp-  
 tico cernendum est. Quid illi honoratiùs quid  
 plausibiliùs accidere poterat, quàm cùm admo-  
 veretur throno, cùm coronati Seniores in ejus  
 adorationem caderent, cùm totus mundus vo-

Apocal: 5

R 12

calibus



calibus admodum in ejus gratiam acclamationibus ac elogiis personaret: *Dignus est agnus accipere virtutem & divinitatem & Sapientiam, & fortitudinem & honorem & gloriam.* Quæ verò ad tanta & talia agni propensio? quis ejus genius? Certè contemptor omnium. Non aliter enim D. Joannes illum exhibet quam velut occisum ac emortuum. *Et vidi & ecce in medio throni agnum stantem tanquam occisum.* Quid enim occiso ac emortuo, quid inquam animi, inclinationis ad terrena quæcunq; , quid æstimationis ac pretii eorundem? Nec incumbere aut insidere throno hic Agnus perhibetur, sed stare in medio ejusdem: *Vidi in medio throni agnum stantem.* Non insedit scilicet nec incubuit, ne possessionem illius aut quietem in illo capere videretur, sed stetit, ut ita pedibus instratum, eidem insistens calcaret. Et dum sic calcat, grandescit in leonem: *Vicit* (inquit) *Leo de tribu Juda,* eaq; quæ jam recitavimus meretur elogia, quæ illum non ad quoscunq; tantum titulos & honores, sed ad ipsam etiam divinitatem extulere: *Dignus est accipere divinitatem:* Ut vel hinc pateat, per quos gradus nostra sanctitas debeat ascendere in sublime.

me. *Cœlum* (inquit *Psalmes*) *sedes ejus*, *terrâ autem scabellum pedum ejus*. Si cœlo ipsi semet inferre nititur, terram & omnia terrena calcando eadem scabellum pedum suorum ponat: *Calces mundum* inquit *Augustinus*, *Et calcato eo gradum tibi facis per quem in sublime conscendas*. Terrena omnia velut scala Jacobea sunt, per quam non aliter cum Angelis in cœlum usq; conscendas, quàm si eandem sub pedibus habueris.

Huc etiam veniat in aspectum vir ille regali conspicuus titulo de quo *Apoc: 19. Habebat in vestimento Et in femore suo scriptum: Rex Regum Et Dominus dominantium*. Cur vero non alibi? Cur non in fronte vel in pectore? Assequor ut mihi videatur hujus ipsius mysterium. Nimirum non illum tam ingens & sublime decus capiti præfixisse, ne videretur tanti illud æstimare, ut dignum tam nobili loco, fronte scilicet & capite judicaret. Non etiam pectori admovisse, ne quoscunq; amplissimos etiam titulos sibi cordi esse putaretur. Excludit itaq; & à capite & à corde, eos ipsos tam grandes titulos, & ad femur usq; per contemptum præcipitat; Non frustra: vestimento quoq;  
eos-

eosdem assuendo; scilicet ut vel eo ipso ostenderet, tam facile hæc omnia paratum se deponere atq; exuere quàm vellem. An verò per hoc vel modicè decrevit heroicus hic contemptor? Certè minimè? Dum enim sic tantopere ab aliis æstimata, depretiat ac contemnit, tot diadematibus, quot S. Joannes commemorat, in capite, ex quo illum, quem diximus titulum dejecerat, coronatur, ut iisdem super se ascendentibus prope coelum ipsum attingat: *In capite ejus (inquit) diademata multa.* Aliqui legunt: *Diademata cœli.*

Cant: 5.

Dum autem illum generosior terrenorum contemptus tam insigniter coronat? Non modicè etiam Sponsum in canticis exornat. De illo ibidem Sponsa: *Crura ejus columnæ marmoreæ, quæ fundatæ sunt super bases aureas.* Ac si hic Sponsus non vulgari alicui metallo, sed ipsi auro insisteret, illudq; quodammodo per despectum calcaret. Quod dum præstat; ecce illico evadit longè pretiosior, capite manibusq; in aurum, comis etiam ipsis in palmas triumphales degenerantibus: cum omni insignium munerum affluentia: *Caput ejus aurum optimum: Manus ejus aureæ, plene hyacinthis*



*this Comæ sicut elatæ palmarum.* Ut ommit-  
tam interim tot Charites & laudes, quas hîc  
Sponsa in prædictum auri contemptorem  
concessit: quasi eo ipso edocens, quo-  
modo hic idem contemptus cum amplissi-  
mo fânore rependat, quod infra pedes deiici-  
endo quodammodo capiti vel cordi eripere  
videtur. Ut merito scriptura moneat: *Si di-  
vitie affluant, nolite cor apponere.* Ac si quæ-  
cunq; terrena non corde, sed pedibus digna  
essent ab ipsis calcanda.

Quod quia statua Nabuchodonozoris  
haud præstitit, in solum caput, pectus & bra-  
chia aurum argentumq; impendendo, pedibus  
vero vix vile admovendo ferrum & argillam.  
*Caput ( inquit Daniel, ) ex auro optimo pe-  
ctus & brachia ex argento, pedum quædam pars  
ferrea, quædam fictilis.* Proinde in cineres &  
favillas abiit: Illud ipsum comprobans minimè  
solidam ruinæq; proximam illam Sanctitatem,  
quæ contemptu caret terrenorum.

Novimus quidnam uxori Loth conti-  
gerit? Reliquit illa Sodomam, secessit in  
montem, in quo se ab incendio salvaret; sed  
quia respexit retro, cùm despicere debuisset,  
proin-

proinde & vitam & seipsam amisit. Et hæc certè causa, quod pleriq; etsi videantur culmen virtutis tenere; retro tamen, scilicet ad ea quæ in ingressu ad religionem reliquerunt, respiciant. Id verò propterea, quòd non satis eadem ipsa despexerint ac conculcarint, *ea quæ retro sunt* - - nequaquam *obliviscentes*.

*Isai. 40.*

Dispari ab iis ratione de quibus scriptura: *Assument pennas Aquilæ, volabunt & non deficient.* Ita scilicet DEI servi se à terrenis elongant; ut sub Solem ac cælum usq; velut cum Aquilis sese efferentes, nunquam in hoc volatu deficient; ut ad terrena aliquando ferantur, ac se deorsum velut defessi demittant.

*Contemptus  
linguarum.*

Nisi quod parum sit ad Sanctimoniam in sublime provehendam, omnia quæcunq; terrena generosiùs contemnere, nisi linguarum etiam heroicus contemptus adsit.

*Canti. 4.*

Heroes Religiosi planè illi turri, cujus Salomon in Canticis meminit sunt non absimiles: *Turris* (inquit) *David cum propugnaculis mille clypei pendent ex ea.* Sunt verò qui ita legunt: *Turris David cum excisis linguarum seu orium similitudinibus.* Verùm quid turri cum oribus cum linguis? Ita utiq; sublimior,

mior, celsissimis non impar turribus sanctitas,  
 nunquam sine linguarum consortio. Quid  
 enim magis nec non hostiliter harum sublimita-  
 tem turrium, quam linguarum, cryses, obrectatio-  
 nes, impugnant ac impetunt? Quo tamen id  
 exitu? non alio certe quam quo robustarum ac  
 infractarum turres à conjurata ventorum tempesta-  
 tum ac fulminum impugnantur sævitie: ita ut  
 inter hæc etiam immotæ consistent: Et id cer-  
 tē S. Franciscus Xaverius apud Turselinum  
 lib. 6. cap. 18. in viris Apostolicis elucere voluit:  
*Si qui (inquit) obrectent, de illorum vocibus  
 non magnopere laborabis, ne quis animadver-  
 tat, te homuncionum vocibus à DEI obsequio ab-  
 sterreri.* Contemnendæ scilicet à divinis he-  
 roibus & velut è summa turri despiciendæ quæ-  
 cunq; adversæ voces velut coaxantes ranæ aut  
 canum latratus, si ii turres & non arundines  
 videri & esse volunt. Uti de semet ipso Sene-  
 ca: *Subitâ aliqua & universa voce feriuntur  
 aures meæ, nec cogitationem meam excutunt,  
 nec interrumpunt quidem Fremitum patientis-  
 simè fero; multæ voces & in unum confusæ pro  
 fluctu mihi sunt aut vento sylvam verberante,  
 & cytharis sine intellectu sonantibus.*

S:

Quid



Quid ille quoq; de quo Psalter : *Qui ambulat super pennas ventorum.* Pennatæ sunt utiq; tumentes illæ à quatuor orbis partibus flantes ventorum buccæ. Nullos tamen magis circumvolant, quam quos excellentior præ aliis attollit Sanctimonia. Scimus utiq; altiora montium juga ventis ac tempestatibus sonoris patere maximè. Quid verò hic sublimioris virtutis sectatoribus agendum est ? certè non aliud ; quàm ut generosius hæc buccas pennatas infra pedes præcipitent contemnant & calcant. Atq; sic ab ipsismet earum insanis vocibus ceu pennis eò efferantur sublimius.

Sic Romanus ille re & nomine magnus Fabius ; qui sub tempus belli Punici ob suam prudentissimam cunctationem quot vulgares sensus , quot censuras quot iudicia ac ludibria etiam pertulit ? Qua tamen fronte ? *Si hæc ( inquit ) tela unquam pertimescere, aut saltem attendere voluissim ; Neq; mundus hodie Romam in pedibus , neq; Roma sibi mundum sub pedibus videret.* Addit Bartolus : *Nec Fabius maximus esset.*

Quid verò illo viro, de quo Daniel , hac in parte sublimius ? *Erat magna arbor & foris*

*fortis* ( de qua Nabuchodonozor somniaverat )  
*Proceritas* ejus contingens cœlum , *aspectus* il-  
*lius* ad terminos universæ terræ : *Folia* ejus pul-  
*cherrima* & *fructus* ejus nimius , & *esca* uni-  
*versorum* in ea , *subter* eam habitabant anima-  
*lia* & *bestiæ* & in ramis ejus conversabantur vo-  
*lucres* cœli. Interim excindenda erat hæc ta-  
 lis tantaq; arbor , & ad terram usquè protru-  
 denda. Verum tot in contra interveniebant  
 rationes , tot respectus ac difficultates , simul  
 à tot feris ac bestiis sub ea cubantibus luculenta  
 pericula. Hinc Leonum rugitus , luporum  
 ululatus , ursum murmura : hinc volucrum  
 garrulæ linguæ ac voces : ut non memorem in-  
 vitamenta foliorum , illicia fructuum , quibus  
 oblectabat oculos & palatum tam speciosa ar-  
 bor. Quid hic faceret vir cælestis , & ut illum  
 Sacer vates nominat : *Vigil* & *sanctus* ? Ecce  
 nihil cunctatus , spretis hisce omnibus descen-  
 dit de cœlo ; neq; mussitando per metum , in-  
 sinuavit , sed velut imperterritus audenti ani-  
 mo *clamavit fortiter* : *succidite arborem* : Atq; in  
 hoc ipso heroici ad omnes linguas & voces ob-  
 surdescentis , omnia quæcunq; contemnentis ac  
 proinde super omnia excelsi animi exemplar ex-  
 hibuit.

hibuit. Planè, ut de Tiberio historicus, *sprenendis rumoribus* seu linguis, *validus*.

Cujus planè animi est, cum Apostolo gentium exclamare: *Mihi mundus crucifixus est & ego mundo*: seu: *confixus sum cruci*. Uti namq; qui in crucem agitur, certè ita à terra abstractus est, ut infra illius pedes jaceant omnia: pariter quoq; Religiosus heros sublimioris Sanctimonie sectator super cuncta emineat. Ad instar Crucifixi Salvatoris qui dum in crucem actus esset, supra omnia terrena ac ipsos etiam linguarum quibus impetebatur assultus eminere visus est, & defacto eminuit. Proinde si quis legitimum se ejus asseclam jactat, non dissimilem se adversus tales omnes aculeos præbeat. Alias juxta S. Francis: Xaver: apud Turselinum loco supra citato: *Quicunq; Sermones extimescunt, mundi veriùs quàm Christi milites sunt*.

Quæ eadem crysis ne in nos quoq; cadat; id fatagamus omnino; ut sicut linguarū, rogo etiam ex iis, cui nos, super eum in DEI holocaustum arsfuros imponamus exemplo P. Gaspr: Druzbicki, ut in vita ejus legimus composito: ita quorumcunq; terrenorum heroici inveniamur contemptores, per id ipsum, sublimioris Sanctimonie non difficulter occupaturi fastigium. Pars




PARS TERTIA  
PECULIARES VIRTU-  
TES RELIGIOSAS.

Ad

Altiolem nec vulgarem gra-  
dum provectas ex-  
hibens,

S s §

AD.



## ADHORTATIO I.

*Non vulgaris animarum zelus virtutum sublimiori Sanctimonie militantium Prodomus & antesignanus.*

**P**Er id temporis quasi in genere non vulgaris rationem exhibuimus Sanctimonie. Abhinc ejus magis particularia in medium nobis proferenda, singulaq; saltem potiores virtutes eaq; ad non vulgarem quoq; gradum provectæ quasi in agmine statuendæ. Undè autem convenientius ducendum initium quæve virtus quasi in fronte ponenda? Si non ea quæ ipse Christus in prædicando Evangelio potissimum præ aliis claruit, ejusq; prototypon in se exhibuit, qua per Apostolos orbem subegit, cui tot Ethnica regna ac imperia tot hæreses succubuere, qua Fides Orthodoxa toto mundo propagata, supra tot hostes suos triumphum egit, cui tot tyranni superati innumeriq; cessere cruciatus ac mortes, quam etiam tot Fundatores Religionum suis implantarunt ordinibus, perq; eam, Romanam huc, usq;

usq; infractam sustinuere Ecclesiam, quam nostræ quoq; Societati adeo peculiarem S. Pater noster IGNATIUS voluit esse præ aliis, ut eam pro fine & scopo sui Instituti proposuerit ac velut antesignariam in ipso suarum Regularum principio & fronte exhibuerit. Ea verò non alia est, quam Zelus Salutis animarum; quem ut non tantum non vulgarem, sed etiam primorum Apostolorum zelo non impari, supremoque dignum culmine nobismet persuadeam, præsentis meæ curæ & conatus erit.

Quo loco Zelus animarum apud quoscunq;, potissimum autem apud Religiosos obsequio earundem animarum deditos ac nostræ etiam Societatis homines esse debeat, non unum est, quod nos hujus ipsius admonet. Idq; imprimis præter alia ipsamet vocatio nostra: quæ uti Apostolorum imò & Christi ipsius facit nos insistere vestigiis; ita quoq; non impari cum illis circa salutem animarum pollere Zelo.

Quàm vero hunc eundem zelum latè parentem nec vulgarem esse oporteat, abundè hoc ipsum Actor: 10. in visione Divo Petro exhibita adumbratum legimus: *Vidit vias quod-*  
*dant*



dam velut linteum magnum quatuor initiis submitti de cœlo in terram, in quo erant omnia quadrupedia & serpentina terræ & volatilia cœli. Ubi Sacri interpretes per linteum prædicationem ac zelum, per animantia, varia genera & status hominum, ad quos sese hic zelus, & prædicatione debeat extendere intelligunt: volatilibus superbos ambitiosos leves instabiles, quadrupedibus avaros gulosos lubricos, serpentibus iracundos invidos fraudulentos gentiles hæreticos denotantibus. Hinc quis non videat, quanta hoc loco zeli nostri depingitur amplitudo & materia? Cùm inprimis non qualicunq; linteum, sed linteum magno tot animantium capaci exprimitur: *Vidit linteum magnum*: Neq; vero hic certò alicui, uniq; & alteri hominum generi & conditioni sit intentus adstrictusq;, sed is omnino, qui se omnibus & quibuscunq; sine discrimine impendat. Ideoq; non solis Aquilis ac Leonibus, hoc est magnatibus ac Principibus, sed laboriosis etiam circaq; terram occupatis, ut ita dicam bosculis, quasi mendicato viventibus passerculis, ac vilissimis quoq; terræ vermiculis hoc est, ignobilissimæ ac infimæ pauperrimæ hominum plebi æqualiter deserviat.

serviat. Nec frustra illud *lintheum quatuor ini-*  
*tiis visum est submitti de coelo in terram.* Idq;  
 ideo quod nostra etiam prædicatio ac zelus non  
 certo alicui loco & angulo debeat affigi, nec  
 intra solam v. g. contineri Europam; multo  
 magis unam aliquam Provinciam regionem, ur-  
 bem. In totum, quantus quantus est cum qua-  
 tuor suis partibus orbem, Europâ, Asiâ, Africâ,  
 Americâ ultra Herculeas columnas sese exten-  
 dat & porrigat. Sic omnino, ipsomet Christo  
 suos ad prædicationem expediente discipulos:  
*Euntes in mundum univrsū prædicate Evan-*  
*gelium omni creaturæ.* Ita ut hic etiam locum  
 illud habeat: quod idem Christus ad Evan-  
 gelicos prædicatores: *Vos estis lux mundi.* Ad  
 quod Bernardus: *Pudeat successores Apostolo-*  
*rum lucem esse modii & non mundi.* Quancumque  
 ipsemet Christus in se ipso hujus zeli nobis  
 exemplum exhibuit, dum nolens uno detineri  
 loco, inquit: *Oportet me aliis Civitatibus*  
*Evangelizare.* Neq; etiam frustra eo proposito  
 lintheo ad Petrum vox directa: *Surge Petre, occide*  
*& manduca:* ut vel hinc pateat: Apostolicos vi-  
 rose eo appetitu in conversionem & salutem ani-  
 marum debere ferri, quo feruntur in cibum,

eoq; zelo debere illos vivere, pasci & nutrir: uti S. Catharina Senensis dicebat.

Et hunc talemq; nempe universalem zelum DEUS in prædicatoribus populo suo mittendis sub allegoria venatorum per Prophetam Isaia 16. appromittit: *Mittam* (inquit) *eis multos venatores & venabuntur eos de omni monte & de omni colle & de cavernis petrarum.* Et certè quisnam ille inprimis celebris venator esset? qui solas v. g. cicures damas capreasq; aut solos hinnulos cervorum, & non etiam lupos, ursos, leones, ac reliquum quodcunq; ferarum genus venaretur. Tum & ille, qui uni alicui vivario intentus, in hoc solo omne lucrum & solatium venationis reponeret, nec in late spatiosos campos asperosq; montes excurreret, in abditos remotosq; sylvarum desertorumq; recessus penetraret, profundissima quæq; spelæa omni excuteret industriâ. Et hoc profecto est quod DEUS sub nomine Angelorum ad quosvis salutis animarum curatores ex ore Prophetæ: *Ite Angeli veloces ad gentem convulsam & dilaceratam, ad populum terribilem, post quem non est alius.*

Quodsi



Quod si à venatoribus ad piscatores sty-  
lum transferre libuerit? & in his vivam zeli  
amplioris spectabimus imaginem. Illis utiq;  
Christus in Evangelio viros Apostolicos assimi-  
lari voluit: *Faciam vos (inquit) fieri pesca-  
tores hominum.* Ubi etiam quis ille insignis  
Piscator censeretur? qui alburnos tantum mi-  
norumq; pisciculorum vulgus, & non prægran-  
des quoq; Lucios, Carpiones, Sulmones, ac ba-  
lenas etiam piscari nosset. Qui hamo non nisi,  
vel quocunq; angustiore reti & non capace plu-  
rium magnorumq; piscium sagenâ uteretur ad  
piscandum. Qui piscinas tantum minoresq; la-  
cus & non amplissima stagna fluviosq; ac im-  
mensa quoq; maria enavigaret. Si Timotheo  
Atheniensi visa est fortuna urbes in retia impel-  
lere; certè nobis in retia Christi non urbes  
tantum, sed integra regna & imperia imò totus  
orbis impellendus. Uti hujus ipsius typum gef-  
ferat Aaronicus Sacerdos: in cujus veste *erat*  
*totus orbis terrarum*: Ut vel eo ipso admone-  
retur, se debere mundi totius ejusquè salutis  
curam gerere. Uti quoq; ad Joannem Apo-  
cal: 10. *Oportet te Prophetare gentibus & po-  
pulis & linguis & regibus multis.*

Math: 17.

Luc: 5.

Et hinc est quod idem ipse Christus in eodem Evangelio Petrum ut tributum exsol-  
 veret, non alio ad piscandum miserit, quàm  
 ad mare: *Vade (inquit) ad mare & mitte ha-*  
*mm & eum piscem qui primus ascenderit tolle.*  
 Hoc autem ipsum præludium & typus fuerat  
 piscationis illius, quâ postea circa homines fun-  
 gi debuit. Uti & illa Evangelica piscatio Zeli  
 Apostolici non postremum Symbolum præse-  
 tulit; in qua *præ multitudinem piscium rumpe-*  
*bantur retia, & navicula pene mergebantur.* Ita  
 scilicet nobis etiam circa piscationem homi-  
 num laborandum, ut illi non quoscunq; cona-  
 tus & studia, sed omnes vires nostras, omnem  
 incolumitatem ac vitam, etsi hæc abrumpi pe-  
 nitus laboribus extremumq; subire naufragium  
 deberet, imò nostræ etiam securitatem salutis  
 æternæ promptè ac heroicè impendamus; eo spi-  
 ritu & zelo, quo S. P. IGNATIUS dicere so-  
 lebat: *Si optio daretur, malle se beatitudinis*  
*incertum vivere, & interim DEO inservire*  
*& proximorum saluti, quàm certum ejusdem*  
*gloriæ statim mori.* Pater autem Nicolaus Lan-  
 ciccius uti in ejus vita Balbinus: *Optabat esse*  
*rete, quo omnes homines ad DEVM caperen-*  
*tur & traherentur.* Verum

Verum ne solis aquis & Ponto zelus  
 noster innatet, à Neptūno ad Cererem, à pisci-  
 bus ad fegetes stylum tantisper transferamus.  
 Nec enim aliò ipse Christus suos operarios in-  
 vitat, dum messem adultam quasi digito mon-  
 strans in hæc verba illos alloquitur: *Eccè regio-*  
*nes albae sunt ad messem. Messis multa operarii*  
*pauci:* Et defacto sicut non ille egregius mes-  
 sor est, qui solas spicas quæ fugerint manus  
 metentium cum Ruth inope colligeret, nec  
 campos & horrea manipulis impleret. Ita &  
 ille nomine etiam operarii Apostolici omnino  
 indignus, qui propria salute & modico anima-  
 rum lucro contentus, tot hominum sanguine  
 Christi redemptorum exitio, securus ac defes-  
 indormirer, nec dignam supremo Patrefami-  
 lias messem Cælo inferret. Is nimirum non  
 vulgaris zelus zelatorq; est, qui nullis labori-  
 bus, nullis animarum proventibus fatur, terram  
 meritis, innumeris cælum accolis implet.

Joan: 4.

Matth: 9.

Illius adinstar quem D. Joannes in A-  
 pocal: se spectasse testatus est: *Vidi Ecce veni-*  
*entem candidam & super nubem sedentem similem*  
*filio hominis: habentem in capite suo coronam*  
*auream & in manu sua falcem acutam.* Acu-

Apocal: 14.



tam inquam hoc est cuiuscūq; etiam robustissimæ  
messi facile parem, non hebetem aliquam,  
quæ se vix in obvia gramina gracilesq; herbas  
posset exerere. Verum quid diademati, quid  
regio insigni, & capiti imò & manui cum mes-  
soria falce? Nempe eo ipso non plebeium hic,  
sed verè Principem, sed Regalem messorum  
zelatoremq; cogitate, qui non in unum aliquem  
angustiore agellum, sed in orbem totum,  
suum proferat zelum ac dominatum juxta illud  
Psaltis: *Constitues eos Principes super omnem  
terram.* Imò etiam suis desideriis ac zelo an-  
gustum eundem mundum reputet: idq; lauda-  
bilius longè, quàm de Magno Alexandro apud  
Pòetam: *Vnus Pelleo Juveni non sufficit orbis:  
æstuat infelix angusto limite mundi, Clausus ut  
Cyara scopulis.*

Ut verò messoriam iterum falcem in  
gladium recudam: planè vir ille Apocalypticus,  
*apocal. 1.* *De cujus ore gladius utraq; parte acutus exhibet*  
*eximium zeli non vulgaris in semetipso pro-*  
*didit specimen.* Quid enim per gladium de  
ore procedentem, quàm prædicationem ze-  
lumq; Apostolicum intelligimus: documen-  
to, eundem zelum, non ad instar subtilioris  
pugio:

pugionis vel cultelli cuiuspiam, sed ad instar  
 trabalis gladii utraq; parte acuti debere esse,  
 qui obvia quaq; hinc & inde inevitabili ictu  
 feriens, toti orbi par esset subjugando. Qua-  
 li ense, usus ille qui de se profitebatur: *In ma-  
 rutino (inquit) interficiebam* (salutifera utiq;  
 interfectione) *omnes peccatores terre.* Nec  
 alius Apostolorum Christi zelus de quibus illud  
 Psalmi: *In omnem terram exivit sonus eorum &  
 in fines terræ verba eorum.* Verba videlicet  
 gladio ancipiti simillima, nec dissimilia ab elo-  
 quentia Cineæ, quā plures hostes & urbes  
 quàm suis armis sibi subactas Pyrrhus Rex pro-  
 fessus est.

Quid dicam de Sancto Patre nostro  
 Ignatio, cujus illud, dum suos in varias mun-  
 di plagas ad missiones expediret edictum fuerat:  
*Ite, orbem accendite, inflammate omnia.* Cui edi-  
 cto quantum satisfacere illi, palam est. Inde  
 nobis etiam quibuscunq; Apostolicorum viro-  
 rum Imitatoribus amplissimo relicto invitamen-  
 to, ut ni degeneres ab illis esse velimus, eo zelo  
 animarum ardeamus, quo, nihil hac in parte  
 mediocre animo designantes, eo usq; hoc ipso  
 zelo prædicatione aliisq; Apostolicis proceda-  
 mus

Ezechiel. 8.

mus laboribus quousq; finem, mundi ac vitæ non invenerimus, quousq; aliquid ejusdem mundi virium ac sanguinis superfuerit. Absit ut fimus *Idola zeli* quale olim Ezechiel in templo Salomonico aspexerat. Idola inquam os habentia & non loquentia, habentia pedes & interim desidiolo otio torpentina, habentia manus, nec salutis collaborantia animarum.

Potius cœlos imitemur, sub quorum allegoria ( uti interpretatur S. Augustinus de viris Apostolicis ) Psaltes, *Cœli* ( inquit ) *enarrant gloriam DEI*: DEI inquam non suam: non nosmet ipsos sed DEUM prædicando, idq; non linguâ tantum, sed operibus etiam ac totis nobismet ipsis.

Planè adinstar illius stellæ, quæ Magorum ad Præsepe Christi ductrix fuerat: cujus totum durare, totum lucere, fuit ducere Magos ad Christum; ita ut postquam suo functa esset officio, non ultra superstes esse voluerit.

Aut certè adinstar lucernæ illius, quam mulier Evangelica ad inveniendam drachmam perditam accendit: cujus id erat muneris & obsequii, ardere & consumi; modo drachma vindicaretur ab interitu.

Aut



Aut deniq; adinstar Evangelici Pasto-  
ris semet, incommodis, periculis, laboribus, diffi-  
cultatibus obiectis, modò ovem deperditam  
inveniret. Ut non memorem inter alia zeli in-  
signis exempla S. Teresiam usq; ad diem judicii  
poenas purgatorii pro animæ unius conversione  
subire exoptantem. Pariter P. Ludovicum de *In vita ejus*  
Ponte S. J. sese ad poenas etiam inferni in per-  
petuum sine peccato tolerandas, si eo ad pec-  
catorum conversionem opus esset, offerentem.

Hec autem certè erit, quod de se  
Apostolus gentium 2 ad Corinth: 12. *Nil mi-  
nus fui ab iis qui sunt supra modum Apostoli:*  
Ubi sic suos Co-Apostolos nominat, seq; ab illis  
non degenerasse enuntiat: non qualescunq;  
eisdem, sed *supra modum Apostolos* deprædi-  
cans: ac si quæcunq; Apostolatu clarescere pa-  
rum esset,

Quod si verò hanc praxim zeli Aposto-  
lici servaverimus, procul dubio ingens lucrum  
faciemus animarum; nec minus pro nostra  
parte præmium nostri laboris re-  
feremus.

# IMMORTATIO II.

*Paupertas, Castitas, Obedientia non vulgaris,  
sublimioris Sanctimonie non ampares Triarii.*

**P**Articularia Sanctimonie Religiosæ ingressi, postquam virtutem zeli animarum non vulgarem esse voluimus: Essentialia Religionis cuiusq; liceat percurrere: Paupertatem, Castitatem & Obedientiam velut validissimos summam rei sustinentes Triarios intelligimus. Et quia labor hic noster, ad suum sese finem præcipitat, nec singulis seorsim fas est immorari: ideo tria hæc in unam hodie compingimus dictionem; ut eadem ipsa nobismet non vulgaria sint, in præsens suafuria.

**PAUPERITAS** virtutum Paupertate, eamq; velimus esse non  
**Religiosa** vulgarem: quâ ipsemet Christus insignis ad-  
**non vulga-** modum inter terrigenas apparuit, ita, ut illâ  
**ris.** ipsâ totam vitam suam non parum exornaverit.  
Hinc illi in primis parentes pauperrimi, nati-  
vitas in stabulo, pueritia atq; adolescentia in  
ipsius planè paupertatis domo Nazareth: jam  
reliqua, Evangelica præsertim vita absq; domo,  
absq;

absq; redivibus, absq; commodis: mors tandem  
in omni egestate extremaq; nuditate in cruce  
peracta. Ipse met etiam Christo de se attestan-  
te: *Vulpes foveas habent, & volucres cœli nidos,*  
*filius autem hominis non habet ubi caput reclinet.*  
Ubi quid pauperius quid egentius? quàm  
ipsis vulpeculis, ipsis volucris, quarum viles  
non nisi foveæ, aut rudes, atq; ex neglectissima  
structi materia nidi, habitaculum: nulla verò  
pastus quotidiani provisio, longè incommodius  
longeq; miserius vivere, nec locum etiam capiti  
reclinando invenire. Ita ut si Diogeni pro do-  
mo, pro tecto, suimet (cujus saltem dominio gau-  
debat,) dolii fuerat usus: Christo nec tantil-  
lum etiam habitaculi manserit.

Matth. 8.

Et hanc talemq; pauperiem suis discipu-  
lis idem Christus impensius injunxerat: ita ut  
*neq; duas tunicas, neq; peram neq; calceamenta*  
habere permiserit, hæc ipsa pauperibus etiam,  
alioquin communia: imò illud quoq; in omnes  
proclamaverit: *Nisi quis renuntiaverit omni-*  
*bus quæ possidet, non potest meus esse discipulus.*  
Quæ autem major insigniorq; pauperies? quàm  
renuntiare carereq; omnibus, nihil velle possi-  
dere. Et hæc utiq; sola ad Sanctiorem Chri-



sti adulta palæstram, solā ejus diviniōis capax  
magisterii. Inde est quod Salvator noster ado-  
lescenti Evangelico consilium exquirenti, quid-  
nam sibi faciendum esset, ut vitam æternam pos-  
sideret? post injunctam illi observantiam omni-  
um mandatorum exactam, illud subjunxit:  
*Si vis perfectus esse: vade & vende omnia &  
da pauperibus & sequere me.* Illam scilicet  
paupertatem censendam esse dignam Christo,  
illam verè & proximè Christi sequacem, illam  
eximiae & perfectæ sanctitatis fundatricem ac  
parentem, quæ hominem omni rerum posses-  
sione spoliaverit. Unde si quispiam gentilium  
Philosophorum in commendationem suæ pau-  
pertatis illud jactare ausus: *Omnia mecum por-  
to.* Tanto commendabilior Christi discipulo-  
rum paupertas, quæ hoc etiam qualicunq; onere  
sui sequaces expedit, ita, ut illos omnibus  
rebus exclusis, nihil omnino secum portare sinat.

Nisi quod parum sit, corpore & crumena  
pauperem vivere: etiam animo & spiritu paupe-  
res nos Christus voluit: *Beati inquit pauperes  
spiritu, ipsorum est regnum cælorum.* Illa videlicet  
non plebeia, non vulgaris, sed planè regia, thro-  
noq; cælesti nō indigna pauperies: quæ non cor-  
pus tantum omni rerum affluentia, sed spiritum

Paupertas  
spiritus.

etiam animumq; omni ambitu & ad terrena affectu penitus exspoliat. Hinc in Evangelio discipuli Christi (uti jam diximus) etiā per *Calceamentis* carere jussi: quid enim per petiā nisi desiderii habendi, quid per calceamenta nisi Doctorum testimonio, affectus ad quæcunq; terrena intelligendus: isq; omnino à genuinis Christi sectatoribus reiciendus atq; exuendus. Inde etiā est, quod S. Petr. ausus est, quasi per aliquam jactantiā illud proferre: *Ecce nos reliquimus omnia*. Quæ vero hæc omnia? Illane tanti relicta semilacera retia?

Respondet D. Gregorius Papa Hom: 5. in Evangelia: *Multum* inquit *reliquit* qui *sibi nihil retinuit*. Et quia neq; hoc satis, proinde addit: *Multum ergo Petr. & Andr. dimisit, quando uterq; etiā desideria habendi dereliquit*. Nec frustra Christus præfato supra adolescenti dixit: *Vade & vende omnia*: Et non alio contractu suis eum bonis cedere jussit. Quid enim Juris ac rationabilis desiderii ad bona absolutè vendita haberi potest?

Eam paupertatem Job de se professus, cum diceret: *Nudus egressus sum de utero matris meæ, nudus revertar illuc*. Quæ enim notabilior patentiorq; nuditas quàm egredientis de utero materno infantuli, tum etiam de-

cedentis ex hac vita hominis, ac in tumultum deportati cadaveris: nuditas inquam absq; ullo etiam ad quævis terrena affectu, atq; quocunq; habendi aliquid desiderio; ita, ut quidquid etiam illi opum ingesseris, vestimentorum indueris, monilium aggregaveris; perinde illi est, ac si vilissimam imposueris lacernam, ad sterquilinum usq; illud dejeceris. Hæc autem defacto Jobum coram DEI oculis eo provexit, ut nullum illi in terra similem agnoverit. Quodsi verò alia quæpiam Mater sic egenos nudosq; in lucem exponit, ac in suum deinde sinum filios revocat; Certè Religiosa etiam paupertas, quam Sanctus Franciscus Assisias Matrem suam appellabat, non aliam educat, non aliam tenerius amat Sobolem, mundoq; ac coelo spectabilem exhibet, nisi quam nuda prorsus egestas in vita & morte commendaverit,

*Fructus Pau-  
peratis.  
Psalm: 10.*

Non aliter quam illum de quo Psalter:  
*Oculi ejus in pauperem:* alii legunt: *Oculi ejus in orbem.* Nempe taliter, hoc est insigniter pauperes, adeo dignum DEO de semetipsis præstant spectaculum; ut apud illum parem orbi sui æstimationem ac pretium inveniant. Imò in



in orbis Atlantes Sanctimoniam excreſcant : at-  
 teſtante ſcripturâ : *Dominus ſunt cardines terræ* : 1. Reg: 2.  
*Et poſuit ſuper eos orbem* : alii interpretantur :  
*Dominus ſunt pauperes terræ* : Acti vix alia ma-  
 gis expedita & compendiarie creſcendi in ſubli-  
 me paremque Atlanti ſtaturam & humeros via  
 eſſet, quam exactiſſimæ via paupertatis. Hinc  
 de ſe Propheta : *Ego vir videns paupertatem* Thren: 3:  
*meam* : Hæc videlicet Religioſos homines, uti  
 non pygmeos in amore ſui poſtulat, ſed Gy-  
 gantes, ſed viros, ita quoque eorū ſui ſectâ-  
 tores egregios in viros omni etiam virtutum  
 genere perfectos, adultosque Sanctimoniam he-  
 roas facit excreſcere.

Nec aliud forſitan expeditum in Mæ-  
 ſopotamiam iter Jacobo Patriarchæ effecit ma-  
 gnisque opibus reducem ditavit : cum id ipſum  
 atteſtari viſus : dum id elocutus : *In baculo* (in- Gen: 32:  
 quit) *transivi Jordānem*, *Ecce cum duabus*  
*turmis regredior*. Quis enim ſatis crederet,  
 quantis non temporalibus tantum, ſed ſpiritu-  
 alibus etiam divitiis ſui ſequaces, exacta, & vix  
 unius baculi domina paupertas locupletet?  
 Hinc illud Apoſtoli : *Omnia habentes nihil poſ-  
 ſidentes* : Omnia inquam ſive temporalia, ſive  
 æterna :

æterna ac supernaturalia species. Hinc præfatus S. Franciscus eandem paupertatem appellabat *thesaurum absconditum in agro*, Evangelicam à negotiatore venditis omnibus quæ habuit, emptam Margaritam.

Mater præterea ut diximus illa est; imò pro Domina etiam ab eodem S. Francisco Assisinate habita. Nec alio igitur ritu quam matri & Dominae debito, è voto quoq; Patris nostri Divinissimi Ignatii diligenda: Et si eandem ralem cogitaverimus coluerimusq; , quomodo illam vulgari aliquâ dignam observantia censebimus? Quid vulgare sperabimus ab eadem? Quod si etiam ut murus Religionis, edicente eodem S. Patre nostro promovenda est? quisnam oro hujus ejusdem muri humilitate aut mediocritate saltem, contentus esse poterit? si inexpugnabilem suam esse religiositatem voluerit. Hinc præter tot Christianos eosq; Religiosos paupertatis exactissimæ cultores, quorum sexcenta exempla non recito, ipsi quoq; gentiles, eo etiam titulo eandem coluere, ut in securo & in integro suam probitatem haberent. Uti Crates Thebanus magnam aurum in mare proiciens nec sibi quidquam relin-

linquens pronuntiavit : *Abite pessum mala cupiditates : ego vos mergam , ne ipse mergar à vobis.* Sic & Phocion dum ei magnus Alexander centum auri talenta dono misisset , ipseq; ex portitoribus quæssisset , cuius gratia id sibi allatum esset ? illiq; responderent : *Ob solam virtutem tuam* & *quia te omnium Atheniensium optimum judicat :* Continuo legatos cum dono ad Alexandrum remisit dicens : *Sinat igitur me esse talem.* Ac si deficiente paupertate , omnis illico rueret probitas ; stante velut muro quodam inexpugnabili , & ipsa invicta staret.

Neq; vero Castitas etiam Religiosa in minorem à nobis provehenda mensuram. Quanquam satis hæc ad justam sublimitatem perveniet , si Angelicam puritatem ( ut idem S. Pater noster Ignatius admonet ) enitendo imitari , iisdem ipsis Angelis aut nos æquabit , aut anteferet : præsertim quòd hæc in Angelis felicitatis est , in hominibus virtutis. Quid enim est , quod dum advenientibus Sodomam duobus Angelis profundam Loth adorationem exhibet : *Adoravitq;* ( inquit ) *scriptura pronus in terram,* hancq; illi absq; ulla repugnancia admittunt : dumq; pariter Dux Israëliti-

CASTITAS  
non vulga-  
ris.

Ejusq; Ex-  
cellentia.



cus Josue apparenti sibi Angelo id ipsum venerationis & cultûs præstat, attestante eâdem scripturâ: *Cecidit Josue pronus in terram*, eumq; cultum ille etiam non minus promptè acceptat: ecce verò dum Apoc: 19. Joannes simili adoratione præsentem Angelum intendit prosequi, sic eum vetantem audit: *Vide ne feceris, conservus tuus sum*: Arabica versio legit: *Servus tuus sum*: Nempe hoc idem ipsum privilegium Arnoldus Carnotensis virginitati castissimæ D. Joannis imputat: *Hanc interim* inquit gloriam propriè Virginitas merebatur. Nec profecto dissimilis nostra quoq; Castitas esto, quæ nos scilicet ut Angelicæ castitati, ita ejus privilegiis exæquetur.

Apocal: 21.

Ita tamen ut cælestem quoq; Jerusalem in ejus liceat trahere similitudinem. Quot enim ibi eximix Symbola Castimonix? *Habebat* (inquit) *murum magnum & altum*: quem videlicet nihil humile nihil terrenum aut telluri agnatum, nihil carne prægravans, facile transcenderet. *Portæ duodecim, duodecim margaritæ*. Quid verò his candidius quid purius? attestante etiam Plinio: *Omnis* (inquit) *Margaritarum dos in candore*. Nec aliud per hasce  
portas

portas quam portas sensuum : ( quas S. Pater Ignatius ab omni inordinatione iussit diligentius custodiri ) intelligendas. *In portis Angelis duodecim.* Nempe his excubitoribus quidnam oro minus purum minusve honestum intus auderet irrepere ? Hinc non immerito huic Civitati inscriptum : *Nihil coinquinatum intrabit in eam.* Jam ipsa Civitas quantis nituit splendoribus ? *Ipsa* ( inquit ) *Civitas aurum mundum simile vitro mundo : lumen ejus simile lapidi pretioso tanquam lapidi Jaspidis, sicut crystallum.* Vitream scilicet atq; crystallinam, animam expedit esse Religiosam, totam velut diaphanam, totam mundam, atque pellucidam omnisq; maculae & umbræ expertem. Ut autem in ea Civitate nihil omnino mediocre, nihil vile foret : *Plateæ* ( inquit ) *Civitatis aurum mundum tanquam vitrum perlucidum.* Per has verò etiam affectus appetitusq; humanos eosq; nihil abjectum nihil maculosum præferentes quis prohibeat intelligere, atq; ita in hac tota imagine totius animæ imò corporis quoq; Religiosi castimoniam æstimare ?

Non aliter quam in eo, quod de tribus pueris in fornacem Babilonicam injectis, ac

omnino illæsis Daniel: Quod scilicet etiam odor ignis non transisset per eos. An non ad talem scilicet nobis expediret eniti Castimoniam, quam non tantum ullus ignis concupiscentiæ fumus infuscarer, sed nec ipse quoq; ignis ejusdem afflaret odor, imò neq; etiam per transfennam absq; ulla licet noxa & afflatu permearet. Cujus Symbolum Rubus quoq; ille Mosaicus, qui cùm arderet, non comburebatur: ad quod Cassianus lib. 12. cap. 13. *Non minus mirabile opus est, hominem carneum carnales affectus in carne positum respuisse.* Uti ipsi etiam doctores apud Drexel: par: 1. Rosar: cap. 10. cui-dam illecebrarum talium triumphatori acclamant: *Vicisti, vicisti, quia in igne fuisti & non arsisisti.*

Nisi illud summum esset, quod idem Joannes Apoc: 14. *Vidi & ecce Agnus stabat supra montem Sion & cum eo centum quadraginta quatuor millia.* Hi sunt qui cum mulieribus non sunt coinquinati: *virgines enim sunt.* Hi sequuntur agnum quocunq; ierit, *sine macula enim sunt ante thronum DEI.* Ubi quid castius vel eo ipso, dum non Angelicis tantum, sed ipsius agni immaculatissimi insistitur vesti-  
giis



giis atq; etiā eō ipso cū eodem Agno in montem Sion hoc est sublime Sanctimonix & gloriæ imò ad ipsum DEI thronum ascenditur. Unde D. Gregorius in lib. 1. Reg. cap. 13. *Per meritum* ( inquit ) *incorruptionis , quo à terrenis & carnalibus delectationibus se dividunt , in superna Redemptoris gloria sublimantur.*

Ne tamen solum Empyreum in Jerusalem cælesti aut in monte Sion adumbratum excellentioris castimonix referat effigiem ; etiam à terra illius derivemus Symbolum : *Dilectus* ( inquit Cantica ) *qui pascitur inter lilia :* Et certè Religiosæ exq; castitate præfulgentes animæ , lilia sint necesse , quæ dum non vulgari inter alios flores candore nitent , hoc ipso extra plebeiam sortem & cunas evecta , regium quiddam præferunt , illo insignia lemmate ac titulo quod lilio inscripsit quispiam : *Meruit candore coronam.* Non plebeia nimirum nec vulgaris nostra castitas sit : sed ea quæ liliū in integro exprimat , *cui nec odor desit , nec candor* , candor in anima & moribus , odor in fama.

Talisq; defacto castimonia Josephum Patriarcham throno Regio adinovit , ut Pater suus illud ipsi ingereret : *Numquid Rex noster* Genes 3.

Genes: 29.

eris? Quæ verò Josephi castitas? Illa scilicet quæ nefariæ Putipharis uxori reposuit; *Quomodo possum peccare?* En quantam hîc Adolescentis castimoniam! quæ illi ipsam pænè potentiam peccandi sive ademit abstulitq; : sive edomuit ac frænavit: simulq; Regem fecit, Isidoro Pelusiota lib. 4. cap. 79. id ipsum attestante: *Etenim unum castitatis opus coronatur ut pote regium.* Et certe quidnam aliud intemperate castitas? quàm illa pulcherrima & castissima Abisai, quàm dum vellet Adonias, per interpositionem Bethsabeæ habere uxorem respondit Salomon: *Postulas Abisai Sunamitidem Adonia? postula ei & regnum.* Atq; ita si illud conjugium summa ipsius regni post se videbatur trahere gubernacula: quidni intaminatæ etiam castimoniæ possessioni longè nobilius regnum deberetur? Quanquam scimus quantum apud ipsos quoq; Ethnicos hæc eadem virtus in Vestalibus fuerit plane regaliter honorata.

Joan: 29.

Nec vero inferior illa in Joanne Castitas, utpote quæ illum ipsi Christi pectori cordiq; admovit. *Præcucurrit ille citius Petro* ad salvatoris vitale sepulchrum: hoc enim quoq; castitatis privilegium; in Sacris Olympiis omnibus aliis

aliis præcurrere, braviumquè occupare sancti-  
tatis.

Quid dico præcurrere? imò prævola-  
re. An non enim Typus ac Symbolum illius  
hæ ipsæ columbæ, quibus oculos Sponsi Sponsa  
assimilat: *Oculi ejus sicut columbæ: super ri-  
vulos aquarum quæ lacte sunt lotæ, Et resident  
juxta fluentia plenissima.* Quis enim candor,  
quis nitor quæ puritas harum volucrum esse  
debuerat, quæ lacte lavabantur, quæ non ali-  
bi; quàm inter rivos aquarum, inter fluentia pu-  
rissima continuo habitabant: atq; sic ad vivum  
excellentem, ad sublimeq; sui pretium evolan-  
tem exprimebant castimoniam. Uti de illa  
sensit Angelus ille qui teste Petro Sanch: p. r.  
c. 8. S. Victorix & S. Anatolix post delibera-  
tionem & certamen inter se mutuum de vitæ  
statu eligendo peractum, virginittis propo-  
situm amplexis apparens dixit. *Virginitas est au-  
rum, viduarum status argentum, conjugalis  
castitas cuprum:* Jam Patri Ledesma (uti de  
eo P. Nadasi) B. Virgo cum SS. Magdalena,  
Catharina Martyre & Catharina Senensi ap-  
parens eumq; in proposito castittis nutantem  
confirmans, hanc illi stropham in habitu suo per  
Socias

Cant: 4.



Socias prædictas cantari curavit: *Divina res est castitas, divina sunt & præmia, quæ continentur dat DEVS.* Inde est quod Eccl: 26. *Omnis ponderatio non est digna continentis animæ: Sapientiæ autem 4. O quam pulchra est casta generatio cum claritate; immortalis est enim memoria illius, quoniam & apud DEVM nota est & apud homines.*

Proinde Hieroglyphicon Castitatis (de quo Imago primi Seculi Soc: lib. 2.) est Virgo in Zodiaco. Sicut enim illa regnans terram maximè frugiferam facit; ita si castitas in animo hominis regnet, fructus honoris & gratiæ copiosos germinare facit. Jam verò S. Chrysostomus Hom: de pæniten: apud Drexelium p. 1. Rosar cap. 10. addit: *In Zodiaco signum Virginis inter Libram & Leonem positum; ut indicetur, pro Virginitate & castitate servanda, semper fortitudinem & temperantiam necessariam esse: nam Virgo, eodem teste à bello nunquam cessare potest.* Unde Sanctus quoq; Hieronymus Epist: 140. ait: *Gentilem errorem Deas Virgines armatas finxisse cum scuto & lancea: ut significarent, sine bello pudicitiam non posse defendi.*

Dum

Dum autem paupertatem castitatemq;  
eo usq; proveximus : nec obedientiam humi  
reperere permittamus. Sit illius Symbolum ille  
ipse Sol, quem Josue ad occasum naturali cur-  
su properantem suomet verbo & jussu stitit :  
*Sol contra Gabaon ne movearis.* Et hæc plane  
est non vulgaris, imò usq; ad prodigium obe-  
dientia : dum non minores stellæ, sed soles  
etiam virtute & scientia adulti, voci ac impe-  
rio simplicis hominis obediunt, & in ipso etiam  
naturæ & gloriæ cursu contra naturam & cum  
ipsius naturæ violentia vel uno quandoq; nutu  
inhibentur : aut si pergere jubeantur, etiam  
augustas Jovis vel Saturni domos ac speciosa  
quævis munia relinquentes, ad ignobiles casas  
& vilia quæcunq; obsequia promptè se transfe-  
runt, imò in Eccipsim etiam & occasum æqua-  
nimiter abeunt. Adverte vero quod tunc cum  
præciperet Josue, aliud soli dictaret natura, sci-  
licet ne subsisteret. Obvenire insuper pote-  
rant tot in oppositum rationes. Orituram sci-  
licet exinde non modicam perturbationem &  
confusionem in toto universo, ingens juribus  
Lunæ & noctis aliisq; planetis præjudicium fu-  
turum, imputaturos errorem soli annotatu-

OBEDIEN-  
TIA  
non vulga-  
ris.

Josue 10.

Y y

rosq;

rosq; in perpetuum Astronomos : toti id orbi  
 monstri adinstar habendum. Nec tamen tot  
 rationibus & motivis solem motum, quòminus  
 voci Josue obediret. Uti etiam cum tempo-  
 ribus Ezechiae retrocedere ab occasu juberetur.  
 Quamquam parum est solem obedivisse : plus est  
 obedivisse tunc Angelum : obedivisse motricem  
 solis intelligentiam, seq; unius hominis iudicio &  
 imperio subdidisse. Quid dico Angelum ? Imò  
 DEUM ipsum attestante scriptura : *Obediente*  
*( inquit ) DEO voci hominis.* Atq; hæc est  
 vis obiedientiæ non vulgaris , non stellas, non  
 soles tantum, non rudiora phænomena, non ignes  
 fatuos, sed Angelos, sed intelligentias, sed deos  
 aut deastros ad nutum flectere. Qualis fuit  
 Divi Xaverii obedientia de quo illud in ejus  
 officio :

*Vastæ remotas India*

*Plagas obit Xaverius :*

*Loiola sed vel litera*

*Si jusseris, reveritur.*

*Nec Sol ut ut promptissimus*

*Vel stare, vel recurrere*

*Volente jussus numine*

*Talis resorbet orbitam,*

*Quales*



Quales & illi monachi de quibus Joannes Climacus cap. 4. de Obedient: cum ad quoddam monasterium venisset: *Quosdam vidisse in eo Senes canitie venerandos, & annis senioribus graves, ita ad obediendum, hucq; & illuc discursandum promptos & dispositos ut pueri agiles viderentur &c.*

Huc spectat illud Propheticum: *Habitabit lupus cum Agno, pardus cum hædo accubabit, vitulus, leo, & ovis simul morabuntur: Puer parvulus minabit eos.* Quid enim magis singulare, magisque inauditum quam Leones & pardos suæ magnitudinis, virtutis, indolis & roboris conscios ad unius parvuli nutum vivere. Agnos etiam & oviculas eodem moderamine iisdem Leonibus convivere lupisque pariter & pardis. Ita tamen ut in hoc ipso Religiosæ obedientiæ insigne admodum eluceat exemplum: Cujus est leoninos etiam spiritus, nec servam voluntatem tantum, sed intellectum quoque unius pænè ut ita dicam rudioris pueruli directioni prompto & hilari obsequio subdere ac velut sub jugum mittere. Uti de semetipso S. Franciscus Seraphicus (attestante hoc ipsum Chronico Ordinis) dicere solitus: *Inter alias*

Isai: m.

*gratias, quas divina bonitas in me plenâ con-*  
*gessit manu; etiam hac me dignata est: ut ani-*  
*mo tam libenti, unius horæ Novitio, quam cui-*  
*vis veterano quamlibet prudenti obtemperarem.*

*Baruch: 8.*

Idq; ipsum illatum adinstar Itellarum,  
 ( ne penes solem omnis laus maneat ) de qua-  
 rum promptitudine eo in passu refert scriptura:  
*Vocatae sunt, & dixerunt: adsumus! & lux-*  
*runt ei cum jucunditate.* Ubi quam prompta  
 quam jucunda quam numeris omnibus absoluta  
 obedientiæ ratio: Quot documenta ac insi-  
 gnia: vix inprimis vocatae, illico obediunt,  
 stationem relinquunt, firmamento affixæ mo-  
 ventur, forsitan infra etiam descendunt: ac  
 nescio quæ ignota terrarum spatia petunt. Uti  
 Rotæ inscriptum: *Quocunq; vertar. Nulla*  
*utiq; ex effato Sancti Indiarum Apostoli lib. 2.*  
*Epist. 4. Locorum spatia obstant obedientiæ.* Nec  
 dicunt: ibimus sed jam *adsumus*: Ubi miram  
 plane in obediendo celeritatem & commenda-  
 tionem advertas. Uti & in illo: quod adfue-  
 rint obediunt *cum jucunditate*: Cum defa-  
 cto insignis promptitudinis sit parere etiam in  
 arduis ac difficillimis jucunde ac hilariter: non  
 examinata etiam voce à quo profecta est:

*Vocata*

*Vocata* (inquit) *adsumus*. Uti in Samuele 1. Reg: 9:  
 contigit, cum ipse illi DEUS loqueretur, ille  
 autem nequaquam discrevit à DEO ne an ab  
 Heli vox illa profluxerat? pro æquali exilli-  
 mans sive voci Dei, sive voci obtemperare impe-  
 rantis hominis. Ubi illud simul expendas. Deum  
 tunc vocem Heli usurpasse ac imitatum fuisse,  
 ut vel inde pateat vocem superiorum esse vo-  
 cem DEI, DEUMq; voce superiorum ad nos  
 uti & loqui. Ita ut hinc etiam illud usurpari ad  
 DEIq; per superiores intimata imperia dirigi  
 deberet; quod discipuli Pythagoræ, ejus do-  
 gmatibus absq; controversia subordinati usur-  
 pabant inquentes: *Ipse dixit*.

Nescio vero an non plus præstitere stel-  
 læ quas DEUS contra Sisaram pugnaturas, ve-  
 lut in aciem eduxerat: *Stellæ* (inquit) *manen-  
 tes in ordine & cursu suo adversus Sisaram pu-  
 gnaverunt*. Cum hoc ipsum legitimæ nec po-  
 pularis obedientiæ sit, non tantum ad plausus  
 triumphos, & commoda, sed ad pugnas quoq;  
 & cruenta prælia præsto adesse, ita ut etiam si  
 velut inter stellas fixas esse videaris, ad unicum  
 imperium, dilectam quantumvis cogaris relin-  
 quere stationem, teq; laboribus ac incommo-

*Jud: 5:*



dis, imò sanguinolentis certaminibus ulstro impendere. Idq; non absq; certa quorumcunq; insultuum victoria, uti spondit Prov: 21; Salomon: *Vir obediens loquetur victorias.*

Quid dico certaminibus? imò morti etiam, & gravioribus ipsa morte probris. Qualis fuerat obedientia Christi: *Factus obediens usq; ad mortem, mortē autem crucis.* Quod si verò hæc talis obedientiæ excellentia in militari vigere consuevit disciplina: Quemadmodum Scipio Africanus apud Plutarchum quandam turrim supra rupem in medio mari constructam indigittans, illud de suis militibus edixit: *Nullus (inquit) horum omnium est qui non conscensa hac turri semet in mare precipitaturus sit, si ego iussero.* Quanta oro in cultoribus Religioe disciplinæ obediendi promptitudo elucere deberet, etiam scilicet cum vitæ impendio.

*Theat: Zving:* Exemplo hac in parte celebris illius Stiliconis Ducis: cui cum immissi ab Honorio Imperatore milites manus iniicere conarentur, illeq; primò se acriter ac strenuè defenderet; ubi Imperatoris voluntate id fieri cognovit, manus illico dedit, seq; interfici passus est. Sic Teribafus teste Plutarcho cum contra immissos in se mili-

357  
milites acinacem strinxisset, illiq; præceptum  
Regis afferrent, confestim ensē abieciſſe fer-  
tur, manusq; vinciendas præbuisse.

Quanquam hoc ipsum pæne æquipa-  
ratur morti: non manūs tantum, non pedes, non  
oculos, non linguam, non etiam voluntatem so-  
lam, sed caput quoq; & intellectum obedi-  
tiæ immolare. Idq; adinstar immolationis Isaac,  
qui non aliter futurus erat digna DEO hostia,  
quàm si paterno ensi caput subderet præciden-  
dum. Aut etiam adinstar Lacedæmoniorum,  
quorum severissimis legibus teste Eusebio Cæ-  
sar: cautum erat, ne iis qui ad capeſſendam  
Rempublicam venissent, fas esset de legum æqui-  
tate disputare. Prout quoq; S. Hieronymus  
Epist. 4. ad Rust: cuidam monacho suadebat,  
ut nunquam de majorum suorum sententiâ ju-  
dicaret; sed illud à Moyse sibi dictum applica-  
ret: *Audi Israel Et tace.* Et hoc ipsum est, caput  
obediētiæ devovere. Idq; longè gloriosius, quā  
cū ad hoc Imperatoris Turearum imperium:  
*Da mihi caput tuum* Principalissimi quicunq;  
Bassæ & ministri absq; cunctatione sua capita  
neci offerant.

Hinc inter lapidem quo David Goliath  
percussit, ac inter gladium quo caput ejus ab-

*Premium &  
fructus talis  
obediētiæ*

stulit, discrimen est: Hic enim post peractam victoriam ad Sacrarium Divinæ domûs deferri, Ephod involvi, ibidem appendi meruit: ille nescio quo projectus; etiam in profunda oblivione sepultus mansit: Verùm quo id oro gladii merito, demerito lapidis? An non ex eo, quod lapis Davidicus collimaverit quidem ad frontem eamq; percusserit, caput tamen reliquerit penes collum & jugulum, à toto corpore indivisum: Jam gladius ita collum feriit ut idem caput penitus absciderit. Etsi verò ludentis hæc inter seria ingenii cogitatio: certè tamen excellentissimæ simul obedientiæ Symbolum, caput & intellectum, quo præmium sui obsequii non vulgare referat immolantis.

Quod vero præmium? *Disciplina tua* (inquit Plal; 17, David) *correxit me in finem.* Eusebius è Symmacho legit: *Obedientia mea augebit me.* Augebit inquam amplioribus ultra alios donis & gratiis, augebit virtutibus augebit cælesti gloria.

Hinc de Sponso Cant: 1. *Collum tuum sicut monilia:* Quo scilicet jugum excipitur: quod cum capite ad nutum obedientiæ inclinatur & subditur. Sic nempe illud eadem exornat



nat obedientia. Proinde etiam *Christus Factus obediens usq; ad mortem*, id ipsum eo testatus est, quod *inclinato capite emisit spiritum*. Propterea vero *exaltauit illum DEVS & dedit ei nomen supra omne nomen*. Non immerito fabulati antiqui Jovem hospitatorem in uxorem duxisse --- obedientiam. Ex hoc autem conjugio natam --- Felicitatem, Sancta vero Catharina Bononiensis in libello DEI jussu conscripto ait: *Quis dubitare potest de sua salute, si finiat vitam in obedientia, per quam credat firmiter se melius salvandum, quam per ullam pœnitentiam, jejunium, & quamvis contemplationem*. Huc spectat illa senis cujusdam in Vitis Patrum quâ ad quendam Tyronem usus est, de obedientia adhortatio: *Intende fili virtutis hujus aliquod ex parte vestigium: Obedientia Salus est omnium fidelium: Obedientia Genitrix est omnium virtutum: Obedientia Regni cœlorum inventrix est: Obedientia cœlos aperiens, & homines de terra elevans: Obedientia cohabitatrix Angelorum est. Obedientia Sanctorum cibus est, ex hoc enim ablaetati sunt, & per hanc ad perfectionem venerunt.*

*Apud Adrian.  
Lyra: de Imita-  
tate: Christi  
Pata*

Hic præterea locum habet, quod in  
vitis etiam Patrum Quidam ex iisdem Patribus  
narravit: *Se vidisse quatuor ordines in cælo:  
Infirmorum, Hospitalitatem sectantium, Eremitarum,  
Obedientium, hos vero idest obedientes torque  
& coronâ aureâ fuisse exornatos. Ut  
non omitam illud quod in Speculo Exempl.  
legitur: scilicet cum quondam Fratres ad Innocentii  
Monachi Sepulchrum se conferentes dicerent: Ergo o  
Innocenti mortuus es? Respondit ille ex sepulchro: Obediens  
mori non potest.*

Quamquam totius etiam Religionis ab  
obediendo dependet integritas. Uti quoq;  
de Spartanis Theopompus affirmavit: illorum  
Rempublicam stare peritia jubendi & Obediendi.  
Solon autem apud Stobæum interrogatus, quâ ratione,  
salva posset esse civitas? respondit: *Si Cives obtemperent  
suis magistratibus, magistratus autem legibus.* Inde est quod  
Cyrus Persarum Rex ( prout testatur Alexander ab Alex: )  
militem, qui cum hostem interfectorius gladium eduxisset,  
& classico audito, ictum cohibuisset, hostemq;  
dimississet, præ aliis laudibus extulit: tanti obedientiam  
militarem æstimans

Et

Et hæc nobis paupertas, hæc castitas, hæc obedientia tot præter dicta, scripturæ, aliorumq; testimoniis elucidata tum ab aliis Religionum suarum Fundatoribus tum à S Patre nostro Ignatio accuratissimè præscripta, tot Regulis expressa, tot monitis inculcata, tot firmata exemplis, ita ut ad ejus perfectionem nihil amplius desiderari videatur. Quam si ad amissum impleverimus, absq; dubio apicem sublimioris Sanctimonix, tum præmia exactissimæ paupertatis, castitatis, & obedientix tenebimus.

### ADHORTATIO III.

*Patientia Religiosa non vulgaris : sublimioris Sanctimonix individuus Comes & Affecta.*

**P**OST essentialia Religionum nuper compēdiarie expedita, nescio an non primam Religiosarum virtutum merito debeam recensere patientiam. Cū enim Religiosus status quoddam, ascetarum judicio, idq; continuum Martyrium sit; quisnam oro potiore in Religionibus locum patientiæ derogare voluerit? Aliæ videlicet virtutes hīc veluti ex parte peregrinæ



& hospites sunt, hæc pænè una cœu perennis materfamilias eaq; constanter inquilina, imò & dominatrix: Præsertim quòd ita sublimiori etiam Sanctimonix se associet, ut individuus ejus comes & assecla esse videatur. Ut igitur hanc etiam ad non vulgarem promoveamus conditionem & sortem, inpræsens conabimur.

Ubiq; ac in omni statu patientiæ locum non deesse, nemo est qui ambigat. Nempè illi non pauperum tantum servorumq; ergastula, sed regum etiam Principumq; patent angustalia. Hinc non incongrue quispiam asseruit: *Regiam sortem splendidam esse servitutem.*

Sicubi tamen, in religionibus certè patientia, & quidem non vulgaris inveniatur necesse est: ita ut non tantum Romanum, sed etiam Religiosum sit: *Magna agere & indigna pari.*

*Jerem: 2.* Quod olim DEUS Prophetæ, idem sibi quisq; Religiosus dici intelligat: *Dedi te in Civitatem munitam & in columnam ferream & in murum æreum.* Et certe plebeia oppida, luteæ casæ, extra tormenta & bellicas machinas, extra arietes, extra validos insultus, extra ictus sunt; Et si levibus quandoq; tangantur adversis:

sis : tam facile dissipantur & corruunt, quàm  
 parvo negotio exstructa fuere. Jam munitæ  
 arces, jam robusta mœnia, jam proceræ turres  
 & colossi, quot patent insultribus : quot con-  
 cutiuntur machinis ; ita ut si hostis in terra de-  
 sit, non desit coelum, quod immissis ab alto  
 fulminibus violenter feriat. Et hoc ipsum est  
 robustæ infractæq; magnitudinis, tot & tanta  
 ferre, nec cadere. Undiq; premi nec opprimi.  
 Atq; sic non alia Religiosæ mentis tum non vul-  
 garis patientiæ debet esse conditio. Ea scilicet,  
 quæ non levibus tantum adversis, sed maximis  
 etiam ictibus par sit sustinendis ; ita ut in illis  
 non tantum non corruat, sed firmitus consistat  
 dum premitur. Non dissimiliter quàm de Jo-  
 bo S. Basiliius hom: 4. de grat: act: *Nonne Job*  
*adamantino corde erat? non impacta ipsierant*  
*ex lapide viscera?* Prout quoq; quidam ma-  
 gnus Princeps apud Drexel: in gymn: pat: cu-  
 curbitam aquis innatantem pro Symbolo sibi  
 pingi iusserat cum Lem: *Luctor non mergor.*  
 Alius vero ventosæ pilæ adscripsit : *Concussa*  
*surgo.*

Idq; ad instar Palmæ cui Scriptura Ju-  
 stum assimilat : *Justus* (inquit) *ut Palma flo-*  
*rebit.*

*rebit.* Ea nimirum hujus arboris natura est,  
 ut congestis in se etiam in immensum oneribus  
 non tantum non frangatur, & fatiscat, imò  
 potentius solidetur, assurgat sublimius. Aut  
 certè illius adinstar ligni, cui Psaltes eundem  
 Justum comparat: *Erit tanquam lignum quod*  
*plantatum est secus decursus aquarum quod fru-*  
*ctum suum dabit in tempore suo, & folium ejus*  
*non defluet.* Nempe fragilis aliqua & vix exti-  
 mæ telluri inhærens arbuscula, minime est ne-  
 cesse ut succidatur bipennibus, ut à centima-  
 nis Gigantibus radicitus evellatur, ut in eam  
 Boreales venti ac fulmina defæviant: violentæ  
 circumquaq; eluviones irruant, letales ictus  
 concutiant: vel unius Noti afflatu læditur,  
 unius pueruli nisu evellitur, modicæ pluvix de-  
 cursu profligatur & sternitur: secus procera firmi-  
 terq; radicata arbor, quam non decumani flu-  
 ctus ac turbines, non jurati ventorum impetus,  
 non quæcunq; bipennes manusq; conficiunt:  
 imò stabiliunt magis, radicant profundius,  
 uberius propagant: ita, ut de illa dici veriùs pos-  
 sit quam quod de quopiam alio Pòëta. *Ceu flu-*  
*ctibus obvia rupes, cui neq; de cælo metus, &*  
*fracta æquora cadunt, stat cunctis immota mi-*  
*nis,*



*nis, timet ipse rigentem Pontus. Aut certè quod  
alibi de alia arbore: Duris ut Ilex tonsa bipen-  
nibus Per damna, per cades, ab ipso Ducit opes  
animumq; ferro. Uti idipsum de Hercule apud  
Tragæd: Inter vapores posuit & flammæ mi-  
nas, correpta flectens membra, adhortatur,  
monet, gerit aliquid ardens: omnibus fortem  
addidit animum ministris: urere ardentem putes.*

Qualis ille quoq; de quo sub alia alle-  
goria Ecclesiasticus: *Non illidetur quasi in pro-  
cella navis* Sicut videlicet minutarum ac in-  
validarum triremium est, minima tempestate  
concuti, dissolvi, obrui ac mergi: Validarum è  
contra beneq; compactarum navium nullis flu-  
ctibus cedere, ridere, provocare Euros Neptu-  
numq; Patrem, nullâ jacturâ sui, inter adver-  
sas qualvis tempestates versari. Ita Religiosæ  
nec vulgaris patientiæ est in gravissimis etiam  
adversis, integro semper infractoque animo esse:  
Ut olim Anaxarchus tyranno reponebat: *Ana-  
xarchi pellem tundis, animum non tundes.* Age-  
silaus quoq; teste Plutarcho in Lacon: cum ar-  
deret podagræ doloribus, eumq; Carneades invi-  
sisset, atq; exiret tristis: *Mane* (inquit) *Cornea-  
de nihil enim illinc huc pervenit: Ostensis pedi-*  
*bus*

bus & pectore, significans pedes quidem dolere, sed animum dolore vacuum esse. Aut certe qualis in mare ejectus Jonas fuerat de semet annuntians : *Flumen circumdedit me & omnes gurgites tui & fluctus tui super me transierunt; abyssus vallavit me, pelagus operuit caput meum.* Ubi non uno parvo gurgite, sed toto mari mergitur; ut inde illustrior ac prodigiosior, emergeret, devoratus à pisce nec absumptus : ac si ipsa illum pro vallo muniente abyssso : præclaro sanè insignis patientiæ Symbolo : in cuius caput etsi tota sese effundant maria : adhuc illam non ita obruent, ut inde thaumaturga enatare non possit : inter mille dentes quibus roditur semper integra, nunquam consumpta ; juxta illud scripturæ : *Cum te consumptum putaveris, orieris ut Lucifer.*

Quid Patientiam æquoris procellarumq; triumphatricem enuntio ? cum illa iis etiam ipsis procellis amarisq; fluctibus, quibus absorbentur & merguntur alii, deliciosè pascatur, eosq; suaviter absorbeat : *Inundationem maris* (inquit scriptura) *tanquam lac sugent.* Hoc nempe ipsum Patientiæ non vulgaris proprium est, non tantum quæcunq; amara quomodocunq; acceptare

ac ferre, sed etiam velut cum gustu absorbere, sapore quodam ac dulcedine in illis perfrui, imò ad ea, velut ad lac & mamillas, adinstar infantum aspirare, ardentiq; orexi ferri.

Et hæc talisq; patientia utpote non plebeja, triumphalis omnium adversorum domitrix non immerito apud Apostolum splendide incedit coronata: *Non coronabitur nisi qui legitime certaverit.* Unde vero illi hæc corona pulchrius texatur? quàm ex ipsismet adversis quæ generosè tolerat, gloriosè triumphat. Ita plane, uti Soli (quod alibi etiam convenienter) nubibus circumsepto inscriptum: *Me nubilavicta coronant.* Aut illius adinstar, quod Pellegrinus testatur: Domitianum scilicet Cæsarem ita egregium fuisse sagittarium, ut fugientem cervum sagittis impetens, *caput ejus telis coronaret.*

Et hoc est quod ait Propheta: *Coronans coronabit te tribulatione.* Quæ autem hæc tribulatio in coronam effingenda? Novimus utiq; quæcunq; minoris momenti artefacta, quacunq; ac viliori etiam, aut saltem mediocri materia constare: Jam si diadema regio capiti fabricandum sit, non qualicunq; metallo, imò nec ipso cujuscunq; examinis auro opus esse:

A a a

Atq;



Atq; ita non alia quoq; sit tribulatio, quæ adve-  
 forum triumphatoribus in coronam formetur.  
 Ultra id, quod congruè patientiæ adscriptum :  
*Patientia colligit rosas*, quibus utiq; sui cultores  
 coronet. Nisi quod vile admodum esset corona-  
 mentum ejusmodi : cum Deus longè pretiosiore  
 diademate nostras tolerantias rependat : uti in-  
 ter alios B. Gulielmo Roschildensi in Dania Ab-  
 bati nonagesimum annum agenti monstratum  
 est, qui per noctis quietem vidit Angelos coro-  
 nam auro gemmisq; distinctam affabrè texentes :  
 cumq; obstupescens quæreret, cui eam appa-  
 rent ? Respondentes audivit : sibi parari, &  
 tunc perficiendam esse, cum satis passus esset.

Liceat hic Angelum Apocalypticum spe-  
 ctare coronatum. Quo vero diademate ? ad-  
 modum raro ac insigni. *Iris* (inquit) *in capite*  
*ejus*. Iris inquam è nubibus, quæ sunt tribu-  
 lationum Symbolum, efficta, aut progenita. Et  
 meritò tali debuit insigniri diademate, qui post  
 terram terrenaq; omnia infra pedes abiecit, non  
 tenuem rivum, non flumen decurrens, sed ma-  
 re tribulationum integrum superavit, calcavitq;  
 hisce omnibus longè major longeq; Superior.  
*Posuit pedem dextrum super mare, sinistrum su-*

per

per terram. Idq; eo gloriosius, quod cum eum  
nubes omni tempestatum genere referta undiq;  
contextisset, adhuc tamen serenâ adinstar solis  
facie resplenduerit: *Amictus nube, facies ejus  
sicut Sol.* Et idem planè de Ethnico etiam  
Socrate apud Senecam Epist: 104. *Hæc usq; eo  
animum Socratis non moverunt, ut ne vultum  
quidem moverit. Non hilarem quisquam non  
tristiores vidit Socratem, equalis fuit in tanta  
inequalitate fortuna: Proinde solari vultu: Uti  
etiam Cato, de quo Idem Ibidem. Nemo mu-  
tatum Catonem toties mutata Republica vidit,  
eundem se in omni statu præstitit, semper idem  
extitit.* Hic planè locum habet, quod Magnus  
Præles Rhodiorum Equitum Franciscus Villa-  
dumius in Symbolo circumtulit, scilicet Solem  
cum inscriptione: *Vbiq; similis* ( Engelgr.  
Dominica 2, Quadrag. )

Nec alio profectò diademate dignus ille  
quoq; fuerat qui de se audacter pronuntiaverat:  
*Hæc mihi sit consolatio, ut affligens me dolore non* Job 4.  
*parcat.* Ubi tam rigidos dolores ac pænas, inter  
solatia numerat, reponit inter lucra. Aut ille  
qui in eo gloriatus: quod fusiùs recenset: *Mi-  
nistri* ( inquit ) *Christi sunt, plus ego: In la-  
boribus*

boribus plurimis, in carceribus abundantius, in plagis supra modum, in mortibus frequenter: Et longè plura alia. En quanta specimina, non vulgaris, abundantius supra modum, non unius etiam mortis discrimina sustinentis patientiæ. Nisi quod de gentilibus quoq; scilicet de Persis Stobæus id referat, nempe morem apud illos fuisse: ut si quem Civium Rex citari, & quantumvis innocentem flagellari iussisset, ille sic cæsus, amplissimas ageret gratias, quod Rex sui tam benevolè meminisset.

Quid de illis de quibus Sap: 3. *Tanquam aurum in fornace probavit illos, & quasi holocausti hostiam accepit eos.* Ubi in tolerantia adversitatum, quid in his mediocri, quid vulgare? dum non auro qualicunq;, sed fornace probatissimo, non cuicunq; hostiæ, sed quæ de integro nulla sui parte relicta, absumenda erat, hostiæ utiq; holocausti, comparantur. Eo pertinet quod Psalmo 43. *Propter te mortificamur tota die, æstimati sumus velut oves occisionis.* Non dicit: Lupi aliæq; nocentes bestię, Nempe jucundissimum DEO holocaustum ex innocenti ovium, idest iustorum grege: Talisq; præ aliis, scilicet absq; ullo demerito



merito gloriosa patientia. Hinc cum quidam  
Phocioni condolens diceret : *Innocens moreris ?*  
ille reposuit : *Vis ut nocens moriar ?*

Et quia superius allata Psalmi verba :  
*Iustus ut palma florebit*, alii legunt : *Iustus ut*  
*phœnix* : Certè quid insignitius quid rarius tali  
patientiae cultore, qui Phœnicis adinstar rogos  
non refugit, sed se in illos sponte iniicit,  
promptus dissolvi in pulverem, modo integra  
sit patientiae virtus & gloria, ac velut ex cinere  
suo reviviscat & assurgat. Præsertim quod  
juxta Pœtam : *Ordo renascendi est, crescere*  
*posse malis*.

Quamquam non ablimilis ille, quisquis  
de se protulit : *Quasi myrrha electa dedi sua-*  
*vitatem odoris* : Myrrha inquam quæ vel con-  
teri vel in ignem mitti non detrectat, modo suæ  
odorem tolerantiae spargat. Præsertim quod  
etiam egregiis viris ipsæ ærumnæ in decus &  
gloriam cedunt. Uti Sidonius ad Narbonen-  
sem urbem : *Noli (inquit) te ipsam erubescere,*  
*quod te machina crebra perforavit* : Namq; in  
corpore fortium virorum laus est amplior, am-  
plior cicatrix.

Nec certè alia patientia de ratione sublimioris Sanctimonix est. Prout in illa anima adumbratum est : quam nescio qui cum admiratione contemplantès, sese ad invicem interrogant : *Quæ est ista , quæ ascendit per desertum , sicut virgula fumi ex aromatibus myrrhæ ?* Unde vero hic virgulæ talis ascensus ? certè non aliunde , quàm à myrrhæ in pulverem contrita , ad ignes damnata , ignibus exusta. Nec aliter facilius nostra quoq; virtus , & Sanctitas assurgit ascenditq; in sublime : quàm dum sic inter adversa velut inter ignes ponitur probaturq;. Ita ut hic etiam locum habeat , quod Salamandræ inter ignes positæ adscriptum : *Dat flamma vigorem.* Aut quod apud Pòétam : *Alma licet virtus , adversa sorte prematur , pressa tamen victrix aliis ire solet.*

Sic Matth. 21. Christus ait in parabola : *Homo erat Paterfamilias qui plantavit vineam & fodit in ea torcular , & edificavit turrim.* Quid verò interim convenientius hæc vinea , nisi anima iusti ? quid torcular nisi patientiæ studium ? quid turris ? nisi sublimioris structura Sanctimonix ; En igitur uti hic Turris non sine

ne torculari, nec sublimior Sanctitas sine tolerantia eaque non vulgari. Novimus utiq; quanta à torculari eodem uvarum pressura ac tormentum.

An non vero talis patientia præter alia *Moyse* DEVM Pharaonis constituit? Cum etiam Stoicus de Ira lib. 2 cap. 25. *Multa incidunt tristitia, horrenda, dura toleratu? Ferte fortiter: hoc est, quo DEVM anteceditis. Ille extra patientiam malorum est, vos supra patientiam.* Alio vero loco: *Ecce par DEO dignum, vir fortis cum mala fortuna compositus: Ecce spectaculum DEO dignum.*

Atq; hujus, talisq; patientiæ si nos quoq; strenui voluerimus esse imitatores, absq; dubio ejus coronæ & gloriæ quam patientia operatur compotes esse merebimur. Non aliter tamen nisi in palmam hanc ejusq; cūlmen & fastigium ascendamus: frustra in radice vel medio fructus ejus apprehensuri. Imò nec tentaturi quidem quam pro DEO ejusq; gloria egregium juxta Divi Indiarum Apostoli effatū: *Quorum (inquit) virtus in arumnis & insectationibus spectata non est, his nihil magnum recte committitur.* Lib. 4. Epistolâ 9. Ut igitur magna agamus.



mus pro DEI gloria animarumq; salute, magna quoq; patiamur ac immoriamur patiendo. Illud nobis quod Sanctior quapiam anima occinendo : *Pati & mori*. Aut illud etiam mente verlando, quod Seneca: *Ego (inquit) Herculem fleam, quodd. virum uritur? aut Regulum, quodd. tot clavis configitur? aut Catonem, quodd. vulnus suum iteravit? omnes isti levi temporis impensâ invenerunt, quomodo æterni fierent*. Ex hæc ipsa nobis quoq; æternitas gravissima quæq; efficiet levia, amarissima reddet dulcia: ipso etiam id ipsum insulurrante Apostolo: *Mentaneum & leve tribulationis genus æternum gloriæ pondus operatur in nobis.*



ADHOR-

## ADHORTATIO IV.

*Humilitatis Religiosæ, profundissimi utiq; , non  
vulgaris Sanctimonie fundamenti sublimitas.*

**D**Um Asceticis adhortationibus non vulga-  
rem promovemus Sanctimoniam, quid  
aliud facimus, quàm exstruendo spiritali ædi-  
ficio materiam comportamus. Et quia hujus  
ejusdem ædificii potissimum fundamentum est  
Religiosa humilitas; ideo ad hoc etiam ipsum  
ut non vulgare nec perfunctorium sit, nostram  
inpræfens operam ac dictionem conferamus.

Satis superq; perspectum habemus, à fun-  
damento totius fabricæ molem dependere: ita  
ut quò sublimior atq; excellentior structura  
educenda est; eò quoq; profundius, firmitus, per-  
fectius, nobiliusq; fundamentum habeat neces-  
se. Attestante etiam in rem Nostram D. Au-  
gustino Serm: 10. de verbis Domini: *Quantam  
quisq; vult & disponit superimponere molem  
ædificii; quanto erit majus ædificium, tanto al-  
tius fodit fundamentum. Et fabrica quidem  
cùm construitur, in superna consurgit: qui au-  
tem fodit fundamentum, ad ima deprimitur.*

B b b

Dum

Dum igitur & nos non cujuscunq̃, sed sublimioris Sanctimonix fabricam aggredimur, de qua certè cum præfato Doctore loqui licet: *Quod est fastigium construenda Fabricæ quam molimur? quo perventurum est cacumen edificii?* Cito dico: usq̃ ad conspectum DEI. Quomodo proinde illi de proportionato fundamento non providebimus? Et quia hoc non aliud est, quam Religiosa ut diximus humilitas, monente etiam, loco citato, eodem S. Augustino: *Cogitas (inquit) magnam Fabricam construere celsitudinis, de fundamento prius cogita humilitatis. Ex quo & Fabrica ante celsitudinem humiliatur, & fastigium post humiliationem erigitur.* Quis autem itaq̃ illius hoc est humilitatis mediocritate contentus esse volet? Sicubi hic certe detestanda omnis mediocritas, eoq̃ in tui humiliatione connitendum, ut amplius non habeas, quo te magis magisq̃ humilies.

Sic planè, ut in Jacobi Patriarchæ contigit spectaculo: Vidit ille *scalam stantem super terram & cacumen ejus tangens calum. Angelos quoq̃ DEI ascendentes & descendentes per eam: & Dominum innixum Scala.* In quo  
 yerò



verò hic non vulgaris humilitatis idea & exemplum? Dicerem in descendentibus infra Angelis. Verum horum alii dum descenderent hæserè circa medium, alii terræ, alii Coelo propius. Ita ut quisq; illorum habuerit, quò se ultra demitteret, nullus in gradu infimo consisterit, nullus quieverit in ipso humilitatis fundo. Unde non stantes, non quiescentes dicuntur, sed descendentes, ex quo videlicet gradus scalaq; supererant, per quam se inferius possent demittere; altius etiam ascendere parati. Ideoq; hic descensus cum ascensu, demissio cum elatione permixta fuisse videbantur: *Vidi (inquit) Angelos ascendentes & descendentes per eam.* Quis igitur hoc in passu longè pulcherrimum veræ ac genuinæ humilitatis de se præbuit spectaculum? Pleriq; Doctores aiunt Dominum non in summo scalæ, sed in infimo innixum fuisse, adeoq; in illo eximium humilitatis non vulgaris eluxisse Symbolum: in eo inquam, qui se ita demisisset, ut non posset magis: in illoq; humilitatis sese collocasset gradu, post quem alius non esset, in quem se ulteriori sui demissione conferret: Si enim per Scalæ gradus Sacri Interpretes Creaturas intelligunt; quisnam oro

sese potest illô demittere inferius, qui se demisit infra omnes? Unde non immeritò Dominus dicitur fuisse *innixus Scalæ*, seu (ut alii) *incubuisse eidem*, id est *quievissse*: Cùm enim nihil amplius superesset quò descenderet, omnino illi post tantum humiliationis exactum spatium incubandum, velutq; in termino quiescendum erat. Pleriq; ita descendunt, ita se humiliant; ut vel inde altius sese erigant, ascendantq; sublimius: adeoq; ipsa illis humilitas ad elationem ac superbiam gradus est. Nempe consistere nonnisi ad modicum, & non quiescere norunt in humilitatis declivi. Ea verò perfecta demissio, quæ non aliter novit sese præcipitare ad infima, nisi ut ibi sine spe ac molimine ascensus quiescat.

Nec alia demissione inclaruit lapis ille Propheticus, qui spreto eo omni, quod in auro argentoq; , ære ac ferro sublimius erat, ad pedes usq; statux, ad fundum utiq; humilitatis se deiecit; idq; non alio fine, quàm ut ibidem quiesceret. Lapidem nempe sursum attolli violentum, in centro decumbere, juxta naturam est. Et hinc facile discrimen pater, tum inter hunc eundem lapidem, tum inter illum Davidicum,

dicum, quo caput & frontem Golizæ ferit.  
 De illo inprimis proditum, quòd ita creverit  
 in montem magnum; ut universam terram re-  
 plevit: de hoc Davidico, quòd assurrexerit  
 in rupem saltem modicam, nihil posthumæ  
 memoriæ relictum est. Quæ autem in utroq;  
 hujus discriminis ratio? Nempe hic Propheti-  
 cus, eò se ut audimus demisit, quo loco ipsa  
 humilitas confedisset. Davidicus ille non tam  
 fundæ jactu, quàm fastu quasi elatus, æeremq;  
 verberans in caput ipsum inpegit: atq; sic fron-  
 ti infixus, cum collapsus in terram Philistæo,  
 eodem & ipse casu, infra, dum se ad verticem  
 erigeret, corruit: Clariori ultra meridianam  
 lucem documento, non aliter facilius in subli-  
 me virtutis & gloriæ quemq; eniti posse, quàm  
 propriâ veræ humilitatis ruinâ, quæ quò pro-  
 fundior, eò Sanctimonix fabrica sublimior,  
 eò gloria speciosior. Uti in simili apud Plinium  
 acclamatum Trajano: *Tanto major, tanto au-*  
*gustior.* Insuperq; de eodem additum: *Hoc*  
*magis excellit atq; eminet, quòd unum se ex nobis*  
*putet, excellenti utiq; demissione id ipsum di-*  
*ctante de qua illud etiam in universali Plinius:*  
*Cui nihil ad augendum fastigium superest; hic*



uno modo crescere potest; si se ipse submittat,  
securus magnitudinis suae.

Ezech. 1.

Quid enim inter quatuor Cherubica animalia, præ illis ipsis, superius Aquilam collocavit? *Facies Aquilæ desuper illorum quatuor.* Nisi quod se illa præ iisdem eò profundius quò exaltiori gradu demiserit. Aliis quippe animalibus, homini scilicet, bovi, leoniq; ex natura in terra repere solitum est, ita, ut per id, vix humilitatis laudem adepta fuerint: quòd se currui gloriæ divinæ adjunxerint: Jam Aquilæ à summo aere, à præcelso supra Cedros Libani collocato nido, ab ipsa Regia solis, heroica sui demissio. Et hæc planè Cherubica humilitas, quæ quo se ex sublimiori gradu ad infima dejicit, eo superius præ aliis culmen Sanctimonix obrinet. Præsertim cum Divus etiam Laurentius Justinianus eandem humilitatem *Reginam Virtutum* nominaverit. Ipsi Symbolum Piscis Purpura dictus: qui juxta Pierium lib. 27. Hierogl: *Ascendit ad regium ornamentum; prius tamen in profundo pelagi quæri solet, ubi solum invenitur.*

Ad eumq; planè scopum collimavit ille, qui insigni resolutione illud de se protulit: *Vilior*

*hior fiam plus quàm factus sum.* Factus inquam à natura, fortuna, gratia. Non qualicumq; videlicet sui humiliatione cor tentus, ad profundiorē aspirabat; ut vel sic fundum humilitatis inveniret, ac merito dicere posset: *Ego autem humiliatus sum nimis.* Certè enim *nimis*: cùm se etiam coram reprobato Saule eanem eumq; mortuum appellaverit: etiam si jam tunc in Regem unctus fuerit. Ecce verò, quò hunc DEI Servum sua provexit humilitas! Eò scilicet, ut illud de semet addiderit: *Ero humilis in oculis meis, & gloriosior apparebo*: Insuperq; illum eadem humilitas supra omnes populi Israelitici Reges, imò secundum ipsum Cor DEI Sanctimoniā & gloriā collocaverit. Quam & ipsi Sauli à Samuele dictum: *Nonne cùm parvulus esses in oculis tuis, caput in tribubus Israel factus es.* De Phraate autem Rege Horatius: *Ius Imperiumq; Phraates, Caesaris accepit genibus minor* idest infra genua Caesaris ejusdem se humilians. Uti & Mithridates infra genua quoq; Pompeii se demittens regium de manibus ejus diadema recepit.

Quid de Divinissimo Baptista quo *non surrexit major inter natos mulierum*? Unde

enim hic ascensus? si non ab ipsa in quam se præcipitavit humilitatis abyſſo: cum se eo etiam indignum profiteretur: *Vt corrigiam calceamenti Salvatoris dissolveret.* Ad quod S. Augustinus tractatu 4. in Joann: *Quod si dignum se diceret, quàm humilis esset? Quando autem nec ad hoc se dignum dicit: verè plenus Spiritu Sancto erat.* Hinc est quod etiam de Servio Rege Romanorum Seneca: *Servium* (inquit) *Regem tulit Roma, in cujus virtutibus, humilitate nihil clarius.*

Præsertim cùm eadem ipsa humilitas, non quomocunq; suos cultores ultra alios crescere faciat; sed eos quoq; plusquam regia donet dignitate & coronâ: hinc Sponsæ in Canticis, in præmium humiliationis ac descensûs de Libano, hæc eadem dignitas & corona defertur: *Veni de Libano coronaberis.* Liliū quoq; à Christo ipsi præfertur Salomoni: *Nec Salomon in omni gloria sua sicut unum ex istis.* Ultra id quod de illo Plinius: *Nulli florum excelsitas major.* Seu quod apud Pœtam: *Flores supereminet omnes.* Unde verò tanta illi sublimitas? certe non aliunde, quàm quod ab eodem Plinio subiicitur: *languido* (inquit) *collo*



collo est, & quasi non sufficienti capitis oneri.  
Idq; pro demissionis Symbolo & nota.

Haud dispari sorte ab illa Eliæ nubecula; quæ dum omni fastu contempto, infimi humani vestigii speciem induit, ultra mare & terras evecta, in copiosos diffluit inbres ac fructus: *Ecce nubecula parva ascendebat de mari quasi vestigium hominis: & facta est pluvia grandis.* Nempe nulli magis sublimiore Sanctimoniâ eminent, uberioresq; suis prædicationibus sudoribusq; velut profuso imbre animarum proventus efficiunt, quàm qui insigni humilitate infra ipsos pedes ac vestigia aliorum se deprimunt. Ut id non memorem, cujus Neotericus quispiam admonet: *Sine (inquit) alios in mirabilibus super se, super aliorum capita volare, tu humili latus in scabello vel scabellum omnium factus remotior es à ruina. Ita sicut qui jacet in terra non habet unde cadat.*

Imo nulli etiam efficacius in intimam ipsius DEI amicitiam & gratiam sese insinuant; quàm qui eâdem humilitate, longè aliis præstant. Quemadmodum celeberrimus ille Abraham, qui ad Divinum colloquium admissus, illud fidenter prolocutus est: *Loquar ad Do-*

C c c

minum

Ex floribus  
Indicis.

*minum cum sim pulvis & cinis* : Vel ideo scilicet sibi divini colloqui & gratiæ patere adita intellexit : quod se in suppedaneum usque cinerem humilitatis artificio transformasset.

Quid verò Sponsus ad Sponsam : *Vulnerasti* ( inquit ) *cor meum in uno crine colli tui* : sunt qui legunt : *cepisti, captivasti*. Quis vero talis crinis captivans cor Sponsi idest Christi? Respondet Rupertus in Cant: *Quid gracilius, quid flexibilius crine unico? quid subtilius & contractius humilitate? capillum unicum vix oculi deprehendunt, humilitas eo deprimat hominem, ut vix sese inter homines numeret.*

Quamquam hoc ipsum probatissimæ Sanctimonix Lydius lapis est; ita se infra deiecere, ut etiam calcari proterique velis. Uti S. Joannes in sua Apocalypsi de Coelesti Jerusalem: *Aurum* ( inquit ) *mundum plateæ ejus*. Hoc enim certè ipso ex vili metallo in aurum degeneras: si in modum plateæ ad calcandum te deitias, eò pretiosior quò humilior. Licet verò aureus defacto esses, eo saltem ipso calcari desideres; ut probes te aurum non plumbum esse. Quod enim hinc calcatur, aurum est.

Ecquis

Ecquis vero Verbo Incarnato sese potuit deprimere profundius, de quo Apostolus: *Humiliavit semetipsum formam servi accipiens.* Nimirum non accidentia tantum, non extimam aliquam humilitatis superficiem inducere, sed ipsam ejus formam assumere voluit. Imò abdicatâ ipsius formâ hominis, vermem, ad se etiam calcandum proterendumq; induit. Ego (inquit) *vermis & non homo*: Quid dico vermem? Imò tandem insigni humilitatis gradatione in nihilum abiit. Ecce ego (inquiens) *tanquam nihilum ante te.* Ut sic nobis hac in parte suo exemplo præluceret: simulq; quò talis duceret humilitas, in seipso declararet: nempe ad eam exaltationem, quam in semet idem Christus assecutus est, attestante Apostolo: *Propterea exaltavit illum DEVS*: Exaltavit inquam ad supremæ Divinæ gloriæ possessionem locationemq; ad dexteram ipsius DEI Patris: incomparabiliter verius atq; excellentius; quàm dum Athenienses Pompeio adventanti, divinosq; honores recusanti scripsere: *Quatenus te censes hominem, eatenus nobis eris DEVS.* Cum præterea S. Ambrosius in Serm:

C c c 2

Quis-

Apud P. Tob:  
Lohner in  
Bibl:



*Quisquis cupit divinitatis tenere fastigium, humilitatis ima sectetur.*

Et hæc talisq; humilitas non tantum ad divini cordis, sed ad cœli etiam totius delectamentum, juxta illud Psaltis: *Fluminis impetus latificat Civitatem DEI*: Fluminis inquam ex natura sua tanto majori decurrentis impetu, quanto majus invenerit declive & profundum.

Defactoq; talem animi demissionem, tum Evangelium tum quodcunq; Religiosum institutum sui sectatoribus unice commendat: ita, ut etiam Sanctus Pater noster Ignatius non alio suam Religionem, quam minimæ Societatis insigniverit vocabulo; nempe ut eo illam deprimeret, quo nullus sese deicere inferius magisq; decrefcere posset. Hic utiq; superlativus diminuens ac deprimens est; proindeq; in infimo gradu collocans.

Hanc igitur ipsam nobis quoq; sectari conveniat, ut inde ad sublimiorem ententibus Sanctimoniam, tanto expeditior ascensus patefiat.

AD.

## ADHORTATIO V.

*Resignatio sui in DEI superiorumq; voluntatem  
ac plena indifferentia, sublimioris Sanctimonie  
manductrix absq; errore dexterrima ac  
felicissima: eaq; non vulgaris.*

**H**umilitatem Religiosam fundamentum esse  
ædificii spiritualis communis Ascetarum  
enuntiat decisio : nosq; immediata adhorta-  
tione ediximus. Et quia ex fundamento to-  
tam ædificii consurgere molem novimus : hinc  
ex humilitate quoq; tota virtutum ac perfectio-  
nis Religiosæ structura attollitur. Quoniam  
verò Resignatio sui ac indifferentia non postre-  
mum locum in eodem ædificio Spirituali occu-  
pat, atq; etiam à vera animi demissione tan-  
quam germana Soboles promanat : ita ut subli-  
mioris etiam Sanctimonie non alia dexterior  
omnis erroris expers feliciorq; manductrix ul-  
tra illam cogitari possit : ideo de hac inpræsens  
ad non vulgarem mensuram & excellentiam  
provehendâ nobis agendum erit.

Numerosam virtutum seriem Religio-  
sa intra se recenset perfectio. Aliæ tamen ex  
his cum secularibus nobis sunt communes : aliæ

Religiosi peculiare Institutum. Inter has verò Resignatio ac Indifferentia potissimum numeranda: quæ si ad quos, maximè ad Religiosos pertinet, ita ut illorum vix non propria esse censeatur. Si quam igitur virtutem, certè hanc ipsam, pænè vel maximè in nobis Religiosis decet esse non vulgarem: ut simus velut viva quædam ad DEUM ejusq; Sanctissimam voluntatem, tanquam ad solem, quodammodo Sympathice conversa heliotropia.

Optimè eandem Resignationem adumbratam legimus in illo lapide quem jam toties velut Zizyphi versamus, Prophetico, quemve Rex Babylonius vidit per Somnium, *Abscissum de monte sine manibus, percussisse Statuam in pedibus fictilibus: tum crevisse in montem magnum ac replevisse universam terram.* Ubi duo nobis in hoc uno lapide considerata occurrunt. Viva in primis in ipso Resignationis non vulgaris effigies: tum admirabilis ejus ipsius resignationis successus. Quoad primum? hoc unum dixisse sufficiat: quòd hic lapis Propheticus lapis fuerit: lapis inquam ut innuitur, *Sine manibus*: quibus scilicet suæ fortunæ faber esse potuisset: sine pedibus quibus sueta ambien-



ambientium æmulo passur decurrisset Olympia,  
 suis occurrisset incommodis ; sua commoda  
 properantius insecutus fuisset : sine oculis qui-  
 bus sibi prospexisset : sine capite ac cerebro  
 quo suæ forti propriisq; consulisset emolument-  
 tis. Sine lingua, quâ patronâ pro sua domo fuisset  
 usus : sine corde, quo in amorem & affectum  
 erga rem quampiam vel excellentiam privatam  
 exarsisset : sine palato sine ventre, in cuius gra-  
 tiam & commodum laborasset : sine omni sen-  
 su, quo seu adversa, seu prospera sensisset inti-  
 mius. Lapis deniq; totus alienæ de se dispo-  
 sitioni ac regimini plene relictus : nulli suæ  
 curæ, industriæ, ac sollicitudini obnoxius : Nul-  
 lus rei appetens, nihil detrectans : quocunq;  
 loco se reponi ac in eodem etiam licet infimo  
 per ævum relinqui, quacunq; manu tractari  
 imò & percuti, cuicunq; se usui adhiberi imò  
 & proici omnino patiens. Neq; hic ullar di-  
 gnatione movetur, se ad pedes usq; statuat, se  
 ad lutum dejectum. Insuper nec id etiam que-  
 stus, quasi aliud illi, alia quæpiam sublimior  
 meta deberetur ; ex quo non de humili aliqua  
 conditione, sed de ipso nobiliore forsitan mon-  
 te sumptus esset, ab alto suam duceret origi-

nem

nem. Et videte iam, quo hâc suâ indifferen-  
tiâ evaserit! Nempe eo usq; quo nec Aquila  
alarum suarum impendio evolare, quo nec  
Gigas Centimanus imponens Pelion Ossæ a-  
scenderet, quo nec ipse pertingeret Atlas aut  
exresceret Olympus: quo nec Phaeton cur-  
ribus paternis devectus fuisset: *Crevit* (inquit  
scriptura: *in montem magnum, & implevit uni-  
versam terram.* Terra utiq; tota, latitudinis  
erat spatium: quis igitur, si proportionem spe-  
ctes, terminus altitudinis? Neq; vero alia Re-  
ligiosi plenè resignati ac indifferentis conditio:  
qui ut in sublime virtutis meritorum donorum  
& gloriæ cælestis exrescat, orbem famâ Sancti-  
tatis non vulgaris impleat; adinstar lapidis sit:  
hoc est omni ex parte sui negligens, totus in  
alienam projectus voluntatem: ac si omni affe-  
ctu, sensu, appetitu, ac etiam, intelligentiâ carens.  
Uti & ille alter Propheticus lapis de quo Zach:3.  
*Ecce lapis quem dedi coram JESU.* Quidnam  
vero de illo DEUS ibidem apud eundem Pro-  
phetam? *Ego* (inquit) *celabo sculpturam ejus.*  
Ac si ipse DEUS potens de lapidibus excitare  
filios Abrahæ curam illius & celaturam in se su-  
sceperet.

Et

Et hujus defacto apprehensionis ille fuerat, qui ea aspiratione ad DEUM suum usus est: *In manibus tuis sortes meæ.* Ac si dixisset: *Psalms: 30*  
Absit ut ego, vel digitum ad promovendam quamcunq; meam sortem admoveam. Integram in tuas manus ac sinum repono, intactam relinquo. Quidquid evenerit, velut de tuis manibus æquāmissimè expecto. Illud supremæ meæ felicitati duco, quidquid è sinu nutuq; tuo in me defluerit. Neq; ea sui resignatione exerravit vel tantillum. Dum enim suis se manibus expedit, divinis relinquit; in eam sortem evectus est, ut illum eadem manus ipsi cordi divino admoverint, extulerint supra omnes. Plane hic congruit quod Neotericus in Floribus Indicis: *Si tua (inquit) voluntas in DEI voluntatem transeat, supra dominium fortunæ, imò supra naturæ jura positus beatus es.*

Quemadmodum ille de quo Angelus ad Zachariam: *Erit magnus coram Domino:* Magnus utiq; excellentissimâ Sanctimoniâ & merito. *Etenim* (additur in Evangelio) *manus Domini erat cum illo.* Quæ namq; manus eo nos efferat? quo suos effert manus ipsius Altissimi.

D d d

Ut



Ut non amplius mirum sit eos Apoc: 1. in stellas primarias degenerasse, qui se huic ipsi dexteræ commisere: *In dextera (inquit) habebat stellas 7.* Longè feliciori prodigio, quàm cum Midas manuum suarum attractu omnia in aurum converteret.

Nec alio spectat illa Psaltis resolutio: *Ut jumentum (inquit) factus sum apud te, & ego semper tecum.* Quid autem jumento ad quævis etiam vilissima & usus quosvis indifferentius, quid tractabilius? ita ut nec nobilioribus oneribus ac ornamentis efferatur, aut afficiatur vel minimum, nec virioribus quibusq; obsequiis reluctetur, pro eodemq; illi sit cuicunq; applicari usui, & cuicunq; muneri. Qualem se profecto erga divinam præstitit providentiam Psaltes: cum hæc ipsa de se pronuntiaret: *Ut jumentum factus sum &c.* Dum verò ita se ad omnia flexibilem exhibet, & uni supra terram sub quovis onere reptanti jumento confert: ecce illico ultra tellurem provectus, in sole cum Aquilis obtutum figit: ut ipsemet animam suam alloquitur: Psalm: 102. *Renovabitur ut Aquila juvenus tua:* Imò ipsius etiam DEI lateri se strictius admovent: *Et ego (inquit) semper tecum.* Quan-

Quanquam libeat hic à virga Aaroni-  
ca indifferentiæ petere Symbolum. Diu illa  
sive Moyſis sive Aaronis tractata manibus, ad  
Regum Ægyptiorum delata non semel augu-  
stata. Sic tamen arida, inops, infructuosa  
remanſit. Vix ad DEI propitiatorium delata,  
vix in Numinis solius ibidem præſentis tute-  
lam ac providentiam projecta verius, quàm re-  
posita: ecce illico unius noctis impendio in  
flores ac fructus sese explicuit: evidenti docu-  
mento, nullos quibus cunq; etiam beneficentis-  
simis manibus commissos, citius sive in Sancti-  
monia, sive in Sanctimonie præmiū efflorescere,  
quàm qui se unius Dei per Superiores eos regen-  
tis tutelæ penitus subjecerint. Idq; ad instar illius  
etiam arboris, cui in Psalmo Justus assimilatur,  
deq; illa Psalter inter cætera illud enuntiat: *Quod  
scilicet folium ejus non defluet.* Id autem ipsum  
non inconvenienter Heliotropio quoq; Resi-  
gnati plenè in Deum hominis Symbolo applica-  
tur: de quo illud Plinii apud Drexel: *Heliotro-  
pio sunt æterna folia.* Uti alibi etiam apud Pœ-  
tam ubi *æternos flores æternū cernere fructū est.*

Nec frustra S. Pater Ignatius sui insti-  
tuti Religiosos in manibus DEI ac Superiorum

non aliter quàm velut senis baculum esse voluit. Aliud quippe est, baculum seu virgam in manibus senis, & aliud, in manibus cuiuspiam alterius degere. Scimus utiq; siue juvenes, siue alios adultiores viros non raro virgam & scipionem ad usus nobiliores tractare, intrâq; ornamenta & insignia dignitatum reponere, sæpe supra terram imò suum caput altius attollere. Jam baculus senis, ita se ab eo tractari sinit, ut teluri ac luto infixus toties, unius ipsius obsequio totiq; senilis corporis oneri sustentando absq; ulla sui dignatione continuò deserviat, eademq; sorte contentus, ad sublimiorem nequaquam aspiret. Nec alia quoq; eorum sit ratio, qui se DEI ac superiorum de se dispositioni plenè submiserunt. Nempe ut non scipiones honorarii esse ambiant, sed ut senis baculi ad omne obsequium omnemq; usum versatiles. Quo vero id successu? certè non alio quam quo Virga Moyſis dum velut in despectum iubetur à DEO in terram proiici: *Tolle Virgam tuam & proiice eam coram Pharaone* thaumaturga effecta, tot prodigiorum patratrix extitit, ac dulces etiam postea aquas è petra elicit: quo Virga Minervæ apud Homerum, pristi-



pristinæ formæ & pulchritudini socios Ulyssis restituit: quo Virga Chymica attactu res mutat in aurum: quo virga aurea idem aurum ac thesauros latentes monstrat ac invenit: quo virga Mercurii insignibus apud Pœtas notis claret effectibus. Imò quo baculus ille Jacobi Patriarchæ, non modica eidem ipsi emolumenta & lucra contulit: *In baculo (inquit) transivi Jordanem, & nunc cum duabus turmis regredior.* Quos enim fluctus, quas difficultates ac ipsum etiam Jordanem, divini scilicet fluvium judicii non facile superat? quas meritum aliarumq; opum spiritualium turmas non congerit? quisquis prædicti baculi in semet similitudinem refert.

Ejusdemq; omnino generis illa Religiosi ad cadaver per eundem S. Patrem Ignatium instituta comparatio. Quid enim pariter resignato Religioso, exanimi cadaveri similis? num enim illud plus regum augustalia, magnatum domos, excellentia quæcunq; habitacula, quam angustam & putridam tumuli & urnæ domunculam exambit? ita ut quocunq; loco illud repositueris, nullo unquam indicio displicentiam bilemq; prodat. Insigni planè Religiosæ æqua-

nimitatis Symbolo, quam ad omne officium, pariterq; omnem locum ita indifferentem esse convenit: ut illud sibi cum Stoico toties ad solamen inculcet: *Intra has ( inquit ) terras Hercules cœlum meruit.*

Nisi quod hoc ipsum etiam magni adinstar solatii, nec postremæ sortis est, non tantum quo ad prædicta, sed etiam quæcunq; alia; cum ipsius DEI voluntate conformem vivere: idemq; velle quod DEUS ipse vult: idem nolle quod non vult. Hinc Ecclesiæ 2. *Sapientis oculi in capite ejus.* Quod verò istud caput est, nisi DEUS, ejusq; voluntas Sanctissima. Unde in hunc locum S. Gregorius ( apud Tob; Lohner. ) *Qui omnem obtutum in DEO, DEIq; voluntate figit, hic verè Sapiens est.*

Quid vero ipsemet Christus in Evangelio? *Quicumq; facit voluntatem Patris mei, qui in cœlis est, ille meus frater, soror, & mater est.* Jam Isaïæ 62. *Vocabitur tibi nomen novum, quod os Domini nominavit; & eris corona gloriæ in manu Domini, & diadema Regni in manu DEI tui. Non vocaberis ultra derelicta, sed vocaberis voluntas mea.* En quot conformium cum divina voluntate Privilegia!

legia : Proinde si Hierophantus ( teste Plu-  
tarcho ) Themistoclis filius gloriabatur, *quid-*  
*quid ipsi placuisset, id populo quoq; Atheniensi*  
*probari; suæ etiam Sententiæ Matrem suffra-*  
*gari:* Quanta illis gloriatio, quorum idem  
sentire & velle quod ipseus DEI.

Non immerito tot viri Sanctissimi,  
quorum hæc sententias & exempla non refero,  
tanti conformitatem suæ voluntatis cum divi-  
na æstimârunt, ut in ea omnem vim Sancti-  
monia poluerint. Imò ipsi quoq; Ethnici Sa-  
pientes, præcipuam suæ Philosophiæ partem  
in ipsa collocatam arbitrati sînt, ejusdemq;  
oblatione ad ruborem & confusionem ipso-  
rum etiam Religiosorum hominum claruerint.  
Audiamus hic Epictetum lib. 3. dissert: cap. 26.

*Appetitum meum obedientem præbui DEO: vult*  
*ille me Febricitare? volo Et ipse: vult me ali-*  
*qua re potiri? volo Et ipse. Non vult, nolo:*  
*Mori me vult? mori igitur volo Vir prudens*  
*ita rem considerat, hanc rationem secum init: si*  
*se DEO dederit, se iter tuto confecturum.*  
*Quid est istud, dedere se DEO? ut quod ille*  
*voluerit, Et ipse velit: Et quod ille noluerit,*  
*Et ipse nolit Et. Et alibi: mihi quidem optabile*  
*est*



est a morte me invadi, nulla alia re, nisi voluntate mea curanda occupatum, ut perturbatione vacuus & liber, dicere possim DEO: numquid præcepta tua violavi, numquid ad alia abusus sum facultatibus, quas mihi dedisti? num sensibus? num te unquam incusavi? num gubernationem tuam reprehendi? agrotavi quia voluisti: agrotarunt & cæteri, sed ego volens. Pauper fui te volente, sed latus. Non imperavi, quia tu voluisti, nunquam appetivi imperium. Numquid me unquam hac de causa tristiores vidisti? numquid unquam vultu, minus hilari te accessi? Paratus siquid mandes, si quid imperes. Hæc me cogitantem, hæc legentem occupet mors.

Jam Seneca de se quoq; ipso Epist: 96. In omnibus quæ adversa videntur & dura sic formatus sum, Non pareo DEO, sed assentior. Ex animo illum, non quia necesse est sequor. Nihil unquam mihi accidet, quod tristis excipiam, quod malo vultu: nullum tributum invitus conferam. Omnia autem ad quæ gemimus vel expavesceamus, tributa vitæ sunt. At Plato etiam apud Drexel: in Heliotrop: illam vulgo precationem damnabat: *DEVS det tibi quidquid*

*quid velis. Imò nunquam det, inquiebat, sed faciat ut velis, quod ipse vult. Hæc enim est pura religio: sic te religes DEO.*

Et certe si nos etiam his tantisq; institerimus velligiis & exemplis: proculdubio hanc ipsam Religationem tam perfectam pro insigni admodum ad sublimioris Sanctimonix terminum, eaq; absq; omni errore dexterrima ac felicissima manu ductrice habebimus.

## ADHORTATIO VI.

*Mortificatio interna & externa sublimioris Sanctimonix vigilantissimi custodes ac propugnatores iiq; non vulgares nec ignobiles.*

**D**Um sublimioris Sanctimonix impigrè promovemus fabricam: ecce tot conjurati hostes, eam aut impedire, aut quamprimum dissicere moluntur. Nec eos paucos numeramus. Alii enim extra nos sunt, alii intra nos, iiq; proinde domestici. Inter hos hostem præcipuum, ac velut antesignanum, ipsum corpus nostrum recenseo: quod dum cum suis concupiscentiis quasi conscripto exercitu militat adversus Spiritum, etiam simul il-

Ecc

lum

lum aggravat, sive ne in sublime virtutis ac  
sanctimonix assurgat, sive ut assurgentem retro  
demoveat deorsumq; præcipitet. Contra hunc  
igitur hostem, cum denso admodum tot pas-  
sionum, concupiscentiarum, pravorumq; habi-  
tuum exercitu adversum nos procedentem bel-  
lum in præsens aggredimur, arma corripimus:  
nec minus potentem antagonistam, & propu-  
gnatorem mortificationem scilicet internam &  
externam, eamq; non vulgarem eidem obici-  
mus.

Quo cum majori hoste, nobis dimi-  
tandum est, eo potentiorum illi opponimus  
exercitum. Quis enim Pigmæorum cohortes  
contra Gygantum turmas instrueret, quis leo-  
nibus obiceret lepulculos, elephantibus for-  
micas, tauris grandioribus, trimestres vitulos,  
Aquilis passeret? Si Hydra velleo est, Hercu-  
lem illi opponas. Si Centimanus Gigas, Jo-  
vem fulminantem: si Annibal Scipionem; si  
Hector Achillem, Theseum si Centaurus.

At verò quisnam major censendus ho-  
stis eo, quem intra nos gerimus, ipsâ scilicet  
rebelli nobis carne nostra? Ille nimirum est,  
cui ipsi quoq; monstrorum immanium ac orbis  
etiam



etiam succubuere domitores: *Victorq; Medusæ,*  
*victus in Andromeda est.* Contra quem ipse-  
 met gentium Apostolus acerbè questus est:  
*Datus est mihi (inquit) stimulus carnis qui*  
*me colaphizet: quis me liberabit de corpore mor-*  
*tis hujus? cupio dissolvi.* Quis igitur tanto  
 hosti sufficiens opponendus Athleta? Certè  
 non alius, quàm mortificatio interna & externa,  
 eaq; non qualiscunq; sed par omnino tam in-  
 domito hosti superando:

Planè eadem duplex Mortificatio, ad-  
 instar illorum duorum gladiatorum est: de qui-  
 bus discipuli Christi in cænaculo: *Domine, ec-*  
*ce duo gladii hic,* Christusq; respondit: *Satis*  
*est.* Certe enim ad expugnandos quoscunq; in-  
 tra nos contra nosmetipsos depugnantes ho-  
 stes, non amplius præter hanc utramq; virtu-  
 tem requiri. Quodsi Rex Pyrrhus interroga-  
 tus à suis, quemnam successorem sibi in Regnū  
 designaret? *Qui (inquit) acutiorem gladium*  
*habuerit.* Profectò nec alius sublimioris re-  
 gnum Sanctimonix occupaturum se speret;  
 quàm qui præstantiori præ aliis utraq; mortifica-  
 tione claruerit.

MORTIFI-  
CATIO  
interior.

402  
Ducamus vero initium ab interna, il-  
liusq; Symbolum ex celebri Regis Babilonii ar-  
bore capiamus. Sic illa Daniel: 4. ad vivum  
depingitur: *Magna arbor & fortis, proceritas  
ejus contingens cælum: aspectus illius erat usq;  
ad terminos universæ terræ, Folia ejus pulcher-  
rima, Fructus ejus nimius, esca universorum  
in ea, subter eam habitabant animalia & bestiae,  
& in ramis ejus conversabantur volucres cœli.  
Ecce vigil & Sanctus de cœlo descendit, cla-  
marit fortiter & ait: Succidite arborem, præci-  
dite ramos ejus excutite folia, dispergite fructus,  
fugiant bestiae quæ subter eam sunt, & volucres  
de ramis ejus. Verumtamen germen radicem  
ejus in terra sinite, & alligetur vinculo ferreo  
& æreo, in herbis quæ foris sunt, & rore cœli  
tingatur, & cum feris pars ejus in herba terræ.  
Ubi quis non videat inprimis, egregiè adum-  
bratum hominem Religiosum, imò etiam quem-  
cunq; alium, passionibus & affectibus nescio  
quibus obnoxium. Quid enim hîc per arbo-  
rem intelligimus, quàm ipsum hominem. Quid  
per proceritatem ejus contingentem cœlum?  
nisi elationes præsumptionesq; animi immode-  
ratas. Quid per aspectum usq; ad terminos  
univer-*

universæ terræ, nisi curiositates, ambitiones fortunæ, honorum, omniumq; temporalium, ad fines usq; orbis sese porrigentes, ac toto etiam orbe inlatiabiles. Quid per folia, quàm vanitatum ostentationumq; aucupia. Quid per fructum nimium, ac escam univerforum in ea, quàm rerum superfluarum, sensualitatum, commoditatumq; studia : & hæc utiq; pravorum nutrimenta habituum. Quid per animalia & bestias, quàm appetitus animales, sensuales, irascibiles, concupiscibiles, tum passiones quascunq; amoris, iræ, odii, timoris, aliasq; reliquas. Quid per volucres cœli, nisi garrulitatum ac multiplicium defectuum, pro varietate volucrum, agmina. Hæc igitur universa, & quidem ad normam, hujus Babylonicæ arboris eradicanda penitus, funditus exscindenda. Adsit inprimis vigil quispiam de cœlo, id est oculatissima centocula, lyncea omnium sensuum, motuumq; corporis, & animi, custodia. Adsint obsequentiores ministri, nimirum frequens, imò continuus mortificationis internæ usus. Adsint nequaquam obtusæ secures, id est seria conscientia præsertim particularia examina, reflexiones quotidianæ, actus heroici, victoriæ sui,

E e e 3.

quibus



quibus hæc eadem pravitatis arbor, succidatur, præcidantur rami, ita ut nihil hujus ejusdem arboris, hoc est veteris hominis residuum maneat, nisi sola radix, eaq; omni novitate reflorescens. Jam succedat vinculum ferreum, id est, firmum propositum, constantia in bono. Tum etiam prompti gratiarum, velut roris cælestis influxus. Et hæc defacto talisq; mortificatio interna, planè non vulgaris; quæ ita omnes pravitates eradicet, ut ne vestigium quidem earum relinquat.

Exod: 32.

Planè adinstar illius (de quo supra in secunda parte) vituli Isràelitici, quem non satis fuerat Moyse in angulum quempiam projecisse, confregisse, non satis vel in quidpiam aliud conflasse; *Vsq; ad pulverem etiam contrivit ac in aquam sparsit*, ut penitus demergeret, ac obliuio elementotradens, in profunda oblivione sepeliret. Imò *dedit ex eo potum filiis Isràél*: Ut vel sic calore naturali ipse quoq; residuus ex vitulo pulvis absumeretur omnino.

Aut certè hoc in passu procedendum non aliter, quàm Samson cum suo Leone processerat: De illo sacer textus: *Dilaceravit* (inquit) *Leonem quasi hædum in frustra discerpens,*

*pens* : Non alligans ducturus domum ut demulceret ac cicuraret , vel certè erueret oculos , dentes excuteret , evelleret ungues : sed potius enecans penitus , ne amplius revivisceret . Quid enim de Tigridibus Leonibusq; Seneca ? *Tigres* ( inquit ) *Leonesque nunquam feritatem exuunt , aliquando submitunt , Et cum minime speraveris , exasperatur torvitas mitigata.* Atq; idem planè de passionibus non satis mortificatis cogitandum . Certè Leones etiam hi non mulcendi , non cicurandi tantum , sed dilacerandi , ac penitus enecandi . Parum eosdem cum Nerone quasi edentulos facere ; adhuc enim sic ferociunt , irascuntur , rugiunt .

Nec aliud egit cum suis passionibus ac vitiis David cum diceret : *Quemadmodum desiderat cervus ad fontes aquarum ; ita desiderat anima mea ad te DEVS.* Ad quod S. Augustinus : *Cervus serpentes necat , Et post serpentium interemptionem majori siti inardescit , peremptis serpentibus acrius ad fontes currit . Serpentes vitia tua sunt , consume serpentes iniquitatis , tunc amplius desiderabis fontem veritatis.* Ubi , en , quomodo cum prædictis serpentibus procedendum , quisve inde fructus colligendus , docetur dilucidè . Hujus

Hujus vero ipsius specimen in quonam exactius eluxit, si non in viris illis Apocalypticis de quibus D. Joannes Apocal: 15. *Vidi (inquit) mare mistum igne & eos qui vicerant bestiam & imaginem ejus stantes super mare.* Quid enim per mare igni permissum, si non quatuor ingeniti hominibus humores, iiq; velut passionum progenitores intelligendi. Phlegma scilicet aqueusq; humor, humor sanguineus velut Erythreum quoddam, humor Cholericus planè igneus. Humor melancholicus velut quodam amarore marino constans vel saltem infectus. Hoc itaq; tot confusum humoribus mare Diviniores Apocalyptici victores ita edomuere, ut infra pedes calcandum effuderint, omnibus passionibus Superiores longè. Nec dispari ratione cum cruenta processere bestia, parte scilicet hominis inferiore & animali, eaq; innumeris pæne passionum, appetituum, pravorum habituum monstris, obnoxia. Non satis scilicet habuere, ut eam in se gloriosè devincerent; etiam imaginem ejus, & omne abolerunt vestigium ac notam vel minimam: *Vicerunt (inquit) bestiam & imaginem ejus.*

Nec



Nec alius olim hac in parte D. Pater Ignatius, qui cum complexionis alioquin cholericæ foret, ita eam ipsam choleram cum aliis quibuscunq, pravis inclinationibus edomuit, ut omni passione vacuus phlegmaticam naturam induisse videretur. Talis & ille Socrates quem cum nonnemo ex phylis ipsius iudicaret sceleratissimum, frementibus discipulis adversus temerarium iudicem, ille ipse reposuit: *Planè iudicem eundem non errasse. Talem enim omnino se futurum fuisse, in Philosophiæ studio ipsam edomisset naturam.*

Quamquam ejus ipsius mortificationis internæ non obscurum Symbolum refert, ille quoq, cuius etiam, parte allocutionum secunda de dominio passionum meminimus, Agnus Apocalypticus *Tanquam occisus*. Quid enim magis mortificatum censendum est, quàm quod usq; ad ipsam omnium passionum & affectuum internecionem panè emortuum est. Sic planè agno huic Apocalypstico non satis fuerat extitisse agnum, hoc est animal ex natura omni quasi passione vacuum: etiam velut emori quoad vitiosa quæcunq; debuit; ut vel sic thronum sublimioris Sanctimonix insideret. *Et vidi* &

Fff

ecce

ecce in medio throni agnum stantem tanquam occisum.

Et hoc ipsum defacto de se deq; aliis Coapostolis annuntiat Apostolus: *Mortui sumus & vita nostra abscondita est in Christo*: Ita scilicet vividae alioquin, in nobis mortificandæ passionēs, ut par sit prodigio si reviviscant. Non aliter quàm dum quadriduanus Lazarus è tumultu redivivus prodierat.

Parum verò est illas utcunq; emori. Audiamus enim quidnam Apocal: 19. insonet: *Scribe: Beati mortui qui in domino moriuntur.* Verum quid est, jam emortuos iterum præcipitari in mortem? si jam morte perempti. *Beati* (inquit) *mortui*: Cur & quomodo moriantur? Nisi quod nulla hic mortis corporalis adsit mentio. Mortem hic potius mysticam, mortem quarumcunq; passionum pravorumq; habituum intelligi est necesse, quæ ut suæ beatitudinis possessionem ineat, aliâ iterum morte aliâq; corrigatur, qua ne spes, quidem reviviscentiæ ultra maneat. *Beati mortui qui in Domino moriuntur.* Hocq; ipsum licet Ethaicus Cicero Tusc: Quæst: *Hoc* (inquit) *commen-*  
temur mihi crede, disjungamusq; nos à corporibus,

*bus, idest consuescamus mori ( nobis ipsis ) hoc  
 Et dum erimus in terris , erit illi celesti vitæ  
 simile : Et cum illac emissi feremur è vinculis ,  
 minus tardabitur cursus animorum*

Et id profectò est quod sub alia allego-  
 ria Apostolus insinuat : Fideles Christi enun-  
 tians velut *superædificatos , super fundamen-  
 tum Apostolorum Et Prophetarum ipso summo  
 lapide Christo JESU* : Superædificatos in-  
 quam velut tigna aut lapides, lateres, marmora,  
 quæ semel circumcisa & expolita, non am-  
 plius ad suam naturam & scabritiem redeunt :  
 longè aliter quam vivax arbor, cui etsi præ-  
 cideris ramos & stolones, reviviscunt iterum ac  
 succrescent. Aut quicumq; hortus quem etsi  
 ab inutilibus herbis expurgaveris, renascentur  
 ac repullulabunt denuo.

Et si autem non postremus hic mortifi-  
 cationis gradus sit, ita uti supra diximus, inor-  
 tuum esse absq; ulla spe reviviscentiæ mundo.  
 An non tamen ille major? de quo Apostolus  
 gloriatur : *Mihi mundus crucifixus est Et ego  
 mundo*. Mortuo namq; pro eodem est hono-  
 rari vel non honorari imò despici, vilissimè  
 pendì, ita ut inter adversa & prospera, infamiam



& famam, honores ac vilipensiones nullum discrimen ponat, eodemq; animo omnia sustineat. At cui mundus crucifixus est : etiam hoc ipsum quod est ab hominibus, honorari, magnifici; ab illo gravis ad instar crucis ac tormenti habetur; ita, ut è contra persecutionibus, infamiâ & contemptu delectetur & gloriatur vel maxime : cum Apostolo clamante : *Mihi absit gloriari nisi in cruce Domini nostri JESU Christi.* Item : *Repletus consolatione superabundo gaudio in omni tribulatione nostra.*

Et hoc est verè pulchrum, hoc verè eximium, hoc admodum gloriosum, ita mortificatum in omnibus & quoad omnia vivere. An non enim inde laudatur in Cant. nescio quæ anima; *Quam pulchri sunt gressus tui in calceamentis filia Principis.* Quid enim per pedes calceatos, quam affectus per mortificationem compressos juxta plerosq; intelligimus. Nec aliis pedibus pulchriores in virtute formantur gressus, nec celerius sublimioris Sanctimonie superatur Olympus.

MORTIFICATIO  
exterior.

Neq; verò dissimilis mortificationis etiam externæ ratio sit. Talis videlicet qualem in se exhibuere illi : de quibus Apostolus : *Carnem*

(( in.

( inquit ) *suam crucifixerunt cum vitis.* Duplicem hic mortificationem facile advertimus : Internam scilicet in crucifixione vitiorum, Externam in crucifixione carnis. Atq; ita utramq; non vulgarem. Parum nempe ac plebeium est : ( ut interim de externa notinisi dicam ) parum inquam, carnem concutere, sauciare, convulnerare utcunq; : in crurem ipsam cum omnibus membris agenda est, cruci configenda : juxta illud Apostoli : *Confixus sum cruci.*

Neq; hæc ipsa mortificatio satis est : nisi talis etiam adstruat nos toleratis probris plagisq; in ipsum Christum, & hunc crucifixum ad vivum transformet : *Donec* ( inquit Apostolus ) *Christus formetur in vobis.* Ita ut non sola in nobis signata sicut in Divo Athanasio Francisco, sed implemet Christus appareat : isq; omnino talis, qualis in Cruce super Calvariae montem comparuerat. Ac si nobis illud inculcassetur : *Fac secundum exemplar quod tibi monstratum est in monte.*

Quid autem illud quoq; ejusdem Apostoli : *Castigo* ( inquit ) *Corpus meum, & in servitutem redigo.* Parum videlicet illi fuerat tot incommoda, tot injurias, tot probra, tot

plagas ab aliis retulisse : etiam ipsemet suo corpori non pepercit. Et videte quonam id modo peregerit ? Ita nimirum , ut cum carne sua non sicut cum sua , sed cum aliena , neq; sicut cum amico cum Sponsa cum Concive , sed cum hoste procederet , tamdiuq; illam feriret , donec plene edomitam foederatamq; sibi habere non contentus , usq; in servitutem redigeret.

4. Reg. 13.

Pari ratione quâ Joas non aliter plenus ac gloriosissimus Syriæ victor & triumphator deletâ usq; ad consumationem Syriâ extitisset ; quàm si non semel , aut tribus vicibus , sed usq; septies , aut saltem sexies terram jaculo percussisset. Insigni inde argumento , non delicatè carnem nostram tractandam , non leviter , nec semel raroq; feriendam ; ut pleni & gloriosi ejus triumphatores evadamus.

Imò etiam non modicam inde virtutis & gloriæ proferamus messem : idq; adinstar illius agri ; cui Isaac filium suum Jacob in paterna benedictione comparat : *Ecce odor filii mei sicut odor Agri pleni* , &c. Quot enim ager per sui culturam perfert vulnera , ut in messem excre scat. Proindeq; nos quoq; cum carne nostra ac nobiscum procedamus non aliter.

Nimi-



Nimirum abunde tot insignium hac in parte, quorum Dives Ascetica historia est, Religiosorum Athletarum memores: Illorum videlicet qui eò mortificatione externa processerunt; ut par fuerit prodigio, quod inter voluntarios carnis cruciatus & macerationes, inter plagas & vulnera sibi met inflicta superviverent.

Qualem inter alios ad exemplum Christus ipse exhibuit velut talium heroum primipilum Joannem Baptistam: *Venit inquit Joannes neq; manducans neq; bibens.* Utiq; tamen manducavit aliquid, scilicet, attestante Evangelio, locustas & mel Sylvestre? utiq; etiam bibit, saltem aquam de Jordane? Nempe ita erat mortificati gustus, ita per inediam maceratae carnis, tam parca per comestionem & potum refectionis, ac si nihil comederet, nihil biberet: vitamq; cum quotidiano prodigio sustentaret. Nisi quod quantum per mortificationem externam, vitae temporalis detrahatur commodis, tantum per illam vitae spirituali praesidii ac roboris additur: Uti Rosae inter spinas collocatae adscriptum: *Vallant non violant spine.* Jam quis alios hac in materia heroes recenseret facile: uti Paulum, Antonium Eremita-

mitarum antesignanos, Simeonem Stylicam, Catharinam Senensem, Dominicum Lorica-  
tum, Andream Zoroardum, cæterosq; pænè  
innumeros, exquisitos ac heroicos, tum alibi,  
tum in nostra etiam Societate suimet corporis  
tortores: quorum vestigia, si pro posse saltem  
tenuerimus, triumphali pariter gressu in eam  
in cuius illi possessionem devenère, gloriam  
eluctabimur.

## ADHORTATIO VII.

*Oratio sublimioris Sanctimonix nutritrix ac con-  
servatrix non vulgari cultu & pretio exhibita.*

**G**Rande & magnificum sublimioris Sancti-  
monix ædificium pænè jam construxi-  
mus: Nec quidquam de ejus ædificii conser-  
vatione cogitavimus, ac etiam prolocuti sumus.  
Cum tamen præstantissimæ structuræ & moles,  
parum emolumenti afferant nec diu subsistant;  
si conservatio earum desit, quæ ipsam etiam  
maximis impensis comparatam exstructionem  
si non superat, certè adæquat. Hinc supremo  
rerum omnium Architecto parum erat admira-  
bilem omnibusq; numeris absolutam mundi  
inferior

inferioris Superiorisque fabricam construere:  
 si ejus per tot millia annorum conservationi  
 suam non apposuisset dexteram, illiq; guber-  
 nandæ ipsas cælestes non admovisset Intelligen-  
 tias. Idem verò de quibuscunq; foetibus co-  
 gitandum; quos parum est in lucem effunde-  
 re, si pari nutrice ac conservatrice sui careant.  
 Et quia sublimioris Sanctimonix non alia par  
 nutrix & conservatrix Oratione invenitur: ita  
 ut ejus quoq; ad fovendam alendamq; eandem  
 Sanctitatem, ( Uti Salomonice Sponsæ ) *ube-  
 ra sicut turris*: nec ullus unquam eximie pro-  
 bus & Sanctus absq; Orationis studio inventus  
 sit. Hanc igitur hodie non plebeio cultu ex-  
 ornandam, nec ad vulgarem statum provehen-  
 dam assumpsimus.

Quò præstantior fabrica, eò validiore  
 ac operosiore sui conservatrice virtute & dex-  
 tera; quo nobilior foetus, eò magis non igno-  
 bili nutrice indiget. Quoniam vero talem fa-  
 bricam talemq; foetum in sublimiore Sanctimo-  
 nia agnoscimus: Quidni illi non imparem in  
 Orationis studio conservatricem nutricemq;  
 provideamus: & hanc pro dignitate Sanctita-

Ggg



tis ejusdem non vulgariter exornemus, atq; attollamus?

Psalm. 44.

Idq; adinstar illius Reginae, quam Psalm. res fusiùs describendam sibi assumpsit: *Astitit (inquit) Regina à dextris tuis in vestitu deaurato, circumdata varietate: Audi filia & vide Inclina aurem tuam, & obliviscere populum tuum, & domum Patris tui. & concupiscet Rex decorem tuum: Et filiae Tyri in muneribus vultum tuum deprecabuntur, omnes divites plebis. Omnis gloria ejus filiae Regis ab intus, in fimbriis aureis circumamicta varietatibus. Adducentur Regi virgines post eam, proxima ejus afferentur tibi. Pro Patribus tuis nati sunt tibi filii, constitues eos principes super omnē terrā.* Ubi an non vera vivaq; non vulgaris Orationis elucet effigies? Hanc utiq; imprimis ut talis hoc est non vulgari cultu conspicua appareat, omnino expedit populi sui ac domus paternae, id est: omnium rerum terrenarum mundanarumque oblivisci, easq; à cogitatione & memoria panitus excludere; ut tunc dum te ad orandum confers, nihil terrenum, nihil sensuale, omnia Spiritualia ac caelestia sapias, spectes, atq; cogites: tanto magis à turba populari & quasi vulgo aliarum

aliarum quarumcunq; occupationum ac negotiorum simulq; appetituum (ut vel sic tua oratio inveniatur non vulgaris) corpore & mente semotus, te sursum ultra terram & terrena quaecunq; animo erigas. Jam quo ad ejus cultum? planè hunc decet esse fulgentem auro, auro inquam ardentissimæ in DEUM charitatis, variis, iisq; eximiis coloribus, hoc est: variarum virtutum actibus & affectibus, profundis ac practicis reflexionibus conspicuum; aut certè (ex quo alii legunt pro *varietate, circumdata scutulatis*) omni genere Spiritualium armorum adversus quosvis Satanæ & quarumvis suggestionum insultus atq; occasiones ac præcipuè firmissimis propositis heroicisq; resolutionibus velut scutis instructum: *omni gloriâ ab intus* hoc est à puritate cordis, & exquisitissimis intentionibus, ac fervore animi & Spiritus intentissimo derivatâ opulentum. Quo fiat ut ipse Rex Regum decore hoc orationis veluti vi magnetica attractus, eam exambiat, in ejus ipsius concupiscentiam & amorem reciprocum ac æstimationem exardescat, eandem ipsam in filiam adoptet, throno suo ac dextræ admoveat, pretioso meritorum diademate coronet, & velut

Reginam constituat. Innumeris donis, muneribus & spoliis, veluti per manus filiarum Tyri gentilium & divitum plebis, hoc est edomitum passionum, pravorumq; habituum ac totius cum suis opibus atq; illecebris mundi porrectis accumulet, & locupletet: Pulcherri-  
mo virginum, id est omnigenarum virtutum, quæ Studio Orationis comparatæ eam velut præducem sequuntur satellitio stipari faciat, Matrem tot succedaneorum Patribus, ad principatum virtutis & gloriæ destinatorum filiorum, id est Sanctorum quorumvis insignium efficiat. Atq; sic planè non plebeiam, nec vulgarem spectatoribus terræ coeliq; oculis exhibeat.

Quanquam hanc orationis excellentiam sub alia etiam allegoria Apoc. 5. exhibitam spectare liceat: visi ibidem ab Aquilino Joannis oculo ante thronum DEI viginti quatuor coronati Seniores: *Tenentes in manibus phialas aureas plenas odorumque quæ sunt orationes Sanctorum.* Ubi quis non advertat egregiè adumbratam orationis non vulgaris insignem, ad quam eluctari per eximium & operosum ejus studium debemus, præstantiam. Primo illa ita  
ab



ab omni terrenarum sensuâlitatum foetore sit aliena, ut in pretiosum ac odoriferum quo DEUS ipse delectetur, thus degeneret. Secundo thuris adinstar, igni se ardentissimi divini amoris seu mortificationis, quo pulchrius oleat, strenuè injiciat, atq; sic eodem amore ipsa ardeat. Tertio adinstar ejusdem accensi thuris, quasi ab omnibus terrenis abhorrens, nihilq; terrenum ac temporale cogitans, tota feratur fursum, solaq; spiret cælestia. Quarto non in alia quàm aurea veluti phiala id est corde ab omni nævo auri adinstar depurato ante DEI sese præsentet obtutum. Nec ei desint quibus teneatur, manus: hoc est operatio orationi conjuncta. Quæ omnia si in illa eluceant, certè à coronatis cælestibus capitibus DEI throno & conspectui admoveri merebitur, atq; sic ad sortem non vulgarem evadere.

Nisi quod adhuc parum sit orationem in eam sortem provehi: longè excellentius Genes: 32. eluxit ejus privilegium: ubi Jacobi Patriarchæ sive cum Angelo, sive cum ipso Deo lucta describitur. Quibus verò circumstantiis & quo successu ea peracta? videamus. De nocte inprimis cepta, duravitq; ad auroram.

Ggg3 Tum

Tum post longum certamen velut palma Jacobo à colluctatore DEO his verbis porrecta: *Dimitte me ( inquit ) jam enim ascendit auro-  
ra: si contra DEUM fortis fuisti, quantò magis  
contra homines prævalebis.* Hinc novum eidem  
Jacobobo nomen Isràélis hoc est prævalentis Deo  
inditum, hinc plures in eundem benedictio-  
nes congestæ, hinc adversus Esau qui tanto pe-  
re ab Isràele timebatur, crevit animus. Et  
quia pleriq; per eam luctam, intensam & con-  
stantem Jacobi ad DEUM fusam orationem  
intelligunt: Proinde vel exinde nostræ typum  
orationis sumamus hujusq; non vulgaris. Hæc  
utiq; non dies tantum, non auroram, sed pro-  
fundas etiam noctes sibi deposcit, ut cum alii  
sux dediti quieti profundo merguntur somno,  
illa ad DEUM vigilet eiq; vacet. Jam quan-  
tam hæc ipsa, quàm constantem requirit perse-  
verantiam? ita ut nullis interrupta obstaculis,  
tamdiu à sui studio non desistat, tamdiu cum  
DEO luctetur, donec eum quodammodo ca-  
ptivum teneat. Et hæc talisq; oratio DEI ipsius  
inprimis, tum omnium adverforum ac tenta-  
tionum victrix, ipsiusq; naturæ & pravorum ha-  
bituum atq; passionum domitrix, palmam no-  
bis

bis victoriæ porrigit, quotidianos de edomitis in nos undecunq; consurgentibus hostibus triumphos peragit, timores & pusillanimitates depellit, imbecilles & cadentes animos roborat & confirmat, divinis benedictionibus accumulât, egregios, mundi, carnis, diaboli victores ac heroes, verosq; Israeles hoc est ut diximus, Prævalentes DEO, ac inferno quoq; efficit. Utiq; enim Christus ipse in Evangelio gravissimorum dæmoniorum victricem proclamat: *Hoc genus (scilicet dæmonii) non potest exire nisi in oratione & jejuniis.*

Imò illa, sui constanter studiosos in ipsa etiam illimi eximie Sanctitatis splendore nitentia astra ipsosq; genuinos DEI filios commutat: *Ubi eras (inquit Scriptura: ) cum me laudarent astra matutina, & jubilarent filii DEI?* Quid enim se magis in laudes divinas exerit, quam fervens & constans oratio?

Job. 38.

Sed quid ego orationem in sublime proveho? cum nos etiam illa inter astra ( ut innuavimus ) collocet, simulq; seipsam, ultra terram se erigens, ærem permeans, nubes pervadens, ultra omnes cælestes orbes planetasq; exolans, alios quoq; coelos solidos & quasi ære  
fufos



fufos ipfumq; coelum empyreum intensiffima vi penetrans , eidem infert, ad ipfumq; ufq; DEI thronum, imò cor ipsum pertingit, coelo, Deoq; non indigna : *Oratio humiliantis fe* ( inquit Scriptura ) *nubes penetrabit* : Item alibi: *Oratio iufti penetrat cœlos* : *Oratio inquam iufti* : *Non enim speciofa laus DEI in ore peccatoris* : Sed planè indecora, ignobilis, ac plebeia nec coelo DEOq; digna.

Et certè talem effe qualem descripfimus noſtram orationem expedit , ſi volumus eam effe non vulgarem. Uti de facto ad eam ipſam ſuo nobis Chriſtus ipſe præluxit exemplo, cùm quadraginta diebus ac noctibus jejunaffet, cui jejuniò certè non aliud quàm non interruptam ad Deum Patrem orationem conjunxit. Quamquam ultra hanc quadrageſimam teſte Evangelio toties à turbis ſecedeſſet, ut locum orationi quæreret, cui non dies tantum, ſed noctes etiam impendebat. Quod etiam in horto Gethſemani præſtitit, ut ſe per orationem ad imminentem paſſionem & mortem præpararet armaretq; : Ita ut tunc Angelum quoq; ſui confortatorem ea oratione è coelo evocaverit: eò nobis relicto documentò : non aliter melius adver-

adversus quavis adversa, quàm vigili & indefesso orationis studio præparari armariq; non aliter efficacius, quam sic, Angelos ipsos cælestesq; suppetias ad protectionem & solatia nostra evocari.

Et si Rex ac dominus nullius rei indigens tanti hoc idem studium fecit, quid mirum servos ejus eosq; omni ex parte egenos ac mendicos tantopere eidem inhæsisse. Non memoro hic Moysen quadraginta dies & noctes orationi, ut tabulas legis divinæ reciperet, impendentem, eundemq; ipsum, ut hostes vinceret, manus in oratione levantem. Non memoro eadem arte ignem è coelo ad absumendam victimam evocantem Eliam: non memoro septies in die laudem DEO dicentem ac de nocte etiam orationem simul & lacrymas fundentem Davidem. Non memoro in Babilonica servitute mira per orationem impetrantem Danielem. Non memoro tot alios è veteri testamento, qui vi orationis planè thaumaturga inclaruere insigniter. Nec tandem memoro Christi imitatores discipulos de quibus Actor: 1. *Quod essent perseverantes unanimiter in oratione*, atq; sic participes adventus sanctissimi Spi-

H h h

ritus

ritus extitissent. Inter quos de S. Jacobo minore S. Hieronymus: de viris illustr &c. illud prodidit: quod usq; adeo flexis genibus DEUM deprecabatur ut callum durissimum obduceret. De Sancto quoq; Bartholomæo Marulus lib. 2. cap. 1. quod centies de die, & centies de nocte flexis quoq; genibus DEO ac orationi vacaverit. De Beatissima verò Matre S. Albertus Magnus: quod omnis ejus vita & operatio fuerit sedula præcatio. Et ideo S. Ephrem eam Thuribulum aureum, in quo sine intermissione thus orationis suavissimum offerebatur; appellat. Non memoro inquam hosce omnes: cum & ipsi Cherubici & Seraphici Spiritus in hoc ipso longè prævivere hominibus, senis alis hoc est intimis affectibus in DEI laudibus ac oratione semper altius altiusq; evolantes: nec die ac nocte ab hoc Sanctissimo unquam vacantes studio, habentesq; requiem.

*S. Arbanasus  
in ejus vita.*

*Idem.*

Jam quis alios huic eidem operi deditos enumeret? Illos Paulos Eremitas, quorum tota cum diebus noctibusq; vita oratio fuit; ita ut nullo vitæ suæ die quidquam prius egerint, quin trecentas orationes genibus provolutis DEO obtulissent. Illos Antonios, qui per to-



ram sæpè noctem orantes, solem orientem quodammodo increpabant: Ah quid me impetis o Sol? qui oriris ab amœniore me Sole abstrahens. Illos non dissimiles istis Arsenios in eo ipso, noctes in orationibus quas primo vespere inchoabant, ad auroram usq; traducendi modo. Illos Martinos Turonenses nunquam ac in morte ipsa animum & linguam ab oratione relaxantes, ita ut etiam cùm manibus laborarent, ab orando non desisterent. Illum Hiberniæ Apostolum Patritium de quo proditum: Integrum quotidie Psalterium unà cum canticis & hymnis ducentisq; orationibus consuevisse recitare, tercenties per dies singulos flexis genibus Deū adorare, ac in qualibet hora diei Canonica, centies se signo crucis munire: nocte tria in spatia distributâ, cujus primum in centū Psalmis percurrendis, in his centies genuflectendo, alterū in reliquis 50. Psalmis, algidis aquis immeritus, ac corde, o culis, manibusq; ad cælum erectus absolvendis insumebat. Tertium vero super nudum lapidem stratus, tenui dabat quieti. Illos (omissis aliis) monachos, quorum orationes S. Bernardus, nocturnis eorum vigiliis assistens, vidit ab Angelo aureo vel argenteo juxta fer-

H h h 2 vorem

Marialis lib.  
2. cap. 1.

S. Athanasius

Spec: Exemp

*Madaf in  
anno Angel:  
hebd: 18.  
num. 8.*

*S. Dorothe.  
Doctr: 11.*

*Spec: Exempl*

*Surias in vi.  
24. eju s.*

vorem orandi caractere annotare, cum aliorum tepidiorum orationes atramento simplici ac etiam aquâ annotarentur. Idem D. Bernardus vidit noctu Angelum thuribulo thymiamate cælesti referto chorum lustrare, divina illa thymiamasi in intimis ferventium præcordiis odores ac fervores cientem, somnolentos autem cum nausea negligentem. Diomaticus quoq; vir Sanctus teste S. Dorotheo vidit noctu in principio Psalmodiæ è sacrario ingredientem Angelum veste splendida indutum, qui omnes Religiosos præsentis obambulando, signabat, uti & subsellia legitimè absentium, pertransisse verò loca eorum, qui per desidiam aberant. Tum & illos Monachos quoq; , quorum orationibus Cuno monachus adeo fuit in morte roboratus, ut licet quindecim millia dæmonum, ad eum oppugnandum convenissent nihil ei nocere potuerint. Post hos verò D. Thomam Doctorem Angelicum, qui cum non minus orationi quam doctrinæ deditus fuisset, illud fatebatur, se eandem doctrinam magis oratione quam labore adeptum: dicebatq; Religiosum sine illa esse militem sine armis.

Ne verò exempla taceam domestica :

An non satis constat quis hac in parte fuerit ultra secessum Manresanum, quem totum orationi atq; contemplationi simulq; mortificationi impendit, tot etiam modorum orandi inventor S. Pater Ignatius ? Quis intra orandum toties à terra sursum elevatus, Xaverius ? Quis inter suas delicias orationem ponens paululumquè temporis ad eandem continuandam à Marco fratre deprecans D. Franciscus Borgias ? Quis Beatus Aloysius tantum studii in oratione quoq; ponens, ac si in ea omnium virtutum summa posita esset. Hinc dicebat : Religionum tam miseras facies ex una oratione neglecta provenire . Illam esse compendiosam ad perfectionem viam, sine illa neminem se perfectè vincere posse &c. Quis in eodem genere Pater Petrus Faber exquisitissimis industriis ad continuè orandum, adinventis celeberrimus ? Quis deniq; P. Ludovicus de Ponte ; P. Balthazar Alvarez , Joannes Berhmans & Sexcenti alii. Quorum agmen claudat P. Franciscus Suarez : qui Theologiam compluribus tomis cum egregiè illustrasset, ingenuè fassus est : malle se, quidquid scientiæ acquisivisset perdere, quàm uni-

Hhh,

cam



cam solitæ meditationis horam intermit-  
tere.

Quaquam quid mirum Eremitoria  
atq; Asceteria Religiosa, eo orationis inclaruiſ-  
ſe ſtudio, cum & aulæ principum ſecularium  
non tantum non caruere eâdem, ſed etiam ve-  
lut per Sanctam æmulationem non impari laude,  
cum neſcio quibus certavêre Eremiticis nec  
non Aſceticis. Sic Aula Bohemica D. Venceslai  
Regis de quo illud in vita ipſius: Bohemi Pragæ  
Venceslaum jam adultum juvenem in Regem  
eligunt, illiq; habenas Imperii committunt:  
quod ille plus jejunii, orationibus, cilicio, ac aliis  
piis operibus rexit quàm imperio: illud planè  
occinens: ſepties in die laudem dixi tibi. Fuit  
hic in eo ardor orationis, quod in ſumma hyeme  
nonnunquam ex pedibus ejus ſanguis effluxe-  
rit, ac ex veſtigiis ipſius aliqui incaluerint.  
Idem de Sereniſſimo Principe Poloniæ Caſi-  
miro. Simile de Elzeario Comite aliisq; non  
paucis, quibus quoq; Aula oratorium fuit. Ut  
non omittam piſſimum Ferdinandum Cæſa-  
rem, cujus precatorios Roſarii globulos plus for-  
midabant hoſtes quàm bellicas machinas.

Quid

Quid verò dico de aulis Christianissimis? cum ipsa etiam Ethnica superstitione iustum nobis pudorem in eo ipso incutere deberet. De Scipione inprimis prodidit Seneca: *Hic ex quo togam virilem sumpsit, nullo die prius publicam privatamque rem egit, quam in Capitolium iret.* Deorum utique simulacra ibidem oratione ac precibus placaturus, eorumque ad ritè peragenda negotia imploraturus opem. Cyrus quoque Rex is teste Xenophonte fuerat: *Vt (inquit ille) nihil publicum aut privatum ageret, nisi prius ad DEVM confugeret.* Numam tandem Pompilium, Jovem è coelo precibus suis deducere potuisse superstitiosa credidit antiquitas.

*Beyrling:*

Et si hic & tantus apud ipsos etiam gentiles fuerat orandi amor & studium: quale apud nos Religiosos deberet hæc ipsa virtus invenire sui pretium: cognita nobis tantâ quam exposuimus ejus dignitate, tot perspectis fructibus, tantâ DEI in ea probatâ complacentiâ & gustu, tot aliis stimulantibus motivis, tot doctis experimentis, tot suadentibus Patrum testimoniis & monitis, urgente instituto ac regulis, prælucentibus exemplis.

ADHOR-

## ADHORTATIO VIII.

*Amor DEI omnium virtutum ac sublimioris  
Sanctimoniae Rex & Corona.*

**U**T sublimitatem Sanctimoniae attingere-  
mus; tot jam virtutes percurramus. Nec  
adhuc attigimus coronidem. Restat nobis illa,  
quæ sicut ultra cunctas eminet, ita sanctitatis  
absolutissimæ apicem constituit. Hæc verò  
non alia quàm amor ipsius DEI. Certè enim  
in virtutum etiam cætu suum est discrimen,  
sua cuiq; major minorq; dignitas, suus gradus,  
ita ut aliæ aliis præcellant, hæc superius, infe-  
rius illæ censeantur. Solus amor DEI emine-  
at supra omnes, & velut è solio cæteras despe-  
ctet. Nisi quod hic quoq; si subiectum spe-  
ctes, aut parum nobilis, aut etiam plebejus  
quandoq; sit. Talis igitur præsentì à nobis  
exhibendus dictione, qui omnino se non vul-  
garem sed excellentissimum quoq; ac velut le-  
gitimum omnium virtutum Regem scribat &  
glorietur.

Et si alias virtutes esse vulgares utcunq; de-  
ceat, Amorem DEI omni ex parte dedecet esse  
plebe-



plebeium Quis enim ferat eximii palatii aut elegantissimæ turris despiciatum fastigium, aurei annuli vilem gemmam, nobilissimi Regni ac populi Monarcham non satis nobilem?

Cùm igitur Amor DEI excellentissimi Sanctimonix ædificii apicem teneat, & Regem se virtutum dicat: quis in illo aliquid vulgare ac minus nobile patiatur? Cùm etiam illam terram beatam enuntiat sapiens: *cujus Rex nobilis est*: Quidni verò Regnum quoq; virtutum pari sorte gaudeat?

Non vulgare  
est DEI amor

Ille itaq; omnino sit amor hic: qualem Sponsus in sua Sponsa esse voluit: *Introduxit me Rex* (inquit illa) *in cellam vinariam, ordinavit in me charitatem*. Et certè quæ illa imprimis charitas, quis amor ille Regis dignus opere ac ingenio esset? qui aliquid vulgare saperet. Nec talem, hoc est quomodocunq; vulgarem vel inde etiam esse decuit: quod non calice aut aliquâ mediocri mensurâ, sed totâ cellâ vinariâ id est plenâ donorum, & gratiarum cælestium affluentia, ali foviriq; debuerit. Alii eundem textum sic exponunt: *Vexillum ejus super me charitas*. Atq; hinc etiam palam est, minimè gregarium DEI amorem debere

esse, qui se in pulcherrimo virtutum exercitu,  
velut vexilliferum præstat, aut instar vexilli sese  
erigit supra omnes.

*Amoris. DEL  
perfectio.*

*Cant. I.*

Et in tali defacto hoc est non vulgari  
amore sibi complacet Sponsus animarum no-  
strarum: quem Sponsa hisce affatur in Canti-  
cis: *Indica mihi quem diligit anima mea: Vbi  
pascas ubi cubes in meridie?* Nimirum non il-  
lum in ipso quasi nonnihil frigescente, hoc est  
nondum satis adulto ac æstuante amore, sed  
ipso ejus meridie ac intenso æstu dulciter quie-  
scere, suaviter deliciari.

Id planè est quod Christus, à D. Petro  
requisit, dum quæreret: *Simon Joannis dili-  
gis me plus his?* Hoc est plus Andreâ in Chri-  
sti servitio veterano, plus Matthæo omnium  
fortunarum propter Christum contemptore,  
plus Jacobo fratre Domini, plus Thomâ mor-  
tis ipsius cum Christo oppetendæ cupidissimo  
heroe: *Eamus* (inquit) *et moriamur cum eo.*  
Plus dilectô Christi discipulô Joanne. Plus aliis  
omnibus quibuscunq; Christi discipulis. Ut  
vel inde pateat quonam Christus amore velit  
à nobis diligi? scilicet non eo qui quoscunq;  
etiam excellentes amores amatoresq; sui adæ-  
quet,

quet, sed etiam longius superet ac velut in statu perfectissimo consistat: cum & hic Christus à Petro trinam amoris sui confessionem extorserit: Trinum autem perfectum. Præsertim cum S. Bernardus Serm: 76. in Cantic: eidem trinx interrogationi: *Simon Ioannis diligis me?* illud superaddat: *Hoc est (inquiens) plus quam tua, plus quam tuos, plus quam te!*

Quodsi amoris natura ignea est? Vide te qualem hunc in se Sponsus exhibeat: *Lampades ejus* (inquiunt Cantica) *lampades ignis atq; flammarum.* Nempe nimis pusillus, nimisq; frigidus amor est, si non ignescat. Quanquam parum etiam ignescere eundem, si non in flammis assurgat. Et ita quidem ut nihil in toto orbe reperiri valeat, quod illum vel comprimant, vel extinguat: *Aquæ multæ* (inquit Salomon) *non poterant extinguere charitatem nec flumina obruent illam.* Nimirum debilis nimium illa charitas esset, quam vel quivis venti afflatus, vel modica aquarum eluvies, penitus consopiret. Ille planè insignis amor censendus est, qui non ventis tantum, aut brevi decurrentibus rivis, sed magnis etiam fluminibus hoc est immensis adyersitatibus sciat resistere.

*Amor inter adversa invictus.*



*Amer mortis  
imitator.*

Nec mirum talem eundem amorem cum morte ibidem in comparisonem venire: *Fortis ut mors dilectio*: Certè enim imbellis illa esset, quam quivis adversarius sterneret, vel quodvis terreret periculum: Imò & illa ipsa, quæ leviores nonnisi assultus vinceret, minores hostes triumpharet. Mortis igitur adinstar nostra sit dilectio, cui videlicet nihil supersit terrificum, nihil indomitum, nihil insuperabile: juxta illud: *Omnia vincit amor*. Et si alia mortis adjuncta excusserimus: uti mors totum sibi hominem ita vendicat, ut homini hominem non relinquat, imò nihil etiam hominis: pariter quoq; Amor DEI non alius esto, quàm qui amantem ita totum in DEUM rapiat: ut de illo verificetur illud Augustini: *Talis quisq; est qualis ejus dilectio. Terram diligis? terra es: DEVM diligis? quid dicam? DEVS es*. Non illa de morte memoro: quod hominem à carissimis quibusq; avellat, ad omnia reddat insensibilem, denudet omnibus: ac nihil etiam de carne tandem relinquat ac patiatur: cum & hæc omnia veri atq; eximii amoris sint. Utiq; enim Jonatas quoq; ob amorem Davidis expoliaverat se cunctis usq; ad balteum.

Si verò

Si verò pari cum auro pretio Amorem alimandus? advertite, qualem hunc DEUS à nobis Apoc: 3. requirat? *Suadeo tibi emere aurum ignitum.* Ubi juxta Richardum aliosq; charitatem intellige, & eam quidem non quamcunq; sed ad auri ipsius pretium ascendentem, illamq; ignitam probatam, hoc est (ut ait Cornelius) *puram, ab omni defecatam Hypocrisi & scoriis cupiditatis; insuperq; ardentem & ferventem.* Et talis omnino nostra Charitas esto, si volumus esse non vulgarem: ac etiam talis de quali Cant. 8. *Si dederit homo omnem substantiam domus suæ pro dilectione, quasi nihil despiciet eam.* Ira scilicet qui velit amare DEUM, necesse est vilescant ei omnia.

*Amor defecatus.*

Tali, hoc est non vulgari charitate non dubium ardere illi Seraphim, de quibus Isaia 6. *Seraphim stabant, sex alæ uni, duabus alis velabant faciem, duabus pedes & duabus volabant.* Quid est stare & volare simul? Quid incompossibilius quam statio cum volatu? At verò sunt, qui hoc loco non volatum, sed potius quoddam pennarum quasi flabelli remigium & motum, refrigerandi gratiâ concitatum, intelligunt. Tantum ardere videlicet grandi amoris

*Amoris incendium.*

*Sanchez  
apud Corn: d  
Lapid:*

divini incendio Seraphim : ut eodem alarum  
 suarum remigio ab eo æstu refrigerari indige-  
 rent. Non aliter quàm Seraphico nostro Ado-  
 lescenti B. Stanislao Koslka evenit, qui eo amo-  
 ris DEI ardore corripiebatur, ut hic ardor lyn-  
 teo aquis immerso pectoriq; appresso tempera-  
 ri deberet.

*Amer in sum-  
 mo suam ce-  
 nuitatem et  
 rubescens.*

*Claudius  
 Aquaviva in  
 Epist. Renov.*

Quod autem ad velamen faciei indu-  
 ctum ? *Duabus* (inquit) *alis velabant faciem* ?  
 Sunt quoq; qui affirmant dictos Seraphim suas-  
 met proprias facies vultusq; velasse idq; ob ru-  
 borem, quod non eum quem par erat DEO  
 Amorem impenderint. Hinc dicuntur non  
 tantum stetisse, sed volasse etiam : Eo scilicet  
 amoris impendio non contenti : nequaquam in  
 eo subsistentes, altiùs in Amorem DEI evolare  
 decreverunt. Et si Seraphicus ipse DEI amor  
 rubori est, quod non ad eam quæ decet hosce  
 spiritus excellentiam & intensionem in eis ele-  
 vetur : Quanto nos suffundi rubore oporteret,  
 quod hic idem DEI amor tam in nobis pusillus  
 sit : ac proinde ut grandescat, eniti.

*Amoris am-  
 latio.*

Grandescat inquam ad eam mensuram,  
 in quam apud Salomonem in Canticis assurrexit.  
 Triplicis ibi Turris fit mentio. Primæ, cui as-  
 simila-



similitum Sponsæ collum: *Sicut turris David  
 collum tuum*: Secundæ, cui assimilatus ejusdem  
 Sponsæ Nasus. *Nasus tuus sicut Turris Libani*.  
 Tertiæ, cui assimilata ubera: Uti de se Sponsa:  
*Ubera mea sicut turris*. Quid vero per hanc  
 triplicem turrim congruentius intelliges? quàm  
 per primam, Fidem: Solius utiq; colli & non  
 capitis ibidem cum turri assimilatio: quid  
 enim fidei ad intellectionem ad persuasibilia hu-  
 manæ Sapientiæ ad caput? Per secundam, Spem;  
 quæ scilicet odoratur futuram mercedem &  
 præmium: *Curremus inquit in odorem un-  
 guentorum*. Per tertiam tandem, Charitatem;  
 utiq; enim inter ubera, interpectus & cor, amo-  
 ris sedes. Et hæc certè Charitas si DEO digna  
 esse velit, non qualitercunq; , non adinstar cu-  
 juscunq; Domus seu Palatii, sed potius adinstar  
 Turris cellissimæ ipsiq; coelo conterminæ assur-  
 gat necesse est: ita, ut etiam sicut turres ordina-  
 riè omnia quæcunq; suâ altitudine superant ædi-  
 ficia, pariter quisquis DEI non vulgaris amator  
 est, ultra alios quoscunq; amore DEI ejusdem  
 ferri velit. Idq; exemplo S. Theressæ, quæ  
 dicere solita; se utcunq; passuram, si in aliis  
 virtutibus superaretur à quocunq; : jam in  
 amore.

apud Hyac.  
Liberium.

amore DEI; nequaquam ulli palmam se velle concedere. Aut certè adinstar duorum illorum Hispanorum Heroum ( de quibus Hispana Historia ) quorum cum unus Fernandez Vasco, in bello contra Mauros in medios irruisset hostes, eoq; processisset, quo processurum sperabat neminem, atq; in tentorio hostili schedam appendisset cum ea inscriptione: *Huc pervenit Fernandez Vasco*: Alter per æmulationem facto validiori in hostem impetu, ultra adhuc processit, chartamq; cum eo scripto affixit: *Huc non pervenit Fernandez Vasco*. Et profectò eò nobis quoq; in DEI Charitate procedendum, eò perveniendum, aut eò saltem votis omnibus collimandum: quò nemo nos in eadem charitate præveniat, nemo nobis anteciat, ac præcurrat.

Amor magnus  
rerum  
operativus.

Quamquam parum est illam esse nescio quantum excellentem & sublimem; nisi sit simul magnarum ac insignium rerum operativa: minimèq; otiosa. Hinc Sponsus se, suiq; amorem ac memoriam non cordi tantum Sponsæ, sed brachio etiã ad operandum valido & robusto imprimi voluit: *Pone me ( inquit ) ut signaculum super cor tuum ut signaculum super brachium tuum*. Sanctus autem

autem Gregorius convenientissimè ad nostrum  
propositum ait : *Nunquam est amor DEI otio-  
sus ; operatur magna si est ; si operari renuit,  
amor non est.*

Imò Heroicum quoq; esse non modicè ne-  
cesse est. Quali scilicet arsit Abraham DEO  
immolaturus filium Isaac. *Ipsè verò* ( inquit  
Sacer textus ) *portabat in manibus ignem &  
gladium.* Ignis quippe Charitatis parum pro-  
ficit absq; gladio , quo omnia etiam charissima  
ac æstimatissima DEO immolentur : ut auden-  
ter illud pronuntiari possit : *DEus meus &  
omnia , amo te super omnia.* Tali quoq; cha-  
ritate arsere Martyres , qui vitam & sangui-  
nem divino consecrârunt amorì. Quo enim  
alio amore summa DEI Bonitas , nisi tali hoc  
est maximo , maximè operativo & heroico  
digna est ?

AMOR HE-  
ROICUS.


Neq; verò nobis etiam dissimili exæstuan-  
dum incendio , si tot heròum asseclæ esse contem-  
derimus. Exæstuandum inquam præter alia su-  
pra memorata usq; ad omnium terrenorum ca-  
rissimorum etiam ob DEI amorem contem-  
ptum usq; ad omnium gravissimorum toleran-  
tiam , usq; ad jacturam vitæ , usq; ad mortem &  
K k k sangui-



sanguinem. Et si tanto taliq; amore arserimus; certò illum Regem virtutum omnium, eoq; regno ac throno non indignum in nobis, met ipsis comprobabimus: nosq; ipsi vel sic in Olympum supremæ eluctabimur Sanctitatis.

F I N I S.





# MATERIÆ CONCIONUM PRO DIEBUS DOMINICIS & FESTIS

Ex

Singulis Adhortationibus desumptæ  
Et iisdem Concionibus applicatæ additis nonnullis  
ultra positas supra, probationibus.

## A D H O R T A T I O PRÆLIMINARIS. Pag: 12.

**P**rimo potest servire pro Concione Dominicæ 4tæ  
post Epiphaniam, prævio Themate: *Quid timidi  
estis modicæ fidei?* Exordium ab eo duci posset. Nem-  
pè quod vita humana sit velut quoddam mare: venti  
sunt tentationes diaboli & quæcunq; adversa; motus,  
& fluctus, sunt passionēs & habitus pravi, motusq; car-  
nis inordinati, pusillanimitates innatæ &c. Et hi tales  
fluctus deterrent nos ab obsequio DEI. Quid igitur  
K k k adver.

adversus hæc remedii ? certè hîc non alio magis quàm magno animo opus est.

Secundo potest servire pro Concione Dominicæ seu 12. seu 17. post Pentecosten, præmissio Themate: *Diliges Dominum DEVM Tuum ex toto Corde tuo.* Exordium ab eo duci posset; Quod scilicet non frustra Deus jubetur ex corde diligi: Ex una enim parte cor ad dilectionem pertinet, estq; amoris sedes; unde quisquis diligitur, non ore sed corde diligendus est. Ex parte altera quisquis Deum intendit sincerè diligere ad magna pro ejusdem DEI amore agenda & toleranda paratus sit necesse, & quia in his non pauci pusilli animi sunt: hinc etiam hîc magno animo opus.

Tertio pro Concione Dominicæ primæ Adventus: ubi post prædictas à Christo graves admodum tribulationes totius mundi, illud ejusdem Christi: *His fieri incipientibus, respicite & levate Capita vestra*, quod ipsum pro Themate assumendum, exordio ab eo ducto: Quis nam tanti in eo rerum statu animi inveniri posset, qui auderet tunc sive Caput, sive oculum sursum attollere? nisi quod ad justos & electos ea Christi vox: ad quos certe pertinet, ut ad omnia quæcunq; terribilia magno animo sint.

Quarto pro Festo SS. Apostoli Petri & Pauli assumpto Themate: *Porte inferi non prævalerunt*: Exordium: En



En quanti insultus adversus SS. Apostolos insurrecturi erant? Cum & ipsæ portæ inferi adversus eosdem armandæ suamq; potentiam exerturæ erant. Quo igitur hic animo opus erat? certè non parvo: uti omnibus quoq; viris apostolicis. Nec alio sed magno admodum hodierni etiam SS. Apostoli fuere animo.

Hæc vero etiam eadem materia tractari potest in Festis aliorum quorumcunq; Apostolorum. Uti in Festo S. Matthæi Christum ad unam vocem: *Sequere me*, illico sequentis totq; & tanta relinquentis, nec extimescentis hæc & tanta, quæ illum in servitio Christi expectabant, seu sequebantur. Proinde facilis conjectura, quanto animo erat?

Pariter in Festo S. Andreæ non tantum retia, sed quæcunq; alia relinquentis ac similiter sequentis Christum magno quoq; animo ad omnia.

Item in Festo Sanctorum Simonis & Judæ, ex occasione Evangelii, in quo Christus prædixit discipulis persecutiones & odia mundi: ad quod certè magno etiam animo opus. Nec defacto defuit hic animus SS. Duobus his Apostolis.

Item in Festo S. Matthiæ ex occasione assumpti Theomatis: *Venite ad me omnes qui laboratis & onerati estis, & ego reficiam vos.* Quæ vero hanc refectionem antecedunt? non alia scilicet, quàm labores, onera, eaq; omnis

generis gravissima. Unde & hæc magnum animum exigentia. Nec caruit illo sanctus Matthias.

Item in Festo SS. Philippi & Jacobi, ex occasione Thematis : *Non turbetur cor vestrum.* Sed quomodo non turbandum erat ad tot & tanta ingruentia quibus ipse Hercules animus turbaretur. Verum non tale Sanctorum Apostolorum cor erat, quod quacunq; turbatione concuti & frangi posset ; cum illi defacto magno admodum & invicto animo fuerint : ut mox patebit.

Item in Festo S. Bartholomæi ex occasione assumpti Thematis : *Elegit 12 ex ipsis quos & Apostolos nominavit.* Qui vero tituli, qui honores, quæ Privilegia, qui proventus, hos electos manebant ? certè non alii, quàm proventus laborum, incommodorum, periculorum persecutionum &c. Quo igitur animo tales electi esse debebant ? non dubium quia valdè grandi. Uti patuit in S. Bartholomæo.

Item pro Festo S. Francisci Xaverii ex occasione Thematis : *Euntes in mundum universum prædicate Evangelium :* Ubi ô quot itinera ! proinde quot labores, fatigationes, incommoda, pericula in terra, pericula in mari, &c. Quali igitur hinc animo S. Franciscus Xaverius ?

PARTIS

# PARTIS Primæ.

## ADHORTATIO I. Pag: 23.

**P**rimo potest servire pro Concione Dominicæ stæ post Pentecosten Thema. *Nisi abundaverit justitia vestra plus quàm scribarum, & Phariseorum non intra- bitis in Regnum Cælorum.* Exordium potest duci ab eo: quanta erat justitia & sanctitas in veteri Testamen- to, Scribarum & Phariseorum, qui ab omnibus pro san- ctis habebantur. Quod etiam patuit in illo Phariseo Evangelico suas justitias enumerante (Lucæ 18.) *Deus gratias ago tibi quia non sum sicut cæteri raptores, &c. Jejunio bis in Sabbato, &c.* Ubi quàm laudabilia omnia, imò laudabilissima si sola abfuisset jactantia. Quid igitur Christus abundantiorẽ à nobis justitiã requirit? nempe ea est legis novæ obligatio, ea ratio vocationis ad Fidem Catholicam, ut nos non qualicunq; , sed superabundanti justitia & virtute contentos esse velit. Jam reliqua omnia, quæ de vocatione Religiosa tractan- tur, vocationi ad legem novam seu Fidem Christianam præsertim Catholicam per Comparisonem, cum lege veteri ac etiam cum quacunq; alia fide accommodanda. Sic per Discipulos cum Christo ad montem ascendentes



intelligendo ad Fidem Catholicam vocatos; per turbam & multitudinem copiosam plebis, infideles quoscunq;. Item per sponsum cujus crura Columnis marmoreis, super bases aureas fundatis assimilata, pariter intelligendo fideles per Fidem veram Christo desponsatos. Item per Virgam Mosaicam intelligendo quoq; sive Judæos sive quoscunq; à fide vera alienos. Tandemq; & alia similiter applicanda.

Secundo potest servire pro Concionibus aliquorum saltem Festorum præsertim SS. Confessorum ex assumpto convenienti Themate: hoc ipsum deducendo: quod hic vel hic sanctus, sit sanctus non vulgaris, v.g. assumpto hoc Themate - *Et vos similes hominibus*. Ac si scilicet hoc aliis quibuscunq; sanctis conveniret: huic autem in particulari v.g. S. Benedicto, Dominico, S. Casimiro, B. Stanislao, B. Aloysio Gonzaga, B. Joanni Francisco Regis &c. nequaquam.

Item assumpto Themate: *Nolite timere pusillus grex*. Ac si scilicet alii quicunq; ad gregem pusillorum pertinerent. Hic autem vel hic sanctus v. g. B. Joannes Cantius, aut alius quicunq; nullatenus.

Item *Revelasti ea parvulis*. Ex una parte hunc vel hunc sanctum v.g. S. Franciscum Seraphicum deducendo fuisse parvulum, parvulum scilicet in oculis mundi parvulum, id est humilem &c. Ex altera parte minimè parvulum ex quo eximiè non vulgariter sanctum.

Hæc eadem propositio totaq; hujus adhortationis materia, facile applicari posset sancto Thomæ Aquinati Bonaventuræ, S. P. Ignatio, S. Francisco Xaverio, & Borgia, sancto Hyacintho & quibuscunq; sanctis Confessoribus declarando illos ex vi assumpti cujuscunq; ad id proportionati thematis non vulgariter sanctos.

Imò hæc ipsa materia quadraret etiam sanctis Virginibus sc̃i non Virginibus v. g. in laudem S. Theresiæ, S. Claræ, S. Magdalenæ de Pazzis, S. Hedvigis, S. Francisæ, idem ipsum argumentis similibus comprobando : quòd hæc, vel hæc fuerit non vulgariter sancta.

## ADHORTATIO II. Pag: 34.

**P**OSSET accommodari Festo Circumcisionis Christi, illud deducendo : quod vel eo ipso annos nostros ex quo Christi nomine insignitos decet esse admodum sanctos. Atq; ita decet esse cum Davidico Lapide turris Carneæ ( sic illū Goliath S. Chrysost: appellat ) id est Carnalium appetituum imò ipsius mundi, carnis, diaboli, triumphatores. Decet cum manipulo Josephi ex vitiis consurgere, assurgere in studium virtutum, stare constanter in eodem studio : cum Michæle Archangelo pro Deo se opponere : cum 1404. millibus immaculatè vivere : cum Abrahamo ambulare coram DEO, & perfectum esse.

esse. Huc potest accommodari ille apud Zachariam Prophetam cap. 3. *JESVS Sacerdos indutus sordidis vestibus.* De quo illud Angeli : *Auferte vestimenta sordida ab eo :* Nec enim decebat sub tanto nomine talibus eum vestiri : proindeq; novum annum, non aliud decet, quam exuere omnia vetera eaq; sordida, & induere nova.

### ADHORTATIO III. Pag: 45.

**A**ccommodabitur imprimis aliquibus Dominicis. Uti Dominicæ 3tæ post Epiphaniam: ubi in Evangelio de Centurione tam excellentis, quam ipse etiam Christus dilaudat, virtutis : assumpto v.g. Themate : *Non inveni tantam fidem in Israël.* Nec vero solâ fidem (quod ipsum in exordio tractari potest) sed etiam tot alias virtutes : interq; alia humilitatem & quas apud alium Evangelistam scilicet S. Lucam enumerant Seniores Israëliti, pro eo instantes ad Christum : *Diligit inquit gentem nostram & Synagogam ipse edificavit nobis.* Unde verò tantæ virtutes? audiamus quid de se idem Centurio dicat? *Habens sub me milites :* ac si diceret : se habuisse tot animas suæ curæ demandatas : Hinc erui potest ea propositio: quantæ Virtutis esse debeant, qui sub sua habent potestate & jurisdictione tot animas, quarum salutis



salutis cura illis incumbit : nempe cura salutis domesticorum ac subditorum. Ubi pro argumento illud quoque ex Amos Propheta cap. 7. afferri poterit : *Eccē Dominus stans super murum litum & in manu ejus trulla camentarii.* Certè enim uti cuicunque eo altiori loco standum est, quò sublimiorem alieno commodo educit fabricam, ita pariter illi qui spirituale in aliis construit ædificium non in humili sanctimonia consistendum; uti & illis qui in aliorum animabus & conscientiis rimas & fissuras obliniunt, ruinas reparant. Eo spectat illud Isaia cap. 2. *Et erit præparatus mons Domus Domini in vertice montium, & elevabitur super colles, & fluent ad eum omnes gentes.* Verum quis audit, quòd cunque sursum & non deorsum ad montis fastigium, & non ad declive fluxisse. Nisi quod hic eximie supra alios longè elevata sanctitatis montem intelligimus, qui quò assurgit altius, eò plures quasi vi magnetica sursum attrahit.

Idem ipsum non minus facili negotio applicari potest Dominicæ vigesimæ post Pentecosten in cujus Evangelio legitur de Regulo : *Cujus filius infirmabatur Capharnaum* : de quo ipso dicitur, quod *credidit ipse & Domus ejus tota.* Nec fides tantum, sed etiam aliæ virtutes in eodem Evangelio referuntur præsertim humiliatio sui coram Christo : unde hoc deduci potest : quantæ virtutis quisque esse debeat, qui domesticis aliisque, sive ad

LII fidem

fidem sive ad alias virtutes doctrinā & exemplo præluceat & quidem efficaciter.

Idem vero etiam accommodari potest Festis saltem aliquibus, sive Apostolorum, sive Pontificum ac Episcoporum v.g. Festo S. Martini assumpto Themate: *Nemo accendit lucernam & ponit eam sub modio, &c.* intelligendo in exordio per Lucernam positam super candelabrum, Episcopos & quoscunq; alios, qui uti dignitate, ita & virtute aliis præluce debent. Taliūq; virtus debet esse præ illis aliis insignior & excellentior: hocq; ipsum in prima parte Concionis tractandum; in secunda autem facienda apodosis ad S. Martinum per enumerationem ejus virtutum.

Nec dissimiliter in Festo S. Nicolai procedendum assumpto pariter apto ex Evangelio Themate: v.g. *Homo peregrinè proficiscens, vocavit servos & tradidit illis bona sua.* Quis verò iste homo? si non quisq; Episcopus, aut quicunq; alius, qui bona non temporalia sed spiritualia tenetur suppeditare sibi subjectis. Proinde ut ea suppeditet aliis, ipse debet iisdem abundare, abundare inquam excellentibus præ aliis virtutibus, meritis, donis. Hocq; ipsum uti prius elucidandum positum in exhortatione præfata, argumentis: & tandem ad virtutes & merita S. Nicolai descendendum.

Ita pariter in Festo S. Adalberti vel Stanislai, assumpto Themate: *Ego sum Pastor bonus*. An verò quomodocunq; bonus? minime! sed certè suis ovibus melior. Pastorum utiq; animarum longè insignior esse debet virtus quàm quorumcunq; aliorum. Et hoc ipsum in Concione tractandum, cum apodofi ad sanctos Pastores, sive Adalbertum sive Stanislaum.

## ADHORTATIO I V. Pag. 57.

**P**Oterit servire pro Dominica 16. post Pentecosten assumpto hoc Themate: *Observabant eum*. Tractando in Exordio: quantos quisq; sui habeat observatores. Contra quos nullum efficacius remedium quàm virtus excellens & exactissima rerum omnium ad virtutem spectantium, observatio. Ad cujus elucidationem præter posita in ea adhortatione posset addi ex adhortatione sequenti illud, quod ibidem de quodam qui adversus hostem cum Clypeo CrySTALLINO processit.

Pariter eadem materia accommodari potest Dominicæ Passionis, posito hoc Themate: *Quis ex vobis arguet me de peccato*: An non vero, fuere tot, qui poterant arguere? & arguissent defacto si habuissent, quod argueretur. Adversus utiq; tales, scilicet quoscunq; Zoilos nihil efficacius, quàm excellentia in nullo culpabilis, in omnibus laudabilis sanctimonix.



Quamquam in Festis aliquibus hæc eadem materia usui esse potest, v. g. in Festo S. Stanislai ex occasione hujus Thematis: *Ego sum Pastor bonus*: Cur tamen ea bonitas tot invenit persecutores, uti etiam Boleslaum Regem? Nisi quod nihil potuerit intrinsecata & excellenti bonitati obicere. Hæc utiq; talis bonitas nullos ocores & adversarios timet. Hinc facienda apodosis ad tot & tanta adversa: quæ S. Stanislauus pertulit, absq; ullo in sanctitate sua & fama nocumento, imò cum augmento utriusq; insigni.

## ADHORTATIO V. Pag. 70.

**A** Commodari potest Concioni pro Dominica sexagesimæ ex occasione hujus Thematis: *Aliud cecidit inter spinas*. In exordio tractando mundum esse plenum spinis. Præter verò alias tot spinas, sunt tot occasiones peccandi, tot diaboli suggestiones, à quibus non raro etiam optimum semen rationale miserè suffocatur. Quid igitur adversus has tales spinas, scilicet peccandi occasiones remedii & præsidii? certè non aliud quàm excellens virtus. Hocq; ipsum argumentis, in ea exhortatione positis comprobandum. Assumpto etiam illo textu Psalmi: *Si dormitis inter medios clericos: pennæ columbæ de argentata, posteriora dorsæ ejus in pallore auri.*

Aliqui

Aliqui apud Lorinum legunt: *si versemini inter medios*  
*cacabos & ollas fuliginosas &c.* Ubi defacto nè turpis  
 veniat coinquinatio, columbam sublimis & excellentis  
 volatûs, nec vilioris pretii, ab auro scilicet & argento  
 mutuati esse oportet.

Non minus commoda hujus ipsius foret applicatio  
 Concioni pro Dominica 3tia post Pentecosten, ex oc-  
 casione Thematis: *Erant appropinquantibus ad JESVM*  
*publicani & peccatores.* An verò cum talibus conversa-  
 tio vel minimo Christi sanctitatem infecit nævo? Mi-  
 nimè! nam non ea sanctitas fuit, quæ infici posset.  
 Proinde in hominibus etiam vitam similem Christo,  
 nempe vitam activam colentibus, similis quantum fieri  
 potest pro ratione conditionis humanæ, requiritur.

Hæc quoq; ipsa materia assumi potest pro Festo S.  
 Casimiri, ex occasione v. g. hujus Thematis: *Et vos*  
*similes hominibus.* Quid vero simile hominibus in S.  
 Casimiro? an similis puritas conscientiæ, devotio, & alia,  
 præsertim verò amor Castitatis virginæ: Et hic inter  
 tot occasiones, & illicita peccandi, in quibus sanctus  
 Casimirus versabatur. Quanquam in hoc ipso certè  
 S. Casimiri excellens admodum comprobatur sanctitas,  
 in hoc ejus eximia laus, quod inter tot, & tanta non  
 corruerit, sed intaminatus perseveraverit. Quod  
 ipsum declarandum locis scripturæ, aliq; eruditione,

in ea Exhortatione posita. Potest quoq; addi illud Canticorum de sponsa : *Sicut Liliū inter spinas, sic Amica mea inter filias Adæ.* Pariter quoq; de Sponso, *sicut malus inter ligna sylvarum, sic dilectus meus inter filios.*

Item illud Moyſis: *Vadam & videbo visionem hanc magnam.* Hæc autem visio non alia erat: quàm quod rubus arderet nec combureretur: de quo Philo: *ex medio rubi promicabat forma quædam pulcherrima nulli visibili similis.* Ubi enī inter spinas & tribulos quibus rubus abundat talis pulchritudo! Item illud de Messeniis apud Pausaniam: *Messenii trecentos ferme annos à Spartanis eiekti, Peloponeso errantes, patrios tamen ritus constantissime retinuerunt & Doricam linguam nil prorsus immutarunt.* Nec alius Casimirus inter tot occasiones peccandi.

## ADHORTATIO VI. Pag. 81.

**P**Rimo potest assumi pro materia Concionis pro Dominica sta post Pentecosten. Ubi illud Christi in Evangelio *Dictum est antiquis* ex una parte discurrendo in Exordio ad quam multa præ antiquis nos posteri obligati sumus, & quidem non paucis titulis; interim tamen non minus etiam multa sunt, quæ iisdem antiquis



quis debemus : idq; illud inter cætera non modicum, quòd illorum exempla ad omnia nobis eximia ac potissimum ad insignem sanctitatem pro motivo sint.

Secundo serviet pro Festo Omnium Sanctorum: assumpto Themate : *Merces vestra copiosa est in Cælis.* Verum quibus viis ad eam deveniendum ? nempe non aliis quàm viis eorum Sanctorum, quorum festum hodie celebramus. Certe enim Ecclesia inter alios fines hoc festum instituit, etiam propter hunc finem, ut habentes in conspectu gloriam Sanctorum, simul quoq; habeamus in oculis vias, vestigia, & exempla eorundem quibus & nos insistamus strenuè. Ad hæc igitur in præsens exempla ac vestigia, ut pote ad efficacissimum motivum oculos convertamus. Ubi præter posita in ea adhortatione, addi posset illud quod de Labeone Antistrio Gellius lib. 13. cap. 12. Ita scilicet illum legum atq; morum populi Romani tenacem fuisse : *ut ratum pensumq; nihil haberet, nisi quod justum sanctumq; esse in Romanis antiquitatibus legisset.*

## ADHORTATIO VII. Pag. 96.

**S**erviet pro Dominica 8va post Pentecosten. Prævio Themate : *Filii hujus sæculi prudentiores filiis lucis :* Qui verò hi filii lucis ? certè non alii quàm vera

vera in primis fide tum etiam specialibus DEI Gratiis & donis sive naturalibus sive supernaturalibus illuminati. Jam *fili Seculi*, iidemq; filii tenebrarum; sunt Ethnici, Judæi, Hæretici, in tenebris suæ infidelitatis existentes; tum etiam quicunq; de plebe rudes carentes eâ luce quâ alii gaudent, in tenebris suæ ruditatis ac ignorantia, quasi sepulti. Ex his ergo omnibus uti justus nobis ita illuminatis pudor, & confusio, ita efficax stimulus qui nos ad meliora permoveat. Ad hanc vero tractandam materiam assumendi loci scripturæ sacræ, & quæcunq; alia in adhortatione posita, exaggerando peculiariter quidnam ex parte una præstiterint ac præstent gentiles, Turcæ, Judæi, Hæretici, sive in suorum idolorum, sive in Dei gratiam? in gratiam suæ legis, fidei, seu potius infidelitatis: quid præstent rudes in DEI obsequio: ex altera nos, eâ tantâ luce pollentes ac proinde *Filii lucis*.

Potest quoq; hujus ipsius adhortationis materia usui esse pro Festo SS. Trium Martyrum Japonensium nostræ Societatis. Ut facile consideranti patebit.

## ADHORTATIO VIII. Pag. 108.

**F**acile accommodabitur Dominicæ septuagesimæ tum & huic Themati: *Portavimus pondus diei & estus*: Propter verò quid? propter unum denarium. Et

Et inde quoq; rubor noster est, quod tot & tanta laborant & patiantur homines modico lucro: neq; nos similia propter DEUM lucraq; æterna. Hocq; ipsum est; quod nos ad eximia quæq; in virtute & sanctitate præstanda & sufferenda stimulare deberet: Hujus vero ipsius argumenta à prædicta adhortatione petenda. Quibus illud Hortulam addi posset ex Evangelio Lucæ 13. de arbore infructuosa in ordine ad hoc, ut fructus pareret: *Fodiam inquit circa illam & mittam stercora.* Quo enim arbores etiam rationales efficacius adjuvantur ad proferendos insigniorum virtutum & operum fructus, quàm admotione stercoreum, id est statuitione nobis præ oculis profanorum quorumcunq; exemplorum ac ipsorum sæcularium mundo & vanitati militantium hominum. Quid namq; illi omniaq; illorum opera ac labores, imò mundana quæcunq;, circa quæ versantur quàm stercorei simillima, imò stercus ipsum. Uti in Psalmo: *Facti sunt ut stercus terræ.* Threnorum autem 4to: *amplexati sunt stercora.* Hinc Apostolus gentium: *Omnia arbitror ut stercora, ut Christum lucrifaciam.* Ecce tamen hoc etiam stercore excellens fovetur sanctimonia, & ad insignia merita promovetur: de hoc stercore DEUS erigit pauperem, ut collocet eum cum principibus populi sui. Pauperem utiq; virtute.

Potest quoq; eadem materia applicari Dominicæ 12.

M m m

post



post Pentecosten ex occasione hominis ascendentis de Jerusalem in Jericho, & incidentis in latrones, expoliati vulnerati &c. En quid hic pertulit passusq; est, non propter Jerusalem, sed propter Jericho quæ juxta Isidorum *Lunam, Luna vero Mundum significat.* Et hoc ipsum est, quod nos ad magna pro DEO & virtute agenda & toleranda stimulare deberet; scilicet quod homines tot & tanta pro mundo & mundanis agant & tolerant.

Par discursus pro Dominica 4ta post Pentecosten institui potest, ex occasione responsi S. Petri in Evangelio: *Tota nocte laborantes nihil cœpimus.* En quantum hi & propter quid laborarunt? hinc vero nobis & pudor & stimulus ad agendum laborandum patiendumq; propter DEUM.

## ADHORTATIO IX. Pag: 118.

**P**Otest adhiberi ad usum Dominicæ 2dæ Quadragesimæ ex occasione ascensus Christi in montem Thabor resplendentisq; ejus faciei ad instar solis, vestimentorum alborum per modum nivis: tandemq; vocis Paternæ: *Hic est Filius meus dilectus in quo mihi bene complacui.* Et si hic ascensus talisq; transfiguratio ac splendor Christi eam vocem Patris Æterni provocavit: Certe similis.

similis quoq; DEI in iis complacentia, qui per imitationem ejusdem Christi culmen sanctimonix prestantes, similes splendores spirituales, scilicet excellentes virtutes induunt. Hocq; ipsum locis in exhortatione eadem exhibitis dilucidandum; eoq; ipso svadendum virtutis ejusmodi studium, quod sibi DEUS in eo complaceat.

Eadem quoq; materia in Festo Sanctissimæ Trinitatis assumi potest, idq; ex occasione textûs Evangelici: *Estote misericordes sicut & Pater vester misericors est.* Ubi en quantam nobis Christus imperat sublimitatem virtutis. Præsertim cum alibi idem Christus: *Estote perfecti sicut & Pater vester cælestis perfectus.* Nec vero talis quodammodo æmulatio DEO Patri ac toti Sanctissimæ Triadi ingrata: sed imò (uti patebit) gratissima.

Idem vero etiam ipsum non difficulter transformari potest pro Festis quorumcunq; sanctorum, vel sanctarum, asserendo in propositione, illos, vel illas eximium Divini aspectûs & complacentiæ delectamentum: idq; deducendo ex studio excellentiorum virtutum, quod in illis elucebat. Talis v. g. S. Antonius, S. Tereſia aut S. Stephanus, ex occasione ipsiusmet de se annuntiantis: *Ecce video Cælos apertos, & JESVM stantem:* ut scilicet idem Christus tam grato in eodem S. Stephano frueretur spectaculo.

## ADHORTATIO X. Pag: 128.

**V**Alebit pro Dominica 8va post Pentecosten: ex occasione fletus Christi super Civitatem Jerusalem, simulq; indignationis super eandem: ex quo cum tot experta fuisset DEI beneficia, tot habuisset opportuna auxilia ad serviendum DEO eumq; amandum, ita ut præ aliis omnibus DEUM colere eumq; omni obsequio & amore prosequi debuisset; hoc tamen neglexit. Nec minor eos indignatio & pœna manet, qui simili neglectu inter paria aut majora Divina auxilia laborant.

Similiter ejus adhortationis materia applicari congruè potest Concioni Dominicæ 19. post Pentecosten: ejusq; Themati: *Amice quomodo huc intraſti non habens vestem nuptialem, ligatis manibus & pedibus proiicite eum* &c. Per hominem Evangelicum intelligendo Dei indignationibus & beneficiis cumulatum, ac velut inter amicos intimæ admiſſionis connumeratum, eumq; ordinariâ nonniſi plebeiâq; virtute contentum: cum DEUS in talibus multum ſibi diſpliceat: per vestem nuptialem accipiendo non virtutem quamcunq; ordinariam, & ut aiunt de feria, ſed magis ſingularem ſolenniorem excellentioremq; præ aliis, cujus neglectus bilem quodammodo in DEO moyet.

ADHOR.




# ADHORTATIO XI. Pag: 139.

**P**Otest valere pro Dominica ista post Pentecosten adductis pro Themate Christi verbis: *Nisi abundaverit justitia vestra plusquam Scribarum & Phariseorum, non intrabitis in Regnum Caelorum.* Nec mirum utiq; Quis enim non advertat, quam tantum præmium iustitiam & Sanctimoniam requirit? hæc q; ipsa ejusdem tanti præmii excellentia deberet esse nobis illicium ad excellentissimam virtutem & sanctimoniam.

Similis quoq; fieri posset ejus adhortationis applicatio pro Concione Dominicæ 19. in supra positum Thema: *Amice quomodo huc intraisti non habens vestem nuptialem*: Per nuptias ac nuptiale triclinium intelligendo Coelum; quod non cuivis virtuti pater, sed excellentem omnino requirit.

Potest insuper eadem ejusdem adhortationis Materia assumi pro Concione in Festo SS. Omnium ex occasione sumpti Thematis: *Merces vestra copiosa est in Cælis.* Et quia copiosa? certe non modicam virtutem requirens. Et hæc ipsa talis merces cælestis, deberet esse nobis pro motivo ad copiosam virtutem & merita.





# PARS SECUNDA

Hujusq; Partis secundæ

## ADHORTATIO I. Pag. 152.

**L**ocum habere potest FERIA 3<sup>ta</sup> Paschatis : assumpto pro Concione Themate ex Evangelio ejus Diei : *Quid turbati estis & cogitationes ascendunt in Corda vestra ?* Hoc ipsum tractando in Exordio ; quod scilicet duo notanda sint , in prædicto Themate : primum turbatio Discipulorum , ex Adventu insperato Resurgentis Christi ; & hæc minimè laudabilis ; cum potius lætari , exultare , non turbari eos , pro tunc decuisset. Secundum ascensus cogitationum in Corda illorum : & hic licet eo loco non in partem quoq; laudabilem accipiendus esset ; mihi tamen in præsens illud in partem meliorem occurrit ; quod scilicet Resurgente à mortuis Christo , nihil humile nobis cogitandum : non cogitationes tantum , sed affectus etiam omnes sursum ascendant , sursum eleventur oportet. Hic igitur ascensus & elevatio cogitationum , & affectuum nostrorum præsentis nostræ dictionis materia esto. Idq; ipsum argu-

argumentis in ea exhortatione positis dilucidandum,  
ac persuadendum; applicationibus ad Christum Resur-  
gentem identidem factis, assumpto etiam loco illo Deu-  
ter: 32. Ubi Moyses DEUM assimilat Aquilæ pullos  
suos provocanti ad volandum: *Sicut inquit, aquila pro-  
vocans ad volandum pullos suos, & super eos volitans.*  
Quod etiam ipsum Christo Resurgenti à mortuis accom-  
modandum; Uti quoq; à sole ducenda similitudo, quo  
oriens, volatilia ex nidis suis evolant in sublime. Cum  
idem quoq; Sol oriens humores à terra sursum trahat.  
Huc illud Apostoli: *Si consurrexistis cum Christo: quæ  
sursum sunt, querite, quæ sursum sunt sapite, non quæ  
super terram.*

In Festo quoq; Ascensionis Christi ejusdem adhor-  
tationis usus esse poterit.

Pariter Dominica 18. post Pentecosten, ubi illud  
Christi in Evangelio: *Ut quid cogitatis mala in Cordibus  
vestris?* Prævio namq; eo discursu: Quod scilicet va-  
riæ sint in Capitibus & Cordibus hominum, cogitatio-  
nes & affectus etiam: nempe alii boni, alii mali, alii in-  
differentes; alii circa terrena & temporalia, alii circa  
spiritualia & æterna, alii humiles & abjecti, id est circa  
humilia & abjecta occupati: sic præfatus pro Themate  
assumptus Evangelii Textus transformari posset: Ut  
quid non dico mala, non dico indifferentia, &c. hu-  
milia



milia, abjecta, imò mediocria etiam; cogitatis? cū defacto ejus quisq; Generosus Christianus deberet esse animi; ut quæq; sublimia, & excellentia cogitet & velit. Quod ipsum positis in ea exhortatione argumentis comprobandum.

Nec inconvenienter ea ipsa exhortatio in laudem aliquorum saltem Sanctorum transformaretur v. g. in Laudem S. Patris Ignatii, S. Francisci Xaverii, &c. Quasi illi semper sublimium, & excellentium Cogitationum & affectuum fuissent. Hinc illud etiam, S. Ignatii: *Ad M. D. G.* Item S. Francisci Xaverii: *Amplius.* Quanquam & in Laudem S. Augustini Cor flammis sursum ascendentibus ardens in manu gerentis derivari posset; illud de illo enuntiando: quod nihil humile cogitaverit, nihil humile voluerit, &c. Simile quid de Sancta Teresia, &c.

## ADHORTATIO II. Pag. 161.

**A** Commodanda primo Concioni, pro Dominica 3. post Epiphaniā, ex occasione Thematis: *Volo, mundare: & Confestim mundata est lepra.* Ubi certè parum erat velle Christum, si non successisset, opus mundationis. Atq; ita vana sunt omnia etiam Sanctissima desideria & Cogitationes sine successione vel conjunctione operis, Ita

Ita pariter Dominicæ Quinquagesimæ; ex occasione Thematæ assumpti ex Evangelio ejusdem Dominicæ: *Quid tibi vis faciam?* Ubi quoq; cum velle actio Christi conjungitur; ut hinc discamus; nihil quodcunq; velle prodesse, si non succedat operatio: proinde vana virtus in solis cogitationibus ac desideriis etiam, sterilibus.

In Festo quoq; SS. Doctorum hujus ipsius fieri potest commoda applicatio, assumptis pro Themate illis Evangelii verbis: *Qui fecerit & docuerit, hic magnus vocabitur in Regno Cœlorum*: hoc ipsum quasi à contrario per positos in ea adhortatione scripturæ locos declarando, quod hic vel ille S. Doctor non fuerit contentus suæ doctrinæ speciminibus, sed simul ad eximia opera processerit: ad quod etiam confirmandum sumi possunt Sacri loci & textus ex adhortatione sequenti.

### ADHORTATIO III. Pag. 170.

Vsus illius potest esse imprimis pro Dominica prima post Pascha. Ubi illud Christi in Evangelio ad S. Thomam: *Affer manum tuam*: Non satis utiq; erat, ad conversionem Sanctum Thomam utcunq; aspirare; manus afferenda, & admovenda erat. Et sic certè ad virtutis studium manibus seu operibus opus est.

N n n

Idem

Idem Dominica 12. post Pentecosten, ubi illud imprimis Evangelii: *Quid faciendo vitam æternam possidebo?* Nec frustra expressè ponit *ly faciendo*. Non dicit cogitando dicendo. Certe enim non his sed operibus ad consecutionem virtutis, ac etiam vitæ æternæ opus.

Idem eruendum ex hoc ejusdem Evangelii: *Diliges Dominum DEVM tuum ex toto corde tuo, ex tota anima tua & ex omnibus viribus tuis, & ex omni mente tua*. Ubi cur non satis ex corde, ex anima ex mente & quidem totis diligere? ad quid vires omnes? nempe vires extenduntur ad operandum. Et in hoc, scilicet in operando non Amor DEI tantum, sed omnis etiam ratio virtutis consistit.

Inde in Festis quoq; quorumcunq; SS. Doctorum (uti supra innuimus) Panegyris eorundem erui & tractari posset; prævio eodem Concionis Themate: *Qui autem fecerit, & docuerit hic magnus vocabitur in Regno Cælorum*. Proinde hujus etiam vel hujus S. Doctoris inde magnitudo pensanda; quod non magnis tantum doctrinis, sed magnis etiam inclaruerit operibus.

Pari ratione ad laudem cujuscunq; S. Confessoris, id ipsum detorqueretur non difficulter: si v.g. hoc Thema assumeretur: *Sint lucernæ ardentes in manibus vestris*. Ad quod S. Gregorius Papa: *Lucernas quippe ardentes in manibus tenemus, cum per bona opera*  
proxi-



*proximis nostris lucis exempla monstramus.* Nec aliunde hujus vel hujus sancti splendor quàm ex hisce & quidem non qualibuscunq; , sed eximiis operibus elucet.

## ADHORTATIO IV. Pag. 181.

**P**rimo pro Dominica 2da post Epiphaniam potest sup-  
 peditare materiam ex occasione Christi Invitati ad  
 nuptias cum Discipulis *Vocatus* ( inquit Evangelium )  
*JESVS & Discipuli ejus ad nuptias :* Quid vero ibi-  
 dem egit, & quomodo se gessit idem Christus pariterq;,  
 Discipuli ? certe nihil egere extraordinarium , præter  
 patratum à Christo miraculum in mutatione aquæ in vi-  
 num : assederunt mensis, sumentes cibum & potum ;  
 vacarunt mutuis colloquiis , ut alii convivæ. Et quid  
 tamen in eo ipso præ aliis habuere ? nempe non aliud,  
 quàm excellentiorem præ his aliis agendi & se in omni-  
 bus gerendi modum ? certe enim in hoc ipso excellen-  
 tia virtutis , ordinaria & aliis communia , non ordinariè  
 nec communiter peragere.

Secundo suppeditabit materiam pro Concione Do-  
 minicæ Septuagesimæ , ex occasione Thematis , ex  
 Evangelio desumpti : *Pares illos nobis fecisti.* Quid  
 verò illos pares effecit ? cum idem quidem egerint , sed  
 minori temporis spatio. Non aliud quàm modus ope-

randi laboriosior, accuratior intensior &c. Et hoc certe coram DEO nostras actiones, licet cum aliis communes facit extraordinarias & digniores, amplioris apud eundem DEUM pretii & mercedis.

Hæc eadem materia assumi potest pro Festo B. Aloysii Gonzaga, B. Stanislai Kostka ex occasione Thematibus: *Sint lucernæ ardentes*. Unde vero tantopere illuxere? unde has accendere lucernas? num à splendidis ab eximiis, raris admodum extraordinariis, quibusque actionibus? minime? ordinariæ utique & communes non ordinariè tamen nec communiter obitæ id effecere actiones. Et inde eorum laus & splendor Panegyricus.

## ADHORTATIO V. Pag. 198.

**H**Anc sibi vendicat Dominica 6ta post Epiphaniam: cujus Evangelium: *De Regno Cœlorum. Grano Synapis*, assimilato: de hoc grano Christus in eodem Evangelio: *Minimum quidem est omnibus seminibus, cum autem creverit, majus est omnibus oleribus, Et fit arbor, &c.* Hocque ipsum assume pro Themate: In Exordio autem breviter circa hoc discurre: quod Christus adeo magnam rem imò maximam, quia ipsum Regnum Cœlorum assimilavit eidem Grano. Si enim per idem Regnum intelligitur Cœlum Empyreum: quantæ id oro magni-

magnitudinis ? ex quo DEI ipsius ac tot Angelorum totq; sanctorum possessio & locus ? Quodsi Ecclesia militans juxta sanctum Gregorium Papam ? quanta ejus quoq; amplitudo ; ex quo hæc per totum orbem diffusa, & ex tot statibus hominum composita. Jam tu quid eidem grano assimilare voles ? certè non aliud, quàm , ut pote minimo, minimum : declarando in quantam molem meriti & præmii, nostra minima ex parte virtutis sese tenentia excrescant. Præstoloq; sunt hujus ipsius in ea exhortatione posita documenta.

Pari modo id ipsum Dominica 3tia post Pascha tractari potest : occasione sumpta ex illo Evangelii : *Modicum & videbitis me.* Quod enim modicum, usq; ad visionem ipsius Christi, in quem desiderant Angeli prospicere nos ducit ? cerre non aliud, quàm quod nos minimè æstimamus, imò contemnimus, pro vili pulvisculo, imò atomo reputamus; scilicet quævis minima ex parte virtutis sese tenentia, quæ nobis uti magnum meritorum aggregatum, ita eximium præmium comparant, & pariunt. Et hoc idem tractandum amplius argumentum, juxta ea quæ in hac exhortatione ponuntur.

## ADHORTATIO VI. Pag. 210.

**H**Æc quoq; Adhortatio Concioni non unius Dominicæ aut Festi accommodari potest. Uti impri-



mis Concioni Dominicæ imæ Adventus. Ubi illud Evangelii : *Tunc videbunt Filium hominis venientem in nube cum potestate magna & Majestate.* Qualis verò adhunc ejus adventum præparatio. Certe non alia quàm per sanctitatem sine ullo defectu ac nævo. Hæc enim omnino excellens & digna DEI conspectu sanctitas.

Item Concioni Dominicæ Passionis, ubi Christus in Evangelio ad turbas Judæorum : *Quis ex vobis arguet me de peccato ?* Neq; hoc admiratione dignum, quod talia de se Christus prolocutus, qui neq; minimo quidem delicto subiacere potuit, tam secundum Divinam quam humanam naturam. Hoc potius insolitum, si quispiam hominum ita innocenter viveret : ut quid simile de se proloqui posset. Et certe tamen pro modulo nostro, nobis etiam fragilibus hominibus, hoc quoq; ipsum curare incumberet, ut sinè defectu nævoq; vivere possimus.

Eadem materia pro Concione Dominicæ stæ post Epiphaniam assumi potest, ubi Evangelium de superseminatis tritico Zizaniis : præmisso Themate : *Nonne bonum semen seminasti ? unde ergo habet zizania ?* Et quia servi Evangelici de hoc cum quadam admiratione interrogârunt ? certe illi ipsi admiratione digni : quod talia scilicet mirati, quæ ordinarie contingunt : dùm optimum semen in terram jacitur, interim tamen tot vitio;

vitiosæ herbæ & gramina intra triticum aut quodcunq; aliud frumentum enascuntur. Hoc igitur potius admiratione dignius foret, si triticum ita purum esset, ut omni penitus vel minima non tantum zizaniorum, sed etiam cujuscunq; herbæ & graminis admistione careret. Idem de rationali tritico de homine nimirum cogita: enuntiando eam planè raram esse & excellentem hominis virtutem, quæ ad hoc enititur; ut vivat sine nævo.

Par campus utendi eadem adhortatione Dominica 4ta post Pascha: ubi in Evangelio de spiritu sancto: *Arguet mundum de peccato & de justitia.* Ut ergo eam arguitionem nostra quoq; non mereatur justitia, procul sit ab omni nævo.

Nec vero dissonum esset, idem ipsum S. Joanni Baptistæ aut B. Aloysio Gonzaga in Laudem eorum applicare: in hoc ipso magnitudinem sanctimonix illorum, statuendo: præsertim in quadam impotentia peccandi: ubi illud ex Apostoli Petri Epistola adduci posset: *Charissimi deponentes omnem malitiam, & omnem dolum, & simulationes, & omnes detractiones: sicut modo geniti infantes.* Quæ autem potentia peccandi actualiter in modò genito infante? Ad talem impotentiam visus est aspirasse Apostolus & Doctor gentium, cum exclamaret: *Quis me liberabit de corpore mortis hujus? De corpore inquam peccabili, obnoxio peccatis.* Idq; ipsum forsitan

forſitan aſſecutus cū diceret. *Vivo ego jam non ego: vivit verò in me Chriſtus.* Ac ſi ſcilicet ſeipſum & naturam peccabilem exuiſſet. Uti alibi etiam aliis quibuscunq; ſvaſit: *Exuentes* (inquiens) *veterem hominem.* Quid enim magis facit impeccabilem, quàm ipſum etiam exuendo hominem induendo autem aut Chriſtum aut ſaltem Angelum. Uti idem Apoſtolus ad Corint: *Induimini Dominum JESVM Chriſtum,* aut quod de S. Joanne Baptiſta: *Ecce ego mitto Angelum meum ante faciem tuam.* Talisq; Aloyſius, ita ut Angelici Adoleſcentis mereretur vocabulum.

Uti etiam in Laudem S. Martini Epifcopi idem tractari poſſet, ex occaſione Thematis: ex Evangelio aſſumpti: *Si oculus tuus fuerit ſimplex, totum Corpus lucidum erit.* Et in hoc ipſo Laus S. Martini, quod ita totus illuxerit; ut nihil umbræ, nihil noxæ ac nævi habuerit. Hinc adſtanti Satanam moriturus allocutus eſt: *Quid adſtas cruenta beſtia, nihil in me ſueſti reperies.*

## ADHORTATIO VII. Pag. 226.

**P**Oteſt imprimis accommodari Dominicæ imæ Quadregimæ ſumpto Themate ex ejus Evangelio: *Ductus eſt JESVS à ſpiritu in deſertum ut tentaretur à diabolo.*



240

473

*diabolo.* Unde in Exordio id tractandum: quod prædictum desertum non jejunii tantum locus fuit, sed simul etiam præliaris arena; ita ut hic se Christus planè Herodém exhibuerit. Quot enim hic actus heroicis exercuit, sive in relinquenda domo Nazareth, sive in adeunda præfata eremo, sive in jejunando tam rigidè aliisq; macerationibus sanctissimi Corporis sui, sive in depugnando cum Satana &c. Idq; ideo ut vel hoc ipso, suo nobis prælucet exemplo: ut ejus imitatione similes nos in vita Christiana per insignes mundi Carnis Diaboli ac nostri quoq; victorias exhibeamus herodés. Et hoc certe ipsum eximæ virtutis est, nempe heroicis actibus inclarescere.

Potest idem ipsum non incongruè tractari Dominica 3tia Quadragesimæ ex vi sumpti Thematis. *Fortis armatus custodit atrium suum.* Per fortem armatum intelligendo quemcunq; virum heroicum, per atrium domumq; ejus propriam, sensus corporis ac potentias animæ, imò ipsum Corpus & animam. Unde vero hujus atrii, domusq; efficacior custodia, imò in omnem virtutem ac merita sui proVectio? si non ab heroicis actibus.

Potest insuper eadem adhortatio in Laudem quoq; cujuscunq; sancti, qui per heroica opera ac virtutes inclaruit, detorqueri: v. g. in laudem sancti Francisci

Xaverii, applicatione facta argumentorum in ea adhortatione positorum, ad actiones in vita ipsius expressas: non quemcunq; illum ex vulgaribus sanctis esse, sed plane insignem herodem proclamando: prævio v. g. Themate: *Euntes in mundum universum.*

Idem quoq; in Festo S. Ignatii de Loiola post exactam mundanam militiam ad Diviniorem transeuntis, & plane se herodem exhibentis longè majorem.

## ADHORTATIO VIII. Pag. 238.

**P**Rimo prodesse potest pro Dominica Septuagesimæ. Ex occasione Thematis: *An oculus tuus nequam est, quia ego bonus sum?* Per oculum intellige intentionem, quæ si non recta est; omnia etiam in se eximia depravat. Uti horum operariorum grandes admodum labores ac tolerantias diei & æstus pessumdedit: eo quod eosdem propter lucrum temporale, propter unum subiêre denarium. Si autem eadem intentio recta? hæc certè etsi in se viliora, insigniter nobilitat, & ad excellens pretium & proemium elevat, cum non modico virtutis & sanctimonix accremento.

Inde quoq; pro Concione Dominicæ Quinquagesimæ sumi posset impetus, ex hoc Themate: *Domine ut videam.* Si enim per oculum intentio (ut diximus) depo-

denotatur: certe hoc nostrum peculiare intentum esse deberet ut videamus, ad quem scopum hæc dirigenda esset? Inde utiq; omnium nostrarum actionum, ac etiam præsentium Bacchi hilaritatum, recreationum, epularum, imò ipsius Christianæ virtutis non leve condimentum.

Potissimum verò hujus ejusdem adhortationis materia quadrat Concioni in Festo S. Martini; ac etiam Themati ex Evangelio sumpto: *Si oculus tuus simplex fuerit, totum Corpus tuum lucidum erit.* In eo vim ponendo: quod idem sanctus oculum suum, id est intentionem non ad terrena ac temporalia quæcunq; sed rectà ad supremum scopum ipsumq; præcipuè DEUM dirigebat. Inde virtutis ejus & sanctimonix non modica sublimitas & excellentia.

Simile quid de B. Aloysio Gonzaga intus operante, aut de sancto Ignatio Lojola *Ad M. D. G.* dirigente omnia.

## ADHORTATIO IX. Pag: 248.

**F**ACILI negotio applicabitur Dominicæ 19. post Pentecosten: cujus Evangelium de Rege exhibente nuptias filio suo. Ex hoc Evangelio sumi potest Thema Concionis: *Rex autem cum audisset iratus est.* Nec tamen per hoc Rex esse desiit. Non enim eò illum pas-



sio iræ deduxit, ut serviliter se ab illa subjugari pateretur. Cum irascebatur, etiam tunc Rex fuit, sub potestate ac Dominio suas passiones & motus quoscunq; continens. Et certe id ipsum Regem illum, etsi aliunde Rex non fuisset, constituit, Regem inquam virtutis excellentissimæ. Hæc enim defacto, scilicet Princeps & plane Regia virtus in perfecto passionum Dominio consistit.

Pari ratione hujus adhortationis fiet accommodatio Dominicæ 21. post Pentecosten: cujus Evangelium de homine Rege ponente rationem cum servis suis. Ex quo Thema Concionis haberi potest: *Iratus Dominus ejus tradidit eum tortoribus.* Et cum iratus; non amplius Rex nominatur. An non ideo quod passioni iræ succumbens Regis titulum quodammodo amisisse visus? Profecto enim si Rex ab eximia pensandus virtute, illum ipsum supremum ac legitimum Regem, quia eximiæ possessorem virtutis, nuncupabimus: qui non tantum non novit passionibus succumbere, sed imò perfecto eorum gaudere Dominio.

Multò verò commodiùs materia ejus adhortationis Dominicæ 4tæ post Epiphaniam, servire potest: cujus Evangelium de Christo ascendente cum Discipulis in naviculam & motu magno facto in mari, eoq; à Christo composito. Porro homines mirati sunt: qualis est hic,

*hic, quia venti & mare obediunt ei.* Et hoc ipsum haberi potest pro Themate: Quid enim per ventos, motus maris, fluctus & procellas intelligimus, quam passionibus indomitas, quæ naviculam mentis concutiunt & non raro submergunt. Ille igitur non vulgaris animi ac virtutis censendus est, qui hosce motus & fluctus passionum novit comprimere, ac sub potestate & Dominio habere; ita ut illi etiam acclamari possit *qualis est hic.*

Forſitan autem quoq; non aliena foret hæc materia à Feſto S. Caſimiri, quem Dominium Paſſionum, ac præcipuè concupiſcentiæ plane Regem, quia eximiæ poſſeſſorem virtutis & ſanctimonix effecit.

## ADHORTATIO X. Pag: 260.

**L**ocus & uſus hujus adhortationis eſſe poteſt: Dominica 2da Quadrageſimæ. Ubi Evangelium de Chriſto in montem excelſum aſcendente ac tranſfigurato, de reſplendente ejus facie ad inſtar ſolis, veſtimentis factis ſicut nix &c. Non ſatis illi erat aſcendiſſe in montem, non ſatis quomodocunq; tranſfiguratum fuiſſe; tot ultra ſplendores & ornamenta quibus totus à facie ad pedes uſq; tegetetur, aſſumere debuit; ut eam de ſe Patris æterni vocem audiret. *Hic eſt Filius meus di-*

*lectus*: Inde vero patet, quantis & nobis virtutum inclarescendum ornamentis ac splendoribus; ut DEI dilectionem & complacentiam mereamur. Parum scilicet est unius & alterius virtutis veluti quandam assuere laciniam; omnigeno earundem virtutum ornatu velut ampliore toga contegendum corpus & anima. Et hoc ipsum argumentis in ea exhortatione positis enucleandū.

Eandem materiam adhibe Dominica 5. post Pentecosten in illud Thematis: *Nisi abundaverit iustitia vestra plusquam scribarum Ec.* In quo autem debet abundare hæc iustitia? certe non est hæc abundantia: unā scilicet & alterā gaudere virtute; pluribus imò omnibus opus est; ut plenē abundes. Et in hoc excellentia virtutis.

Poteris quoq; eam ipsam adhortationem adhibere pro Dominica 4. Adventus præfixo Concioni Themate: *Parate vias Domini, rectas facite semitas ejus.* Ergo ne ad Adventum Christi solæ viæ ac semitæ parandæ? minime! imò si viæ tantā parandæ diligentia, quantus nobis ipsis apparatus, apparatus inquam virtutum providendus? Hic verò non alius, quàm omnium virtutum. Ea namq; excellens dignaq; DEO sanctitas, quæ omni virtutum genere resplendet.

Sicubi verò, certe in Festis Sanctarum Virginum & non Virginum materia hujus adhortationis tractari potest, in laudem earundem v. g. sumpto Themate:

*Orna-*



*Ornaverunt lampades suas.* Ad quid verò ornatus hic lampadum? cur non potius de ornatu ipsarum Virginum agitur? Quanquam de hoc etiam minor difficultas; si ornatus interior, ornatus spiritualis, ornatus virtutum adfuerit. Et hoc ipso si quispiam, vel quæpiam, certe S. Catharina, vel S. Agnes, Agatha &c. eoq; omnigeno splendebat eximiè.

Non difficilis quoq; hujus ipsius accommodatio S. Annæ, S. Magdalænæ, S. Hedvigi sumptis convenientibus sive ex Evangelio, sive aliunde Thematibus.

Imò ex hac eadem ipsa materia laus plurium Sanctorum Confessorum sumi posset v.g. posito hoc Themate: *Sint lumbi vestri præcincti & lucerne ardentes in manibus.* Verùm totus ne hic legitimorum Christi servorum ornatus? minime! nempe si quos certe illos ornatu omnigeno, ornatu inquam virtutum decet conspicuos. Talisq; de facto hic vel hic sanctus Confessor.

Idem erui posset, ex illo Evangelii: *Ecce nos reliquimus omnia.* Omnia inquam terrena ac temporalia. Quantis verò in loco eorum servi DEI spiritualibus abundant divitiis. Profectò sicut omnia illa propter DEUM relinquunt atq; contemunt; ita pariter satagunt; ut omnium spiritualium divitiarum, virtutum scilicet & donorum DEI possessionem capiant. Hæc enim nobilissima ac ditissima sanctitas; quæ talibus divitiis

divitiis iisq; quantum fieri potest omnibus abundat. Sic dives ac opulentus post relicta omnia S. Benedictus Bernardus Franciscus Borgias &c.

## ADHORTATIO XI. Pag: 268.

**V**Ti plures alia, ita & hæc adhortatio correspondet Dominicæ 5tæ post Pentecosten: præsertim sumpto ex Evangelio ipsius Themate: *Nisi abundaverit iustitia vestra &c.* In quo verò hæc abundantia? certe imò in possessione non unius & alterius, sed plurium imò omnium virtutum. Et quia & hoc non satis; proinde adhuc in possessione etiam gradus supremi in omni virtute. Et ad hoc cuiq; Christiano, cui inest studium & amor virtutis in abundantia, connitendum. Idq; adinstar Magni Constantini ( teste Nicephoro ) qui dum dimensionem Constantinopolitanæ urbis quàm ædificaturus erat faceret, longiusq; quàm par videbatur procederet, monitus à quopiam è suis ut gradum sisteret: respondit: se eo usq; processurum donec staret ille, qui ante se irer. Nec enim aliter in via quoq; virtutis procedendum. Ad eum scilicet gradum & terminum, tendendum nobis, quem Christus nobismet præcurrens suo designavit vestigio ac exemplo.

Nec aliena esse poterit à materia Concionis Dominicæ 4tæ post Pascha: ubi illud de Spiritu Sancto ex  
Evange-

Evangelio: *Arguet mundum de peccato & de justitia.*  
 Nec mirum arguendum ab ipso mundum de peccato:  
 Quid verò arguere deberet in justitia? si justitia, si vir-  
 tus est? imò si pro complexo virtutum sumitur? Lau-  
 dem potius non arguitionem meretur. Nisi quod hoc  
 ipsum complexum non raro soleat aliquo laborare defe-  
 ctu, defectu inquam saltem altioris v. g. præter admi-  
 ssionem aliorum defectuum quorumcunq; in hac vel illa  
 virtute gradûs. Hæc autem sola excellens justitia, hæc  
 sola virtus & sanctitas perfecta, nec arguitioni Sancti Spi-  
 ritus ulla ratione subjacens; quæ absq; hoc etiam defe-  
 ctu, quæ non tantum omnis virtutis, sed etiam supre-  
 mi in omni virtute gradûs possessrix.

Item à Dominica II. post Pentecosten: ubi illud de  
 Christo: *Bene omnia fecit*: Non contentus utiq; omnia  
 fecisse, id etiam insuper præstitit; ut benè imò optimè  
 in supremo gradu faceret: Et in hoc ipso studium servo-  
 rum quoq; DEI elucere deberet: Nempe ut non tan-  
 tum in possessionem omnium virtutum incumbant: sed  
 ut etiam supremum earum gradum obtineant.

Nec id ipsum alienum à Dominica 16. post Penteco-  
 sten: sumpto ad id impetu ex illo Evangelii textu: *Ami-  
 ce ascende superius.* Persvadendo ut non simus conten-  
 ti omnibus etiam virtutibus; sed ad supremos etiam il-  
 larum gradus contendamus.



In hoc pariter laus plerorumq; Sanctorum & San-  
ctarum statui posset; scilicet v.g. S. Benedicti S. Ber-  
nardi, S. Ignatii S. Tereſiæ, S. Magdalene de Pazzis,  
B. Aloyſii Gonzaga, S. Catharinæ Senenſis, &c.

## ADHORTATIO XII. Pag. 275.

**S**erviet pro Dominica prima poſt Epiphaniam. Ubi  
illud Evangelii : *JESVS proficiebat ſapientiã &  
etate & gratia apud DEVM & homines.* Neq; hic la-  
tis fuit Chriſto, profeciſſe Sapienciã; proficiebat inſu-  
per & ſanctitate inſigni, quã gratiam apud DEVM  
merebatur : & hoc ipſum ſupremæ eſt laudis ac virtutis,  
eandem virtutem cum doctrina & Sapiencia conjungere.

Inde laus quoq; ſanctorum Doctorem quorum-  
cunq; ſumi poteſt : ex occasione Thematis : *Qui autem  
fecerit & docuerit, hic magnus vocabitur in Regno Cœ-  
lorum.* Non minus quoq; laus S. Ignatii Lojola Literas  
cum virtute conjungentis. Item ſancti Joannis Can-  
tii, S. Catharinæ, &c.

## ADHORTATIO XIII. Pag. 289.

**A**dhiberi poteſt pro Concione Dominicæ primæ poſt  
Epiphaniam. Ubi illud Evangelii de Chriſto :  
*Descendit cum eis, & venit Nazareth, & erat ſubdi-*

*rus illis.* Adde verò quod ibidem usq; ad annos 30. latuerit & velut sub umbra manserit: hocq; ipsum eximiae virtutis & laudis, suae sanctitati & talentis umbram quærere, cum illis latere.

Item pro Concione Dominicæ primæ Quadragesimæ; Ubi *ductus est JESVS in desertum.* Ductus inquam non tantum ut ibi jejunaret, sed ut etiam lateret.

Item pro Concione Dominicæ secundæ Quadragesimæ. Ubi illud Evangelii: *Nubes lucida obumbravit eos.* Obumbravit inquam inprimis Christum splendentem facie adinstar solis, tum Apostolos Coelesti luce circumfusus. Nec illis hæc umbra nocuit; cum à nube lucida procederet. Ita scilicet maximis etiam splendoribus umbra vel maxima, non tantum non officit: sed imò luci lucem majorem addit. Ita ut hic quoq; locum habeat, quod apud Prophetam: *Et tenebræ tuæ erunt sicut meridies:* Uti pariter sub alia licet allegoria, de Sponsa in Canticis: *Quæ est ista quæ ascendit per desertum, sicut virgula fumi ex aromatibus myrrhæ, & thuris, & universi pulveris pigmentarii:* Ubi in deserti umbra, quantos diffudit odores: dumq; latere voluit, in oculos & admirationem ipsorum Coelitum incurrit.

Item pro Concione Dominicæ tertiæ post Pascha ex illo Evangelii: *Modicum & non videbitis me.* Hoc autem de se Christus dicit, quasi post cortinam aliquam

procederet, ac se subduceret vel se conderet intra umbram. Audiamus verò quid sequitur? *Et iterum modicum & videbitis me.* Videbitis inquam splendidum gloriosum &c. Qualis in Resurrectione apparuit. Sic enim est umbra, quæ non tam obscurat, quàm potius illustrat magis.

Item pro Concione Dominicæ 23. post Pentecosten: ubi Christus in Evangelio iussit ut turba aliq; tunc præfentes recederent; idq; ut lateret eos suscitatio à mortuis puellæ; sicq; Salvator velut intra umbram suam virtutem reconderet. Idcirco quoq; ibidem ad adstantes dixit: *Non est mortua puella, sed dormit.* Verùm latuitne per hoc à Christo patratum miraculum? minimè: sed imò fama ejus per orbem & secula propagata. Hæc nempe est proprietas virtutis latere volentis, quærentisq; umbram; ut non tantum latere non possit, sed imò ex eadem umbra lucem & gloriam colligat.

Item pro Concione Dominicæ ultimæ, post Pentecosten. Ubi illud Evangelii: *Sol obscurabitur, luna non dabit lumen suum.* Et licet ibi omnia iubente DEO & pereunte mundo. Interim tamen ab his discendum Principibus planetis, quomodo quisq; suarum virtutum splendoribus, umbram quærere debeat vel inde illustrior.

Item pro Concione in Festo B. Aloysii Gonzaga de quo illud S. Magdalenæ de Pazzis: *O quantam gloriam*



*riam habet Aloysius, quia intus operabatur.* Sumpto ad id impetu, ex Evangelio: Ubi nocturna in secunda & tertia usq; vigilia servorum DEI beatificantur obsequia. Et dum illi ita se intra noctem condunt; eò illustriores evadunt, dùm supra cæteros Beati proclamantur, traditisq; in manus suas illustrantur lucernis. *Sint* (inquit Evangelium) *lucernæ ardentes in manibus, &c.* Nec aliunde Beati Aloysii Gonzaga splendor. Cui plane illud Esaïæ convenit: *Erumpet quasi mane lumen tuum.* Utiq; enim matutinum lumen cum nocturna umbra conjungitur, aut eandem consequitur. Præsertim cùm B. Aloysius nondum mane ætatis fuerit prætergressus.

Id quoq; in Festis S. Benedicti, S. Bernardi, S. Francisci Borgiæ aliorumq; non minus congruè in laudem ipsorum afferri posset, utpotè magnis suis virtutibus ac splendoribus umbram quærentium.

## ADHORTATIO XIV. Pag. 299.

**A**pplicanda imprimis Dominicæ Septuagesimæ & Sexagesimæ: Ubi in Evangelio: labores diurnos operariorum in vinea merces, exultam laboriosè terram, & injectam in illam sementem fructus centesimus consecutus.

P p p 3 Item

Item Dominicæ quartæ post Pentecosten. Ubi illud in Evangelio S. Petrus ad Christum : *Per totam noctem laborantes nihil cepimus : in verbo autem tuo laxabo rete.* Quam ad laborandum alacritatem post tot exactos nocturnos labores, quantâ illi piscium multitudine idem Christus rependit ? & certe illa virtus DEO multum grata magnisq; gratiis & lucris rependitur, quæ laboriosa.

Pariter Dominicæ sextæ post Pentecosten. Ubi Christus : quatuor hominum millia septem panibus refecit. Ad quod S. Ambrosius Episcopus : *Sed quibus impertiatur, (id est alimentum) adverte : non otiosis &c.* Sed laboriosis utiq; : ac si parum fuisset cum Christo tot dies persistere, ejus sanctissimis alloquiis frui, dulces ejus sermones auribus excipere. Hæc namq; DEI donis ac beneficiis digna, hæc excellens sanctitas, quæ laboribus innutrita.

Non omittendum hic Festum S. Isidori : in cujus laudem hoc etiam ipsum assumi potest.

## ADHORTATIO XV. Pag. 311.

### Prima Pars hujus Adhortationis.

**V** Sui esse poterit pro Dominica tertia Adventus, ubi in Evangelio de S. Joanne omnium Prærogativarum & plausuum ac sui ipsius contemptore. Item

Item pro Dominica prima Quadragesimæ. Ubi Satan Christo: *Ostendit omnia Regna, & gloriam eorum.* Et hoc totum idem Christus contempsit.

Item pro Dominica quarta Quadragesimæ. Ubi in Evangelio de Christo: *Jesus cum cognovisset, quia venturi essent, ut raperent eum, & facerent eum Regem, fugit iterum in montem solus.* En contemptus Mundi & Regni.

Item pro Dominica Palmarum. Ubi Christo in ingressu urbis Jerusalem tanquam egregio mundi contemptori tam cæsi de arboribus rami, quam vestimenta infra pedes sternebantur in via. Et hic ipse contemptus Regem illum exhibuit virtutis & gloriæ. Uti de illo ibidem in Evangelio ex Propheta: *Ecce Rex Tuus venit tibi mansuetus.*

Item pro Festo S. Francisci Assisinate, ex occasione Thematis sumpti ex Evangelio: *Omnia mihi tradita sunt a Patre.* Quod dum Christus de se prolocutus, idem de semetipso S. Franciscus proloqui posset. Dum enim ille omnia mundana contemnit & proculcat, ecce quæ & quanta in locum eorum recipit! videamus verò hunc tam insignem omnium contemptorem, hujusq; contemptus lucra & præmia.

Item pro Festo S. Francisci Borgiæ sumpto Themate: *Ecce nos reliquimus omnia.* Pro Festo S. Benedicti, S. Bernardi, S. Rochi &c. Pro quorum Festis idem Evangelium.



gelium legitur : de quibus illud consonè pronuntiari potest : Quod illos contemptus mundi ac terrenorum omnium ad insignem sanctimoniam & dona DEI eximia præmiumq; cælesse extulerit.

### Secunda Pars.

Pro Dominica quarta post Epiphaniam, ubi JESUS in Evangelio, fluctuante Mari dormiebat, velut sonoros fluctus contemnens. Quod ipsum ad contemptum lingvarum applicandum.

Item pro Dominica tertia Quadragesimæ : pro Dominica Passionis : Pro Dominica tertia post Pentecosten : Dominica 22. Ubi in Evangelio lingvas suas exerebant Pharisei, & alii adversus Christum. Nec tamen ille his & tantis aut deterrebat, aut vel minimum arcebat à sanctissimis operibus contemnens omnia.

Quamquam horum etiam omnium ad S. Ignatium de Lojola insignem lingvarum contemptorem, in laudem ipsius facilis applicatio : præsertim ex occasione hujus Thematis : *Dignus est operarius mercede sua : Quâ verò illa ? An non de qua Ecclesiæ 51. Dedit mihi Dominus linguam mercedem meam.* Lingvas utiq; persecutrices S. Ignatius non tantum non timuit, sed imò etiam ipsas pro insigni mercede eximiorum suorum operum reputavit. Et hinc ultra in laude S. Ignatii progrediendum, juxta posita in ea adhortatione.

PARS



# PARS TERTIA

## ADHORTATIO I.

Pag. 324.

### De Zelo Animarum.

**P**rimo potest valere pro Dominica quinta post Epiphaniam. Ubi in Evangelio de servis Patrisfamilias accingentibus se ad colligenda zizania: *visimus & colligimus*, &c. Et quamvis interim non acceptaverit Paterfamilias, id obsequii: certe laudabilis hæc eorum alacritas. Utinam verò similis in nobis zelus esset, tum ad expurgandam sive vitiis, sive hæresibus Ecclesiam, Civitates, Regna, &c. Domosq; etiam privatas, tum ad propagandum ubiq; triticum: id est Fidem ac virtutem Christianam. Hunc igitur talem zelum & quidem numeris omnibus absolutum viris præsertim Ecclesiasticis ac etiam quibuscunq; zelosis Christianis conabor svadere in præsens.

Secundo pro Dominica Septuagesimæ. Ubi de Patrefamilias conducente operarios ad laborandum circa vineam. Et quoniam per hanc intelligimus Eccle-

siam: Ideo de hoc agendum: Qualesnam illa operarios requirat, cujus animi, zeli, & laboris?

Tertia pro Dominica Sexagesimæ. Ubi de seminando semen suum, alioq; cadente secus viam, alio super petram, alio inter spinas, alio in terram bonam. Et quia ipse Christus hic intellexit varia hominū genera, ad quos semen id est Verbum DEI dirigitur: ideo nobis agendum de zelo Christiano, quibusnam se debeat impendere quove studio conatu & charitate?

Quarto pro Dominica secunda post Pascha. Ubi de Bono Pastore præter alia de se dicente: *Et alias oves habeo quæ non sunt ex hoc ovili: Et illas oportet me adducere.* Quod autem hic in persona Pastoris de se Christus: hoc idem quisq; zelosus DEI servus de semetipso deberet proloqui: *Oportet me adducere:* tot scilicet erraticas oves sive hæ sint domestici servi, subditi, sive quicunq; fideles, deviantes tamen à via virtutis Christianæ, sive infideles, &c. Et tunc talem zelum, præsertim quibus cura animarum incumbit, conabor persuadere.

Quinto pro Dominica Sanctissimæ Trinitatis: Ubi illud Christi in Evangelio: *Euntes docete omnes gentes.* &c. Certe enim quisq;, si legitimus & genuinus est Sanctissimæ Trinitatis Vnius DEI & Trini cultor, ejus deberet esse zeli, ut omnes quoscunq; ad ejus agnitionem cultum & amorem ducat. De hoc itaq; zelo in-  
præsens: Sexto,



Sexto pro Dominica 2da. post Pentecosten. Vbi in Evangelio de homine faciente cœnam magnam & servo misso ad invitatos : cui præterea dictum : *Exi cito in plateas & vicus civitatis : & pauperes ac debiles & cecos & claudos introduc huc.* Item : *exi in vias & sepes &c.* Et quia per servum hunc talibus instructum mandatis, intelliguntur illi præcipuè, quibus cura animarum demandata, ideo de obligatione eorum & zelo, quo esse erga quoscunq; debeant, tractandum.

Septimo Dominica 3. post Pentecosten. Ubi de appropinquantibus ad Jesum publicanis & peccatoribus, de Pastore quærente ovem perditam, de muliere quærente pariter amissam drachmam : & quidem ingenti studio & sollicitudine. Idq; nobis etiam quibuscunq; & circa quoscunq; maximè domesticos servos subditos præstandum.

Octavo pro Dominica quarta post Pentecosten : ubi de piscatoribus, & S. Petro tota nocte laborante concludenteq; piscium multitudinem copiosam &c. quorum omnium facilis applicatio ad zelum omnibus quidem zelosis Christianis, sed maxime curatoribus animarum circa easdem quascunq; animas exercendum.

Nono pro Dominica 19. post Pentecosten. Ubi de Rege faciente nuptias, Filio suo; & mittente servos ad invitatos, & his nolentibus venire, iterum mittente alios servos &c. Per quos quia facile intelligi possunt

zelatores quicunq; animarum : ideo illis eorumq; zelo  
ea quoq; adhortatio non difficulter accommodari poterit:

Tanto verò facilius Festis Sanctorum Apostolorum  
quorumcunq; ac etiam sancti Francisci Xaverii.

## ADHORTATIO II. Pag. 336.

### De Tribus Religiosis Votis

#### *Punctum Primum*

### De P A U P E R T A T E.

**P**Rimo suggeret materiam pro Concione Dominicæ  
octavæ post Pentecosten. Ubi villicus in Evange-  
lio : *Mendicare erubescō*. An non verò potius erube-  
scere debuit sua malefacta, quàm mendicitatem ac pau-  
periem eamq; honestam ? Quæ si sit voluntaria ac pro-  
pter DEum ; eò nobilior pretiosior atq; locupletior est,  
quò major. Ita ut hic præter posita in adhortatione ar-  
gumenta illud quoq; allegari posset ; quod sponsa de  
sponso in Canticis : *Manus illius tornatiles aureæ, ple-  
næ hyacinthis*. Aliqui legunt : *plenæ paupertate* : Ubi  
pro eodem Paupertas & pretiosi lapides : ita ut hæc etiam  
manus cælestis sponsi exornet, ab illis gestari digna ; cu-  
jus insuper cum Hyacintho ipsi Cælo affinis imago.

Secundo

Secundo pro Concione Dominicæ 14. post Pentecosten. Vbi Christus in Evangelio : *Respicite volatilia Cœli, quoniam non serunt, neq; metunt, neq; congregant in horrea.* Et quia hæc ipsa volatilia sunt Symbola pauperum Christi : hinc eo loco de paupertate deq; ejus lucris, pretio & præmio ad quod evolat, tractandum. Eadem quoq; assumi posset materia, ex occasione Verborum Christi in eodem Evangelio : *Considerate Lilia agri, &c.* quæ pariter non ex uno Capite sunt Symbola paupertatis.

Tertio Constituet Panegyrim S. Francisci Assisinnatis, declarando & exaggerando ejus singularem paupertatem, quæ illum in oculis totius Cœli adeo fecit pretiosum & locupletem.

Pari ratione pro Panegyri aliorum Sanctorum, qui hac virtute excelluerunt, servire poterit. Præsertim in quorum Festis legitur illud Evangelium : *Ecce nos reliquimus omnia.* Vti in Festo v.g. S. Rochi, &c.

*Punctum Secundum*

DE CASTITATE.

Conficiet Concionem pro Dominica secunda Adventus : ubi in Evangelio ex Propheta Christus de sancto Joanne : *Ecce ego mitto Angelum meum ante faciem*



*ciem.* Exponendo excellentiam & privilegia Castitatis, virtutis utiq; Angelicæ.

Item pro Dominica 14. post Pentecosten in illa Evangelii Verba *Considerate Lilia agri*, &c. Symbolum utiq; Castitatis Liliū. Hancq; Castitatem Commendandam suscipimus.

Potissimum tamen adhiberi poterit in Laudem Sanctarum quarumcunq; Virginum v. g. S. Agnetis, Magdalenæ de Pazzis &c. Imò etiam in Laudem S. Casimiri, B. Aloysii Gonzagæ, &c.

*Punctum Tertium.*

## De O B E D I E N T I A.

**C**onficiet Concionem Dominicæ primæ infra Epiphaniam in illud Evangelii de Christo: *Erat subditus illis.* Quo nobis præbuit exemplum obedientiæ, multum insignis. De qua nos in præsens. Expendendo ex eodem Evangelio hæc adjuncta: *Quis, quid, ubi, cur, quomodo, quando.*

Item Dominicæ tertiæ, post Epiphaniam: ubi in Evangelio Centurio ad Christum: *Et ego homo sub potestate constitutus, habens sub me milites: Et dico huic: vade Et vadit. Et alii, veni Et venit, Et servo meo fac, Et facit:* Ex occasione igitur hujus ipsius tractari potest

in

in eadem Concione de obedientia erga DEVM, & erga homines, applicando punctum prædictum eidem materię.

Punctum idem conficiet facile Concionem Dominicę quartę post Epiphaniā: ubi Christo imperante, mare fluctus suos composuit, venti siluerunt: per id erga DEVM suam testati obedientiam: quam & ego hominibus tam erga DEVM quàm erga ipsos homines svadendam suscipio.

Potest idem punctum conficere Concionem Dominicę quartę post Pentecosten. Ubi illud S. Petri ad Christum: *In verbo tuo laxabo rete*: In qua pariter agi posset de subordinatione nostra erga DEVM & homines, in loco DEI existentes.

Potest insuper conficere Concionem pro Dominica 19. post Pentecosten. Vbi in Evangelio de servis missis ad invitatos ad nuptias, & aliquibus ex eis occisis: & hæc plane singularis ad mortem usq; sese resolvens obedientia.

Tandem poterit conficere Panegyrim pro Festo S. Francisci Xaverii, assumptis Evangelii verbis: *Euntes in mundum universum prædicare Evangelium*. Vbi tractandum quomodo S. Franciscus satisfecerit huic mandato: quomodoq; hac in parte paruerit tam Deo quam superioribus iubentibus: quàm excellentis ac insignis fuerit

fuerit obedientiæ in omnibus ; ita ut etiam illud ad amissum impleverit quod S. P. Ignatius de suis ( uti testatur in sua Epistola Gosvinus Nickel nostræ Societatis Generalis ) dicere solitus : nempe uno illos pede stare debere in terra , alterum sursum levare ; quo testentur , se paratos ad quocunq; pergendum ex mandato & nutu superiorum.

### ADHORTATIO III. Pag: 361.

#### De Patientia.

**P**otest conficere Concionem pro Dominica sexta post Epiphaniam de grano Synapis. Vbi idem granum & arbor Synapis potest esse Symbolum patientiæ : ad quem illa gradum, excellentiam, amplitudinem, excrecere debeat. De hocq; ipso eâ Concione dicendum.

Item pro Dominica Sexagesimæ : ubi Christus in Evangelio ; *Hi sunt qui in corde bono & optimo audientes verbum retinent, & fructum afferunt in patientia.* Vnde & hic tractari potest de gradibus & fructibus patientiæ.

Item pro Dominica infra Octavam Ascensionis. Vbi Christus suis Discipulis prædicit ; quas persecutiones toleraturi erant , adhortando illos ad patientiam.

Item pro Festis præsertim quorumcunq; Martyrum v.g. Stephani & aliorum , ac etiam pro Festo Sanctorum



rum Omnium, qui per patientiam Regnum Coelorum  
obtinuerunt: sumpto v. g. hoc Themate: *Beati qui  
persecutionem patiuntur.*

## ADHORTATIO IV. Pag: 375.

### De Humilitate.

**C**ommunicabit materiam Concioni Dominicæ pri-  
mæ Adventus. Vbi illud Christi in Evangelio :  
*Respicite & levate capita vestra.* Imò potius demit-  
tenda, & usq; ad terram prosternenda tunc erunt. Hu-  
militas utiq; quod major, eò sublimioris sanctimonix ma-  
jorisq; in DEI Judicio securitatis fundatrix, magnorum  
lucrorum spiritualium Parens. Prout in illis Psalmi ver-  
bis elucet : *Ponens in Thesauris abyssos.* Certè enim  
primo thesauri quicunq;, sed maxime spirituales, quò  
maiores sunt, eò profundioris humilitatis abyssus indi-  
gent. Deinde quoniam pleriq; legunt : *Ponens Thesau-  
ros in abyssis*, non dubium quod abyssus humilitatis, ad-  
modum magnis ac pretiosis à DEO sibi liberaliter col-  
latis thesauris gaudet. Quanquam apud Salomonem  
etiam regali humilitas indumento splendet, in illo scili-  
cet gradu; quem dum sibi idem Salomon sub pedibus  
sternit, simul purpurâ induit *Ferculum* ( Cant. 3. ) *fecit  
sibi Rex Salomon; ascensum purpureum media Charitate  
constravit.*

R r r

Item

Item Dominicæ tertiæ Adventus: ubi in Evangelio humilitas S Joannis describitur.

Item Dominicæ quartæ Adventus: ubi illud Evangelii: *Omnis mons & collis humiliabitur, omnis vallis implebitur.*

Item Dominicæ primæ post Epiphaniam: ubi illud in Evangelio de Christo: *Erat subditus illis.* Certe ex magna humilitate.

Item Dominicæ tertiæ post Epiphaniam: ubi in Evangelio illud Centurionis: *Domine non sum dignus, ut intres sub tectum meum, &c.* In quo eximia ejusdem Centurionis eluxit humilitas.

Item Dominicæ Sexagesimæ ex occasione Patrisfamilias Seminantis semen, ejusq; seminis cadentis super petram ac etiam in terram bonam; ubi sicut semen super petram cadens, est Symbolum superbiæ; ita semen cadens in terram bonam ibiq; se profunè demittens & sepeliens, ac etiam afferens fructum centesimum est Symbolum humilitatis.

Item Dominicæ quartæ post Pentecosten: ubi illud in Evangelio S. Petri conclusa piscium multitudine: *Exi à me Domine, quia homo peccator sum.* Et certe rara humilitas in affluentia.

Item Dominicæ iomæ post Pentecosten: ubi in Evangelio de publicani humilitate.

Item

Item Dominicæ 21. post Pentecosten: ubi illud de servo decem milliū talentorum debitore: *Procidens autem servus ille orabat dicens: Patientiam habe in me & omnia reddam tibi. Misertus autem Dominus servi illius, dimisit eum & debitum dimisit.* En quanta vis humilitatis humilisq; orationis! ex qua occasione illa tractanda, quæ in ea exhortatione ponuntur de humilitate.

Item Dominicæ 23. post Pentecosten: ubi de Hemorroissa: *Accessit retro, & tetigit simbriam vestimenti ejus:* Idq; ex profunda humilitate.

Præcipue autem locum habere potest in Festo S. Francisci Borgia, qui singulari humilitate inclaruit: sumpto Themate: *Ecce nos reliquimus omnia & secuti sumus te.* Nec difficultas de primo: *Ecce reliquimus omnia.* Palam enim est orbi; S. Franciscum Borgia tot & tanta reliquisse, nec sibi quidquam reservasse. Quo ad secundum autem, nempè: *Secuti sumus te?* hic plus difficultatis. In quo enim S. Borgia secutus & afsecutus quantum fieri potuit Christum? de Christo Apostolus: *Humiliavit semetipsum formam servi accipiens* En igitur S. Franciscus Borgia, huic maxime exemplari institit, ac ipsa humilitate inclaruit eximiè.

Non minus idem ipsum accommodari potest S. Francisco Assisinati, cujus humilitas quò profundior, eò illum altius promovit.



## ADHORTATIO V. Pag. 387.

## De Resignatione in Voluntatem DEI.

**P**Otest attribui Dominicæ tertiæ post Epiphaniam: ubi in Evangelio, leprosus ad Christum: *Domine si vis, potes me mundare.* Unde quis voluntati Divinæ se non committat? cum sit ita efficax ad omnia: quis propriæ voluntati fidat tam inefficaci debili & infirmæ? hoc igitur ipsum suscipiendum, ut svadeatur.

Potest præterea assumi pro Concione Dominicæ sextæ post Epiphaniam: ubi ad Patrem familias servi de colligendis zizaniis: *Visimus & colligimus ea.* In quo non proprio arbitrio, sed sola Patris familias voluntate regi volebant. Et hoc ipsum laudabile, & eximie virtutis, non à proprio arbitrio, sed à solius Divinæ voluntatis nutu pendere in omnibus.

Item poterit valere pro Concione Dominicæ septimæ post Pentecosten. Ubi Christus in Evangelio: *Non omnis qui dicit mihi Domine Dne: intrabit in Regnum Cælorum, sed qui facit voluntatem Patris mei, ipse intrabit in Regnum Cælorum.* Et certe quid nos magis evehit, uti ad summum virtutis & donorum DEI, ita ad sublime præmium, quàm voluntatis nostræ abnegatio, Divinæ subordinatio.

Item

Item servire poterit pro Dominica 14. post Pentecosten : ubi illud Christi in Evangelio : *Nolite solliciti esse dicentes : quid manducabimus, aut quid bibemus, aut quo operiemur ?* Quò igitur in his necessitatibus recurrendum ? certe non aliò quàm ad voluntatem & Providentiam Divinam. Et hic profectò quo ad omnia fortunatus, qui suæ voluntatis abnegans, unius Divinæ voluntatis de se dispositionem prospectat.

Ex occasione quoq; assumpti hujus ex Evangelio Thematis : *Quis vestrum cogitans potest adiciere ad staturam suam cubitum unum ?* ex quo scilicet omnes nostræ staturæ sive Physicæ sive Morales sive Spirituales ac supernaturales à DEI arbitrio & providentiâ pendent. Huicq; ipsi voluntati & providentiæ se suaq; omnia committere optimum est.

Item pro Dominica 18. post Pentecosten : ubi illud Evangelii : *Ascendens JESUS in naviculam transfretavit, & venit in civitatem.* Quæ vero est talis navicula ? qua securè possimus transfretare ipsum mare hujus mundi, omnes ejus fluctus & procellas. Certè non alia melior ; nisi voluntas DEI.

Facilis quoq; hujus adhortationis applicatio in laudem S. Cojetani suum institutum in voluntate & Providentiâ Divina fundantis.

## ADHORTATIO VI. Pag: 399.

De Mortificatione Interna &amp; Externa.

## P A R S P R I M A

De Mortificatione Interna.

**S**erviet pro Dominica tertia Quadragesimæ : ubi in Evangelio illud Christi de Satana & anima hominis iusti: *Cum veneris, invenit eam scopis mundatam & ornata.* Quæ vero illæ scopæ sunt; quibus domus humana, scilicet corpus & anima mundantur? certe non aliæ, quam præter alias mortificatio interna passionum. De qua Psalter: *Scopebam Spiritum meum.* Et hæc certe multum ad ornatum animæ, per cæteras virtutes comparandum conducit: modo sit talis, qualis in ea adhortatione describitur. Talis inquam ( præter ibi posita ) qualem à nobis Sanctus Apostolus requirit: *Exuentes* (inquit) *veterem hominem*: Et hoc est insigniter esse mortificatum, nempe ipsum hominem exuendo. Ad idq; ipsum visus aspirasse idem S. Apostolus cum diceret: *Quis me liberabit de corpore mortis huius?* Hinc illud ejusdem ipsius Apostoli: *Vivò ego jam non ego; vivit vero in me Christus.*

Non



Non minus hæc ipsa materia assumi potest pro Pagnegryri B. Aloysii Gonzagæ & aliorum, qui hac in parte excelluerunt præ aliis.

## PARS SECUNDA.

### De Mortificatione Externa.

**P**RO Concione Dominicæ sextæ post Epiphaniam :  
ubi Regnum Coelorum assimilatur grano Synapis :  
Quid verò per illud intelligi potest ? certe præter alia ,  
mortificatio externa : quæ quò magis in nobis abundat  
& propagatur, ac velut, uti granum Synapis, in arborem  
crescit, tantò promptius virtutes velut volucres Coeli  
ad eam convolant, & in ea securius conquiescunt, tan-  
tò nos ipsos sublimiùs hæc ipsa mortificatio Coelo ad-  
moveret.

Potest quoq; trahi in laudem S. Francisci Borgiæ,  
qui insigni maceratione corporis claruit.

### ADHORTATIO VII. Pag. 414.

#### De Oratione.

**P**OTISSIMUS ejus usus Dominica quinta post Pascha :  
in illud Evangelii : *Petite & accipietis.*

Potest

Potest tamen etiam habere locum Dominica prima post Epiphaniam. Ubi de Christo : *Remansit JESVS in Jerusalem.* Certe verò non per plateas deambulans , lapideas & domos invisens , &c. sed potius in Templo cum DEO Patre versans ; ut ipse de se : *In his quæ Patris mei sunt , oportet me esse :* Nec alibi etiam à parentibus inventus. Idq; ut nobis exemplo suo ad amorem Orationis præluceret : quem ego quoq; auditori suadendum assumo.

Item Dominica prima Quadragesimæ : ubi in Evangelio de Christo : *Ductus est JESVS in desertum à spiritu.* Ibiq; tempus 40. dierum & noctium non tantum jejuniis sed etiam Orationi impendit.


Item Dominica quarta Quadragesimæ : ubi in Evangelio de Christo : *Subiit in montem JESVS , & ibi sedebat cum Discipulis suis :* Partim scilicet illos instruendo partim orando , quod illi erat consuetum ; nempe in montes excurrere ad orandum. Unde etiam cum cognovisset , quia venturi essent ; ut facerent eum Regem , fugit iterum in montem ipse solus : Ubi proculdubio orationi ad Patrem tempus insumpsit.

Item Dominica 9na post Pentecosten : ubi illud Christi in Evangelio : *Domus mea domus orationis est.*

Quæ vero hæc domus DEI & Christi ? certè non tantum Ecclesia , non tantum Domus Religiosa ; sed etiam  
domus

Domus quæcunq; Christiana debet esse domus ejusdem ipsius DEI, adeoq; domus orationis. De hac igitur, oratione & amore illius nobis differendum.

Quanquam in Festo quoq; S. Mariæ Magdalenæ hujus materiæ locus ex occasione assumpti ex Evangelio Thematis: *Vade in pace*. Quo vero vadendum ei erat? nempe præter alia in Massiliam: inde in eremum, in inaccessam rupem. Quid autem ibidem egerit? figamus oculum. Nec verò aliud videbimus, quàm eandem Magdalenam innumeris macerationibus innocens corpusculum affligentem, atq; continuæ orationi & contemplationi immerfam. Quod de se Sponsa Cant. 4. hoc idem Magdalena in rupem prædictam sese expediens: *Vadam ad montem myrrhæ, & ad collem thuris*. Per myrrham mortificationem, per thus orationem intelligimus. Hinc illa coeliturum admiratio: *Quæ est ista, quæ ascendit per desertum sicut virgula fumi ex aromatibus myrrhæ & thuris?* additur vero: *& universi pulveris pigmentarii*: Ex myrrha nempe & thure id est mortificatione & oratione, universitas odoramentorum id est virtutum meritorum & gratiarum divinarum promanat.



S ss

ADHOR-



# ADHORTATIO VIII Pag. 430.


## De Amore DEI.

**H**Æc potissimum pro duabus Dominicis usui esse potest : nempe pro Dominica 12. & 17. post Pentecosten : ubi in Evangelio de diligendo DEO ex toto corde, &c.

Potest etiam servire pro Festo S. Augustini, S. Ignatii de Lojola, S. Philippi Nerii, S. Teresæ, &c. qui insigni DEI amore flagrarunt. Imò etiam in Festo S. Magdalenzæ, de qua illud Christi : *Dilexit multum.*

Hic verò potissimum locum habet illud Apostoli Pauli ad Romanos Cap. 8. *Quis nos separabit à Charitate Christi? Sc. Sc. Certus sum: quia neq. mors, neq. vita, neq. Angeli Sc.* Et in his plane verbis Apostoli genuina amoris erga DEUM heròici descriptio.











300 -  
K

160224

D No 365760

\*KSIEGARNIA\*  
ANTYKWARIAT



D No 365760

\*\*\*\*\*



